

99


*The Gift of
The Associates of
The John Carter Brown Library*

ID 2326

LOT: 168

$\frac{1/12}{15}$

2



Thomæ Cattanei Turrianj.

Adams 655

1^o vol. N^o 4 bianca

2^o vol. - Adams non cita le ultime 3 carte (+ 4 b)
di modici in fine

- Carta 2^a 4 finale mancante e probabilmente
bianca

W. H. Allen 1783

Ric N 6

23 Aprile 2017

M/F

HIERONYMI

CARDANI MEDI-

CI MEDIO-

LANEN-

SIS


Contradicentium Medicorum

LIBER PRI-

MVS.

*Continens Contradictiones cen-
tum & octo.*

VIRTUTE DVCE,



COMITE FORTVNA.

LVGDVNI APVD SEB.

GRYPHIYM,

M. D. XLVIII.

*Cum medici, patria, affines, fortuna, parentes,
Me inuisum odissent, non potuere tamen
Extremos inssu fati superare labores.
Sic uiuam semper: maior & inuidia.*

AMPLISSIMIS, PRVDEN

TISS. QVE, AC HONESTISS.

CAESARIS SENATORIBVS

MEDIOLANENSIB. HIE-

RONYMVS CAR-

DANVS

S.P.D.



I QVO olim, Patres Conscripti, in coronandis certatoribus tota Gracia, nūc mortales omnes iudicio uterentur: certe nullum aut admodum paruum, in eligendis uiris errorem admitterent. Neque enim opinione quenquam, aut uulgi studio, sed quem exiis ipse uictorem cursu, lucta ue, seu pancratio ostendisset, coronabant: cum nec sensibus ipsis firmitus, nec experimento clarius, nec euentu ipso maius testimonium haberi possit. Quo fit ut qui his confidunt, non fama leuitati, non inuidorum calumnijs, sed rebus ipsis uelut in Solis luce, manifesto se exhibentibus, inniti uideantur: ac ea de causa, iustissimam soli posse ferre sententiam. Quod si in tam leuibz causis, tantum diligentia antiquitas impendere solebat: quid rogo in his deligendis, quibus sine, hominum genus nullo modo, aut saltem non commode uiuere potest? Dico autem professores, ac medicos, in quorum arbitrio, eruditio, uita, ac ualetudo, tum opes ipsæ, summa mortalium bona, posita sunt. Et quanquam in his constituendis, maxima semper laus uestra fuerit: nulla tamen maior esse potest, quam ut à uobis eruditi eleuentur, tueantur, ac foveantur. Etenim beneficium uestrum, quo sanctissime nō solum, sed etiam prudentissime patriam nostram gubernatis, quanquam ingens sit, ac admirabile: non tamen regni fines, non seculum hoc,

excedere potest. Et ut penè dixerim, etiam cum ipsa uita extinguitur. At si bonis literis manus uos ipsi dederitis, incredibile est, quàm utilitatem mortalium generi asseratis, quàm longe, lateq; pateat uestrum hoc liberalitatis, atque prudentiæ testimonium. Neq; enim atas ulla doctorum uirorum monumentis iniuriam asferre potest: nec ulla prouincia illis carere uelit. Deniq; si ad laudem res etiam referri debet: quàm illustrior est Stagira uicus pusillus, ob unius Aristotelis laudem, multis Macedonia non solum, sed etiam Asia magnis urbibus? sic Pergamus, sic Cous, atque alie multe sapientum uirorum patrie, solum nomine celebres. Ergo quonam pacto id facere licet, nisi prius in electione antiquos, ne aberremus, imitemur? Deinde electionem ipsam fauor uester consequatur. Sed si alterum horum deficiat, nihil proficitur. electionem consilium iuuat: in exequendo opus est uoluntate. At in consilio experimentum iam tutissimum esse ostendimus. Experimento doctorum uirorum quatuor sunt necessaria: horum maximum est, ut legenda scribere norint: proximum huic ut profiteri ac docere sciant: tertium ut exercitatione ualeant: ultimum ut disputationibus sint assueti. hæc autem sic se habere uel discendi ordo docet. nam ut primum in scholis proficimus, disceptare adolescentes incipere solemus. ubi uero eruditiores euasimus, & atate confirmati, exercemur opere in ipso, medendi, aut cau sis patrocinandi. at publice profiteri feliciter, paucis admodum concessum. uerum legenda scribere, rara auis est: quamuis multi scribant, argumentum potius stultitiæ suæ, quàm quæ alij inspicere dignentur. hoc autem ideo est, quòd qui scribunt, doctos docere debet: qui profitentur, adolescentes & inexpertos: ergo tanto difficilior est, bene scribere, quàm bene profiteri, quanto docti eruditione adolescentibus nuper initiatis præstât. tum præsertim, cum etiã inter coæquales inuidiæ stimulus repugnet. ob id mortuorum tantum labor

bore extollunt : nisi quid adeò ex cultum sit , ut liuoris tentiginem ,
uerecundia ob operis ipsius excellentiam , contineat . Itaq; si un-
quàm alios huius tam pulchri facti desiderium tenere potuit , uos
maxime nunc Patres Conscripti sollicitare debet . nam præter rei
ipsius magnitudinem , in qua hominum saluti prospicitur , quæ tan-
to etiam Regum ipsorum potestate maior est , quanto maius est
posse uitam dare , quàm eripere : præter pacis tam diu à uobis de-
siderata insperatam alacritatem , & florentissimam tot librorum
copiam : ac tantam hoc æuo linguarum notitiam : tantamq; è di-
uerso eruditorum uirorum penuriam , ut uix unus aut duo Itali
totidemq; Germani temporum calamitati nunc resistent : eo etiam
in Italia nuper extincto , quem longa exercitatione eruditissimum
quisq; merito existimare certe debuit : maximum accedit ex ue-
stra promptitudine & singulari uirtute in fouendo , ex eruditione
in eligendo commodum . quorum altero fermè omnes , ambobus
etiam plures non hoc tantum sæculo , sed multis etiam ab hinc præ-
teritis , caruere . Nempe præter præsidis uestri egregiam laudem ,
ante actæ uitæ illustria facta , senectutem uirtute adeò uirentem ,
quisq; è uobis tam claris animi dotibus insignis est , ut notissimus uel
ob singulos , Europæ toti , uester iam ordo sit . Quod nisi timerem ,
ne apud multos metam excessisse uestra laudis uiderer : quod ex-
tra mei propositi certe intentum erat , nunc silentio præterissem .
uerum cum adulationis calumniam grauem , non nisi leui calum-
nia alia effugere possim : paucorum senatorum conditionem sic
exprimam , ut intelligant omnes quales reliqui sint : qualisq; esse
debeat is , qui meruit ut uobis præficeretur . Ergo è uobis unus fuit
Franciscus Sfondratus : in Cymnasio professor : in Reipublica ad-
ministratione nulli secundus : nunc Cardinalis : exemplo ostendens
summam etiam eruditionē , & apud principes ac populos gratiam
pietati ac religioni non præponenda sed ornamento esse debere . Pro-

ximus ab eo ordine, sed è nobis unus ille tamen est Franciscus Taberna, memoria, prudentia, experientiaq; tractandi regni, tum legationibus ac magistratu cum summa fide coniuncto clarus. Fuit Baptista Spetianus uir toga & armis clarus, iustitiaq; praefectus: non uulgari Latinae Graecaq; linguae, tum iuris peritia insignis, impiger, iustus, & in amicorum officijs indefessus. E nobis est Andreas ille Alciatus iureconsultus, patriae non solum nostrae, sed cui etiam maximum ornamentum. Mitto nunc Io. Angelum Ariciboldum Nouariensem Episcopum, academiae moderatorem, humanitatis singularis: Egidium Bosium, scriptis suis, memoriam familiae secum posteris commendantem: Philippum Castellionem atq; Amanium, Barbauariam Rigonum sapientissimos uiros: tresq; cognomines inclytos Lampugnanum egregium, Casatum optimum & integerrimum, Crassum illum, orando cognitum, Caesaris laudibus, uel potius panegyrico. Inde Alexandrum uicecomitem, Ioannem Varaonam uirum iustissimum, Iacobum Piroanum clientum patrocinijs, legationibusq; ac in patriam officijs clarum. Petrum Antonium Marlianum, qui uitam gloriam, dignitate superauit. Illustrem Symonetam, Falcuuum, Schicium, Marcum Barbauariam, Nicolaum Bello-num, omnes uirtute & sapientia insignes. In quorum fide & innocentia spes omnis patriae nostrae, in administratione salus posita sunt. Quamobrem merito quisq; dubitauerit, plus'ne in mortuis beneficijs, an in senioribus utilitatis, an in iuuenibus spei sit collocandum. Multos etiam scio esse alios absq; toga illustres: qui ut nulla inuidia à me nunc praetermittuntur: sic moderatius quoscunque laudaui eos, quibus uterer familiarissime. Igitur'ne temere in uobis spem meam collocasse uideor, cum etiam in aduersis temporibus adeò constanter rem literariam foueritis: in diiudicando hominum ingenia, eruditionem, exercitationem, praestant

stantiam, mente uestra inter mortales nihil possit esse diuinius?
Quamobrem illud potius cogitare mecum decuit, quonam pacto
uel uoluntate saltem, erga talem ordinem gratus uiderer. &
quanquam difficile esset liuorem effugere, cum tamen posteritatis
recordatio occurreret, illud poëticum succurrebat,

Virtutem incolumem odimus,

Sublatam ex oculis quærimus inuidi.

Neque tamen uel sic, fortuna meliorem conditionem in dies ex-
pertisumus. eoq; magis gloriam spreuimus, quo plus, turbam hanc
solo nomine sapientia turgidam liuoris stimulis agitari sentiebam.
legeram enim apud Galenum olim, quot quantaq; ab æmulis Ro-
mæ passus esset. quare quicquid minus illo ab eis perpetior, æqui,
boniq; consulo. non enim ignoro, uel in arte nostra inuidiam, uel
imperatorum conspirationem aduersus eos, quibus se pares esse non
putant. Quamobrem nec artem ob id deferere, nec illos ob calum-
niam ulcisci æquum duxi. Sed felici quadam inimicorū omnium,
tanquam nullius pretij hominum, obliuione fretus, ad mortalium
commoda me conuerti. simul etiam sperans eos qui non omnino
essent insanabiles, his nostris laboribus, in agrorum commodum
posse iuuari. Nihil enim cum sit eruditis difficilius, & in opere ipso
præcipiti præsertim occasione coniuncto periculosius sententiarum
contrarietate: operæ pretium fore existimaui, ut quæ utilissima
essent, aut scitu iucundissima, in unum conferrem, si quando in eis
celebres autores disiderent. Sed cum opus immensum euassisset, in
duodecim libros illud dissecui, ut sic minus mihi esset laboriosum, &
legentem adeo non fatigaret. & quanquam laboris ac temporis non
parum impenderim: credo tamen his, non inferiorem mortalibus
futuram ob hæc ipsa utilitatem. Cum enim diu, ac bene uiuere, id
est inculcata ualitudine, hominibus sint præcipua huius uitæ dona:
in horum altero aliquid non contemnendum, in reliquo etiam ma-
gnum.

gnum præstitimus auxilium in quibus enim sumus scopum assecuti, in his desiderio nihil relictum est. ubi assequi non licuit, ansam præbuius ut alij qui nō tam facile perficere possent negotiū, quā necessario etiam qui doctrina præstant, aggredi cogerentur. unde in utroq; consilio & capeffendi, & complendi utilis illis ero. Verum qui ante nos fuere, quā leuiter atq; oscitanter hæc tractauerint, præter unum Conciliatorem, ac in dissectione Vesalium, in paucisq; admodum alijs Fuchsum, cum Ferrariensibus, non est cur recitem. uix enim uel uerbo à reliquis omnibus adiutus sum. atq; utinam non plus in legendo iactura, quā in scribendo cōmodi essem consecutus. Et quanquā longe facilius, quorundam more, antiquorum opinionibus acquiescendo, hunc, tum ceteros libros absoluissem: quia tamen seriam nimis rem agimus, & in qua uita hominum periclitatur, non philosophorum nugæ aut præcepta oratoria, diligentius in singulis, cum res id postulat, rationem euidentem requirimus. Nam quod ad Arabes attinet, cum falsas Galeni plerunq; sequantur interpretationes, cæcutire etiam in manifestis, quod & alij ante nos animaduertunt, luce ipsa clarius est. Hippocrates concisus, & ob id uetustate etiam suspectus in multis, in alijs exesus, sæpe plus nobis affert negotij, quā auxiliij. Paulus perbreuis est, & nihil fermè extra Galenum adducit. Aëtius uariis, ac quasi ex pugnantibus constat: cum eos sequatur, quos iam Galenus damnauerat. & si in eo etiam iudicium probemus, nullam tamen dictorum suorum rationem ostendit. Oribasio melius est carere, nisi etiam quicquid nūc usq; habemus boni, quod tamen quidam facere solent, in controuersiam reuocare uelit. Latinis, quorum Celsus princeps est, nulla est autoritas, nisi pro nominum interpretatione. unica igitur in Galeni iudicio spes relinquebatur. sed huius etiam maxima operum pars, antiquitate intercidit: & quæ supersunt sæpe euariant: & ipse, ut existimo,

stimo, cum medendo plurimum occuparetur, ac multa scribere uellet, non satis sibi constat. cuius rei euidentis est testimonium, quòd toties de eadem re scripserit. quorsum enim ad eundem sæpius redire laborem, nisi quemadmodum etiam Sueffano, & quibusdam alijs accidit, quæ prius scripta essent, iudicio proprio damnarentur? Sed uel sic tamen, poterat nobis omnis litis esse uoluntarius iudex, si non in dissectionibus liquido apparuisset, constanter illum tanquam uisa, contradicendi studio affirmare, quæ nec uidisset omnino, nec uera essent: ut iam nos non Uesalio credentes, sed oculis nostris, non de iudicio, quod sæpe contigerat, sed de fide dubitaremus. quamobrem illius præceptum, quo contra alios utitur, secuti, quæ dubia uisa sunt, rationibus subijcere tentauimus. iniustum uero duxi, si id in medicorum Principe ausus essem, in alijs autem omitterem ob negligentiam. Quare in cunctis ratione duce præter etiam autoritate usum: ut si ea cum illorum sententiâ consentiret, firmitus esset iudiciũ: si repugnaret, nostra opinione recitata, integram lectoribus eligendi quæ magis placeret, facultatem relinquerem. Quòd si quis queratur, non me tam expresse aliquando declarasse quæ sentiam: breuitatis id sciat esse uitium, non uoluntatis. Solent enim quidam nostra ætate, quod etiam Pomponatius iure reprehendebat, quatuor ex inuentis, totum unum uolumen, atq; id etiam ingens uelle conficere. quod cum mihi consilium absurdum maxime displiceret, effecit, ut aliquando breuior euaserim quàm uellem. Sed tamen nulla in parte, quamuis uel diuisus, uel etiam paulò obscurior, sensus non patet. Hoc igitur qualecunq; fuerit munus uobis dedico Patres Conscripti, atq; etiam mitto. quod si pro uestra dignitate exiguum est, non aliter melius uestre humanitatis, & meæ de uestra moderatione confidentiæ, exemplum patere poterat. & sit modo quantumcunq; pusillum, non tantum pro uiribus meis quæ maius efficere nõ possunt, sed etiam pro uoluntate quæ erga uos prona est, magnum
b fiet.

fiet. cunq; etiam uel unus homo, huius libri beneficio in uita serua-
tur, contemnendus esse non potest. At non unum, nec mille, sed in-
numeros, non solum presenti æuo, sed etiam in posterum, diremptis
his libris seruandos, haud dubie spero. Cæterum cum uos amplissi-
mis obstrictos negotijs sciam, ne longa oratio tadium cum impedi-
mento afferat, illud tantum cum addiderim, rogare me Deum
Opt. Max. q̃, ut uos sospites Cæsari patriq; nostra, quam inter
tot temporum procellas, calamitatesq; illi ac nobis, uestra cum sa-
pientia, & animi candore seruauistis, quandiu esse uelit: pauca-
laq; ad lectorem ipsum pro operis introductione præfatus fuero: rem
ipsam aggrediar. Valete.

HIERONYMVS CARDANVS

MEDICVS AD LE-

CTOREM.



E te forsā lector curiose, aut admiratio teneat, aut deside-
rium torqueat, cognoscendi argumenta cæterorum undecim
librorum: tum præsertim cum tot tantq; uideantur hoc in
primo contineri, ut uix ei qui ordinem non inspiciat reliquo-
rum, uerisimile uideri possit totius operis hanc tam minimā
esse partem: breui descriptione hic illa subiunxi. simul etiam
ut intelligeres hunc librum ut & omnes alios eius argumenti, seorsum posse le-
gi: tum etiam cum cæteris in ordine collocari, pateretq; ratio, qua tot tamq; di-
uersa iure merito in unum librum concurrere iungiq; potuerint. Ergo primus hic
liber primam partem habet Aphorismorum, initiumq; secunda, tum primi me-
dicinalis artis quesita, & si qua inter legendum proxima illis nobis occurrerūt.
Quod etiam genus in reliquis æt̃iquorū scribendi seruauimus. Secundus habet
secundum & tertium medicinalis artis librum: postremasq; Aphorismorū quinq;
sectiones: cum eo toto quod ex secunda derelictum erat. Tertius uerò cōtinet to-
tius primi libri Auicennæ contrarietates: his exceptis quæ ad dissectionē perti-
nent: & ad conseruationem sanitatis: quæ in tertia eius particula descripta est.
Manifestum est igitur ad hanc pertinere libros de elementis Galeni: de humana
Natura: de Naturalibus facultatibus: cæterosq; eiusdē, ut dici solet, farinae libros.

Atq;

Atq; sic trium lectionum circula rem ordinem absoluimus, quæ matutina hora solent legi. Quartus autem continet primam particulam quarti libri Auicennæ. atq; cum ea libros de Differentijs febrium: primum ad Glauconem: decimum ad Almanforem. Quintus uerò nonum ad Almanforem: totum tertium Auicennæ librum. libros Galeni de locis affectis: & extremos artis curatiuæ libellos, & continentia omnia ferme ipsius Rasis. Atque hoc modo duas lectiones quæ alternatim legi solent hora uespertina, tanquam ordine præcedentes dissolutis difficilioribus disputationibus compleuimus. Supererat & dissectio, quam etiã solent publice in academijs profiteri, ei igitur Sextum librum dedicaui mus. Manifestum est autem quod libri de Vsu partium & Anatomicarum administrationum; & Vesalij, ac aliorum huic contemplationi debentur. Septimo uerò quicquid in quinq; ultimis continetur particulis quarti libri Auicennæ subiunximus. habet igitur & secundum ad Glauconem: & de uenenis tractationem, & chirurgiam totam. tum libros Hippocratis cum Galeni commentarijs de ijs quæ in medicatrina, de fracturis & de articulis. Octauus secundam particulam quarti Auicennæ habet: Prognostica prorrhiticaq; & quæcunq; ad medicinæ partem coniecturalem pertinent. Nonus simplicium medicamentorum difficultates continet. manifestum est autem luce clarius quos ille antiquorum libros amplectatur. ubi etiam de Manardo & Leoniceño non pauca habentur. Verum Decimus habet quintum Auicennæ librum. libros etiam decem de medicamentis secundum locos: & septem de medicamentis secundum genera: de Theriaca utrosq; de Antidotis. Vndecimus autem habet libros de Alimētis, de Tuenda sanitate. omniaq; quæ uel ad conseruandum sanos: aut neutra præferuanda aut etiã restauranda pertinent. Supererant præter hæc plura quæ adeo uaria & incerta erant, ut uix in unum ordinem redigi possent, ut libri Epidemiarum & magna pars libri de Victu in acutis: libri Hippocratis de morbis:

aliq; innumeri: quos omnes in unum atq; eundem duodecimum

& ultimum redeginus. Erat & eiusdem argumenti liber,

in quo Auerroës medicis penè omnibus contradicit.

Sed hunc ut Auerroëm, ubi defendi meretur,

tueri possemus septem libris quibus

eius septimum librum expo-

nere decreueram, ita im-

miscui, ut non disti-

milis ab alijs

uideatur.

INDEX LIBRI PRI- MI CONTRADICEN- TIVM MEDI- CORVM.

TRACTATVS PRIMV.

I.	Vita hominis an brevis sit.	pagina 17.
II.	Hyeme an cibi calidiores conueniant.	pag. 18. & 19.
III.	An in Aphorismo in perturbationibus uentris intelligat de hu- more in quali peccante.	pag. 21.
IIII.	An sint tantum duæ uirtutes in homine naturalis & anima- lis.	pag. 23.
V.	An multa cocta magis nutriat quàm cruda.	pag. 23.
VI.	In tenui uictu an ægri magis delinquant quàm in pleno.	pag. 24.
VII.	Indicationes mittendi sanguinem an sint tres.	pag. 27.
VIII.	Deriuatio an reuulsionem præcedere debeat.	pag. 28.
IX.	Ephemera an fiat calore in sanguine existente.	pag. 29.
X.	Qui crescunt an plurimum habeant innati caloris.	pag. 30.
XI.	Humidum radicale an ab innato calore consumatur.	pag. 32.
XII.	Zinziber an humidum.	pag. 36.
XIII.	Zinziber an flatum gignat.	pag. 38.
XIIII.	Corpora cum quispiam purgare uoluerit, oportet fluida facere.	pagina 39.
XV.	Sacharum non est in detergendo inferius melle.	pag. 39.
XVI.	Rhabarbarum an calidum.	pag. 40.
XVII.	Non pura corpora an copiose nutrienda.	pag. 41.
XVIII.	Vinum album leue seu aquosum an magis urinam prouocet. An rubrum nigro magis nutriat. Austerum an magis urinam pro- uocet. Album an tam in prospera quàm aduersa ualitudine ma- gis salutare. Austerum an in syncope conueniat. Rubrum an flauo melius in tuenda sanitate. An omne uinum calidum etiam si album sit.	pag. 42.

TRACTATVS SECVNDV.

I.	Ars an singulare.	pag. 46.
II.	Experimento an duæ rationes tantum satisfaciant ad hoc ut ue- rax sit.	pag. 47.
III.	Medicina an solo experimento inuenta sit.	pag. 48. Exp

INDEX.

IIII.	Experimentum an sit artis principium.	pag. 49.
V.	Dies febris enixæ an à partu computandi.	pag. 49.
VI.	Putredo fit non prohibita transpiratione.	pag. 52.
VII.	Vinum natura humidum est.	pag. 54.
VIII.	In laterali morbo an ex parte dolente uena secanda sit.	pag. 58.
IX.	Vinum an pueris competat.	pag. 86.

TRACTATUS TERTIUS.

I.	Dialectica an medico necessaria.	pag. 90.
II.	Præcepta medica an omnia ex propriis principiis, & an dies iudicatorii uim à luna suscipiant.	pag. 92.
III.	Dies impares an soli iudicatorii.	pag. 95.
IIII.	Dies iudicatorii post quadragesimum debiles sunt trigessimus & centesimus an sint iudicatorii.	pag. 98.
V.	Quartus dies an iudicatorius & an acuti morbi imparibus diebus exacerbentur.	pag. 101.
VI.	Ordo dierum iudicatoriorum: an decimusseptimus iudicatorius an duodecimus & sextusdecimus intercalares, an sextus omnino malus.	pag. 103.
VII.	Purgationes an debeant fieri diebus Decretoriis.	pag. 105.
VIII.	Fœtus decem mensibus in utero manet. Septimestris an ante centesimum octuagesimum secundū diem uiuere possit: octimestris an uitalis. tempus motus & perfectionis tempori formationis an conueniat. masculus an foemina celerius formantur.	pag. 107.
IX.	Argentum uiuum si in aurem cadat an plumbo extrahendum.	pag. 126.
X.	Acetum scilliticum an leniat asperam arteriam.	pag. 226.
XI.	Lactuca an calefaciat: an multum sanguinis generet, an lac copiosum.	pag. 127.
XII.	Mala punica an uentriculo noxia.	pag. 128.
XIII.	Galenus an dicta repetat.	pag. 128.
XIIII.	Lilium an uentriculo inimicum.	pag. 129.
XV.	Lens an frigida.	pag. 129.
XVI.	Coriandrum an frigidum.	pag. 129.
XVII.	Coriandrum an comitali morbo conueniat.	pag. 131.
XVIII.	Atra bilis an sit sanguinis fex.	pag. 131.
XIX.	Atra bilis an fiat à calore temperato.	pag. 136.
XX.	Medicina an sit ars coniecturalis.	pag. 138.
XXI.	Medicus an debeat imitari naturam recte operantem.	pag. 239.
XXII.	Si qualia oportet purgari purgentur, an conferat, & an bene fe-	

INDEX.

- rant. pag. 140.
 xxiii. Dolor iuncturarum an à mala fiat intemperie. pag. 142.
 xxiiii. Dolor iuncturarum an à sanguinis misionis semper curationis initium suscipiat. pag. 143.
 xxv. Ischiadicis an reprimentia medicamenta conueniant. pag. 144.
 xxvi. Hypericonis semen an per aluum expurget. pag. 144.
 xxvii. Sanguinis misio an post ieiunium conueniat. pag. 145.
 xxviii. Ischiæ dolor & coxendicis an sit unus. pag. 146.
 xxix. Iberida an uerum sit Ischiadicis summo esse præsidio. pag. 146.

TRACTATUS QVARTI.

- i. Medicina an cum cibo sumenda. pag. 148.
 ii. Articulari morbo an uinum competat. pag. 150.
 iii. Articulari morbo an balneum competat. pag. 150.
 iiii. Articulari morbo an coitus competat. pag. 151.
 v. Humores an actu sint in uenis. pag. 151.
 vi. Agaricus an purget materiam in pectore existentem. pag. 154.
 vii. Epialæ febres an calorem simul & frigus habeant in eadem parte. pag. 155.
 viii. Lateralis morbus an perniciosior in iuuenibus quàm in senibus. pag. 156.
 ix. Phthificis an uinum competat. pag. 156. & 157.
 x. Hippocrates an pulsus agnouerit. pag. 157.
 xi. Intentiones curatiuæ an à tribus sumantur. pag. 158.
 xii. Euacuationes ad syncopim an quandoq; cōueniant ubi de mensura detractionis sanguinis. pag. 159.
 xiii. Euacuatio ad animi deliquium an detur cum tolerantia: & an Hippocrates intelligat in 23. Aphorismo primæ particulæ etiam de purgatione. pag. 161.
 xiiii. Febris ex sanguine putrido an detur. pag. 162.
 xv. Peracutus morbus an in tertio die consistat. pag. 164.
 xvi. In morbis peracutis an uictu exquisitè tenuissimo utendum sit. pag. 165.
 xvii. Morbis acutis an necessario febris complicitur. pag. 167.
 xviii. Olera an frigidum & humidum exhibeant alimentum. pag. 167.

TRACTATUS QVINTI.

- i. Caro an tactus instrumentum. pag. 168.
 ii. Finis medici est sanitas. pag. 178.
 iii. Decoratio an ad medicum pertineat. pag. 179.
 iiii. An medicina sit scientia. pag. 179.
 v. Neutrum primi modi an detur. pag. 180.

Neu

I N D E X.

VI.	Neutri dispositio an sit sensibilis.	pag. 181.
VII.	An panis sit facilioris concoctionis quàm caro.	pag. 182.
VIII.	An medicinæ possint esse plures diffinitiones.	pag. 192.
IX.	An morituri solis sint prædictionibus relinquendi.	pag. 193.
X.	Lens cum acetosis an laterali morbo conueniat.	
XI.	Medicina an tradatur tota in libro Artis medicinalis.	pag. 198.
XII.	Insensibilis alteratio an detur.	pag. 196.
XIII.	Hippocrates an dogmaticus fuerit.	pag. 199.
XIIII.	Coniuncta causa seu continens an detur.	pag. 199.
XV.	Tertiana & quartana an omnino salubres.	pag. 207.
XVI.	Ossa an sentiant.	pag. 209.
XVII.	Dolor an sentiat.	pag. 210.
XVIII.	Prandium an coena maius esse debeat.	pag. 226.

T R A C T A T V S S E X T I.

I.	Dispositio fiens an morbus esse possit.	pag. 235.
II.	Consuetudo mala an seruanda.	pag. 236.
III.	Aër contrarius an omnibus malis temperamentis conueniat.	
		pag. 227.
IIII.	Abinthii succus an uentriculo conferat.	pag. 228.
V.	Nerui, arteriæ, uenæ, ungues, adeps, an simplicia membra.	
		pag. 229.
VI.	Neutrum tertii modi an diuidatur à Galeno.	pag. 233.
VII.	Neutrum secundi modi, an sit quod partim ægrum, partim sanum est.	pag. 236.
VIII.	Sanum corpus an sit, quod in solitas potest exire operationes.	
		pag. 233.
IX.	Temperatura æqualis an detur.	pag. 241.
X.	Corpus humanum an sit medicinæ subiectum.	pag. 213.
XI.	Olera an facili concoctionis.	pag. 251.
XII.	Materia quæ concoquitur an necessario transeat in alimentum.	
		pag. 253.
XIII.	Omnis concoctio an condenset.	pag. 171.
XIIII.	Syrupi an concoquant: & an syncerus humor concoqui possit:	
		pag. 174.
XV.	Materia turgens an mobilis: initioq; , & an ex toto expurganda.	pag. 179.
XVI.	In morbis an à principio medicari conueniat.	pag. 182.

F I N I S.

INDEX

1	1	1
2	2	2
3	3	3
4	4	4
5	5	5
6	6	6
7	7	7
8	8	8
9	9	9
10	10	10
11	11	11
12	12	12
13	13	13
14	14	14
15	15	15
16	16	16
17	17	17
18	18	18
19	19	19
20	20	20
21	21	21
22	22	22
23	23	23
24	24	24
25	25	25
26	26	26
27	27	27
28	28	28
29	29	29
30	30	30
31	31	31
32	32	32
33	33	33
34	34	34
35	35	35
36	36	36
37	37	37
38	38	38
39	39	39
40	40	40
41	41	41
42	42	42
43	43	43
44	44	44
45	45	45
46	46	46
47	47	47
48	48	48
49	49	49
50	50	50
51	51	51
52	52	52
53	53	53
54	54	54
55	55	55
56	56	56
57	57	57
58	58	58
59	59	59
60	60	60
61	61	61
62	62	62
63	63	63
64	64	64
65	65	65
66	66	66
67	67	67
68	68	68
69	69	69
70	70	70
71	71	71
72	72	72
73	73	73
74	74	74
75	75	75
76	76	76
77	77	77
78	78	78
79	79	79
80	80	80
81	81	81
82	82	82
83	83	83
84	84	84
85	85	85
86	86	86
87	87	87
88	88	88
89	89	89
90	90	90
91	91	91
92	92	92
93	93	93
94	94	94
95	95	95
96	96	96
97	97	97
98	98	98
99	99	99
100	100	100

CONTRADICEN- TIVM MEDICO-

RVM SOLV-
TIONES.

*

PRIMVS TRACTATVS

PRIMI LIBRI,

HIERONYMO CARDANO
MEDICO AVTORE.

CONTRADICTION I.

Vita hominis an brevis.



ITA hominis brevis est, ad artem medici-
næ experimento discendam comparata, pri-
ma Aphor. primo. Oppositum in de subfi-
guratione empirica, Ex multis experimen-
tis fit ars, experimēta autem ex multis ex-
perientiis. & clarius in tertio Prorethici ui-
detur Hippocrates ex singularibus experimen-
tis uniuersalia præcepta & artem ipsam
collegisse. Non possum in hoc tot exposito-
rum stuporem non admirari, uolentium ui-

com. 33.

tam esse breuem in comparatione ad artem, ut uno uerbo tres errores fa-
ciant. Primùm præsupponunt, quòd ab Hippocrate probandum fuisset,
scilicet quòd ars esset longa, in comparatione ad hominis uitam. Funda-
mentum autem rationis debet esse uel sensu manifestum, uel ostendi. Se-
cundò, si uita est brevis ad artem comparata, igitur aut oportuit addere,
quòd ars sit longa: nam si est longa in comparatione ad uitam, est indi-
gnum aphoristica breuitate: est enim ac si diceret, Vita est brevis, in com-
paratione ad artem, quæ est longa, in comparatione ad uitam. quid absur-
dus dici potest? at uerò si uita est brevis, est in comparatione ad artem,
& ars per se longa: tunc sermo est incongruus, ut in primo loquatur com-
paratiuè, in secundo non: eademque particula Ars longa, habebit du-
plicem sensum. Particula *est*, quæ est, autem, seu uerò, cum sit aduer-
satiua, non facit ut referantur tanquam coniunctum. Tertium est, quòd
istud esset auersari auditores, & abigere lectores ab arte, essetq; hæc pul-

c cherr

cherrima ratio proœmii: esset enim ac si diceret, Vita hominis ad artem medicam comparata brevis est, ut nunquam totam possit addiscere. Respondent ad hoc qui melius intelligunt, quod uita humana brevis est in comparatione ad artem experimento sine literis discendam: cuius sententiæ est Rasis 4. ad Almanforem cap. ultimo. Verum non respondent hi autoritati Galeni in Proretico, nec aliis satisfaciunt argumentis. Propterea dico, quod non tam callidè loquitur hîc Hippocrates, sed uoluit dicere, quod simpliciter sonant uerba, quod ars est longa in comparatione ad alias, ut colligitur à Galeno in libro cui titulus est, An ad medicinam an ad gymnasticam seu exercitatoriam pertineat tueri bonam ualitudinem. Reddit autem rationem primo de Crisi, quomodo dicatur ars longa ab Hippocrate, dicens, Si per unum signum, uel per plura etiam, firmiter de exitu morbi coniecturam facere possemus, non utique Hippocrates artem longam fuisse dixisset: quasi uelit, longa experientia, & multorum consideratione artem longam euadere. Vita uerò brevis dicitur per se, ut etiam à Poëtis scriptum est: Labitur extemplo fallitq; uolatilis ætas, uel forsan ad id Hesiodi de comparatione attamen alludit.

Ergo sensus est: Vita existente nostra breui, & arte longa per se, tamen maximè si experimento discatur, cum occasio sit fugitiua, seu præceps, & iudicium difficile, bonum est artem scriptis, & quam breuissimis etiam mandare, ut eam commodè possimus in tempore opportuno exercere. Nec tamen negat, quin quod ipse fecit, artem iudicio & experimēto possit inuenire etiam alius.

Sed contra Galenum in libro de Medico, hæc habet uerba: Perfectam autem medicinam, & quæ propriis esset partibus absoluta, eam siquidem quæ diuina esset, solus inuenit Asclepius. Sed hic liber Galeni genuinus non est. Sed in oppositum uidetur autoritas Galeni qui bis in commento repetit hoc, quod ars est longa in comparatione ad uitam: primò in initio, secundò post medium. Dico, non est dubium quin id Hippocrates intendat concludere: & est, si uita nostra brevis est & ars longa, non erit sufficiens homo solis experimentis aut magna cum difficultate artem medicam totam discere. Nec tamen conclusio silentio prætermittitur, sicut & reliquum, quod scribenda sit ars, uel quod breuiter scribenda sit. Et de hac conclusione Galenus loquitur, nam demonstratio ipsa ad hoc tendit.

CONTRADICTIO II.

Hyeme an cibi calidiores conueniant.

VEntres hyeme & uere natura calidissimi, prima Aphorismorū x v. Concludit etiam uberiorem cibum dandum hoc tempore. Dicit etiam

etiam Galenus, plus de optimo sanguine hoc tempore generaliter, scilicet in hyeme quàm uere: quia calor naturalis robustior est. Huic tamen Aphorismo multa contradicunt, primoq; Aphorismus secundus tertiæ particulæ: Naturarum hæ quidem ad ætatem, hæ uerò ad hyemem benè malè ut se habent. Vbi manifestum, quòd non omnibus hyems confert: nò igitur omnibus calor naturalis augetur, nec melior celebratur concoctio.

Respondetur, quòd secundum Galenum in commento. x v. Aphor. primæ particulæ, intelligitur in hominibus habentibus ualidum calorem: nam in debilibus calor naturalis exinguitur, nò roboratur: & dat exemplum de animalibus etiam quibusdam, quæ tota hyeme dormiunt. Ad quod facit quod scribitur in tertia particula Aphor. 18. Senes ætate melius se habent: consistentes uerò hyeme. Vbi etiam Galenus contradicere uidetur Hippocrati dicenti, Senes autumnus usq; ad aliquod melius habere. At Galenus dicit omnes ætates male se habere autumnus. Soluitur hoc incidens ex superioribus Galeni uerbis, quòd ab Hippocrate hoc additum est, sicut etiam de prima ætate, quæ quasi uerisimilis est: sic etiam de autumnus ætati simili in priore parte. Sed redeo ad priorem contradictionem, nam duæ exurgunt difficultates: Prima, quòd pueri melius uere quàm hyeme se habent, ut ibi dicitur: non igitur melior concoctio fit hyeme quàm uere. Item, quia Galenus in commento 2. tertiæ particulæ dicit, quòd pituitosiores natura melius se habet ætate quàm hyeme, quia non augetur consimilis humor: contrà biliosiores hyeme. Igitur non fit collatio ad multitudinem caloris, sed ad habitum naturæ. Item uidentur humores ex hoc textu temporibus similes generari: quod etiam colligitur in libro de Victu priuatorum, & prima Aphor. 2. in cōmento, & primo etiam de Humana natura. Ad hoc dico, quòd aliud est cōparari corpus quo ad alimentum solum, nam sic omnia corpora non debilia melius se habent in hyeme, quia melior celebratur concoctio. Possunt etiā comparari ad immutationem quæ ab aëre continente fit: & ad hoc dicit Galenus, Temperatam, seu ad ætatem, seu ad naturam referatur, simili gaudere: inæqualem autem sua contraria. Sed & præsentī Aphor. contradicere uidetur quod in primo de Victu priuatorum à Galeno scriptū est sectione tertia, Utendum fore siccioribus alimentis & calidioribus, quasi uelit plus eo tempore de pituita gigni. Sed hoc clare in primo de Humana natura. t. c. 34. & 38. exposuit Hippocrates, uolens plus hyeme generari de pituita sicut ætate de bile: quam difficultatem uidens Galenus in commento 38. excitat contrarietatem cum præsentī Aphorismo, soluitq; eam duobus modis. Imò potius duas rationes adducit, quarum altera est, quòd hyeme utimur cibis frigidioribus, humidioribus, & durioribus: datq; exemplum de nouo uino, tum etiā de rapis, bulbis, agninis ac suillis

carnibus Altera est, quod uel ob iter, aut uestium, penuriā, aut incuriam, homo ab exteriori frigore persæpe lædatur: & si non lædatur, tamen (dicit) aër attractus per oscula cutis uitiat uenas: ideoque quantumuis absoluta in uentriculo coctione (dicit) in iecore lædatur. Quid tamen si quis horarios fructus æstatis obiiat? Respondeo breuiter, Calor naturalis in hyeme melius concoquit, generat tamen humidiores humores, scilicet sanguinem, & pituitam: unde si frigidioribus alimentis augeatur pituita & humidioribus utrunque, in magnam incidet corpus intemperantiam. At uerò æstate, quāquam non melius concoquat, plus tamen de siccis humoribus progignit: ideoque humida tutius exhibentur. Longe autem differt, calidiores gignere humores, aut melius concoquere: & similiter calorem esse maiorem, & robustiorem, uel sicciorē. Vnde in libello aduersus Lycum, Pueros abundare calore naturali copiosiore ac suauiore affirmat: tum in his præstantissimam concoctricem: Iuuenes uerò non maiorem, sed sicciorē, imo minorem substantia, si ad mixtionem confectur: quo fit, ut non tam bene concoquant, sicciores tamen progignant humores. atque ideo in æstate hoc manifestius, ubi naturalis calor minor mole, maior autem qualitate, præsertim siccitate iuncta, cernitur. Hoc autem declarabat Galenus 5. de Tuenda sanitate. c. 22. in fine. Aliud est, calorem multitudine esse maiorem, qualitate autem minorem, ut in hyeme, unde plura concoquet, ad minus tamen calidam temperiem deducet concocta, quia non ultra proprium modum, seu gradum: Aliud, qualitate maiorem, multitudine minorem: sicque ratione paucitatis pauciora concoquet, sed tamen ad maiorem modum caliditatis educet. Galenus tamen Aphorismum Hippocratis ad solum uentriculum extendit, ut ille solus sit calidior. Sed si sic, cur plura dare consulit? Dico: Bilis abundat æstate, primo de Natura humana 36. tertia Aphorismorum 21. & quarta Aphorismorum 4. & sic de pituita in hyeme. Et ideo est sicut si quis haberet lebetem magnū plenū aqua, & multū ignem, & tēpus ad coquendū breue, deberet tamē ponere multas carnes ad coquendū, non paucas: quia tametsi multæ illæ carnes non possint perfectè coqui, tum ob paruā morā, tum ob aquā: attamē nihilo secius si apponeres paucas carnes probè non coquerentur. Ita & si multus cibis hyeme non perfectam assequatur coctionem, ob frigus dandus tamen est: quia etiam quod paucum daret, omnino non assequeretur perfectam illam coctionem: imo persæpe minus perfectam: quā multus: quia impedimentum non est à multitudine cibi, sed à frigore. Cæterum quatuor modis qualitas qualitati comparari solet: Multitudine, quæ ad mixtionem refertur: Magnitudine: Vi, seu operatione substantiæ: & Modo operandi.

C O N T R A D I C T I O I I I.

Humor purgandus an peccet in quali, ex Aphorif. in perturbationibus uentris.

IN perturbationibus uentris, & uomitibus sponte factis, si qualia oportet purgari purgantur, confert, & bene ferunt: si uerò non, contrà: prima Aphor. 2. at Gal. in commento intelligit de humore qualitate sua noxio ut etiam in sequente Aphor. at in commento Aphorismi eiusdem particulæ dicentis, Deiectiones non multitudine sunt æstimandæ, sed si qualia. ibi Galenus in commento docet, non multitudinem spectandam in deiectionibus alui, sed si qualia oportet excerni excernantur: & etiam si confert ac bene ferunt. His duobus nos contentos esse iubet. Igitur non unum in altero includitur: nam si cum qualia purgari debent purgantur, confert & bene ferunt: uiso quòd purgantur qualia purgari debent, constat quòd ægro contulit, & quòd bene fert. & hoc est primum.

Item omnes cum uelint uel unam partem Aphorismi ex alia pendere, uel saltem unam alteri similem, non uidetur hoc conueniens: nam non semper ars naturam imitari debet: quarta enim Aphor. XXI. natura excernente deiectiones multorum, malum. Item secundo Prognost. ubi de deiectionibus agit, Versicolor autem deiectio, & si longiorem significat morbum, attamen exitialis est. at in Aphor. eodem dicitur, Cum medicamento uerò melius, & quanto colores plures. Similiter morbo existente exurgente materia, licet ab initio purgare, iuxta illud, atque mouere non cruda, neque in principiis, modò non turgeant. prima particula Aphor. Et medicari in ualde acutis eadem die, si materia turget: tardare enim in talibus, malum: Aphor. 4. Et inchoantibus morbis, si quid mouendū uidetur, moue. 2. etiā Aphor. Et in acutis passionibus raro atque in principiis medicinis purgatis uti: & tamē natura ab initio nihil tale utiliter operatur. Vnde primo Epidemiorum, sect. 2. t. c. 46. Cruda uerò, & incocta, & ad malos abscessus cōuersa, iudicationis carentiā, uel dolores, uel morbi longitudinem, uel mortes, aut reuersionē indicāt. Et clarius Galenus in commento Aphor. Inchoantibus morbis, si atra bilis uel supra, uel infrā exierit, letale. quarta particula Aphor. Non potest (dicebat) in initiis morborum, cum natura à causis morbum facientibus grauatur, & materia ipsa cruda est, quicquā bene euacuari: sed oportet coctionem præire, inde separationem, ultimo uerò expulsionem.

Respondeo, prætermissa difficultate, an intelligat in quali tantum Hippocrates, quoniam omnis materia peccans in quanto, etiam in quali peccet: uel, quoniam omnis materia quæ extra uenas est superflua, in quali etiam peccet: non ob multitudinem solam, sed quia à natura intra uenas

traheretur. Huius aphorismi expositionem patet usque ad secundum quartæ particulæ extendi, cum dixit, In medicationibus talia educere qualia & sponte prodeuntia utile. ubi Gal. docuit per inanitionem, sanguinis missionem, & exercitia, & sputa significari. quod nobis declarat primam aphorismi partem non esse ad ostendendum secundam: ubi dicit, Sic & inanitio, nisi concedamus ex singulari posse ostendi uniuersalem. Ergo, ut ad propositum reuertar, Aphorismus de operatione ac intento primo loquitur: idest, Noxius humor est ille talis, qui debet euacuari seu modo quantitate seu qualitate peccet. Hoc est igitur ut qualis humor euacuandus doceat Hippocrates, idest peccantem, non tamē ut in quali necessario peccet, seu per qualitatem. Veruntamen omnis humor in quanto peccans etiam per qualitatem in comparatione ad corpus peccat. Hanc tamen expositionem Philoteus refugit. Stat tamē ut per accidens noceateductio materię noxię aut propter loci conditionem, aut uirtutis debilitatem, aut tempus morbi, aut symptoma cōiunctū.

Ad primum in Aphor. 2. considerat tantum proportionem qualitatis materię ad educationem, cæteris circūscriptis, introducturus initiandos arti. in xxiii. considerat opus naturę, uel artis, cum omnibus conditionibus requisitis.

Contrā, si cōfert, ac bene fert, igitur qualia oportuit excreuit æger. Respondeo ex Gal. eas esse notas optimę euacuationis, non solum in quali, sed etiam in quāto. Primā uerō esse notā solum in quali. Sed adhuc stat argumentum: nam si bene fert, & cōfert, non solum qualia, sed quāta oportuit deiecit. Igitur dico quod ambo hæc considerare oportet quia & si confert, ac æger toleret, nihilominus hoc erit potius exonerata natura, quam subleuata. Ideo dicebat, non secundum rationem alleuiatis minime fidendum esse: nam alia causa poterunt alleuiari, non ex purgatione, ut à cibo, à lætitia, à causa etiam supercoelesti.

Ad secundū, Medicus imitatur naturā: non tamē ex hoc sequitur, natura sic agendo malū finē ostendit, igitur & medicus: quia in opere naturę non tantum causam, sed signū inspicere debemus: in opere artificis tantum utilitatem, uel iacturā. Et quāuis natura ab initio expellente materiā nondum coctā, sit malum signū ratione materię, & grauitatis morbi: non tamen est necessariò perniciosum semper, nec inutile: cum sæpe à grauioribus morbis liberetur æger. Sed in atra bile secus est, quæ non solum ab initio morbi, sed debili existēte ægro perniciē affert: significat enim perniciosę materię uitium, quæ antequā concoquatur mortē sit allatura. Et licet æger à deteriori morbo eo naturę conatu liberetur, cū tamē naturā tā prauo humori non dominari ostēdat, quod illa coctionē non expectet, exitiū certū declarat. Sed de hoc, in xxi. cōtradictione III. tractatus dicemus.

C O N T R A D I C T I O III.

Virtutes in homine an tantum duę.

Duę

DVæ sunt operationes in homine, Naturalis & Animalis: primo de Causis sympto. in initio: at 1x. Artis curatiuæ cap. x. ponuntur tres, addita Vitali. nec est quod inter facultates, aut operationes, uel uirtutes discriminis interponas. Conciliator differētia. 57. hanc uidit difficultatem, modoq; uitalē sub naturali, modò sub animali collocat facultate, ex Gale ni tamē sentētia quotiēs eas in duas redigit, nā tres lōgo processu eas esse docet, VI. & VII. de Placitis Hippoc. & Platonis, naturalis uitalē amplectitur, cum absq; uolūtatis imperio corpus administret. in quo sensu primo de Causis sympto. loquitur: nā arteriæ nō parēt uolūtati, ut nec in coquēdo iecur. Est autem necessariū primā diuisionē in unoquoq; per contraria declarari: cum uerò de sensu, de dilatatione loquimur, animali uitalis annectetur: sed cum ad principia, & proprias functiones, tres illas esse dixit.

CONTRADICTION V.

Mulsa cocta an magis nutriat cruda.

Mulsa cocta plus nutrit quā cruda. XII. Artis curatiuæ, & IIII. Regim. acutorū v. & III. eiusdē. XIX. quin etiā ait, illā minus uentrem subducere: sic Gal. At ē diuerso Hippocrates eodē III. lib. & XXIII. inquit nullam inter coctā ac crudā mulsam agnoscere differentiā, nisi quod cocta pulchrior est, minusq; nutrit, & minus aluū deiicit. Est autem intelligendū, duplicē fuisse mulsam in usu: crudā coctamq; quod ex locis deductis elicitur. tum uerò ut habetur. VIII. de Arte curandi: ubi docet uictum illorum, qui ephemera, ex obstructione cōtra laborāt. Triplex est etiam uniuscuiusq; harū genus: Validū, in quo mellis plurimū: Imbecille, quod parum: & Mediocre, quod commēsuratā quantitātē habet. Sic igitur sex illius genera erunt. Dioscor. libro v. cap. ix. docet nos illud mulsæ genus quod seruatur Hidromelq; uocari solet, priuatim inter alia, habetq; uires loræ ac imbecillis uini, cum media ætate constiterit, duplo aquæ pondere mellis admixto cōfici. Plin. lib. XIII. cap. xvii. aliam ostendit rationē: cūq; quinquēnio eam seruari prius affirmet, quā in usum ueniat: uel sub canis feruoribus pluuiālē aquam ad tertias decoctā tertiæ parti mellis coniungunt xl. diebus in sole habētes: quā non uires sedaporē uini uetustate assequi ille affirmat. At Columella XIII. libr. cap. xi. Mulsam & ipse crudam conficit ex pluuiali aqua diu seruata, atque depurata. minima uerò portio mellis quæ adicitur ex aquæ dimidio est, alia ex dodrante, ut solum tertia pars ad ponderis æqualitatem desit. Hæc igitur plus nutrit, quā decocta, in quā mellis minus coniiciebatur. Verū cum Gal. illam plus nutrire cōtendat, pares in utraq; mellis portiones assumit: nā ea quæ decocta est, si par mellis pondus assumat, proculdubio cruda alit copiosius. aliter cum dicat ἀσθενέστερον μὲν τοῖ γε τῶ ὠμῶς καὶ ἀνοργανῶς ἐστέον ἔστιν. hoc est, Infirmitior quidem est quā cruda, & minus deiiciens sterco-

ris,

ris, unde ille, Minus nutritiuam, pro imbecilliore uertit: quod & si usu uocis inualuerit, plura tamen sunt exēpla quibus id minime significet. Consentiant autē hęc iis, quæ Gal. in 3. de alimentis scripsit. cap. 39. Quod si particula æ, auferatur integra cum Galeno concordia manebit: cum ille exponens non nisi interiectis quatuor breuibus expositionis partibus, nullam contrariæ Hippocratis sententiæ mentionem faciat.

CONTRADICTIONE VI.

In tenui uictu an ægri magis delinquant quàm in pleno.

IN tenui uictu ægri delinquant: quo fit, ut magis lædatur. Omne enim quodcunq; fit magnum, fit magis quàm in paulo plenioribus: prima Aphor. v. at contra II. Regim. acut. xxxvii, multò autem minus aduersus adiectionem eundum est. Detractio enim frugalis plerūq; confert, ubi superfuturus est æger, donec morbus concoquatur, ubi Gal. exponens dicit, Vbi peccandum est, & à decente mensura recedendū, omnino laudabilius ad id, quod quantitate minus est potius, quàm ad id quod plus est, inclinare: nempe quod plus est, noxas interdum facit inemendabiles: uerū quod minus est, facile emēdatur. Nempe si uirtus labi uideatur, exiguum cibi dare possumus. Verū si in uentrem cibus absorptus fuerit, si aliàs quod redundat, multo magis in acutis tollere difficile est. Itaq; subtrahere sæpenumero expedit, si uirtus sufficiat, donec morbus concoquatur, Item in Com. xlviii. Ingens siquidem malum est, si ob laborem morbiq; acumen imbecilliori factò potum quis, aut sorbitionem copiosorem, uel esculentum dederit: Imbecillitatem eam ex uasorū inanitione contigisse arbitratus, ubi Galenus dicit, Verū qui ex uasorum inanitione parum ualent, hos si quis diætā prefferit tenui, lædet quāquā nō æquē euidenter, uel celeriter. Itaq; unū uidetur detrimentū in pleniore uictu grauissimū.

Ergo cuiusdam expositoris sententia talis est, quod hoc medici peccatum in tenuiore uictu accidat: eo quod ei alius superueniens medicus illum cibauerit, succedente bona ualitudine primus reprehenditur. improspere autem cōqueritur, quod ad illum uberiorem cibum descendere coactus sit, ob primum errorem. Verū adeo impudens est hęc expositio, ut existimem eā falsò Oribasio tribui: quanquam illum uecordem inter omnes Græcos medicinæ auctores diiudicem. Sunt qui existiment melius esse ad pleniorē uictū declinare, ut Vgo, & Iacobus, tribus rationibus: Prima, quia melius est ut aggregentur superfluitates, quàm ut spiritus uitalis corrumpatur, natiusq; humor & membrorum substantia consumatur. Secunda, quia facilius est superfluum expellere, quàm deperditum restaurare: quemadmodum contingit ex superflua inedia. Tertia, quod (ut habetur secundo Regim. acutorum. xv. & xl.) trāsitus à pleniore uictu ad tenuiorem tutior est, quàm à tenuiore ad pleniorē. Igitur error plenio

plenioris uictus, cum facilius emendetur, minus est periculosus.

Alii, ut Ferrarienses, existimant, quod dicta secundo Regimine acutorum, per se uera sint: scilicet ut melius sit, ad tenuiorem uictus rationem declinare, attamen Aphorismi sententiam intelligi in comparatione ad errores: nam si error laboranti accadat, qui tenuiorem uictu usus sit, debiliore facta uirtute, laborans difficilior illum sustinere poterit, quam si pleniori uictu usus robustiores uires haberet. Ergo quod ita sit, sic astruitur: nam Hippocrates in illa parte, ubi de sanis agit in Aphorismo, dicit periculosam esse uictus tenuis rationem, quia errores difficilior ferunt. cum igitur pariter in utraque Aphorismi parte loquatur, haud obscurum est quod dicitur. Secundo, ubi cibus præter naturam plus ingestus est, morbum facit, 2. Aphorismorum 12. quanto magis in ægris, morbum augens, etiam uires debiliores reddet? atque sic laborantem duplici incommodo afficiet.

Ex his ad rationes aduersæ opinionis. Ad primam, patet ex secundo argumento, nam uirtus etiam in hoc errore debilior redditur. Ad secundam, refragatur Galeni sententia clara dicta secundo Regimine acut. 48. Ad tertiam, non supponunt tantam fieri extenuationem ut cibum asfumere cogantur: uerum si incidat, adhuc leuius ferent quam si uberiore cibo impleti morbum ferre non possint, ut dictum est à Galeno in commento 37. iam adducto.

Inde errores colligunt illorum: nam cum dixisset Hippocrates, Quia ægri peccant: intellige, ut plurimum, ideo læduntur: illi intellexerunt, quia læduntur, ideo peccant. Et similiter cum Hippocrates dixisset, Magis lædi ob peccatum: illi, magis peccare ob læsionem intellexerunt. cumque *ἀμαρτάνουσι* in prima parte peccatum credant esse, seu delinquere, uel aberrare: in secunda uictum tenuem interpretati sunt. Illud etiam animaduertit, quod cum Galenus uictum tenuem uocet, qui minus alit quam ptisana: plenum, qui uberius, illi comparatiuè dictum putant ad eum, qui ægro debetur: ut apud Ferrarienses melius sit, nihil omnino dare, quam carnes in acutis. Recensent etiam, quod cum in pleniori uictu Hippocrates dixerit *ὀλίγον*, uel *μικρόν*, paulum scilicet, uel parum: & in tenui *πάνν*, quod est ualde: illi æqualem excessum in utrisq; à debito sumendum existimauerint. Ex his tandem claret, (dicunt) eum inoleuisse errorem, ut potius morbum quam uirium alendam imbecillitatem uulgò lætent: cum tamen Hippocrates ex Galeni autoritate primo Regiminis acutorum 25. magis sit ex eorum numero medicorum, qui ægros fame excrucient, quam cibo expleant. Inde illud subiiciunt, Hippocratem quinque alios de uictu tenui subiecisse Aphorismos: ne talis uictus per hunc exclusus existimaretur.

d Itaq;

Itaq; ut mihi uideatur, nec hi mētem Hippocratis, imò ne experimentum sunt assecuti: quandoquidē si æqualis sit differentia, grauius in tenui uictu lædantur egrotantes. & Hippocrates librum Aphorismorum senex condiderit: longe iunior librum Regiminis acutorum: ut si altero in loco peccasset, uerisimilius esset in Aphorismis propriam magis explicasse sententiam. Verum, ut uideo, concors est sibi met. Indignissimum autem est Hippocratis grauitate, atq; in Aphorismis præfertim, illum existimare super errore, & casu, generalē uictus rationem fundasse. Quod si per uictum nullam comparationē intellexit: cur Paulo pleniore, aut Valde tenuiore dixit: non Pleniore, tenui q;? At si per uictum tenuē illum intelligit, qui infra ptisanam est, qualicunq; æger tenui uictu utetur, etiam si angina præfocante laboret, peccabit: & quicunq; carnes edet, parū aberrabit. tum illud absurdissimū est. quòd si propter errores hoc tantū præcauere iubet: non tamen edixit an præcauēdum sit: sed tantum cōmonuit hoc illis accidere. Sua igitur intererat dicere, Hippocratem uoluisse, ut quāmaxime errores caueamus, cū uictu tenui uti cogimur. Quòd si hoc dixissent, forsan aliquid, etsi non secundum Galeni dixissent sententiā. Deinde quid causæ est, quòd si ex cibo & morbi grauitate & uirium imbecillitate incurrunt: deteriusq; se habent his qui tenui uictu uti sunt: ut facilius errores postmodū ferant, non sat intelligo. Cum etiā dixit, paulò pleniore uictu, si uirū imbecillitas nō accedat: nunquid etiā si nō Paulò plenior sit, sed plenior, absolutē, nō ferre quisquā poterit? Galenus etiā in fine commentī dixit, Et quoniā ad eum (scilicet uictū tenuē) trāsitus est insuetus. Nō igitur ob errorē superuenientē, sed propter seipsum tenuis uictus grauis est. Neq; etiā illud uerū est, eos qui cibū sumperint copiosiorē, facilius ferre incommoda, ut uigilias, ac tristitiam: imò grauius lædunt hæc, si quis cibo utatur copiosiore, quod cuiuslibet experienti patet.

Verum quia Galenus dixit in fine, Confirmāt autem: ideo explicāda sunt illa uerba, quæ pro illis esse uidentur. Vult ergo damnare secundam interpretationem, & est eorum qui dicebant, quòd insciis medicis coguntur ægri cibari. Dicit non hoc uerum esse in sanis, sed ob id illos grauius lædi, quia ipsum exquisitum & constitutum uictum per se ægrè ferunt.

Causa erroris illorū est, quòd uictū triplicē tantum ex substātia distinguunt: Mediocrē, ptisanā: plenū, qui alit copiosius: & Tenuem, qui minus: nam hæc à Galeno dicūtur solū de substātia: nam in quantitate etiam tres illæ differentię sunt constituendæ. Cū dixit etiam ptisanā succum si in modica exhibeatur quantitate, ad tenuissimū pertinere uictū. An putāt, si quis quadruplū eius quod ex aliis cibis assumere solet, in quantitate accipiat ex ptisana, mediocri illum uictu usurum? Certē non. Princeps prima quarti trac. 2. cap. 8. dicebat, Et cū ambigua sit tibi dispositio in ægrit

ægritudine, tunc ut declines ad subtiliationem, est melius, quàm ad additionem: te obseruâte uirtutem, & tolerantia. Suprà etiâ dixerat, Et si uideris ægritudinē acutā nō ualde, imò acutam absolutē: tunc oportebit ut subtiles regimen, nō in ultimo nisi in apostematibus in die crisis propriē.

Ex hoc pater solutio clara in morbo cognito, melius est à debita uictus quātitate per æqualē differentiā declinare ad pleniorē, quàm ad tenuiorem: seu hoc fiat ratione qualitatis cibi, ut dando carnes pro ptisana: seu quātitatis, ut dando duplū quàm nihil, aut dimidio plus quā minus: & ad hoc faciūt argumēta Iacobi. Et ratio est clara, quia celerius ille perueniet ad mortē, nihil dando, quā duplū debitæ quātitatis. & ideo dixit Hippocrates, Paulo pleniorē: quia modicū est quod potest addi in cibo ægri, si nō plus addatur quàm detrahi possit. Neq; enim dubiū est, quòd si uellemus uni longe plus dare debito, quàm ab alio detrahere, quòd falli possemus. Nec est quòd dicāt, tantū augeri posse uictū ut suffocet: nam hic uictus nō erit. Cū uerò morbus ignotus est, seruata uirtutis tolerātia, longē tutius est declinare ad uictū tenuiorē, quàm ad pleniorē. sed hīc non fit cōparatio ad unum ægrū, sed ad duos, quorū unus febricitet leuiter, alter habeat phlegmonem in pectore gratia exempli: & in priore cū debeatur uictus mediocris, exhibeatur tenuis: in secundo cū tenuissimus exhibeatur, tenuis tunc ægri primi iactura emendari poterit: secundo ad mortē perueniente. ideo in libro Regiminis acutorū loquitur ubiq; in cōparatione ad duos ægros, non ad unum tantū. nam & in phlegmone ubi à propria uictus ratione sit declinandum æqualiter, ad pleniorē erit declinandum. Aphorismus igitur respectu eiusdem morbi differentiam plenioris tutiorem innuit: liber Regiminis respectu diuerforum morborū æqualem uariationem, in periculosiore periculosiorem docet, in leuiore tutiorem.

Ad primum Ferrariensium, particula Quicumque, refertur ad multitudinem errorum in uictu, qui possunt esse innumerabiles, maiores, uel minores.

Ad secundum refertur ad 4. Aphorismum eiusdem particulæ: nam damna communia sunt nimix repletioni & inanitioni.

CONTRADICTION VII.

Indicationes sanguinem mittendi an tres sint.

Indicationes mittendi sanguinem tres sunt principales, Robur uirium, Morbi existentis imminētis uel magnitudo, & Aetas quæ nō sit puerilis: nam quod ad decrepita pertinet, in uirtutis imbecillitate continetur, libro de Venæ sectione: reliqua non de abstinendo indicant, sed de paucitate, aut augment: non de mittendo docent. quam sententiam fermē de clauit etiam x. Artis curatiux: at primo ad Glauconem & pōst li-

bro de Sectione uenæ, docet temporis caliditatem, seu ambientis potius, prohibere ne omnino sanguinem mittamus. nam in libro de Venæ sectione, iuxta finem, quatuor docet esse considerata, Continentis caliditatem, & reliqua tria quæ in principio enarrauerat. Et in primo ad Glauconem refert, multos interiisse qui in feruentissima æstate sanguinē miserint, dum febre laborarent: unde docet hyeme parçè sanguinem mittendum: æstate autem calidissima nullo modo. Atq; sic calorē inter primas refert indicationes, frigus inter postremas. A libi uerò, ut in 9. Artis curatiuæ, & 2. ad Glauconem, primas postremis admiscet. Item in coli dolore ab humore uitreo ipse non mittit, 2. de Locis, dum de seipso loquitur, nec mitti debet. Dolor non dicitur morbus magnus nisi sit à causa calida. Respondeo, Calor ambientis ex regione, ex anni statu, & qualitate superueniente constat. Horum singulum si per se cōsideretur, ex postremis est indicationibus: nec prohibere potest ne sanguinem mittamus: sicq; remanent tres tantū indicationes. Verū si in unum coëant, fiatq; ex his omnibus continens calidissimum, quod & in ceteris accidit ex pluribus postremis, una propemodum sit indicatio prima: quæ de non mittendo prorsus sanguine docet. Cū uerò eiusdem generis esse uideretur hæ tres postremæ indicationes, facile in unā redigi meruerunt. Sed cōtrā, quia, 13. Artis curatiuæ, in lethargo sanguinem detrahes, si uirtus & ætas cōsenferint: & nec cruditas humorū, aut calor, frigus uē obfiterit. Igitur hæc ad uirtutem non reducūtur, & tamen morbus est magnus. & 5. Aphorismorum, Mulier utero gerens sanguinē misso, ex uena abortit. Igitur ubi acuto morbo laboraret non est mittendus sanguis. Respondeo, quòd in præcedēte iam dixerat, interituram si tali morbo corripiatur: igitur melius est ut abortiat. Ad aliud: Vel deficit in litera, Mittendus sanguis copiosus: uel imminet uirium imbecillitas: uel hæ indicationes prohibent si magnæ, aut plures fuerint.

cap. 21.

aphor. 31.

CONTRADICTIONE VIII.

Deriuatio an reuulsionem præcedere debeat.

Deriuationem reuulsio præcedit: ut colligitur 2. ad Glauconem, 2. At vj. Epidem. partic. 2. cōmēt. 8. Deriuatio tanquam absolutissimum auxilium reuulsionem præcedere debet. Plura possent hincinde adduci, sed nos mentem Galeni, 2. ad Glauconem, iuxta medium capituli explicabimus, similiter & loci Epidemiorum. ergo in ij. ad Glauconem tria genera educationis Reuulsionē, Deriuationē, & Euacuationem tribus modis cōparat: Primò, ratione temporis, nondū defluxa materia reuulsio cōuenit: iam defluxa, & in particulā decūbente, deriuatio: tota iam in loco firmata, corporeq; plenè expurgato, euacuatio. Secūdò, ratione loci reuulsio fit ex loco remoto, & unā habēte cōtrariā positionē: deriuatio ex proximo loco: euacuatio ex ipsa patiēte particula. Terziò, cōparat hæc gratia,

ut in uno conueniunt, siquidē in hoc, quōd ex uenis affinis fieri debent: ut omnia hæc sint secundū rectitudinem loci patientis, differenter tamen: nam reuulsio fit ex uena, quæ cum uena patientis loci in unum coincidit: deriuatio ex eadem uena, sed in parte alia à patiente: euacuatio ex loco ipso. Ergo ex hoc patet, quōd non debet unquā in genere præcedere euacuatio deriuationem, nec deriuatio reuulsionem: quia nō potest esse prius materia tota collecta, quàm in parte: nec in parte defluxa in particulam, antequam defluat, & sit in motu: uerū postquā deflexerit in parte, non dicit necessarium esse, ut antè reuellatur, quàm deriuetur. Sentētia igitur, 7. & 8. secundæ particulæ, 6. Epidemiorū est: quōd si materia quæ defluxerit sit multa, & dolorem faciens, prius est deriuanda, inde illico molienda reuulsio: focus autem à reuulsione incipies. Et ratio quā adducit est clara: quia stāte dolore magno, dolor attrahet materiā, & augebitur phlegmon, & reuulsio uirtutem minuet: atq; hoc modo ægrū duplici uia perdes. Verū si prius deriuabis, alleviabis materiā, & hoc est quod dixit Princeps 4. primi cap. 1. & Cū materiā diuertere uolueris, dolorem prius seda. Intelligit duo: primò, ut tentes sedationem eius cū lenientibus dolorem. ut, 2. Regim. acuti cap. 1. Hippoc. in morbo laterali. aliter pro dolore à statu sanguinem mittes. Secundū, q̃ stante dolore ualido, à deriuatione non reuulsione incipias: ut prius dolor sedetur. Ideo Gentilis in illius textus expositione nutauit, quia Galenū in Epidem. nō uiderat. Sed hæc ratio non potest in euacuatione, ut deriuationi præponatur, locum habere: quāuis materia tota deflexerit: & hoc, quia euacuatio ex loco totius corporis præsupponit purgationem, quæ longo tēpore indiget: hanc cū nō postulet deriuatio prætermitti quidē potest, sed euacuationi postponi non potest.

C O N T R A D I C T I O I X.

Ephamera an fiat calore in sanguine existente.

Ephamera fit, calore in sanguine existēte. 2. de Differen. febr. cap. 9. at uerò quōd fiat sanguine, nemo dixit, sed ipsis spiritibus super calefactis. 2. de Crisi. cap. 13. & Princeps prima quarti. cap. 1. & omnes. Soluitur ex primo de Dif. feb. 5. & 9. Artis curatiuæ cap. 1. in fine. Antiqui distinguiebant genera febrium in Putridas, & quæ in solidis mēbris accidebant: & Ephemeræ, quasi diurnales uocatas: at quæ Synocha dicitur, in sanguine fit, quia tamen rarius ephamera contingit, & ipsa sicut illa putredine caret: ideo, dicit Galenus, ephemerarum nomē adepta est, cū tamen non fit: nam hæc diem ipsam non solum, sed duos ac tres transire potest. Ideoq; Rasin patet deceptum esse, qui ephamera ex obstructione credidit ad octauum usq; diem pertinere posse: nam hoc nomine apud Galenum, qui à synocha ephemerā plerunq; non distinguit, deceptus est. Non igno-

ro alios alio modo scripſiſſe de hac ſententia: unum ſatis conſtat, ut in Galeni uita docuimus, ſatis maturè hunc librum illum conſcripſiſſe: minore quidem ordine, arte, ac etiam diligentia.

CONTRADICTION X.

Qui creſcunt an plurimum habeant caloris innati.

Qui creſcunt plurimum habent innatum calorem. prima Aphor. 14. ibi Galenus explicat Hippocratem, de innato, & influente intelligere. Eſt autem Innatus propriè, qui membris inſitus, tanquam quartum elementum: Influens uerò, qui ex cibis gignitur. Dicit Hippocrates, eos qui creſcunt plus caloris habere, quàm conſiſtentes. Galenus exponendo intelligit de innato tantum, nam de influente pares ſunt, niſi quòd calor puerorum ex aërea & aquea magis ſubſtantia eſt, conſiſtentium ex ignea & acriore. Hanc etiam ſententiã uidetur confirmare Auer. 2. Collec. 2. hoc argumèto, Aetiã qualitates conſequuntur paſſiuas: calor innatus fundatur in humido radicali: igitur ad diminutionem humidi, minuetur calor: quare innatus minor erit in iuene, quàm in puero. De influente uerò cum Lycus aduerſus Hippocratem inueheretur, uolens dñare uerbum illud plurimum, quia uel ad robur, uel ad magnitudinem, uel ad uehementiam referri poteſt. In primo uerbum non conueniebat, ut ualidius diceremus plurimum. In ſecundo falſus erat: nam plus in iuene, quàm in puero caloris innati continebatur: in maiori quanto maiori etiam exiſtente uirtute. In tertio damnabatur in utroq: nam nec pueri calor tactu uehemètioreſt iuuenis calore, nec uehementiori plurimū, ſeu quod Græce eſt *πλεον* congruebat. Reſpondens Galenus ſecundum modum amplectitur dicens: Non abſolutè quidem plurimum in puero adeſſe calorem, ſed in comparatione ad corpus. Exemplū autem de doliis plenis, aut ſemiplenis, commemorat: quòd fit, ut non de innato poſſit intelligere, quandoquidem hīc & in comparatione, & abſolutè maior ſit in puero: utpote cui nihil poſſit adiici ad iuuentam procedenti. Igitur de influente intelligendum eſt: qui ſi maior eſt in puero, maior quoq: ut probatum eſt, innatus, non ſolū ad corporis rationem, quonam pacto uerum eſſe poteſt quod 2. de Temperamentis. 2. dicitur, æqualem in utriſq: eſſe: quodq: maius eſt, illud tactu ſolū poſſe demonſtrari. Quod ratione ſic confirmare nititur: In demonſtratione propoſitiones debent eſſe per ſe notæ ſenſu, uel ratione: ſed propoſitio quæ his demonſtrāda eſt prima eſt ſenſu, quia huius iudicium ex ſenſu pendet: igitur ex ſecundis prima demonſtrabitur.

Sed tamē Princeps prima primi doctrina 3. cap. 3. adducit tres rationes ad probandū hanc concluſionem. Prima eſt, Calori naturali, dum creſcit homo, non aduenit cauſa corrūpens illam, quia homo ſanus non eſſet:

nec

nec augens, nam origo eius, quæ est humidum, non augetur: igitur stabit. Reliquæ rationes sunt quasi corroborantes primam. Secunda ratio, Humidum pueri est sufficiens ad calorem suum conseruandum, & augmentum: igitur augmento desinente debet etiam esse sufficiens ad conseruandum: & hoc fit in iuuentute. Tertia ratio fermè cum secunda coincidit: Humidum in pueritia sufficit ad caloris conseruationem & augmentum, in senectute ad neutrum: igitur in hoc transitu poterit aliquando unum & non aliud, non augere, non stante conseruatione, igitur conseruare non stante auctione: & hoc in iuuentute, ratio autem tenet in ordinatis, non aliter, ut patet. Ex quo liquet, quòd Galeno contradicit manifestè Princeps, in hoc quod putat posse probari: non in conclusione de æqualitate. Sed Auerrois Principi contradicit, eo quòd minorem faciat calorem iuuenis quàm pueri. Galeno uerò in ambobus. Gentilis uerò & ipse aliam inducit pro Principe rationem: ea autem est, Omnis natura quæ est principium operationis in ætate perfecta inducitur in initio generationis: sed calor innatus, est principium operationum in ætate perfecta. Assumpta propositio probari potest per enumerationem: item quia aliter natura, ut in pluribus, posset frustrari suo fine, quod est incòueniens. Auer. etiam in primo Canticæ com. 34. confitetur hanc æqualitatem, ut tamè quis neget, maiorem constituit paulo calorem pueri, ratione, ut clarum est, inductus sua. Albertus in libris de Somno & uigilia, & de Iuuentute & senectute, putat pueros calidiores iuuenibus: quia caput habent maius, & magis dormiunt. Fundatur ratio in dicto Philosophi, quòd qui habent partes superiores maiores inferioribus, sunt lōgioris uitæ, quia calidiores: libro de Longitudine & breuitate uitæ. Somnus etiam à caliditate fit uapores eleuant. Sed in pueris somnus amplior fit, ob humidum & curarum carentiam, non ob caliditatem, unde primi senes malè dormiunt. Capitis magnitudo ratione finis fuit: quia cum osseum esset, atq; idèd minus posset extendi, ut commodatus homo euaderet, ab initio maius creatum est: hi enim paruū sortiuntur, qui ab initio habent moderatum. Sed cadit in hoc difficultas alia: Operationes in iuene sunt perfectiores, quàm in puero: igitur calor naturalis etiam maior. Secundò, Humidum radicale augetur, & augeri potest: igitur & calor qui in eo fundatur.

Ad Auerrois fundamentum sunt quatuor responsiones. Prima, quòd calor influens, est superauctus tanto, quāto innatus est diminutus. hæc autem æqualitas, quæ sensu apud Galenum comprehenditur, est in còposito. Secunda, quòd ut minuitur calor naturalis, ita augetur impressio in membris: ut per hoc remaneat æqualis. Hæc responsio est sophistica, licet subtilis: admittit enim duos calores in eodem subiecto, eiùdem naturæ: item actionem aliam in proprium subiectum: item concedit calorem naturalem

turalem esse diminutum. Prima etiam non est ad mentem Galeni: nam uult, ut diximus, influentem in pueris esse maiorem, aggregatum equale: igitur innatus in iuuenibus necessario maior est. Sed ad hoc pro Gal. concordia dicere possumus, quod in aërea & aquea substantia etiam innatum humidum intellexit. uerum sic non distinguit Galenus de humido influente, & innato, neque de calore, & hæc est conciliatio in dictis Galeni.

Tertia responsio est Principis, quod calor non adæquatur humido: ideo non consumitur, nisi ad consumptionem humidi adæquati: sed solum retrahitur in puero: & hæc est etiā causa, cur in iuvene ualidior uideatur.

Quarta est, quod humidum, ut diximus, augeatur in quantitate, licet non in perfectione. Et ad hoc est ratio nostra, Corpus nutritur humido, quod est melius, quam sit illud, quod est innatum, & æquale, saltem humido contracto à principio generationis: igitur humidum uerè augetur innatum. Assumptum ex hoc ostenditur, quia homo annorum quadraginta gignit filium, qui potest uiuere annis octoginta, cum ipse solus possit superuiuere secundum naturam per alios quadraginta annos: igitur semen nostrum humidius est, & calidius, quam sit humidum & calidum nostrum: sed semen est superfluum tertii alimenti: igitur multo melius erit id quo nutrimur. Ad hoc dicunt quidam, putantes se cum Principe respondere, quod licet optimum, ac longe melius reparetur humidum, quod tamen necessario ad senium peruenitur: quia non licet intrinsecus humectare, sed tantum madefacere. Hæc responsio, quantum ad assumptum, est cum Principe: causa tamen est falsa: nam si puer crescit uero augmento, & in augmento, ut habetur primo de generatione ab Auerroë, requiritur ut quælibet pars eius quod augetur ab exteriori materia suscipiat incrementum: aliter non augmentum, sed appositio dicitur: igitur humidum tale innatum uerè crescit, & augetur. Causa tamen, cur homo necessario senescat, est: quia id quod consumitur est purissimum, nam terrea pars consumi nequit: quod additur, licet sit melius humido innato, non tamen potest esse melius humido quod consumitur, aliter non esset mixtum ex quatuor elementis. Quare necessario quamuis melius humidum innato in dies reparetur, humidum tamen innatum fit magis terrestre & imperfectum.

CONTRADICTIONE XI.

Humidum radicale an à calore naturali consumatur.

Circa hoc dubitatur, an humidum radicale consumatur à calore innato. Respondet Galenus primo de Tuenda sanitate, quod sic: uerba eius iuxta initium subiungere libet, sunt autem hæc: Ergo statim in generationis initio coniectum copiosius elementum oportuit, quod siccati uim haberet: est uerò id natura maxime ignis: sed tamen & terra, est enim
ca

ea quoq; res sicca : uerùm huius plus immisceri principiis non erat, si modò hæc humida erant futura. Ignis certè, quo minus plus sit admixtum, nec obstat quicquam : & sanè admixtum est tanto plane plus in utroque principio, quantum ne torreat, urat ue, & tamen abundè siccet : Quippe etiam tantus calor adhibitus agilitatem ad motiones præstare fat erat. Ab hoc igitur primum cogitur, paulatimq; cōcrescit, quod in utero conceptū est : mox siccius redditum, ueluti lineamenta quædam, rudimenta que cuiusq; membri obtinet. Vterius uerò etiam siccescens non modò lineamēta & rudimenta, sed etiam exactam uniuscuiusque speciem ostendit. Iam uerò in lucem editum & magnitudine proficit, & tum siccius, tum ualentius semper efficitur. donec ad summū incrementum (ἀκμή Græci uocant) sit peruentū : tum uerò & incrementū omne sistitur, ossibus nimis ipsis per siccitatem non ultra sequacibus, & sanguinis spiritusq; uasa, spiritus ipsius flatu in latum aguntur: cuncta deniq; membra non solū robusta fiunt, sed etiam uires suas summas obtinent. In eo uerò quod sequitur tempore, omnibus iam partibus supra iustum siccescentibus, nō solū cuiusq; officium minus probe administratur, sed etiam corpus ipsum macilentius, graciliusq; quàm antè, redditur. Ergo ultra siccatum, non macilentius modò, uerum etiā rugosum efficitur. Artus quoque ipsi inualidi, atq; ad motus suos incerti inconstantesq; redduntur. Affectio hæc in animalibus senium appellatur, ei quæ in stirpibus *ἄνωσις* Græcè dicitur, proportionē respondēs. Est enim illa stirpis senium siccitatis excessu proueniens. Vna hæc igitur est omni genito corpori corruptelæ interitusque necessitas. Altera est, quæ etiā in animalibus præcipuè cernitur, totius substantiæ fluor, quem insitus calor excitat. Hæc itaq; incōmoda nullū quod genitum sit corpus effugere potest : reliqua quæ sequuntur prouidentia consilioq; certè potest. Hæc ille in quibus humidi radicalis consumptionē ab innato calore sine cōtinentis aëris memoria ulla nobis declarauit. Sed tamē in libro de Dissolutione cōtinua, in ipso initio inquit : Quia corpora humana ab ipso calore innato, & calore aëris nos exterius ambiētis, dissolutionē continuā patiūtur, ideo necessaria fuit ciborū ac potuum administratio. Sed hæc autoritas Galeni nō est, nec liber ille suam retinet dicendi grauitatē. tum uerò illud clarum est in libro de Tuenda sanitate, rem hanc illum ex composito tractasse. Auicenna autem cōsumptionem hanc ambientī nos aëri primo tribuit, non naturali calori: unde prima primi Doct. 3. cap. 3. Præterea sciendum est, quòd caliditas post tempus cōsistendi minui incipit, propterea quòd aër circundās, materiam eius, quæ est humiditas, exiccat. Calor quoque innatus, qui est intus, ad hoc adiuuat : & labor proueniēs ex motibus corporeis, & animalibus, qui necessarii sunt in uita: & defectus naturæ ad resistendū illi semper : omnes enim uirtutes corpo-

reæ sunt finitæ,quare operatio earum nõ potest esse perpetua.Ex his uerbis luce clarius est, Principẽ uelle aẽrem esse principalẽ causam exiccãdi corpora nostra: calorem autẽ naturalẽ quasi per consequentiã.Est autem ratio pro Auicẽna clara,nihil agit in seipsum, igitur cum calor naturalis sit in ipso humido,nõ aget corrumendo illud. Item calor animalium secundũ Philosophum est calor non igneus,sed coelestis: unde & Galenus, 11. Artis curatiuæ. c.8.calor naturalis conseruat corpora: sed præternaturalis corrumpt,& depascitur carnes, & pinguedinẽ.2. de Generatione animalium,cap.3.dicit,Cæterũ calorem in animalibus cõtentũ, nec ignem esse,neq; ab igne originem ducere,manifestũ ex his est.Manifestũ est autem quòd Galenus aliter censet,nam libro de Vsu respirationis, uult calorem nostrũ esse igneum,sumpta similitudine,quòd non secus ac in fornace ignis prohibita transpiratione extinguitur.Est igitur hĩc alia inter Galenum & Aristotelẽ discordia,quæ præcedentis causa est. Verũ neq; illud cõcedere cogimur,quòd si calor animalis etiã sit igneus, ob id debeat,cũ sub forma mixti est,agere in subiectam materiã. Primò,quia elementa sunt in potẽtia in mixto, 2. Collec.cap.1.apud Auer.& ideo nõ possunt cõcurrere ut agentia ad corruptionẽ.Secundo quia ipse in 4.disput.dubio 2.uult,quòd causa corruptionis est materia,& nõ dicit quòd sit forma elementĩ.ipse etiã Auicẽna 12.de Animalibus cap.3. repetit idem quod dixerat,uolens quòd consumptio humidi principaliter fit ab aẽre, deinde à calore naturali.Aristoteles autẽ in lib.de Longit.& breuit.uitæ cap.1. uult, quòd agant in seimicẽ contraria,dicens:Si igitur quãdo actiuum & paties simul sunt semper alterũ agit,alterum patitur, fieri non potest, quin fiat mutatio. Vult igitur,quòd contrarietas omnis, seu interior, seu exterior, corruptionẽ pariat.Sed alia exurgit maior difficultas:nam Philosophus 2. cap.quærens, Cur masculi diutius uiuunt foeminis in eodẽ genere:respondet, Quia plus habent caloris.Ideo cum nullam aliam reddat causam, calor humidum non consumit: aliter quæ plus haberent caloris,essent breuioris uitæ.quandoquidẽ constat eodem capitulo illum fateri senectutem esse exiccationẽ.Idem colligitur 2.de Tuenda sanitate,Exercitium auget calorem naturalem,atq; ideo attractiuam,cõcoctricẽ,& nutritiuam: ex quibus solida membra molliora & humidiora fiunt: sed si calor auctus cõsumit humidum, magis corpus exiccabitur ex exercitio,quàm ex perpetua quiete,& magis ex moderato, quàm immoderato: quia ab immoderato exercitio calor minuitur,& à moderato augetur.Igitur patet, quòd à maiore calore fit maior exiccatio.Nec potest dici, quòd ratione melioris nutritionis reparat copiosius humidum:nam istud est declaratum in Cõtradictione præcedente: quòd nunquam potest humidum, quod iam est exiccatum,melius reddi ullo ingenio, uel arte. Igitur calor naturalis au-

ctus

et us nunquam poterit compensare iacturam iam factam, & quam facit, plus consumendo de humido radicali.

Est tertia ratio contra Galenum, quia ipse concedit 8. de Dogmate Platonis & Hippocratis quod calor insitus in sanguine & pituita consistit ex caliditate & frigiditate temperatus: quare non poterit magis calefacere, quam infrigidare: imò magis humectaret, quia humidus, quam exiccaret. Alia ratio sequeretur, quod homines fame enecti, deinde restituti, non possent diu uiuere. Nos autem uidemus oppositum experimento: quod illud parum, uel nihil obest uitæ diuturnitati. Est etiã aliud fundamentum ex libro de Iuuentute & senectute cap. 2. nam querēs, cur animalia calida sint, calorē in sanguine cordis non in substantia illius constituit. At talis calor exiccare non potest: exiccabit enim prius sanguinem in quo est. item ille calor non est innatus, sed influens. ipse etiã in cap. 3. dans rationē corruptionis caloris naturalis, dicit: Quod utriusq; & marcoris & extinctionis causa est una, alimenti subtractio. Igitur in senio cum explicet per alimentum cibum coctum, manifestum est humidum ipsum radicale à calore non consumi. in lib. etiã de Respiratione & inspiratione, dans causam senectutis, dicit eam esse caloris naturalis diminutionem. Rursus ostendens causam diminutionis caloris naturalis in senectute, docet esse paruum & non expeditã illius perfrigerationē, propter pulmonis siccitatem, & branchiarū eius: igitur causa non est consumptio humidi à calore innato. ad quid enim querere causam quasi per consequentiã, si primaria in propatulo est? Est etiã experimentū pro Philosopho, quod homines eo uiuaciores quo calidiores, nō quo humidiores: quod tamē necessarium esse cōsentiēti Galeno cōfiteri. Auerroës autē uidetur in paraphra de Long. & breui. uitæ Galeno consentire dicens: Et corruptio accidit eis cito duabus de causis: quarū una est consumptio naturalis humiditatis, quæ est in corpore, & dominiū frigiditatis & siccitatis in eis: & hoc erit quādo utentur rebus extrinsecis opportune. Igitur patet, quod talis uita brevis sit per consumptionem celerem humidi, & non ab aëre, quia non uteretur rebus exterioribus conuenienter. Sunt autē tres hæ rationes claræ pro Galeno. Prima est, dum corpus foetus est in utero, perpetuò exiccatur, & ibi nō ab aëre, sed à calore proprio, igitur & extrā: & est ratio posita in prima autoritate iam dicta eius. Secunda, Ossā senum & cartilagine cum inciduntur inueniuntur sicca: igitur humidum radicale in eis consumptū est. hanc ponit in libro aduersus Lycum. Tertia, A sinus & homo eiusdē regionis æqualem uitæ diuturnitatē habent. Respondeo, quod conciliatio Aui-cennæ cum Galeno est difficilis: quoniã Princeps motus est quasi autoritate Philosophi in de Longi. & breui. cap. 1. quid autē tenuerit Philosophus, respondeo, quod calorem in sanguine existentem, ut est in corde, in-

natum uocat: alium qui in membris est à temperatura. qui uerò in illa influitur à corde influentē. Calor membris proprius nō exiccat, tum quia non mouetur: ignis autem exiccat ratione motus: nam calor ille est refractus, & cōtinetur à forma mixti. Sed nec calor innatus propriè agit in humidū, nisi ratione motus, sicut & influens. Hic autem motus fit uel iuuatur ab aëre, idè aër est causa prima cōsumendi humidū. Idè plurimū confert habitare in regione calida & humida ad uitæ longitudinē, ut circa mare, ut colligitur ab Auer. in paraphrasi dicta. Galenus autē considerat eundē calorē ut includit omnia sibi necessaria, motū siquidē, & aërem: & hoc modo ipse principaliter cōsumit humidū in mēbris existens: & ita nihil agit in seipsum. quare disidium Galeni à Principe est in uerbis tantum: & est, ac si diceremus, homo principaliter est intelligens, & anima humana est principaliter intelligens. Vtraq; propositio est uera, sed tamē non sunt contrariæ, nec repugnantes. & Philosophus uult tamē quòd antequam cor ad tantam siccitatem perueniat, ut cogatur calor extingui, quòd prius pulmo siccescat, & sic motus refrigerationis impediatur. Embrio autem in utero habet motum & aërem, ut patet à Galeno in libro cui titulus est, *An animal fit quod in utero continetur*: quamuis liber ille Galeni esse non credatur: manifestum est etiam ex umbilici arteriis, quæ necessariò spiritum ducunt, ac ex consequenti motum: quare ueritate intellecta non est difficile obiecta diluere.

CONTRADICTION XII.

Zinziber an humidum.

Zinziber calidum est in tertio, siccum in secundo. Auicēna 2. Canonis. cap. proprio. Serapio cap. 336. dicit ipsum & connumerat inter calida & humida in tertio: quare maxima est differentia inter humidum in tertio, & siccū in secundo. nec potest propter ordinē dici, quòd sit error, ita ut loco humidi debeat scribi siccum: nam reliquæ tales etiā sunt medicinæ de quibus ibi tractat. Hæc contradictio est magnæ considerationis: nam inuenire medicinam calidā & humidam in tertio gradu, & cum hoc odoratā, esset ualde utile, & necessariū. Dioscor. lib. 2. cap. 146. dicit ipsum calidum, uimq; ferre piperis totā æquare. Porro piper siccū apud omnes esse uidetur, ut etiam ipse Serapio id inter medicinas calidas & siccas in quarto gradu connumeret. Paulus uerò dicit, Zinziber adèd inuictam humiditatem obtinere, ut primo occurfu calefacere non uideatur. lib. 7. Galenus & ipse 6. libro zinziber calidum & humidum statuere uidetur: sed subiungit, *καὶ μὴ οὖν ζιγγίβερι καὶ τὸ μακροπέπερι καὶ εἰς διαφέρει τὰ ὅτι τὸ μέλαν & πεπέρει, καὶ ἐπ' ὀλίγον*, quod est, Hoc quidem zinziber, ac longum piper, etsi hoc modo à nigro pipere differt, attamen parua est

est hæc differentia. Subscripti Græca propter errorem in translatione. Igitur non humidum est Zinziber in tertio, quandoquidem parum à nigro differt, nec piper omne siccum, cum longum zinziberi natura simile sit. Auer. v. Collectaneorū uult zinziber esse calidū in tertio & humidum in primo: idem de longo affirmat pipere. Rasis tertio ad Alman. 34. dicit ipsum esse calidum & humidū. Idem 22. Continen. 353. auctoritate Atau- bionis dicit esse calidum in tertio, humidum in primo. Sed auctoritate Bi- masui dicit, quòd qualitas caliditatis est in tertio gradu, sed in fine: & hu- miditas in primo, sed in fine. Est autem odoratum atq; ideo calidū, ut 2. de Alimentis, cap. de fructu iuniperi. sed non uehementer, dicebat in libro de Attenuante diætā: ubi odoratum rodenti & mordicanti comparat. Igi- tur qua mordicat in fine uehementer excalefaciet: qua solum odoratum, mediocriter. Conferunt autem quæ bene olent discutiendo interiores col- lectiones omnia, tum maxime quæ altius infederint. 14. Artis curatiuæ, cap. 12. Sed Zoar uidetur sentire, quòd conferunt omnibus membris prin- cipalibus, quod & Galeno placere uidetur. 7. Artis cur. cap. 4. igitur con- cludendo dico, quòd si feruetur conditum quòd erit calidum in tertio, hu- midū in fine primi: & hoc uoluit Galenus & Serapio. Pro quo animad- uertendum est, quòd Serapio diuisit medicinās in quatuor gradus, solum ratione primarum qualitarum, non secundarum, ut testatur in fine primi capitis de simplicibus medicinis. Vnde quando dicit, de medicina calida & humida in tertio: uult dicere, de medicina humida quæ sit calida in ter- tio. Et cum dicit, de medicina frigida & humida in secundo: uult intelligas, medicinam humidam sub quocunq; gradu sit: quæ sit frigida in secundo, & hoc patet ratione, aliter non daretur unquam medicina apud illum in dispari gradu in actiuis ac in passiuis: quod est ualde absurdum, cum innu- meræ tales sint, ut semperuiuum, quod apud Gal. est frigidum in tertio, & leuiter tamen siccatur: contra acatia exiccat in tertio, in frigidat solum in secundo: ita ciolamen calefacit in secundo, exiccans in tertio, ut patet 6. & 8. de Simplicibus medicamentis, capitibus propriis. Cur autē Serapio non curauerit de gradu in passiuis, est, quia Gal. & ipse plerunq; ordinem in il- lis qualitatibus prætermittit, tum quia minoris periculi, tum etiam quia difficilioris experientia. Serapioni igitur actiuarum qualitarum gradus sufficit. Porro non conditum, iuxta medium primi gradus humidum est: & in caliditate par ratio, nisi quia celerius imprimit, & celerius finit. At Auicenna operationē ultimam considerauit: si siccatum iam & priuatum superfluo humido exhibeatur, nec conditum, nec cum alio medicamēto, (nam, ut referunt, immaturum est quod ad nos defertur) nec cariem ante- quam colligatur contrahat. Est enim radix herbæ ut gramen, repullulans sub terra, in India nascens: porro Lilii radici ac naturæ magis similis est,

quanquam folio ualde dissimili. Matura igitur si colligatur radix, & ficitur, tandem ex usu poterit ficare. Sed forsan decepit illum quod in. s. de Tuenda sanitate Gal. scriptum reliquit in fine: Omne immodicè calidum exiccare tandem non leuiter: sed hoc in uiuentibus, & animalibus, quæ præsentē calore fruuntur, tantum uerum est non in medicamentis, quæ ab alio tantum mutantur, & locum materiæ habent.

CONTRADICTIONE XIII.

Zinziber an flatuosum.

Zinziber est resolutiuum inflationis. Princeps 2. Canonis, cap. 746. Loppo. uidetur. in eodem lib. tract. 1. cap. 4. post medium dicit, quod semen erucæ & Zinziber sunt medicinarum flatum generantes. Solutio est, quod medicina potest flatum gignere uel in prima, uel in secunda, uel in tertia concoctione: exemplum primæ est aqua: secunda autem olera, quæ etiam in prima concoctione gignunt, si frigida sint: exemplum tertiæ eruca, mel, Zinziber, longum piper: & tales dicuntur medicinarum iuuantes uenerem. Zinziber igitur est ex hoc genere faciens flatum in uenis, dum tertia concoctione transmutatur. Sed contra, quia Princeps ibidem in cap. proprio, autoritate quorundam, quod retinet coitum. Respondet Princeps, quod iuuat coitum confortando uentriculum, & tollendo humorem mucilaginosum: & ita hoc modo non uidetur parere flatum in tertia concoctione, quia constat. 2. Can. trac. 2. cap. 53. quod assa iuuat ad coitum, & non cet uentriculo: & hoc est, quia parit flatum in tertia concoctione, & in prima. Per primam nocet concoctioni, per tertiam iuuat coitum. Respondeo, quod possumus distinguere, primò de Zinzibere: nam album conditum, recens immaturum, coitum adiuuat, & flatum in uenis non mediocrem parit, ut experimento patet: siccum uerò per se & maturum, in humidis corporibus etiam concoquendo humida relicta in uentriculo, ut agens parit flatum in tertia concoctione, non ut materia, & coitum iuuat: per se autem sic sumptum, uentriculo mundo existente, omnem flatum discutere solet, atque hoc modo coitui nocebit: admixtum autem humidis, semper flatum excitat: ob id uerò, & quia ut odoratum calorem adiuuat naturalem, omnibus fermè ad uenerem medicamentis immisceri solet: quæ ratio etiam in longo pipere tenet: uerum longum piper in antidotis magis in usu est. Zinziber ut conditum mirum appetitum ueneris excitat. Serapio affirmat semen augere, atque hoc ut dixi intelligendum est.

CONTRADICTIONE XIII.

Corpora purganda an fluida reddenda sint.

Corpo

Corpora cum quispiam purgare uoluerit, oportet fluida facere. 2. Aphorifi. 9. at. 7. Aphorifi. 66. scribitur Aphorismus idem, his uerbis adiectis. Et si supra aluum, sistere, si infra, humidiores reddere. Ergo uel primus incompletus, uel secundus habet quod extra propositum est. Galenus in commento, 66. Aphorismi dicit adiectitium esse superfluum. supraq; hoc in quarta particula esse demonstratum: uidetur igitur intelligere de. 13. Aphor. quartæ particula: sed tutius legemus, *κατὰ τὸ δυνάμιον* pro *κατὰ τὸ τέταρτον*. id est, in secundo Commentariorum, id est in hoc. 9. Aphor. declaratur enim quod oportet fluida reddere corpora, meatus ipsos faciles reddendo, tum incidendo tenaces humores, tum subtiliores reddendo qui sint crassi. At quidam ultra Græcam lectionem, quasi *ἐν φθύνειον* ascriptum esset, in 9. Commēto superaddidere, Absterfis: quod cum desit in Aldino codice, etiam uitiosam Galeni sententiam reddit: qui duo tantum superius antiquæ expositioni præcepta superaddiderat, nunc tria, interpretationem facit operosiorē.

C O N T R A D I C T I O X V.

Saccharum an minus melle detergat.

Zucarum non est melle inferius in abstergendo, & mundificando 2. cap. tracta. 2. cap. 755. oppos. septima terti cap. 2. de dentium absterfione loquens dicit. Et Zucarum in abstergendo melle inferius est, & prima quarti tracta. 2. cap. 8. Nunc autem mel cannæ (quod est Zucarum, & propriè mundificatum,) melius est melle apis, licet eius absterfio sit minor absterfione mellis. Auerro. 5. Collectaneorum cap. de melle. Et mel cannæ est minoris absterfionis, caliditatis, alio melle. Dioscorides libro. 2. cap. 73. de melle: Saccharum agnouisse uisus est, sic tamen ut iam tunc in frequenti non esset usu. appellatq; indicum sal: existimo nondum arte inuenta per ignem copiam habendi, fuisse rem raram, quia non propagatam ignota adhuc lucris uia. Gal. libro. 8. Artis medendi. cap. 4. Sacchari mentionem facit melli illud assimilians. at uerò in. 10. libro cap. 11. cum mel in hecticis febribus asinino lacti misceat, illius fermè naturam ignorasse uisus est: quanquam, ut diximus, rem cognouerit, tunc raram, & cuius exiguus esset usus. ostendit autem illud libro. 7. Simplic. medic. cap. de melle. unde agnouisse palam est, sed non in usu fuisse. Quod igitur ad contradictionem attinet: id quod sponte fluit, cum nullam aquam admixtam habeat, uocaturque Sulimenum à Principe, & est quod cognouit Galenus dicens non adeo esse dulce ut mel, hoc nulla ex parte melle inferius est in abstergendo. Reliquum, quod nobis in usu est, propter admixtam aquam, cum palam sit melle dulcius minus abstergit.

Rhab

Rhabarbarum an calidum.

Rhabarbarum est frigidum, ut habetur decimasexta tertiū tractatū. cap. 4. enumerans enim medicinas frigidas astringentes omnes, adnumerat illis rhabarbarum: nec in noua emendatione sublatum est, nec potes dicere esse ambiguitatem propter uerbum. Et medicinæ singulares absolutæ aut secundum uirtutem retentiuam. Nam primò connumerat illico astringentes calidas, inter quas non ponit rhabarbarum. Secundò, quia medicina astringens ut talis est, semper est frigida & sicca, ut colligitur 4. de Simplic. medic. cap. 7. quanquam ibi uideatur de sapore tantum loqui: uerum illud clarum est. ad rem reuertor: Rasis 3. ad Almanforem cap. 47. ponit ipsum calidū, & 22. Continentis. 332. ponit autoritate Chum, calidum & siccum in secundo. Auer. uerò 5. Collectaneorum dixit, quòd Galenus numerauit hanc medicinā inter illas quæ non soluunt, sed astringunt: & tamen ipse uult ut purget, & connumeretur inter innoxia medicamenta. Mesue uerò ponit & calidum & siccum in secundo cum Rasi, & purgare illud docet: cum Auer. ut experientia etiam attestatur, Serapio 206. cap. describit Rhaponticum, potius quàm rhabarbarum: neque enim purgatorium medicamentum esse agnouit: sic igitur Galenus, sic Dioscorides, sic Aëtius, sic Paulus omnino ignorasse uidentur hanc radicem. Sed & Princeps cum cap. proprio. 2. Can. statuat Rhabarbarum inter astringentes medicinas, nullam purgantem facultatem tribuens, quod nec in aloë, uel agarico facit, aut aliis purgantibus medicinis, ipse etiam rhaponticum præterit: nec mirum est quòd ante accessiones scribat Dioscorides uelut agaricum datum rhaponticum prodesse: non enim purgando: esset enim insulsiſſimus medicorum, dare medicamentum purgandi gratia ante febrium accessiones: sed ratione tollendi rigoris. Itaq; primus uidetur Auerroës post Mesue rhabarbarum agnouisse, & quòd etiam purgaret intellexisse. Verum inter modicè calidas medicinas illam refert, cuius uis præcipua sit astringere: quo fit, ut nec de qualitate nobis satisfaciatur Auicenna, frigidum statuens: Galenum enim putauit se imitari. qui 8. Simplicium medic. rhaponticum proculdubio, non rhabarbarum describens, temperatum esse ait: atq; ita inter frigidas ratione non leui, cum astringat ut frigidum, ab Auicenna potuit adnumerari. Ex quo patet, cum ex descriptione Rasis non rhabarbarum, sed rhaponticum definierit, frustra calidum & siccum in secundo gradu ipsum statuisse: nam tale est rhaponticum. Sed excusat Rasi aliena autoritas, non enim ex mente propria locutus est. Sed illud etiam nos torquet, quòd Paulus lib. 1. cap. 43. inquit, Terebentinam oliuæ magnitudine aluum ciere: uerum si uelimus acrius
subd

subducere, pauxillum rheu superaddere debemus. quare purgatoriū erit rhaponticum. Vel ipse rhabarbarum uerum agnouit, sed lectio antiqua Rhu habet, quod Sumac dicitur. Græcus etiam codex manu scriptus habet *ῥῶν*, temerē igitur permutata dictio est. At rhus astringit non leuiter. Verū cū dormituris detur illud forsan cōtingit, quod Galenus dicebat 2. de Alimentis: Astringētia à cibo sumpta aluum nō parū subducere. Temerarium igitur est uelle fidem codicum tam leuiter infringere. Quamobrem illud iam tantum obstat, quod Galenus tantus uir hanc medicinam uel ignorauerit, uel usum eius nō cognouerit. Sed quid mirum? cū multarū aliarū, quas hīc cum his subiūgemus, naturā, ac uim nescierit, et si aliquas, ut māna, sub alio nomine, & sub aliis uiribus agnouisse uisus sit.

Medicinæ nobiles, quarum usus Galeno incognitus fuit: Saccharum, Rhabarbarum, Manna, Cassia fistula, Colutea, seu Sena, Mirabolani ut purgantia medicamenta, Moscus, Caphura, Ambra, Santhali: uerū hos sub Aspalathi nomine, ut & Dioscorides tamen, uirtutem agnouisse potuit si Santhalum est Aspalathum.

C O N T R A D I C T I O X V I I .

Impura corpora an copiose nutrienda.

NON pura corpora quāto magis nutriēs, tātō magis lædes. 2. Aphor. 10. ubi legitur *τῶν σωματῶν*, pro *τὰ σώματα*, sed uidetur oppositum prima Aphor. 17. nam ibi Galenus dicit, Si enim uires laborātis debiles fuerint, & ea quæ in corpore est dispositio ex corruptione humorū, uel defectu, parū & sæpe his dandum est de alimento. Parum quidē, quia uirium imbecillitas non potest totā simul alimenti multitudinem sustinere: sæpius autē, quoniam multis indiget dispositio. Defectus siquidem adiectionē exigit, corruptio contemperamentū. Et rursus in eodē: Autūnus morbis, qui ex corruptione fiunt, assimilatur. Quapropter qui eo febricitant tempore, continua optimi indigent adiectione, & si uires ualidæ fuerint, sæpe & multa dabimus: sin imbecilles, pauca, & sæpius afferemus. Sub eadē fermē sentētia scriptū est tertia primi Doc. 2. cap. 7. Quum uerō fuerit corpus repletum malis humoribus cum subtilitate, ipsum nutriētibus laudabilibus copiose refice. Et rursus in eodē capitulo ante dictā autoritatē scribitur: Et sæpe etiā cōceditur illi, in cuius corpore mali habentur humores, ut rem bonā largiter comedat, & propriē cum nō patitur uentrē sibi solui. Est etiā experimentū 5. de bello ciuili Cæsaris: dum enim exercitū fame & cibis improbis debile ac morbosum haberet, ingressus Agar ciuitatem, totū illū refouit, tum maxime uini copia: nam largissimē epotum, illos qui uel ægri essent, uel debiles restaurasse ait. Vinū autē copiose nutrit, ut in aphorismo sequente. At uerō prima Hippocratis sententia à

f Galeno.

Galeno aliàs recitatur:& rationem secum habet: nam adiectum putrido, putrescit: quare quantitate augetur quod inimicum naturæ est, qualitate autem manet.

Multæ solent dari ad hanc cōtradictionem uariæq; à recentioribus responsiones. Prima, quòd in hoc Aphorismo Galenus intelligit de cibo restaurante iam defectos: in aliis locis de cōmuni, qualis his, qui in custodia sunt, exhiberi solet. Secunda, quòd Galenus ibi loquitur de uictu necessario, coactòq;: hic uerò de eo quod illi corpore æqualitatis ratione cōuenit. Tertia, quòd intelligunt de cibo medicinali, qui cū uirtute ea præditus sit, corporis humores possit emēdare: uel quòd loquitur ratione præparationis ad euacuationē. Gentilis in utraq; Principis autoritate nutat: uolens intelligi illā de cibo ad uomitus præparationē dato. uel quòd contemperare possit humores, ut est dictū iam Galeni. Respondeo igitur, cū hæ responsiones imprudentē faciāt Auicēnā, qui tam difficili re proposita principale prætermiserit, ex præsentī cōmento colligi posse cōcordiam, quæ est: Qui nō appetunt (nam hæc est extrema octauī Aphorismi pars, quæ à Galeno, prætermisso nono, censetur adiungenda præsentī) debent à restauratione cauere: quoniā humoribus corruptis in uētriculo solo existētibus, seu etiā in illo, atq; etiā toto corpore, quāto plus nutries, eo magis lædes. Non sic cū uentriculus mundus extiterit, quāuis corpus reliquum putridis sit repletū humoribus: quo in casu copiose reficere debemus: namq; præsentia humoris corrupti in loco cōcoctionis, prohibet cōcoctionē, atq; corrumpit. At uerò in cæteris locis cū iam absoluta fuerit omnis coctio, permixto bono cum malo, torū minus noxiū efficitur. Sed cōtrā 2. Aphor. 32. Quicūq; circa initia bene cibati, rursus fiūt nō appetētes: igitur uentriculus mūdus nō sufficit. Respondeo: in 2. Aphor. 10. loquitur in morboſis iam seu cōualeſcentibus citra purgationē. Tres igitur ad copiosum cibū rectē sumēdū in impuro corpore cōditiones requirūtur. Verū eam cōsules Contradictionē, an putredo à sola obstructione fiat.

CONTRADICTIONE XVIII.

Vinum aquosum an magis urinam prouocet, an rubrum nigro magis nutriat, an austerrum urinam prouocet, an in syncope conueniat, an album tam in prospera quam aduersa ualitudine salutare, rubrum an flauo melius in tuenda sanitate, an omne uinum calidum etiam si sit album.

Vina alba, & tenuia, quæ aquosa dicūtur, minime ut nutriunt, etiam urinam prouocant: at rubea colore, crassaq;, plus alimenti præbent quàm reliqua uina. 2. Aphor. 11. Verū ad proficiendam urinam s. de Tuenda sanit. ante medium, præfert quod substantia tenue est, & colore flauum non album: flaua autem clalidissima ibi esse uult: contrā alba frigidissi

gidissima: media inter hæc statuit, quæ medii coloris sunt, ut pallida: non tamen ad rubra nigraue comparat in caliditate: unde (ex dictis) adiicit. Hippoc. etiam 3. Regim. acut. 6. dicit, alba uinosa ac potentia maxime urinam prolificere. Galenus quod in 5. de Tuenda sanis, præterierat, adiicit, exponens illorum ordinē à calore: Sic flaua, inde fulua, post rubea, post dulcia, (per quæ nigra illū intelligere est existimandū: forsitā uel oblitus nō adiecisse colorem, uel mendo scriptoris omissa) ultimo alba. Igitur quinque ordinibus ea distinxit. Potentia igitur flaua uel fulua quæ albo simillima uidentur, uehemēter urinā educunt: non aquosa. Illud etiā cōtradicere uidetur secundæ parti quod 2. Aphor. 18. scribitur, dum dixit, Crassā quidē ac rubea tanto à nigris in nutriendo plurimū superantur, quantū superāt in præstādo uniuersum & uelox alimentū. Quidā dicunt illa confundere Galenum: sed quid absurdius, illum dicere cōfundere, qui ea cōparet? Alii nigrum robustius alimentū, rubrū uerò celerius præstare dicunt. Sed quomodo sic rubrū crassum cæteris uinis copiosius nutriet? Accedit tertium incommodū: nam Dioscor. lib. 5. cap. 6. dicit, quod albi usus cōmodior est tam sanis quàm ægris. Vt postmodū ad ætatem peruenit mediā laudat, ut non nouum, nec antiquū sit: tale autē probat septē annorū, tanquā in cōsistētia medio: laudat autē austerū ex sapore aliis præferens. At si quis animaduertat, quisnā primo usus erit rubri, nigri, flauī? at flaua tenuia cōmodissima senibus: nō igitur alba. Caliditatē autem per tēpora diuidit Galenus 8. de Simplic. medic. iuxta princ. dicens: Vinum nouum mustū in primo gradu calefacientiū est, antiquū in tertio, mediæ ætatis in secūdo. Quomodo igitur cum Dioscoride cōuenit? an ne mustū dicemus ad annos usq; sex, uel etiā ad summū duos iam? Sed & in 8. Artis curat. cap. 6. præponit omnibus in proliciēda urina album mediocre in caliditate austerumq;: quod et si sit probatissimū, iuxta Dioscoridē, attamen ab aliis hæc dissidet autoritas, ab aquoso ac potēti laudē eam tollens. Declarat tamē quod Sabini, Adriani, Albaniq; ac taliū nobiliū uinorū, nō cæterorū tantū, usus ante sextū annū nō sit, quod grauēt uentriculū, & innatēt illi. De austero uerò est difficultas maxima, quia 3. Regim. acut. 6. textu, ei tribuatur quod urinā supprimat: ob idq; ab his, qui suppressam habēt illā, uel sputum prohibetur: nisi dicas, quod fuluū dicat: at hoc maximē, ut dictum est, prouocare dicitur à Gal. si solius coloris ineas rationē: ergo sapore id fiet. At uerò in de Attenuante uictu, in fine: in proritanda urina fuluum albo postponit, cum tamen in sputis fuluum & flauum præligat: potentia, dulcia, omnis expertia austeritatis: itaq; Gal. undequaq; sibi tum cum Dioscoride discors esse uidetur. Idem 2. de Locis affe. cap. 9. tantam inesse uim caliditatis ac siccitatis uino antiquo refert: ut cum Grāmaticus puerum domi reliquisset, isq; siti tentatus largiter uinum antiquum ebibisset, in posterum perui gil

semper remanserit, donec febre correptus simul ac delirio, mortuus sit. quo fit ut suprà dictum de uini caliditate confirmetur.

Res igitur ad tria refertur capita, quorū primum est, An aquosum, an mediocre, an potēs uinū magis urinas prouocet. Secundū, An rubrū uinū nigro magis nutriat. Tertiū, An austerū uinū supprimat urinas, an prouocet. Mihi certē uidetur facile primū discutere, nā aquosum cū minime nutriat, maximā materiā urinæ relinquit: atq; sic si corpus mundū extiterit, calorq; potēs ualētius urinā ciet. In prouocādo uerò, ac educēdo alienas partes aquosas, potēs uinū præponi debet: mediocre autē inter ea quæ cōueniūt his, de quibus sermo ibi habetur, in urina proliciēda est præstātissimum: quod tamē potēti cedat, uel aquoso, nihil refert: quādoquidē illa nō cōueniāt ut nimis ualida, uel imbecillia. De secūdo dicamus, Nigrū quidem copiosius alere longo usu, quia nutrimentū eius minus dissoluitur, et copiosum estat rubrū tamē copiosius alit in singulas uices. Ad tertiū dicimus, Vinū quod austerū est minime ut tale urinas prouocare, sed sic esse saluberrimū: attamē cū etiā hoc albū sit, & non inualidum substātia, & qualitate, ut subtile calidūq; urinas prouocat. Mustū autē dicitur in nobilibus uinis (qualia Galenus appellat) Italicis, aut Græcis, ad annum usq; sextū, uel ut Dioscorides, usq; ad septimū: uerū uina uulgata mediocrē ætatē, alia primo, alia secūdo, atq; ita deinceps anno fortiūtur: ut singulum illorū nobilius extiterit, serius. Verū albi uini usus, qui ad eō cōmodus in utraq; extat ualitudine, ad flauū & fuluū extēditur: nā ibi rubrū ab albo Dioscorides tantū distinxit, ac nigro, ut tria sint eius uini genera tantū à colore sumpta, cū apud Galenū quinq; statuātur, (ut dictum est) hoc ordine, flauū, fuluū, rubrū, nigrū, albū. Sed Aëtius lib. i. iuxta si. eadē fermē de colore rubro et nigro sentit, quæ diximus: nā rubrū crassum nigro præponit. Verū cū in fine capituli dicat, rubrū uinū subtile, modiceq; astringens, tā sanis quā cōualescētibus optimū esse, Dioscoridi cōtradicerē uidetur. Causa autē, cur uinum subastringēs ab Aëtio laudetur lib. 9. cap. 3. edocetur, quia corpora firmat, & uires uētriculo addit. In eandē sentētiā scribit Paulus lib. i. cap. 95. attamē uterq; inter uermiculū & rubrū distinguit: nā ἐρυθρόν rubrū, uermiculū autē κίρρον uocat, sic aliqui giluū expouunt: alii π ἐρυθρόν coccineū etiā interpretātur: etenim nō præterisse fuluū ac flauū Aëtii ostēdit cap. 31. lib. 4. inde disidiū inter Paulū Aëtiiq;: nam uermiculū laudat Paulus, Aëtius rubrū. Rursus pro austero astringēs scribi deberet, codicis Græci habita ratione, nam σφόν astringēs sonat. Galenus tamen austerū laudauit 4. & 12. Artis curat. Palam est autē per κίρρον flauum intelligi debere apud Paulū: cū rubrum exprimat per ἐρυθρόν, fului autem ac flauī nullā faciat mētionē: igitur de hoc intelligit. De austero illud censēo quod Galenus. Verū quoniam difficilis est, nec adeo euidens differentia inter austerum, & astringentem, alterum pro altero

supposuit . Differentiam autem austeri & astringentis habetis 4. & 8. cap. quarti de Simplici medicina. nam astringēs est, ut rhu & gallæ: austerus sapor, qui in fructu palmæ ultra dulcedinem percipitur. est & in uinis astringens frigidioris notæ quàm austerum: cum tamē uino astringentem facultatem tribuere possis. ueruntamen ad rem magis ille *συγγ* austerum pro astringente interpretatus est: sed Aëtius rubrum præponere maluit ad confirmanda corpora, id tamen sanè nō ex Galeno. Quod uerò Aëtium seduxit, est quòd uina rubra, crassa, sanguini gignendo accōmodatissima Galenus dixit, 3. de Alimētorum natura. Id dictum ad sanitatem transtulit Aëtius: uerū in inculcata ualitudine rubrum potest flauo & fuluo præferri: at in cōalescentibus, album: in senibus flauum, ac debilibus: tum fuluum, quòd uim habeant medicamenti, præponi debent. Sic igitur non simpliciter quod à Dioscoride profertur uerum est. Ex quibus etiam non obscurum euadit, uinum rubrum esse quod his, qui uirtute deficiunt, cum panis buccella exhiberi debet, secundum horum sententiam: uerū non sic Gal. 12. Artis curat. cap. 4. nam flaua tantū, ac fulua, tum austera in usu conuenire docet: atq; omnia nobilia uina eiusmodi esse ostendit. Declarat autem austero uino inesse quòd confirmet uentriculum, & quòd non feriat caput: quia tamen nutrimentum non celeriter distribuunt quæcūq; austera sunt, ob id in syncope non minus quàm aqua sunt fugienda, in fine cap. 4. at iuxta initium hæc habet uerba, de syncope loquens: At quoniam ipsorum falernorum aliud dulce admodum est, quod Faustianū uocant: aliud, si cum hoc conferas, austerū: at uerò si cum Signino, & Marfo, dulce: deligendum ex his secundum. Hęc contradiçtio paulopōst dissoluta uidetur, cum dixit, Reliquorum uini generum austera quæ mediocriter alba, crassaq; sunt: certè nullum ad digestionem in corpus est idoneum. ergo Falernum comparatione austerum dicitur ut Creticum, nō quòd talem obtineat saporem, quoniam aliud dulcissimum sit. Rasis igitur dictum lib. 3. ad Almanforem cap. 5. quòd uinum album leue sit, ad urinam prolicendam utilissimum, nō aliter quàm ut dictum intelligi debet, quòd multam gignat, non quòd prouocet. Vinum etiam rubrū omnibus ut alimentum: non uerò ut medicinalis potus, uel ut cibo iunctus, uel ut languētibus, aut ætatis uitio laborantibus aliis præferri debet: nam alba pueris, flaua senibus magis conueniunt. Idem lib. 22. cap. 6. Continentium, repetit quod de albo uino diximus: scilicet, quòd tale aquosum maximè urinā prouocat. Sed uerba illa de uino, quod concoctionem auget, & humores digerat, (ut uerbo eius utar,) ad austerum, non ad amarum (quamuis malus in uerbis ordo sit) referri debent: nam hoc est ex loco Galeni proximè adducto ex uerbo sumptum. Apparet etiam, quoniam dicit uinum illud esse delectabile, nullum autem amarum tale esse potest: circa quod intelligendum,

quòd ætas ex sapore in uinis ac substantia distinguitur: nam dulce & crassum semper nouum est: amarum & subtile, antiquum: horum neutrum usui commodum. austerū & si dulcedinis particeps sit, seu media substantia, seu subtili, mediocris est ætatis. Quod autem Serapio capitulo proprio dicat, uina stiptica, idest astringentia, maxime urinam prouocare, non aliter intelligi debet, quàm ex Galeno 7. Artis curatiuæ cap. 6. ut primò pro astringente austerum intelligas: deinde, ut laudatissimum hoc credas inter ea quæ prouocare urinam possunt. est autem laudatissimum quia in 7. Artis curat. libro Galenus de uentriculi imbecillitate agit, ubi austerus sapor, imò etiam astringens, maximè probatur: sed astringens urinam nimium coërcet: ergo loci etiam pertractationū in Galeno inspicendi sunt: nam in eo loco ut imbecillitatem uentriculi principaliter spectat, sic in 12. uirium resolutionē. at in 5. de Tuēda sanit. abundantia serosi humoris, qui copiosius gignitur. Austera igitur in 7. lib. probabuntur. mediocria ualida ac dulcia, in 12. Artis curatiuæ: subtilia flaua fuluæ, in 5. de Tuenda sanit.

Sed emergit aliud dubium, nam si omne uinum calidum est in primo, uel secundo, uel tertio gradu, quomodo album infrigidare potest? quod etiam Rasis testatur autoritate Ruffi & Gal. 12. Arti. cura. cap. 4. nullum album uinum calidum. Respondeo, uinum infrigidat bilem educendo: nam Gal. quòd per se infrigidet, nunquam fatetur: sed dicit aquosa nullam insignem calefactionem facere, alba autem non esse calida, nō arguit ea tamen esse frigida, saltem absolutē.

HIERON. CARDANI

CONTRADICENT. MEDIC.

LIBRI PRIMI TRACT.

SECVNDVS.

CONTRADICTION. I.

Ars an singularium.



Rs est singularium. 9. Artis curatiuæ cap. 6. Ars in uniuersalibus theorematis methodo, in singularibus exercitatione indiget. At uerò 2. Ethic. cap. 2. Singularium non est ars, neq; præcipiendi ratio ulla. Item primo Primæ philosophiæ, Ars ipsa uniuersaliū est, experientia singulariū: ob hoc expertus melius operatur sine experientia rationem habētibus. Philosophus 2. Posteriorū tract. 27. dicit, quòd ex sensu rerum memoria constat: multæ autem memoriæ experimentum unum

unum sunt. At uerò ex experimēto prodit ars, cū in anima fuerit confirmatū. Hæc responsio quibusdam satisfacit, cū tamen duas relinquitur dubitationes: Prima, quòd ars experimentū præsupponat. Hoc autē uidetur falsum, ut ex primo Primæ philosophiæ colligitur: nā eum, qui experimento sine ratione duce operatur, præfert illi, qui artē habet sine experimento. Præterea Hippocrates artem non traderet scriptis quandoquidem illa præsupponit experimentum. hoc autem uidetur etiam Galeno contradicere. I. Aphor. I. Secunda difficultas est, quia 2. Posteriorum. 27. uult experimentū constare necessario ex pluribus singularibus: & tamen primo Primæ philosophiæ uidetur hæc esse differentia experimenti ab arte: quòd illa sit uniuersalium, hoc autem singularium. Ideo dico quòd, (ut habetur 6. Ethic. 8. de prudentia) habitus ipsi, ars, & prudentia sunt de uniuersalibus: sed exercitatio est singularium. Et hoc uoluit Galenus loco adducto. Non sic scientia, uel intellectus, uel sapientia: nam hæc uniuersalia semper sunt. Est autem triplex modus: aut Singularis comprehensio, & dicitur sensus: aut Singularium plurium, & est experimentum, ut in memoria colliguntur: aut Vniuersalium prout ad singularia comparantur, & sunt artis uel prudentiæ habitus. Reliqui tres uniuersalia agnoscunt, non in comparatione ulla ad singularia. Verum de his in 3. lib. Contr. 8.

C O N T R A D I C T I O I I.

Experimento an duæ rationes sint necessaria.

Experimentum ut rectum dicatur exigit duas condiciones: primam, quòd in humano corpore sumptum sit: secundam, quòd per primam ac propriam operationem, non ex consequentia: primo de Simplic. medicamentorum facul. cap. 2. Princeps 2. Can. cap. 2. quinq; alias adiicit condiciones: quòd in morbo simplici, quòd illud quo experimur uitiosum non sit, quòd experiamur in morbo æquali, quòd idem agat in contrariis temperaturis, quòd secundum plurimum non semel tantum aut bis. Hæc uerò condiciones colliguntur tertio de Temperamentis cap. 5. quamuis id secundum plurimum etiam ad temporis magnitudinem extendat, non solum ad multorum hominum experimentum. Experientiam tamen ab Experimento separat Galenus libello de Empirica subfiguratione, qui apud nos in Græco non habetur: pluribus experientiis experimentum constare affirmat. hoc autem est quod iam diximus, scilicet, Experimentum multis sentiendi memoriis constare. Diffinitur autem ibi Experientia, quòd est tota rei euidētis obseruatio. Aliter uerò secundum eius opinionem diffinitur, quòd est obseruatio ac memoria eorum, quæ sæpe eodem modo perspecta sunt. Ibi uerò diffinit Experientiā quæ est artis principium. Igitur non tot erunt necessariae condiciones ad experimentum.

Respon

Respondeo: quanquam possem, ut dixi, subterfugere per distinctionem iam datam experimenti & experiētiae: nihilominus experientiam omnē esse artis principium: perfectam autem experientiam & quā ratione perfici possit, his indigere conditionibus. Ex hac autoritate oritur hæc.

CONTRADICTION III.

Medicina an solo experimento inuenta.

EXperientia constituit artem medicam & solam. Philosophus etiam, ut dixi, primo Primæ philosophiæ tract. I. iuxta initium, probat Polisententiam dicentis, Experientiam artem efficere: sed oppositum habetur prima Aphor. I. commento. Medicina duplici modo inuenta, experientia, & ratione. Quanquam enim dicat de aliis artibus: manifestum est etiam, quòd de medicina intelligit, cum de aliis propter illam loquatur. At 3. de Crisi cap. 8. uidetur sentire, quòd ars medicinæ ex principiis philosophiæ inuenta sit: fidem tamen sumpserit ab opere. Idem in Introductorio cap. 2. docet, tria genera principiorum, Inventionis, & hoc totum ad experientiam pertinet: Constitutionis, id est, ut in artem redigatur, his opus dicitur esse ratione & experiētia: Interpretationis, naturalis speculatio fundamentum exhibet. & in 9. Artis curatiue cap. 2. Non licet cuiquam artem totam adipisci solo experimento, si non uniuersalium methodum quandam teneat. In libro autem de Constit. artis medicatiuæ, probare nititur, artis inuentionem citra experiētiā ullam posse constare, utar autem illius uerbis: *ὅτι μὲν οὐκ ἄρχησθαι, ἢ μέλλει τις οὐ διὰ πύρας πινός, ἀλλὰ μεθόδῳ συστήσασθαι τὴν τέχνην, ἥδ' ἐκ μοι δοκεῖ πρόδ' ἔχον ὑπάρχειν. ὅτι δὲ οὐ δ' ἀδύνατος, ἐφεξῆς σκοπῶμεν, ὀλίγοντι πρότερον ἡμῖν διαλεχθῶτες.* Quod est, Quod quidem non usui inutile futurum sit, si sine experientia quadam, sed ratione sola artem cōstituat, iam mihi uidetur manifestum esse: Quòd autem non sit impossibile hoc, posterius cōsiderandum, paucis prius nobis declaratis. Respondeo, autoritas ex libro de Subfiguratione empirica, est ex Empiricorum, non propria, ut ipse testatur Galeni sententia: initium tamen Artis, ut in Introductorio, ob antiquitatem ab experientia sumptum est: ars tamen ipsa utroque indiguit auxilio, ratione siquidem & experientia. Philosophus autē nihil aliud uult, quàm quòd experientia sit principium artis: intelligendo principium originem primam, non formam: nam & forma à ratione inducitur. Aliter ars esset idem quòd experimentum, experientiis pluribus solum constans. Ad hoc autem inueniendum sufficit solum experimentum, sola ratione naturali adiuuante, qualem habuit Hippocrates. Ad tradendum uerò sub Artis forma methodus artificiosa necessaria est: cum iam lumen autoris & fides experimenti non maneant. Galenus autem in libro de Constitutione Artis me-

dicari

dicatiuæ, docet medicinam, quo ad primas illius propositiones, ex philosophia procedere: nam sic potius est scientia, quàm ars.

C O N T R A D I C T I O I I I I.

Experimentum an sit artis principium.

EXperientia quæ ratione caret non est sufficiens ad artem completendam. 3. Artis curatiuæ cap. 2. Et adducit rationem, quia ea sola nec ex medicamēto in medicamentū, nec ex affectu in affectū transire licet. Hippocrates experimētū periculofum etiā uocat, prima Aphor. in proœmio: Galenus etiā 9. de dogmate Hippoc. & Platonis, affirmat experimētū absq; ratione esse infirmū. Princeps uerò prima quarti trac. 2. cap. 7. dicit, & experientis quæ non sunt secundum rationem, accidit ut nec unum sit signum nedum ut ualeat. & Ioannes Damascenus etiā experimentum quod ratione caret non probat, sed requirit rationē in eo, ut in suis Aphorismis. Quomodo igitur poterit esse artis principium? Respondeo: Experimentum quod periculofum est, apud Hippocratem pro experientia sumitur: & hæc non est artis principium, cum sit tentatiua. Experimentū uerò cuius nondum ratio est comperta, nō est tutum, quia nescimus an affectus hi similes sint: ratione autem sui est tutum, cum sit artis initium. Damascenus præcipit, ut non tuis tantum experimentis uel scriptis confidas, si ratione caruerint: nam inter experimenta potiora decet eligere. Principis dictum tenet, cum experimētum rationi aduersatur: uelut si hydrops casu quodam ascliticus frigida aqua sanetur. Multum autem interest dicere, quòd experimenti non pateat ratio, uel quòd experimentum aduersetur rationi. Primum, & si non sit omnino tutum, propter translationem ad similia, est tamen artis principium, & per se tutum. Secundum artem nunquam facit, & est periculofum: & de hoc loquitur Auicenna.

C O N T R A D I C T I O V.

Dies febris enixæ an à partu computandi.

PARI modo in mulieribus iudicationes fiūt à partu: tertio Prognosticorum 7. Vbi Galenus exponens, inquit: Principium numerationis fiat, non quo die coeperint febricitare, sed quo pepererint. In quibusdam igitur circa secundum diem aut tertium diem à partu incipiunt, ex quo multi numerant futurā iudicationem. Sed res non ita se habet: sed ex quo pepererint, numerationem oportet fieri dierum. Princeps etiā secunda quarti trac. 2. cap. 1. secundum priorem literam: Et si peperit mulier, deinde accidat ei febris, tunc si non computetur ex febre, & non nisi ex partu, est illud error. De hoc dixerunt quidam, quòd plurimum accidit post secundum & tertium. Sed alia litera Galeno contradicit, dicens, Et si

g pep

peperit mulier, deinde accadat ei febris, tunc fiat computatio ex febre, & non ex partu: ex illo enim est error, & plurimum, quod accidit post secundum & tertium. Hic igitur emendator putauit se Auicennam ad Galeni mentem traducere cum illum ab eo maxime abduxerit. A ueroes autem quarto Collec. 40. Et debes scire, quod istæ crises à principio ægritudinis computantur: & est, quando manifestè in operationibus læsio apparet: excepto in pariente, quia ab ipso partu incipere debemus: quamuis ægritudo post partum per triginta dies sensibilibiter extitisset: & breuiter hæc regulæ dicta Hippocratis cōsequuntur. Hæc ille. Idem fermè Haliabbas 10. Theoricæ cap. 8. iuxta principium: Passiões autem, quæ mulieribus post partum fiunt, ab eo cōputabis die, in quo partus celebratur, quæ admodum Hippocras imperat. At tertio Epidem. super primum tex. 21. de uxore Philini sic inquit: Decimo & quarto die à partu cum purgata rectè, & cætera benè haberent, ignis inuasit cum rigore. Inde cōnumerans omnes dies iudicatorios, & præter hos sextum, uigesimo mortuam fuisse affirmat. Ex quo liquet, quod à die febris, non à partu computantur: nam sextus fuisset decimus nonus, & septimus uigessimus: & dies in quo mortua fuisset, trigessimus tertius. Sed nec trigessimus tertius iudicatorius est, sed trigessimus quartus, ut à Galeno apparet. Rursus in sequenti textu declarat idem: subiungã autem initium propter multa, est autè tale: Epicratis uxor, quæ ægrotabat apud Archegetem, instante iam partu rigore correpta est, non incaluiit ut ferebant: postridie eadē erant, tertio die filiā peperit, cæteraq; rite consecuta sunt: postridie partus eam febris acuta inuasit, cordis dolor, & muliebrum, nulli erant somni: per suppositā glandem hæc releuata sunt: sed caput, collum, & lumbi dolebant: alius pauca biliosa, non cōcreta, mera: urinæ tenues, subnigræ: sexto die, qua illā febris corripuerat, sub noctem delirauit: septimo omnia exacerbata, uigiliæ, delirauit, sitibunda, deiectiones omnes synceræ, biliosæ: atq; ita usq; ad octogesimum connumerat dies à febre, non ab hora partus: nam cum in quadregesimo die pauca uomuerit biliosa, in octogesimo liberata sit, fierent connumeratis à partu diebus quadregimus primus & octogesimus primus iudicatorii, quos nemo unquā cōcedat: tum magis, ut dixi, quod Hippocrates ad febris initium redigit numerū. Respicere etiā oportet, cum triduo ante partū morbus initium habuerit, nō tamē tunc sumptū initium, sed postquā febris nō obscurè eam uexauit: quod ex sententia etiā Galeni est, primo de Diebus decretoriis, cap. 6. Rursus 3. super primū de Morbis uulga. tex. 28. hæc habet: Dromeadaī uxore, quæ filiā erat enixa, cæteris rite consecutis, postridie rigor cepit, febris acuta. Primo die ex præcordiis laborare cœpit, fastidiosa, horrēs, implacida: sequētib; diebus somnū non cepit, spiritus rarus, magnus, præcordia statim reuulsa: postridie eius diei, quo rigue

riguerat, alium cōmode reddidit, urinæ crassæ, albæ, turbidæ, cuiusmodi sunt, quæ in matellis diu steterunt, cum agitatur, nō subsidebāt: nocte non dormiuit: tertio die circa meridiē riguit: tandē in sexto die illā mortuam fuisse affirmat. est autē sextus ex genere malorū dierū & qui perniciē afferant. I. de Diebus decret. cap. 4. & 5. Quo fit, ut manifestū sit, Hippocratē & autoritate sua, & experientia docere nos dies iudicatorios à febre, uel morbo in puerperio inchoādos. Aētius & Paulus hanc difficultatē leniter tractasse uidētur: & quod mirabilius est, Galenus in nullo horū locorum hāc cōtradictionē animaduertit, uerū difficultatē auget in Philini uxore: nā cum Hippocrates dixisset, *ἡ φύσις καθάρσεως γινόμενης*, quod est, Facta secundū naturā purgatione: Galenus dicit, *ἐπισχεθείσης γὰρ τῇ γυναικὶ πάντῃ τῆς μετὰ τόκου καθάρσεως*, quod est, Prohibita autē mulieri huic secundū partum purgatione. Quare dic, lapsum interpretē, nam *ἡ φύσις* cum præpositio accusatiuo iungatur, potest etiā contra significare, & plerunq; (ut notat Galenus in de linguis Hippocratis) *ἡ* in malā partem ab Hippocrate accipitur. Vel dic, in Galeni textu legendum, *ὅτι ἡ φύσις*, nō secundum naturā. Verū Hippocratis uerba sequentia difficultatem augēt, dicentis, *ὅτι τὰ ἄλλα κύψως διαγούσιν*, quod est, Et alia opportunē procedebant. Forsan aliquis dicat, quod Hippocrates 7. Aphor. 57. ait, purgationes nimias morbos efficere: quæ uerò exiguæ essent, utrum malè afficere: uolentes ut Hippocrates ortum morbi generalē ostendat, Galenus autem sedem: sed non est moris Galeni cōtradicare Hippocrati, nisi eum nominet, tum uerò aliqua ex parte excuset, uel sententiā in alium referat. Poterat & *ἐπισχεθείσης ἀπὸ τοῦ ἐπισχεῖν* deductum, ut pro *κωλύειν* interpretatur, etiā *κρατεῖν* dicere: sic enim anceps est uerbum, autore Hesichio. Est autem *κρατεῖν* uincere, ut Galeni sensus sit supereffluētibus pūrgationibus à partu. Sed iam hæc dimittamus, quāquam ualde necessaria, & ad principalē quæstionē ueniamus. Conciliator differentia 106. uidit dubitationem, sed nō autoritates, duo tamē dicit: Primū, quod non solū à partu, sed à febre, ita ut utrunq; consideretur, computādi sunt dies. Secundū, quod in naturali partu magis attēdendi sunt dies ab initio febris, quia talis febris non dependet à partu, sed ab errore, uel alia causa: & tum magis, si fuerit initium febris partui propinquum. Istud patet, quia in febre quæ ab apostemate, considerantur dies initii tam apostematis, quàm febris, ex Galeni & Principis sententia. Sed in innaturali magis dies partus, quia febris consequens, est quasi symptoma. igitur cum dies critici disponantur à morbo, non à symptomate, erunt ipsi numerandi à die partus, nō à principio febris. Ad autoritatē Hippocratis 1. Epidem. dicitur, quod 2. de Diebus creticis, cap. 6. dicit Galenus, Hippocratem prius scripsisse libros Epidemiorum, quàm Prognosticorū, uel Aphorismorum: adducta igitur au-

toritas ex tertio Prognosticorum præponi debet autoritatibus libri Epidemiorum. Adduntur tamen rationes à Conciliatore ad oppositâ partem, quarum fermè uis in unam reducitur. Partus ad febrem se habet ut causa disponens, uel antecedens, & ipse per se est res naturalis: igitur dies nō sunt computandi ab eo, sed à morbo. patet sequela 1. de Diebus iudicatoriis, cap. 6. & 2. Prognosticorū §8. Sed hæc ratio nō uidetur ualida in casu partus non naturalis: quia ipse morbus est, & febris, ut dictum, symptoma: itē quia, ut Auer. & Haliabbas dicūt, hæc res habet autoritatem & rationem ab Hippocrate: ipse uerò experimento dies hos comproba uit. Atque ideo cum clarè in primo exemplo & tertio naturalem partum exposuerit, in secundo forsan uiolētum, uidetur mihi, cum eandē in omnibus obseruet à die febris cōputationem, non esse ullo modo distinguendū. Verū etiam plus Hippocrati hīc credendum est, ubi per tria exempla totā rem decernit, quā in libro Prognosticorū, ubi paucula tātū uerba subiecit. Quod uerò mixta ratio ineunda sit in febre cōputandi dies à partu, & à morbi initio, hoc est perabsurdū: nam bene possumus dies in partu & febre, uel apostemate & febre utriusq; cōsiderare, sed tamen utrosq; seorsum, & singulos pro suo ægritudinis genere, nec tamen prohibet quicquā, ut in apostemate habente febrē ephemerā iunctam cōsideremus dies ab initio apostematis pro febre, cum sit purum symptoma. autoritas igitur tertii Prognosticorū intelligitur solum de naturali partu, & morbis, qui sunt illius symptomata: & sunt febris ephemera, quæ quarto die solet aduenire: item dolores, & cursus menstrui sanguinis, & si quid aliud tale. In his omnibus debemus dies à partu, etiam si hæc post partum coeperint, computare. In aliis autem ab initio morbi. Auicēna, Auerroës, & Haliabbas cum uidissent libros Prognosticorum, & nō Epidemiorum, quod facile est cuiq; intelligere, qui illos diligenter euoluerit, ob nō uisa dicta Hippocratis aberrauere. Porro dies partus in masculis sunt triginta, in foeminis quadraginta. uicēfima prima tertii trac. 2. cap. 33.

CONTRADICTION VI.

Putredo an solum ex obstructione.

Putredo fit, cum calida & humida corpora calido & humido loco manentia non perflantur: quod si maneant transpirata, non putrescunt: oportet igitur ad hoc ut putrescant, impeditam fore transpirationem, 11. Artis curatiuæ, cap. 4. At 2. de Differētiis febr. cap. 9. uult duplicē esse putredinis causam. uerba subiungā: In putrefactionibus autem (nam & sanguinē putrescere necessariū est) quādoq; quærendū, quæ nā sit harū febrium species. Hoc autē inueniri posse putandū, si prius cognouerimus, quo pacto sanguis putrescat: nā recte sentire uidetur Aristoteles, ab aliena calid

caliditate oriri putredinem. Vocat autem alienam externam, nō insitam, atq; natiuam, in quocūq; rerum genere. Nam hæc coquere aperta est, externa autem corrumpere, quod est putrescere. Calor autem exterior sanguinem opprimit, ut in Solis deustionibus, & in pestilenti aëris statu, atq; ut simpliciter dicam, in febribus uniuersis, ex quacunq; causa originem duxerint. Sed & quādo in aliqua corporis parte sanguis plurimus aceruatus eius corporis uim opprimit, corrumpi cōsuevit: ac item præcipuè, cum in paruis uasis propter crassitudinem obstruitur, aut propter multitudinem impingitur. At libro de Inæquali intemperie cap. 7. dicit: Neq; uerò ea solum, quæ inculcata sunt, & perspiratu prohibita, putrescunt, quamquam celeriter ea, maximeq; sed & alia multa putredini sunt opportuna. Itaq; in prima autoritate uult tria esse necessaria: Prohibitam totius corporis transpirationem, quod inferius declarat: Corpus calidum & humidum: & Ambiens tale. At in secunda prætermittit duas primas causas, & uult uel solam extremam esse sufficientem, uel quandoq; conuenire humorum conculcationem in loco uno, ex qua obstructio loci fit. At in tertia autoritate amplectitur & obstructionem, & prohibitam transpirationem: uerum non esse causas necessarias uult nisi uelocis & maximè putredinis: atq; sic uidetur secūda primæ, & prima secundæ, & tertia utriusq; ostendere insufficientiam. Nam ex dictis uidentur quatuor causæ putredinis, caliditas, & humida qualitas totius corporis tum cōtinentis: prohibita transpiratio in cute: tum in certa corporis parte. Galenus 12. Cōmento, 2. particulæ, exponēs illud, Quæ relinquuntur in morbis, &c. dicit: Quæ relinquuntur in morbis necessariò sunt humores mali: nam intelligit materiam morborum: tales autem cum nutrire non possint, necesse est ut tempore succedente febres accendant: non igitur necessarius est calor cōtinentis, uel obstructio, aut prohibita transpiratio. Princeps, 13. tertii, tract. 3. cap. 2. & prima quarti tract. 2. cap. 1. docet plures causas corruptionis: sed in priore loco propriè cōcoctionis, in posteriore generaliter omnium humorum: quæ causæ cum ad septem, reducātur plures uidentur quàm quæ à Galeno recitata sunt: dicit tamen, quasi Galeni dicta inter se, & secum concordans: Et plurimum corruptionis humorū ex causis est obstructio: propter humoris multitudinem uel crassitiem, aut lentorem. quod sumitur 11. Artis curatiuæ cap. 9. in fine. Dicebat enim Galenus, de obstructione loquens, Redundantia cum crasis & glutinosis humoribus, horū enim uitio obstructio est orta, quæ morbus est instrumentalis eorum quæ obstructa sunt corporum: hanc symptoma secutum, ipsa transpirationis retentio, quam rursus putredo humorum excepit, ipsa scilicet febris antecedens quædam causa. Recentiores quidam dicunt, in febribus necessariò esse coniunctam prohibitam transpirationem, si à materia sint putri-

da: retinentur enim uapores, qui exire deberēt: in aliis etiam plerunq; putredini coniunctam esse hanc prohibitam transpirationem. Dico igitur, quod putredo fit in humoribus, uel humorum: humorum quidem, dum generantur: & sic longe plures sunt causæ quàm quatuor: nā ex corruptione concoctionis fit putredo persæpe humorum genitorum, nec tamē semper, cūm sint alii modi corruptionis, quàm ad putredinem: & sic loquitur Princeps in 13. tertii loco dicto. Vel putredo fit in humoribus iam factis, & hoc accidit in tota humorum congerie, quæ est in sanguine: & hæc præsupponit prohibitam transpirationem, & de hac loquitur 11. Artis curatiuæ 4. uel in una parte tantum, & hæc propriè fit ab obstructione, uel inculcata materia: & de hac loquitur secūdo de Diff. feb. 9. Aut loquitur de utraq; in generali, & de hac dixit in libro de Inæquali intemperie, quod causæ essent illæ tres dictæ, nam quarta causa semper est ex supposito necessaria caliditas cum humido eius quod putrescere debet. ut 11. Artis cur. cap. 4. docet: nam dicit, cūm animal fit, uel planta, necessariò constat calido & humido: & ita ibi explicauit causas necessarias omnes, seu naturales, seu aduentitias: aliis autem in locis hanc naturalem prætermisit: ideo in de Inæquali intemperie tres tantum connumerat, quæ omnes sunt necessariae. Differunt autem obstructio in particula, prohibens & motum, & perspirationem, à prohibita perspiratione, quæ in toto fit: nec tamen prohibet sanguinis motum, sed halitus ac uapores tantum fuliginosos excerni. Motus autem est de causis etiam conseruantibus à putredine, ut apparet in aquis fluminum, quæ nō putrescunt, cūm stagnorum celeriter corrumpantur. Sed cur ergo Philosophus dixit 2. Problem. 4. quod motus corruptionem excitat? Respondeo: Motus naturalis, & proprius, conseruat: quicunq; alius externa causa proficiscens, corrumpit: hoc autem quia concutit, & quia facit obuiare aëri nouo: nam hoc Philosophus in fructibus quæsiuit, quæ motu uitiantur propter teneritudinē. At ut colligitur 4. Meteor. 6. & 3. Collectaneorum 3. Aër sui caliditate putredinem in animalibus operatur, exhalare faciens innatum calorem: item frigiditate extinguendo proprium, unde materia alium concipere cogitur putredinis autorem. Hoc autem secundum membrum, cūm rarò accidat, & per consequentiam tantum caloris nostri corrupti putredinem pariat, iure merito à Galeno prætermissum est.

CONTRADICTION VII.

Vinum natura humidum est.

Vinum confert iuueniliter duplici modo, bilem educendo, corpusq; humidius reddendo: primo de Tuenda sanitate. & quinto eiusdem: Vinum maximè competit frigidis ac siccis temperamentis. Primo etiam Regim.

Regim.acut.22. iubet ante ptisanam uinum aut mulsam exhiberi: uelut aqua ipsa humidiora ubi morbus ipse siccior extiterit. secunda quoq; Aphorif.21. uinum iubet dare Galenus in fame illa non naturali, seu à frigiditate, seu ab acido prouenerit humore: est autem humor acidus, frigidus atq; ficans. Ex quibus colligitur, cum omnis cura sit per contraria, ut in tertio habetur Paruæ artis, uinum non solum calidum esse, sed etiam humidum. Princeps etiam tertia primi doct. 2. cap. 8. dicit, Et uinum cōfert melancholicis, quia eis contrariatur à tota specie: ipsi autem sunt frigidi atq; fici, quare uinum erit calidum ac humidum. unde Gentilis in sua quæstione ibi tenet, quod uinum semper humidius corpus reddat. Et prima tertii tract. 4. cap. 17. in cura manet in generali, in fine, dicit: Cumq; fuerint in declinatione, detur eis uinum plurimū mixtum: illud enim humectat eos, & dormire facit. Idem fermè primo ad Glauconem cap. ultimo, dum curam eorum tractat, qui animo linquantur. & prima quarti tracta. 3. cap. 4. In cura hecticæ uinum humectat sed calefacit: & parum post: & similiter cum necessitas te uocat ad fortem humectationem & uelocem, des ea quæ sunt, ut aqua, carnis, & uinū. Haliabbas quoq; in primo practicæ 22. Vinum calefacit & humectat, & contrarium est melancholiæ à tota specie. & sexto Collectaneorum 13. recēsetur inter ea quæ corpus humectant, cum extenuatis exhibeat, qui siccitate nō uacant. Aristoteles quoq; tertia Problematum. 16. Vinum natura humidum est. Sed in oppositum Galeni uidetur esse autoritas 8. de Simplic. medic. cap. de uino. Nouum in primo calidum est, uetustum in tertio, mediæ ætatis in secundo. his pro caliditate siccitas respondet. Item Galen. 2. Aphorif. 11. exponens humidum melius nutrire, potabile interpretatur: quod actu non potentia humidum est: atq; hoc modo uinum inter humida connumerat: quasi potentia tale non sit, propterea dixit, quod humidum prout à solido distinguitur, maxime nutrit, presertim si natura calidū sit. Paulus quoq; lib. 1. cap. 95. & lib. 7. in litera o, Mustum in primo siccum est, mediæ ætatis in secundo, sed antiquum in tertio. Sed & Haliabbas quinto Theoricæ cap. 30. uinum fici temperamenti esse dicit. Serapio etiam in tabula & cap. proprio, uinum inter ficas medicinas adnumerat: quæ tamen primum gradum non excedant quo ad caliditatem. nam superius declarauimus in Passiuis qualitatibus, solitum non esse gradum proprium obseruare. Hanc tam euidentem contrarietatem euadere quidam desperauerunt, ut Gentilis loco præallegato. Sed Cōciliator Differētia 70. tenet ipsum esse humidum, respondetq; autoritatibus melius quàm potest, ac rationibus: ueruntamen cum non uiderit auctoritatem Galeni & Pauli de siccitate: ideo sua determinatio nihil ad nos facit, cum neruum difficultatis præterierit. Nemo enim est qui, si quis illas auctoritates auferat, non statuatur omni suffragio humidum esse

esse uinum. Quidam existimant exterius etsi sit natura humidum, posse ficcare quadruplici modo: Primo, abluendo sordes, & hoc modo etiam aqua frigida exiccat, & consolidat autoritate Celsi: Secundo, per uirtutem astringentem comprimendo, dein exprimendo humorem contentum in loco uel ulceris uulnerisue: Tertio, quia omne calidum calefaciendo tandem exiccat: Quarto, quia pars humida quæ est in uino subtilis dilabitur, & sicca manet quæ crassior extat. Sed isti magnam Galeno calumniam inferunt, qui loquens de re, quæ & cibus est, & medicina, proprii temperamenti nusquam meminerit: nec uirtutis quam interius assumpta retineat: sed solum accidentiam naturæ expresserit, atque eam qua fungitur tantum donec exterius applicatur. Parcendum esset Auicennam aut Auerroem interpretantibus, quibus lege sua uino interdicebatur tanquam frequentioris usus solum apud illos meminissent: at de Galeno quis æquo ferat animo, ut propriam naturam, proprium usum, tum frequentissimum prætermiserit: rem raram, & præter consuetudinem, ac non propriam explicauerit? Non etiam uidetur quod in ablutione uulnery apparet humidioris naturæ uestigium: nam ulcera etiã sordida illico mordicat, quod medicamenti siccioris est opus, non humidi. Aliqui dicunt, quod est humidum ut oleum, nam facillimè illud etiam ardet ut uinum, sed hoc est magis argumentum siccitatis, nam in similibus facilior fit transitus, unde uelocissime ardet nitrum, aqua ardens, sulphur, quæ omnia procul dubio sicca sunt. Quidam autem respondebat hoc modò, quod uinum antequàm esset actu nutrimentum erat siccum, sed postquàm nutriuierit fiat humidum, augendo humidum substantificum: & hoc modo Princeps dicebat lactucam esse calidam, quamuis sit frigida, antequàm nutriat. Hæc responsio non uidetur satisfacere: nam & si lactuca calefaciat augendo calorem, non tamen meretur dici calida: quia hoc oporteret dicere in comparatione ad reliquos cibos, item uinum uelocissime nutrit, 2. Aphor. 18. ut nihil ei possit æquiparari. & 3. de Temperamentis, cap. 2. dicit, quod dummodo aliquandiu in uentriculo & iecinore originem traxerit, nutrit: quare non poterit impressionem siccam facere, si in humidum illico transferit alimentum. Dico igitur, Vinum siccum esse: nam 5. Aphorif. Aphorif. 5. uinum subtilitate sua cõuulsionem mouet, siccitate & caliditate sedat. Item 2. de Victus ratione, (& est 28. liber Hippocratis) uinum calidum & siccum. habet autem oratio eius genuina sic, *οἶνος θερμὸν καὶ ξηρὸν. ἔχει δ' ἐπὶ καθαρκτικὸν ἀπὸ τῆς ὕλης. τῷ δὲ οἴνῳ οἱ μέλανες καὶ αἰσχροὶ, ξηρότεροι, καὶ ὁ διαχωρῶνται, ὅτε ὀρεῖονται, ὅτε πτύσσει. ξηρὰ κινῶσι δὲ καὶ τῇ θερμότητι, ὅ ἐν τῷ σώματι καταναλίσκοντες.* id est, Vinum calidum & siccum: habet autem ex materia uini purgandi. Vinorum autem quæ nigra sunt & austera, magis exiccant uentrem, lotium, sputum minime iuantia:

uantia : exiccans autem, & calefaciens, humidum corporis consumit. Inde docet candida, & noua, & dulcia, humidiora esse : quin & acidum humectare edocet, quòd aquam admixtam habeat. Sed ibi alia exurgeret dubitatio, quia acidus sapor ficcitatis indicium est. Sed non omnia omnibus in locis sunt enodanda, unicuique disputationi sua difficultas satis est. In libro etiam secundo Regim. acutorum iuxta initium dixit : Vinum fitim mouere, & caput petere. Hæc igitur omnia quis non uidet opera esse uini ficcantis magis absoluta etiam coctione, quàm per initia ? Quare ualeat Manardus cum sua subtili inuentione : nam Galenus. nunquam uinum humidum pronuntiauit, sed humectare, cum fit ficcum. Vehementer etiã posse affirmat, hoc autem quadrifariam : Primò, faciendo plurimam appositionem & nutritionem, propter naturæ dilectionem, propter subtilitatem, propter facilitatem conuerfionis in alimentum. Secundò, propter aquæ admixtionem, nam subtilitatem quidem & cum natura humana conuenientiam mixtum retinet, uerùm amittit ficcitatem. Tertio, si fit candidum aquosum, tale enim sub natura uini quanquam comprehendatur, eo tamen nomine non intelligitur, nisi adiciatur aquosum. Hoc uerò non excalefacit : non dicam quòd refrigeret prima operatione, multo minus etiam exiccat. & quanquam sub eodem gradu ficcitas & caliditas uini apud Galenum censeatur, nihilominus tamen non sub eadem gradus parte. Ideoq; in febribus, & in animi deliquiis Galenus albū aut lymphatum exhibet uinum : non tamen quia humidum, sed quia cum sit uelocissimi transitus, & naturæ amicum, ficcum non est. Quartò, comparatiuè : nam temperatura eius est infra ficcitatem bilis, & atræ bilis, & senum : quare his potest exhiberi : tum quia in atra bile educit eam & subtiliorē reddit, & est naturæ amicum. Senes autem indigent regimine simili, non contrario : & cum hoc uinum habet plures utilitates, de quibus dictum est : nam & mel senibus conuenit, quod tamen ficcum est in secundo : ut 7. de Simplic. medic. facult. Ad Arabum autoritates dicendum est, uinum censeferi apud eos humidum, ab operatione. Vel dic, quòd de mixto aqua intelligunt, uel quod absolute humidum crediderunt. Nihilominus uerum est, ipsum hæcticis & melancholicis conuenire. Quòd si quis arguat ex 2. Aphor. 11. in commento : Vinum ut habet similem substantiam aquæ, quod aquosum dicitur, sic & naturam : aqua igitur cum sit frigida & humida, igitur & uinum aquosum. Respondeo : Comparat naturam in subtilitate, & nutriendi paucitate, ex quo colligitur, quòd aqua fit subtilioris substantiæ ipso uino : quamuis uinum ob caliditatem facilius penetret, ac cibum distribuat, ut in 12. Artis curatiæ colligitur, cap. 4. in initio, & post. Sed cur uinum aquæ supernatat, aqua uino supernatare non potest ?

In laterali morbo an ex parte dolente uena secanda sit.

QVum dolor ad iugulum extenditur, aut grauitas brachium, mamillam, aut partes quæ sunt supra septum transfuersum infestat, interna cubiti uena secanda est: nec dubites copiosum detrahere sanguinẽ, donec rubidior multo, uel pro rubido & puro liuidus effluxerit, utrunq; enim accidere solet. 2. Regim. acut. 10. At quarto Regim. acut. 73. si dolor ad superiores partes extenditur, iugulum, mamillam, brachium, internam brachii uenam secare oportet, ab eo scilicet latere quod dolore fuit affectum. Est etiã illud indicium, Hippocratem in prima autoritate hoc sensisse: quod dicat sanguinem permutari solere: quod quidẽ non accidit nisi ubi phlegmon magnum sit & ex parte qua fit sanguinis missio: ut in libro de Sectione uenarum colligitur. Neq; est dubiũ quin Galenus in cõmento 10. censuerit, secandã eiuidẽ, non aduersi lateris uenam: quãdoquidem celeritati euacuationis ex ipso loco studeat: ut uerba testantur. Altera habetur autoritas 6. Epidemiorum super sextum, textu quinto: ubi dicit: In doloribus secandum esse uenarum uentrem: id est uenam magnam, quæ loco proxima est. Sed ista autoritas cum præcedentibus parum aut nihil facit: nam materiam iam fluxisse Hippocrates præsupponere uidetur, cum dixit, adesse grauitatem, quæ iam fluente non adest: tum quod pertingat dolor ad iugulum: Secundò, quod succedat mutatio sanguinis: Tertiò, quia 4. de Ratione uictus in acutis, parum ante autoritatem dictam, iubet Hippocrates sputi colorem obseruandum, an sit rufum, uel aliter coloratum, nam hoc non nisi iam in coctione potest apparere: Quartò, quia Galenus in de Venarum sectione dicit, ubi iuxta sextam uenam phlegmone est ingens, optimum est sanguinis in colore & substantia mutationem expectare, sicut Hippocrates nos docuit in libro de Acutorum uictu, quando de laterali morbo uerba fecit. Est etiam difficultas ex hoc, quia quartus Hippocratis acutorum Galenò teste, non est Hippocratis. In secundo autem non explicat ex quo latere sit detrahendus sanguis: quare hæc autoritas parum aut nihil concludit, quantum ad Hippocratis sententiam pertinet. Et si quis obiiciat, crimen ferre esse, Hippocrati ascribere, quod quicquam necessarium ad artem prætermiserit: quare coniectura licere assequi, solum eam, quæ ex eodem fiat latere, esse necessariam, quando eius tantum meminerit, iuxta Galeni interpretationem. Respondemus: Quanquam hoc solum firmari possit ex Galeni sententia, nihilominus etiam illius supposita autoritate, nihil tamen in dictis Hippocratis pro hac sententia concludere: nam uel Hippocrates reuulsuam ex aduerso latere cognouit, uel nõ. nam eam in aliquibus morbis, puta in capitis uulneribus, necessariam esse

esse inferius demonstrabimus. Si igitur non cognouit, quod quasi nephas est dicere, nihil mirum, eam illum non tradidisse: si autem cognouit, principio morbi faciendam docuit in generalibus sermonibus, ut ibi deriuare, cedentem reuellere statim, resistentem cedere. secūda particula sexti Epidem. 8. ubi etiam uidetur Galenus illud declarare, quod dixit Princeps quarta primi, cap. 1. cū ad longinquum trahere uolueris, dolorē prius sedare. Sed expositio tamē Galeni non uidetur nisi ad confirmandum hoc, ut post deriuationē reuulsua ex aduerso utamur: sed non explicat, quod ab opposito latere reuulsua sanguinis missio cōueniat. Sed melius erit Hippocratem per Hippocratem exponere, quādoquidē ex hac autoritate saltem illud constet, duas fecisse Hippocratis mittendi sanguinis rationes diuersas, Reuulsuam, & Deriuatiuā: cuius meminit in 2. & 4. Regim. acut. locis prællegatis. Sed non esse ducendum ab eadē parte quasi similitudine infert 2. Regim. acut. 22. cū dixit, de medicatione loquēs quæ per expurgantia fit: Quicunq; autē dum inflāmantur, statim per morborū initia medicamento soluere conantur, ij non solum ab intensā inflammataq; parte nihil adimunt, uerū cū non cedat nec obsequatur quæ cruda est affectio, partes sanat, & morbo aduersas, medicamentum ipsum absument, contabefacitq;. Sed ut diuersa est ratio medicamenti, & mittendi sanguinem, nec idem in iisdem effectus, ut nihil contra opinionem cōcludit, sic nec pro ea. Attamen cū Hippocrates curatiuam rationem, non præsertiuiam iniisset in libris Regim. acutorum, reuulsuam prætermisit, cōtentus illam in generalibus sermonibus docuisse: deriuatiuam uerō explicat, quæ ut fit ex latere patiente, sic affectum iam constitutū non orientē præsūponit. Vnde reuulsui etiā meminit auxilii secūda particula sexti Epidem. 28. dum dixit: Reuellere si quod nō oportet, uergat: sin autem quod oportet, his aperire conuenit, secundū quod singula uergunt. An & in hoc generale erit, ut ab eadem parte tantum fiat reuulsio? atq; sic frictions & cucurbitulæ solum erunt patienti particule ab eodē latere, uel iuxta eam applicandæ, summa ægri perniciē: an quia reuulsua sunt auxilia ex aduerso licebit? Quare & in missione sanguinis, quæ ad reuellendum fit, quid prohibet ne in parte cōtraria fiat? quādoquidem in hoc non singularē curationem iuxta Hippocratem exequamur: sed generalē iuxta illū reuulsionis rationem, quæ ad contraria fieri solet, ineamus. Quod si quis dicat, Galenum 2. Regim. acutorum 1. dicere, Fomenta augere dolorē in initio, atq; ob id cū augetur dolor, mitti sanguinem, atque sic ab initio sanguinem mitti: hoc nil impedit tamen: quia, ut dixi, ex prima autoritate quæ in 2. Regim. acutorū est, non constat quod ex aduerso latere: in secunda autoritate, quæ in quarto habetur, Hippocrates non loquitur, nec uir sententia Hippocratis dignus ex Galeni sententia in eius libri initio: quāquā

eum textum uelut phœnicem quandam in Hippocratem referat. sed & si uterq; textus Hippocratis sit, nihilomagus concluditur ratio: nam Hippocrates quāuis morbum per fomenta exploret, in secando tamen uenam id præsupponit, quod morbū non solum constitutum, sed & uehementē demonstrat: siquidē, ut dixi, grauitatem, & extensionem ad iugulū, & sanguinis corruptionem. At uerō non inconuenit morbū iam cōsistere, sic ut iam factus sit: materiam uerō aliam denuō influere. At non merito fluentis materiæ, sed morbi iam facti hæc uenæ sectio instituitur: nam si illud uoluisset, adiciere eas non oportebat conditiones. Si enim post fomēta solus dolor pungens appareat, non ulla grauitas, non ulla iuguli, sed solū costarū affectio, quid agendū? Sunt qui adducant Aphorismū 22. sextæ particulæ, sed parum ad propositū. Ideo melius est declarare, antequā ad Galeni expositionē ueniamus, quonam pacto ex secundo ad Glauconē tria genera misionis sanguinis distinguātur, Euacuatium, Deriuatiuum, & Reuulsuum. Deriuatiuū igitur ex directo patientis particulæ secundum motū eundē materiæ fit: uelut si quis in liene, uel rene sinistro phlegmonē patiat, sanguine à superioribus partibus horum membrorū descendente, fit deriuatiua sanguinis missio ex saphena pedis, uel sub poplite: ita si fluere ab inferioribus ad superiora in hæc mēbra, tunc cubiti interior diceretur deriuatiua: & generaliter deriuatiua & reuulsua fit ex eodē latere patientis particulæ, & etiā euacuatua: atq; ita omnes apud Galenum mittendi sanguinē modi, ut ibi declaratur cap. 2. iuxta mediū: sed deriuatiua secundū partē motus materiæ ultra locum ipsum fit: at reuulsua ex loco motus materiæ ad locū patientem, uel ei propinquo, sed tamē à loco defluxus remotiore: & ideo in similitudine deriuatiuæ, & in contrarietate reuulsuæ, non particula patiens consideranda est, sed motus à quo, & ad quem: reuulsua ex contrario: deriuatiua autem secundum motum naturæ fit: euacuatua ex loco ipso, aut propinquissimo. His itaq; cognitis, mirum satis uidetur, cum 3. Epidem. particula tertia tex. 80. de Anaxione loquens, subiecerit: Venam sectam in cubito dōlorē leuasse: nec adiunxerit, ex quo latere, cum tamen latus dōlēs dextrum esse declarasset: si quid dubium esse poterat, non illud ostendisse: cum etiam in initio fomenta adhibeat, proximam autem succedere uelit sanguinis misionem, si per fomēta dolor non leuetur: cur, aut quando ex aduerso latere sanguinem mittere poterit? In angina etiam latus ipsum dolentis partis si obseruat Hippocrates, idem etiam in aliis morbis agere: sin aduersum, cui cōmodo? tamē etiam illud iam declaratū est, Omnes species sectionis uenæ secundum latus idem fieri debere. Quare uerisimile est, Hippocratem nullam misionem sanguinis ante eam, quæ ex eodem fit latere, nos edocuisse.

Sed ad Galenū iam ueniamus: hic enim, ut mihi uidetur, clarē loquitur:
nam

nam in libro de Sanguinis missione, cap. 15. & 16. secundum nostrā sectionem, hæc habet: Quæcūq; igitur de hac speculatione à medicis dicta sunt, ea si scribere aggrediar, opus erit libro iis sigillatim dicato, eoq; ingenti. Cæterum ut in aliis quæ hætenus definita sunt effeci, ut scilicet mentem meam vobis exponerem, qui eam à rebus ipsis probari uideritis, idem nunc quoq; faciam, initio sumpto ab iis quæ quotidie in laborantibus uidentur: quæ quidem Hippocrates diligentè obseruata memoriæ prodidit. Est uerò unum eorum primariumq; caput, scilicet hoc: Quibuscunq; κατ' ἔξω eruptio sanguinis fit, summum affert commodum laborantibus. (Hoc autem κατ' ἔξω, quòd secundū rectum intelligatur, omnibus est confessum, cum clarissimè sæpenumero hac uoce in hoc utatur significato.) Quibus autem contra euenit, nihil iuuat, cum etiam interdum noceat: quòd uires citra morbi leuamen exoluat. Non enim liene turgente ex dextra nare erumpens sanguis, aut in iecore ex sinistra ullam affert utilitatem: sed reuulsio quibus in directum adhibetur, euidentem utilitatē celeriter ostendit: quibus contrā, non. Dextra igitur nare sanguis erumpens, ad dextrum hypochondriū fixa cucurbitula clarè celeriterq; sistitur: sicut ad sinistrum ex sinistra erumpēs. Porro reuulsionis causa si uenam feces in directè quidem oppositis sanguinis eruptionibus, citissimè conspicuam uidebis utilitatem. At si contrā feces, nihil profuerit. Sic & affecto liene æquè adiuuerit circa medium digitum sinistrae manus incisa uena, atq; si internam cubiti secueris. Multum enim lienem afflictum iuuat sanguinis detractio ex sinistra manu. Inde paulo pòst: Quin & pleuriticis quæ è directo lateris laborantis adhibita fuit missio sanguinis, clarissimam sæpe utilitatem attulit: quæ uerò ex opposita manu, obscuram omnino, aut post temporis interuallum. Inde rursus paulo pòst: Itaq; dolentibus oculis humeralis uocata uena, quæq; ex ea deriuatæ in cubito incisæ luculentū celeriter commodum afferunt. Dolente autem latere, aut pulmone, aut septo transuerso, aut liene, uel iecore, uentriculoue, ea quæ per alas ad cubiti iuncturam pertingit. Hoc autem casu maxime interior secanda uenit. Quòd si non, certè ea quæ ab ipsa diducta in iuncturæ flexura apparet: his non obscurum est, Galenum tria edocuisse: Primum, quòd ex eodem latere & per uenas à loco læso deriuatas, aut ei coniunctas, sanguinis missio sit mollienda: Secundum, quòd illud Hippocrates censuerit: Tertium, rationem huius ostendit quæ cū Hippocratis auctoritate coniuncta est. Inquit enim ille tertio Prorrheticorū 33. Sanguinis ad latus diuersum eruptiones malæ, ut si cū lien magnus fuerit, ex dextra nare fluat: atque res in hypochondriis ita se habet: cū sudore deterius id existit. Atq; ibi Galenus desumptum hoc refert experimento plurimorum languentium, quos in Epidemiis enarrauerat. Hoc igitur pro confesso haberi debet, quòd in reuul-

sione Galenus sanguinem ex directo mittit. quòd autem directum latus dicatur dextrum dextro, sinistrum itidem sinistro, iam satis clarè uerbis suis edocuit, ostenditq; ratio sua cum Hippocratis autoritate coniuncta: & ostendit 2. de Tuenda sanitate, dum species frictionis refert, directam ac transversam: tum etiam quinto de Partium usu cap. 14. dum uentris musculos enumerat. Idem clarum est 2. ad Glauconem cap. 2. secundum nostram sectionem. Quin etiā 4. Regim. acut. 73. confundit ista tria, Venam in directo, & Internam, & Lateris eiusdem patientis, quasi idè significant.

Altera habetur autoritas 13. Artis curatiuæ, cap. 11. secundum nostram diuisionem, inquit enim: Proponatur itaq; iecur iam phlegmonem contrahere coepisse: tum, quænam mali curatio huius cōmodissima sit, quæ-ratur. Inde paulo post: Ergo pariter tum reuellendus tum educendus sanguis est, qui ad iecur confluit, interna in dextro cubito infecta uena. Propterea quòd & è regione, & ampla uia, cum uena quæ cava dicitur societatem habet: hac non apparente, media secanda est: quòd si hæc non apparuerit, reliqua ac tertia est incidenda. Inde etiam post, sed tamen eodem capite: Satiùs igitur sit, ubi partes, quæ in ore sunt, phlegmonem accersere coeperint, ad nares deriuare. Pari modo uenam quoq; ubi hæ partes sic laborant, incidere humeralem in manu: si ea non cernitur, mediam: ubi iecur, pectus, pulmo, aut cor sic afficiuntur, internam: in angina, quam *συνέγγη* Græce uocant, primas in manibus, secundas eas quæ sub lingua habentur. At iis quæ in occipite sunt afflictis, etiam eam quæ in cubito est, & eam quæ habetur in fronte: renibus uerò & uesica, & utero sic habentibus, eas quæ in cruribus sitæ sunt, & potissimum quæ circa poplitem: sin minus eas quæ circa malleolum: ac in omnibus quidem semper ea quæ in directo est, ubi iecur phlegmone inuadit quæ in dextra sunt manu, ubi lienem contra. Qui huic resistunt opinioni, de iam facto phlegmone exponunt. Verùm responsio nulla est: nam in angina docet primam facere ex brachio sanguinis missionem: hæc autem sit nondum facta angina. igitur hæc & reliqua sanguinis missio, quæ in laterali morbo iubetur, in initio est. Docet etiam ibi cataplasmata, uel purgationes in aliquibus morbis conuenire. Igitur cum hæc tantum in initio conueniant cataplasmata quidem astringentia, & purgationes, inchoantibus morbis iuxta illud in acutis raro, & in principiis medicinis purgantibus uti: & hoc cum premeditatione faciendum. & 2. Aphor. 29.

Tertia autoritas colligitur ex dictis 2. ad Glauconem. Sufficiat propter ea quæ diximus uerba ipsa subiecisse, ea autem sunt: Fluentium igitur humorum retractio, sic enim Hippocrates nominat: eorum autem qui iam membrum obsederunt deriuatio medela est. Vtrunq; autem euacuationis genus per communes uenas fieri præcipit. & infra parum: Patientibus

tibus uerò membris extremis à coniunctis euacuatio fiat, siue retrahere uelis, siue deriuare, præterquàm ubi passio est inueterata: tunc enim à membro ipso patiente detrahimus.

Quarta autoritas habetur in de Constitutione artis medicatiuæ, cap. 17. cum dixit: Maximè uerò & partium sanatio, quæ phlegmone laborant, ex situ & positione desumitur. Inde post pauca: His ergo docentibus, qui in coxendicem fluxus decubuerunt, per poplitum ac malleolorum uenas euacuabimus: uti sanè & quæ in uteris hærent: quæ in pulmone, ac thorace, per uenam cubiti internam: quæ in capite, & collo, ex humeraria: proximarum enim atque communium affectæ particulæ uenarum euacuatio, optima est, atque facillima. Si quis dicat deriuatiuam hic docere iam consistente phlegmone: non erit uerum, semper humerariam capiti & collo maxime conuenire: nam in angina quæ sub lingua sunt magis quandoque conueniunt: at humeraria in angina & phrenesi retractiua est: igitur in laterali morbo interior cubiti talis est. Nec obstare uidetur his quatuor tam claris autoritatibus, quòd dicat tertio Paruæ artis in cap. de causis præseruatiuis. At attrahendi ex omni loco ad oppositas partes communis indicatio est, ad quam maximè distantia: deriuatio uerò ad uicina. Et antè in capitulo de Asperitate & lenitate, ubi de phlegmone loquens, hæc habet: Si igitur uniuersum corpus plus æquo plenum fuerit, per patientem locum minime euacuandum. Nam si scarificationibus aut sectionibus sensibilibus euacuabimus: plus ratione doloris excitati attrahemus. Si uerò calefacientibus dispergere tentabimus, plus erit quod uicinis ad partem attrahetur, quàm dispersum. Quòd si elaborabimus, ut quod influxit retrocedat, corpus plenum non admittet. Ad hæc igitur ambo totum corpus euacuare oportet, aut ad contraria omnino loca retrahere quod patienti particulæ influit: quo perfecto opere, prius à parte repellendum, mox dispergendum. Neque illud Hippocraticum 5. Aphor. 68. Dolenti partem capitis posteriorem in fronte uena incisa prodest, ubi Galenus etiam: Auerfio ad contraria fit secundum longitudinem quidem, supra, & infra: secundum latitudinem uerò, hinc, & inde, hoc est à dextris & à sinistris: secundum altitudinem uerò, ante, & retro. In doloribus itaque partis posterioris capitis cum auersione nunc euacuatio fiet: nam prima autoritas de præseruatione loquitur, non de cura. Altera ex eodem libro exponenda ad aliarum autoritatum sensum, ut hæc contrarietas ad materiæ motum, non ad positionis differentiam in corpore referatur: aliter omnis contrarietas esset in hoc casu necessaria. Vel igitur una, & hanc habemus ab intus extra, tum etiam ad locum magis dextrum, uel magis sinistrum: aut omnes necessariae sunt, & tunc oportebit simul trahere à superiore parte ad inferiorem, à dextro in sinistrum, ab antè retro: & sic laborante ægro phleg

phlegmone costarum in latere dextro, ex calcaneo pedis sinistri sanguinem necessarium esset mittere. Ad tertiam auctoritatem quidam dixerunt Hippocratem loqui de materia educēda iam expurgato corpore.

Dii boni quis ferat mores horum temporum? nanq; cū uix unus, aut alter literas medicinæ sciat, quinimo eorum, quos ego è facie noui, nemo est qui nō oderit nos, propter studium & ueritatis amorem: quod & Galeno, ut ipse de seipso refert, contigit: ut pro bonis literis ingemiscam: nam hanc auctoritatem (proh tempora) modò pro se adducunt, modò prætereunt, modò euacuato iam corpore exponendam docent. Quid mirum est igitur, actum esse de medicina, apud Italos præsertim? Hoc illud unum est quo mihi illi aduersantur: non parum tamen uni debemus, quòd laboris ad restituendum bonas literas plurimum impenderit: an affecutus sit, non est meum iudicare, qui mortuos nō insector: atq; utinam nulla mihi causa esset reliquos medicos accusandi. cū enim stertāt in domibus, cōsiliisq;, ac arte ualeāt: nobis hoc unum obiiciunt, quòd mathematicas nouerimus: atq; quod olim summo honori fuit, tum medicis, tum philosophis omnibus, Hippocrati, Galeno, Platoni, Aristoteli, impii ac nepharii uiri mihi uitio uertunt: nec sufficit illis maxima ignorantia, nisi & de illa, quemadmodum olim de studiis gloriantur. Ego bonis non maledico, nam nemo bonus nos odio habere potest. At hoc certè in hoc monstro inuidiæ ferendum est. Conantur quibusdam hoc etiam sciolis persuadere, qui uel prima literarum Græcarum elementa tenentes, orbem digito temperare se posse putant, atq; in cœlum os infanum ponere audent. Deceret illos, qui secum plurima iactant, qui tantum sibi sapiunt, qui iudicium de melioribus faciunt, aliquando uelut tauri solent, seipso luctando experiri, propriasq; uires expendere. Scribant, disputent, doceant, si licet: uidebunt a finos esse, qui lepores currendo se fore existimabant: plus illi bonis literis detrahunt, quàm medici: nam ex his aliquot uel saltem pudore tenentur: ignoscendumq; his qui propriæ utilitati, & si aliorum iactura, consulere se putant: ferenda est etiam medicorum inuidia, quæ cum arte ipsa coalescit. At has importunas cicadas quis ferat, uel inspicere etiam dignetur? Cæterum Deum aliquando humani generis misereri oportet sic, ut Principes aliquot mittat, qui non famam hominum respiciant non gloriam falsò quæsitam, sed mortalium communem salutem. Misit forsan, sed hos tot curis, tot suspicionibus impleuit, ut ab hoc tã præclaro beneficio auer- rat: nam non potest Cæsar uituperari inter cæteros, qui Vesalium apud se habeat, hominem antiquam redolētem ingenuitatem. Ergo ut ad rem redeam, pudet me dicere quosdam hanc auctoritatem dissimulasse: Ergo id Hippocratis cōsiliū est, ut de diuturnis loquatur morbis: nam & Galenus diuturnæ fluxionis oculorū meminit in his, cum affectus phlegmo-

nem

nem non possit excitare: neq; enim inueteratus fieret hic dolor, sed ad finē breui perueniret, cum calidā supponat fluxionē, quæ sanguinis misione curāda sit: quicquid in dies effluit non cogi, sed à natura dissolui præsupponit. Ergo superuenienti materiæ, non defluxæ occurrendum est: at illa quæ de nouo superuētura est, auersione ad opposita indiget, cum rationē habeat præseruantis partis medicinæ. Igitur in talibus iure merito, & in capitis dolore posteriore, uenæ anterioris sectio: & in diuturna ad oculos fluxione cauterii genus in occipitio, quod setonū uulgo uocāt, optimē cōueniet. Eadem difficultate illud fermē præterit: duo esse genera diuersionis: alterū quidem quod ad maximē distantia loca cōtrariāq; deducit, quo in præseruatione uti debemus, nondum morbo factō: atq; id è diuerso latere magis: alterum autē, quo per materiæ euacuationē dolore sedato, influentē adhuc sanguinem ex loco reuellimus, quo quidē phlegmone iam factō utimur. atq; illud ex latere eodē κατ' ἴξιν, non quidē ex lateris reſtitutione, sed uenarū cōmunicantium causa faciemus. Accidit autē fermē semper, ut quæ in eodē latere sunt etiā magis cōmunicent, quā in extremis: unde Curtius in hoc peccat, cum pro uenis latus exponat. ideoq; non facile illud effugere potest quod Galenus 13. Artis curatiuæ cap. 5. secundum sectionem nostrā (est autē in primo folio) dixit: Cogimur autem alias sanguinem mittere, idq; aut uena incisa, aut mēbris his, quæ laxa non sunt, scarificatis. Manu enim laborante scarificabis crura: altero autē crurum male habente, reliquum. Quidam expōnebat sic, ut mutuō referrentur, quasi dicat: Manu laborante, crura scarificabis: uicissimq; manum, laborantibus cruribus: hoc enim uidetur esse reliquū in sermonis contextu: sed non patitur hoc Græca synexis, habet enim, *ἢ τοι φλέβα τέμνοντες, ἢ ἀποσχέροντες τὰ μὴ πεπονθότα κῶλα. χεὶρὸς γὰρ μὲν κακῶς ἐχούσης τὰ σκέλη: τοὶ δ' ἐτέρω τῶν σκελῶν πεπονθότα, τὸ λοιπόν.* Existimo quosdam auctoritatem nō uidisse, nec aulos negare: cum enim multas Hippocratis et Galeni auctoritates aduersum, & pro se adducāt ex loco: hanc quasi secundum ad Glauconem libro scripta esset, in qua plurimum erat in tota quaſtione ponderis, retulerūt: cōnātes euadere, tum eludere. Sed ut illos excussem: certē Manardus & ipse locum non demonstrauit: & in codice Andree Turonensis (qui illā primus in medium adduxisse uisus est) error in numero capitulorū emerſit: quare nihil mirū fuit, cum id solerent homines exercitati in promptu habere, ut ad omnem auctoritatem quātumuis clarā effugiendi uiam haberēt paratam, quasi diuinātes responderūt. Itaq; cōmunicantes uenas semper Galenus respicit, latera non ob aliud curat. At in cruribus, cum uenæ caue supra ofſis sacri initiū diuisio in ambo crura fiat, neceſſe fuit, ut sanguine ad alterum crus retracto, diuersio uera fieret ex cōmunicante uena, propioreq; loco. quod si ad manum retraxisses

nihil peractum erat: cum detractio communis fuisset etiam alteri cruri. At in brachii, uel manus phlegmone, diuersio ad crus materiam à loco patiente diuertebat: quoniam sanguis, qui ad manū ex corde & iecore ascende-
bat, ad inferiora retrahebatur. At uerò alterius brachii uenarū sectio non proderat, cum auertere à toto corpore sanguinē necesse sit. Illud autē rectè dixit: Pleno corpore ex aduersa parte sanguinis missionem prodesse tardè, nec adeo manifestè: at materia ex circūuicina parte fluente, mittē-
dum esse sanguinem ex cōmunicante uēna: duplex enim dispositio adesse potest, ut tertio Artis paruæ colligitur. Sed repletio totius aliam habet à phlegmone alicuius partis diuersam indicationem, de qua hīc sermo habendus non est. Similiter & illud forsitan (quāuis extra propositum) diluendum erit, quod Curtius dicebat ex Galeni sententia libro de Sang. missione cap. 19. dum Aphorismus ille exponitur, Dolenti partem capitis posteriorē, uena frontis incisa iuuat: corpus enim prēuacuatū esse oportet, dicit Galenus: non quidem, quòd ob diuersionem iam facto morbo conueniat, sed quòd in præservatione, cum è proximo diuertendum est, corpus totum euacuandum est. Hoc autem & prius à Galeno fuerat demonstratum, quare nimis oscitanter quidā interpretantur. Manardus autē diligentius. Sunt & aliæ nō paucae contra hanc sententiā Hippocratis, Galeni auctoritates 5. Artis curatiuæ cap. 3. & 4. eiusdem, cap. 6. & in libro de Antispasi, seu reuulsione: tum in libro de Succis ab Hippoc. & 2. de Humana natura t. com. 10. cum dixit: Vidēdum est autem, ut sanguinē quā longissime ab locis mittamus, quos obsidere dolorem animaduuerimus, sanguisq; contrahatur: nam ita demū haud magna repente mutatio incidat, & consuetudinē prācideris, ne eò loci confluat posthac. Legit Græcus codex, cum interprete, Minima, absq; negatione: sed utcunque legas, non magis consulto hoc, uel diligentius cæteris adductis, ab aduersariis inducitur. Vide hominum stuporem, & Gorgonis caput intuentium: nam Galenus inquit, Quod uerò non explicuit, an à dolentibus partibus procul reuelli influentes humores prācipiat, an sanitatis tempore, hoc nomine sit reprehendendus. Equidem de ualentibus potius dictum censeo, ut autor. (nam Hippocratem illum esse negat) assuefacere uelit, exundātes humores in alia membra fluere. Videant modo cæci, (non enim eos alio dignos nomine iudico, tum præsertim, quòd sanam interpretationem sententiæ Hippocratis & Galeni damnant) an hæc uerba pro illorum opinione faciant. Aetius libro 8. cap. 68. satis neglectim quibusdam hanc rem tractasse uideri poterit: cum nec Galeni meminit, sed Archigenis, qui duos uno uerbo letales admittebat errores: parum scilicet, & ex aduerso latere sanguinis detrahens. uerum libro 3. cap. 12. clare mentem Galeni exponit, in omni quidem affectu reuulsuam ab eodem latere constituens ex illius mente

mente omnibus in casibus: peculiariter autem ac nominatim de laterali etiā morbo differēs. Vnde Leonharti Fuchsi reprehēſio in Aëtium, tanquam contraria Galeno ſentientem, in quarta ſecundi libri Paradox. illius autoritate indigna eſt: quippe uir ille doctus inter noſtri æui homines dici poteſt, ingenuiq; pudoris, atq; utinā non tam temerè Aëtium uirum undequaq; abſolutè doctrinæ dānaſſet, aſinum illum Oribasiū, nihil ſani propemodum ſentientē, laudans: qui ubiq; tanquam ſus inter ſœdas nugæ ſe prouoluit: Galeno ex compoſito, ſine ratione cōtradicens. Aëtio autem ob antiquitatis amorē, tum quòd multa utiliter ex eodem medicamina deſumpſerat, moris fuit in ſingulis fermè Archigenis enarraſſe ſententiam. cuius etiam Galenus ipſe meminit, tum maxime in libris de Medicamentis ſecundum locos: ipſum autem quòd diſceſſerit à Galeno, cū illum multis iam annis præceſſerit, cur non accuſet, admirari nō debemus: cū nulla in parte Aëtius quenquam ſoleat damnare, uel oppugnare, uerū antiquorum fideliter ſententiam referre. Trallianus libro 1. cap. 41. hæc habet: Noli uerò auertendi cauſa, aliam quā ex affecta parte uenam pertundere: uerum ſi dextra parte dolor magis diſcruciat, eodem ſtatim latere uena ter quaterq; ut dixi, non copioſè ſecanda eſt. Sed hæc in angina, non laterali morbo. libro autem 2. cap. 1. dum hanc tractaret curā Hippocratis ſententiā ſequitur: quam cū ex Galeno interpretatus ſit, haud dubium eſt, ſanguinem ut ex eadē parte mittatur conſulere: tum magis, quòd eodē modo cucurbitulā loco ſectionis uenæ quādoq; apponere nos ſuadet: cū haud dubiū ſit, illam ex eodē latere apponendam, quam ſuper loco dolente uelit affigi: ſic enim protinus ad exteriorē regionem, illius ſententia, morbus adigitur. Paulus lib. 3. cap. 33. nihil clari affert: lib. 6. cap. 40. clariùs loquitur dicens: Cæterū in particulis recens inſtāmatione tentatis ex oppoſito inanitionem moliri conuenit, in uetustioribus ex propinquo: ſiquidem ex omni corporis parte ſanguinē mitemus: frequentius autem ex interiore uena cubiti. Quo ſit, ut qui Paulū pro ſe adducunt, diſſimulare mentem eius uideantur: nam quāquam dicat in ſine capituli, In iecoris affectibus dextram, in lienis ſiniſtram pertundendam: de manuum uenis, non brachii loquitur: & iam conſiſtente morbo. Itaq; etſi, ut pleraque ſolent, illius opinio ad Galenum retrahi, eiusq; ſententiam poſſit: hæc tamen ſunt eius potius, qui ſectam tueatur, quā ueritatem. Vnde miror, imò non miror, quosdam pro ſe Paulum in medium adduxiſſe, uelut & reliqui, qui illis aduerſantur, Galenum. Verū hæc ut apud multos incerta ſunt, ob tot autorum contrarietatem, de Hippocrate tamen quòd ſic cenſuerit, credēdum eſt: non ſolū ob adductas ſententias illius, & Galeni interpretationem, ſed quòd ſecūda particula ſexti Epidem. in t. 12. Secundum rectum & coſtarum dolor, & præ-

cordiorum contentiones, & lienis elationes, & ex naribus, eruptiones, & aures secundum rectum. Et inde in 15. subiicit: Consideranda hæc sunt, quò, unde, & propter quid. Facile quiuis nulli addictus opinionem intelligit Hippocratē eam curā moliri è directo, in omnibus his partibus phlegmone laborantibus. In libro etiā primo de Morbis pagina ultima, *ἐν μέρει τῶν φλέβων ἀποσκήσαι τὴν ἐν τῇ χειρὶ, τὴν ἀσπληνίην καλεομένην. ἢ τὴν ἡπατίην, καθ' ὅποτις ἐν αὐτῇ τὸ νόσημα, καὶ οὕτως ἢ ὁ δὲ ἄλλος. Quod est, Confert uenā secare, in manu lienarē uocatam, uel iecorariā secundum partem qua morbus afficit. atq; sic lateris dolor mollior fit, atq; aliarum partium. Atq; in uniuersum Galenus hanc sententiam sequutus est: unde 2. Regim. acut. 10. Cum igitur superiorū cōdolentia signū fecerit, uenā in cubito secare eam oportet, quæ ab affecta parte sanguinem magis ac uelocius reuellere, tum uacuare possit. inde fermè in fine iuxta Græcā lectionē ibi, *γινώσκων τὰς κενώσεις ὅθεν.* cum multa traductor prætermiserit, necessaria sententia illius subiiciatur, his quasi uerbis, Cognoscentes quidem quòd euacuationes undecunq; fiant ab uniuerso animalium corpore educere: quāquā neque celeriter, neq; similiter ex omni uena. Nos uerò partem eam, quæ obfidetur inflāmatione, & celeriter, & plus aliis partibus, præsertim in acutis morbis, euacuare studemus. Quod sanè interna cubiti uena facit, multoq; magis ubi sanguinis redundantia ad superiora uergere uideatur, aut superiores thoracis partes affectæ sint. Et causam huius certè nobis explicauit 13. Artis curatiuæ, cap. 8. cum dixit: Igitur tum reuellendus, pariterq; euacuandus, qui ad iecur sanguis fluit, interna in cubito incisa uena. Duo igitur molitur simul Galenus: reuulsionem scilicet, & euacuationem. Vnde illud etiam in octaua Contradictione præcedētis tractatus ex Hippocratis sententia declarauimus. Ex quo nō paruo errore lapsus est quidā uir clarus in hoc, qui frustra conatus est tueri reuulsionē solam ex eadem parte fieri debere, cum hoc nusquā Galenus uelit: sed hoc unum illi sufficit, quòd quæ ex eadem parte sectio facta euacuat, etiam ad hoc reuellere potest. Quòd autem ex eadem parte sectio conueniat, ubi reuulsionem tantum sit opus, non deriuatione, nec euacuatione, Galeno quærere non fuit propositum. Vbi autē hoc declarauit, nō sufficere censuit, ob idq; perperā uisum est Auerroi 7. collectaneorū 29. Galenū cōtraria de hac sectione sensisse. Sed Rabi Moyses in 12. particula Aphor. rectè Galenū assecutus est, ac eius mentē, ut apparet in Aphor. 32. et 35. illius particula. Verū postmodū particula 25. Aphor. 10. reuocauit dicta Galeni in dubitationem, & contradictionē, quasi sui oblitus: cum tamē nullā in se habeāt difficultatē. Haliabbas uerò magnus Galeni interpres, uidetur in tertio practica ca. 21. & quinte*

& quinto Practicę cap. 1. huic assentiri opinioni, dicens, quòd in phlegmonibus debemus mittere sanguinem ex latere patiēte: uerum in cura morbi lateralis lib. 6. cap. 13. dixit totum oppositum: nam dixit, quòd in initio sanguis ex aduerso latere mitti debet, uerum post initium morbi ex uenis eiusdem lateris à brachio. Idem ferme nono Practicę cap. 3. unde mirū est de duobus: primò de huius uiri inconstantia, si modò ad nos mutulus non uenit: secundò, quòd quidam adducant eum pro se, cum manifestum sit sermonem proprium præferri debere generali, cum fuerit ex auctoris, non alterius sententia. Et ideo iste tantus Galeni interpretes uidetur ex toto Galeno contrarius: nam cum omnes ferme in propria curatione, Galenū affirmant uoluisse, ex eodem latere mittendum sanguinem, cum de laterali loquitur morbo, at de generalibus præceptis dubitent: hic ex toto oppositum dicit. Sed iam ad Rasim ueniamus: hic quarto Continentis cap. 3. fol. 4. iuxta medium, hæc uerba, Galeni sententiam declarans, habet: Dixit quòd congruum est, quòd minutio fiat in uenis manus partis diuersæ: & de membro læso attrahatur sanguis ad partem contrariam partis in qua declinans est sanguinis. Dico, quòd iuxta huius contrarietatem minutio fieri debet in parte diuersa: quoniam dixit, ut attrahatur sanguis ad contrariam partem partis in qua declinans est sanguis. Hæc ille. Ex quibus, quicquid dicat Curtius, si panis panem significat, & non leporem, palam est Rasim sensisse Galenum uelle ex contraria parte morbi sanguinem mittendū esse. Verum diffusus propriæ interpretationi, denuò uerba hæc subiecit: Causa quoque propter quam minutio fit in basilica uena, manifesta est in libro Anatomix: quoniā in eo dictus est locus, de quo sanguinem recipiunt huiusmodi membra. Dixit quòd minutio ipsius uenę est maximi iuuamenti, si passio declinans fuerit ad superiora. Per quæ opinionem Galeni nolens uolensque declarat. & rursus intrā fol. 88. col. 3. ex Galeni auctoritate habet hæc: Dixit existimo, quòd, dum passio fuerit in principio, dignum est, ut minutio fiat ex diuersa parte partis dolentis: sed si purgata fuerit materia, minutio fiat in ipsa parte dolente. sed utendum est minutione si dolor peruenerit ad partem hepatis & furculæ. Ex quo detegitur alius error eius, nam furculam inferiorem intelligit, cum Galenus superiorem. in folio etiam 91. col. 3. iuxta medium, declarat minutionis iuuamenta, & causas, tanquam de ea loquens, quæ ad latus patiens pertinet: ut nihil plus expiscari liceat ex Rasi, quantum ad Galeni pertinet opinionem, quam contradictiones, & ambiguitatē. Nec tamen præter utilitatem fuerit narrare, quod ex sententia Binscrapionis adiecit his uerbis: Dixit, ego iubeo quòd fiat minutio in principio huius passionis ex latere diuerso: sed quiescente passione fiat in latere læso. hæc ille Græcus. nam hic, ut alias dixi, anterior Galeno fuit, nō autem Arabs & Galeno posterior, temporibus

bus Auicennæ fermè. Ex quo pudendus error Othonis Brunfelsii manifestus est, qui cum duos unum esse crediderit eundem, qui Galenum citat, illo antiquiorem facit, & creditur tamen hic aliquis fuisse. Cogita modo quales hi nostri æui medici sint, qui etiam gratuito studiosos oderint: an putas illos literas discere posse, nedum ut dicā scire? At ego, nisi Deus aliquis nobis auxilietur, hanc artem perditā prorsus nunc putem: cum alii, ut solent blandientes, falsò in Principum & populorum perniciem reuiscere affirmant. Multos tales libros Rasis habuit, qui ad nos non perueniunt: ut commētaria Galeni super secundum Epidemiorum, quæ à nobis desiderantur: librū Galeni de Humoribus quē tamen Brasauolus citat: Ruffi, Serapionisq; Græci libros, tum alia plurima. Verū, ut dixi, hæc omnia uerba posteriora declarant primam auctoritatem adductam, ostendere sanguinis missionē in laterali morbo faciendam, ex Galeni, ut à Rasi interpretatur, sententiā: quanquā anceps propter posteriora uerba fuerit, ut fermè quod Auerroës Galeno imponit, etiam ipse Rasis sentire uideatur. Ne igitur adeò quisquam gloriatur, nam si suffragiis standū foret eorum, qui de Galeni sententiā diiudicant, & si Galenus aliter sentiat, attamen potior esset opinio illorum, qui eum contrariæ partis sanguinis missionem præposuisse pronuntiarunt, falsis ac uitijs translationibus decepti. Quamobrem operam lusurū me existimo, si homines quorum lapsus adeò in comperto causa est, argumentis uel rationibus aut melioribus interpretationibus ad ueritatis sententiā reducere coner. Sed iā institutum prosequamur. Arabum nullus in hac sententiā certè est, sed ut à Galeno dissentiant, ita etiā inter se pugnant: ut fermè plures sint opiniones, quam homines. Nec mirum, cum unus idem etiam diuersa senserit. nam falsis opinionibus innitentes nunquā quiescunt: nec eadem uia progrediūtur, sed alius aliò tendit, uelut & in testibus falsis, cum diligenter de eadem re interrogantur, accidere solet. Iccirco primus inter eos (dignitate loquor) Princeps, & si in fine Canticq; dicat: Galenus quidem aperiebat uenam, & sanguinē minuebat, cum erat chimus auctus, & magnificatus: fiat igitur minutio sanguinis in corpore apparentibus signis, & potissimè cum apostemate, seruatis conditionibus istis: non autē in aliis humoribus. fiat ergo phlebotomia in his quæ intellexit in hoc tractatu, & in morbis illis etiam in quibus ipse fecit eā. Inchoetur igitur à phlebotomia in omni phlegmone, habito certo testimonio super ipso Aphorismo tertiæ partis Practicæ. 75. & tribus sequentibus: & in sermonibus generalibus plurima ambigua, obscura, dubia, pugnantiaq; ut plerunq; solet, de hoc dixerit: Aristotelem imitatus, ne reprehēdi possit, 10. tamen tertii t. 5. cap. 1. habet hæc: Ex rebus communibus est sectio uenæ: sed in principio ex latere diuerso, & magis festina de saphena opposita in longitudine: & post ipsam de basilica opposita

posita in latitudine: & post ipsam de nigra opposita in latitudine: & si non appareat, tunc non oportet ut dimittatur sectio uenæ cephalicæ, quamuis inuamētum eius sit minus, & tardius. Hic quatuor ordines ponit adeò clarè, ut interprete non indigeant: uerùm in cap. 2. subiicit uerba, quæ quidem his non repugnant, quāuis sensus uideatur manifestè contrarius: ideo ne talem uirum accusauerim, referātur uerba secundi capituli ad illa primi, quibus dicit: Deinde post aliquot dies ex latere conueniente in latitudine. Tunc exponantur rectè uerba illa capituli sequentis: Et extrahatur sanguis donec permutetur color eius: significat enim, quòd nocibilior sanguis iam euacuatus est. Et scias, quòd sanguis corporis uehementioris nigredinis est ille, qui est propinquus huiusmodi apostemati. Ex quo patet, quosdam dum nimis ueritati student ipsius rei, extorquere à proprio sensu Principis uerba, & in contentionem reuocare: quæ quāuis falsam contineant doctrinam, clara tamen & omnis contradictionis expertia sunt: atq; talia quæ à quouis pertinaci defensore absq; ulla calumnia tueri possint: cum ipse sibi ex omni parte constet in eo opere, cui summam, ut par erat, adhibuit diligētiam. Neq; enim ille ego sum, qui more quorundam sciorum nostri temporis, ut primum quatuor elementa Græca tenent, in Arabes omnes impudicè debacchantur: tanquàm uel ipsis illis possint comparari, aut habeant quem Auicennæ in medicina, ordine, uel subtilitate comparēt: aut Auerroi in Philosophia. Neq; uerò negauerim, Græcos aliquos tales fuisse, qualis Auerrois: sed nullius, ut illius, omnia opera extant: uel quia non scripserūt, uel quia temporum iniuria subtracta sunt nobis. Galenum medicinæ parentem uoco, illumq; in opere sector, ordinem tamen nullum habet, ac immensam prolixitatem: quare fit, ut ad Aëtium, uel Auicennam confugere sæpe cogar. nam Paulus nimis brevis: Oribasius omnino inutilis: Aëtius etiam multa prætermisit: sed tamen hic solus Auicennæ par est, uel parum ab illo differens. Quare ne mihi oblatretis, qui ut Græcas literas scire uideamini, hoc solum indigne didicistis maledicere Auicennæ: cæterisq; uiris non solum indyctæ eruditionis, ingeniiq; penè diuini, sed spectatè probitatis. Dico præter Auicennam, Rasim, Auerroēm, Haliabbatem, Albucasim, Auenzoar, Serapionem, Mesuem, quorum ego placita suspicio, admirorq; At errauerunt per sepe. Vbi, & in quibus? In simplicibus manifestè. Hęc est illa spelūca amœna quorundam Arabes insectantium: at Dii boni, quàm rectè modo nobis explosis Arabibus consultum est circa illa, ut neq; caules, neq; buglossum, aut mespila agnoscamus: tam bene actum est cum hac præstigiosa simplicium sapientia. At ego hos non accuso: præstiterunt quod poterant: uerùm ob regionum diuersitatem tum temporum, tum linguarum permutationem, non possunt ueritatem enucleare: nec autorum contrarias sententias concordare.

dare. At si hæc omnia apud Arabes etiam paria uel maiora facere: nam & lingua à lingua plus disidet, & regio à regione, quàm nostra: cur non in illis hæc animaduertunt? ac pro excusatione duxerunt? Aucti sumus & nos ingenti libros imprimendi commodo: quo si caruissemus, ne quis uel sponte multorum, qui adeo se iactant, uel precario libros apud se habere uelit. cum Arabum gloria iam trecentis annis etiam illorum expugnata gente, uigeat: cum Galeni ipsius ex tribus duæ ferme partes librorum interierint. En uides Principem quàm breuis, quàm circumspectus, quàm subtilis? Rasim quàm doctus? Auerroëm in utroq; genere huius laudis eminentem? Errauerunt falsis trãslationibus decepti: Fateor: Sed quoties iam Galenus ad nos conuersus uenit: & tamen etiam nunc cum tanta copia rerum, exemplarium, facilitateq; imprimendi, in magna illius parte uix sensuum umbram habemus, & si uerborum nõ tanta iactura sit. Desinant igitur ineptire qui sibi ambitum, uel gloriam, ueteres damnando querunt. Sed hæc iam satis aduersus hanc nouam hæresim, cum in his quæ propriæ sunt inuentionis, Arabes ingenio, Latini facundia Græcis non cedant: fabulis tantum ac nugacitate uincimur. Præferant Aristotelem, Platonem, Hippocratem, Galenum, Ptolemæum, & Aphrodiseum: ego cum ad regionem quæ latissimè patet (nam Aristoteles, Platoq; Europei, Aphrodiseus Aphricanus & Ptolemæus, sed Galenus & Hippocrates Asiæ in annorum duorum milium spatio amplioremq; floruerunt) respicio: nihil dignum uideo tanta magnitudine. at unica Hispaniæ ac Africæ maritima ora hos omnes ac plures alios nobis reddidit uelut Heber Maumethem Mosis, Thebit, Hali, Alchindum, annorum paulo plus spatio ducentorum. Quare definite eos damnare quibus pares multa secula datura non sunt, etiam tot freti commodis. Sed ad rem reuertor, quãuis amor ueritatis nimium aduersus belluinos huius ætatis uiros quosdã me impellat.

Rasis itaq; sic distinguit libro Diuisionũ 54. ut in sanguinea ex opposito latere primo fiat sanguinis missio: post tertia die ex basilica eiusdem lateris. quæ sententia fermè in omni genere est Azarii in sua Practica. dicit enim primo ex latere opposito, deinde post trẽs dies ex latere eodem. sed Rasis, ut dixi, in ea quæ fit à bile, uult sanguinem ex eodem latere statim mittendum esse: in ea autem quæ ab atra bile uel pituita, non se declarat: sed in lib. 9. ad Almanforem cap. 57. dicit, quòd in omni, præterquàm ea quæ fit cum repletionem multa sanguinis. ubi addit multũ, & repletum: quare in aliis duobus generibus intelligit sanguinẽ ex eodem latere mittendũ esse. Et si quis instet, quòd lib. 7. cap. 11. dicat, in apostematibus semper mittendum esse sanguinem ex aduerso latere: & quarto Continentis cap. 3. Respondeo: In prima autoritate loqui manifestè de exterioribus apostematibus: & in libro Continentium aliorum narrare dicta, quæ par-

tim

tim non dignum habent autorem: aliquando autem propter malā translationem corrupta fuere. Et hæc sit declaratio & conciliatio dictorum Rasis, quæ quantum veritatis contineant, inferius edocebo. Satis sit illum uelle ex basilica semper mittendum esse sanguinem, & post initium semper ex ea quæ est eiusdem lateris, in initio etiā semper, nisi multa sanguinis redundātia in corpore affuerit: cōfuisse tamē Galenū aliter sensisse, ob malam translationem. In exterioribus autē apostematibus, uulneribus, ac fracturis ex aduerso latere semper, ut in libro Diuisionum cap. 138.

Nunc ad Principem ueniamus quarta primi cap. 3. hæc habet: Et in attractione, quæ fit ad partē longinquam, non oportet quidē ut in duas diametros prolongationem facias, sed in una tantū, quæ sit diameter magis longinqua: nam si materia fuerit in supremo dextræ partis, non erit trahēda ad infimū sinistræ, imō ad infimum ipsius dextræ: & hoc quidē est illud, quod est magis necessarium: aut ad sinistram à supremo, si fuerit tantum longinqua, quantū est ab humero ad humerū. Hic declarat apertē quid uoluerit in decima tertii, cū dixit, se magis diligere sanguinis missionem ex saphena: nam uult ut remorio, si esse potest, ex eodem latere in retractione fiat: aliter ex contrario latere. hæc ille.

Et Mesue quasi in eadem sententia, in cura morbi lateralis: iubet enim fieri missionem sanguinis ex basilica oppositi brachii, & in magna repletionē sanguinis ex saphena lateris oppositi. Quod si error non est in scriptura, disidet in duobus à Principe: Primum, quod saphenā eligit alterius partis, cū Princeps eam quæ ex eodē est latere: nec ullus alius, præter Mesuem, hoc dixit: & ideo suspicor, quod uelit dicere, ex saphena eiusdem lateris. Alterum est, quod Mesue præponit generaliter missionem sanguinis ex basilica, sed Princeps ex saphena. Adde tertium quod Princeps generaliter loquitur, sed Mesue ex parte. Verū ratio ac mēs Principis clara est: nec dicendum, ut ille, quod Princeps loquatur de regimine præseruationis: nam cū dicit, post paucos dies sanguinē mittendū ex eodē latere: uel omnino diuinat laterale morbū futurū, non existentē: uel non existente morbo bis mittit sanguinē, & secunda uice etiā ex eodē latere. Quare melius est id intelligere quod uult: scilicet, diuersionē ex longinquo faciendā semper, & si liceat, ex eodē latere: ubi uerò non, detur ex contrario. Vnde missionem sanguinis ex basilica eiusdem lateris Princeps nō somniauit. Quod autem iubeat Galeno assentiendum: loquitur in singularium uenarum sectione, quas Galenus expertus est ad morbos proprios conuenire. Vel forsan illud dixit, quoniam in interpretatione dictorum Galeni deceptus est ob malā translationem, uelut & Rasis. Sed Auerroës in commento 77. dixit, illudens Principi, quod cantauit sequutus Galenum in eo canone, & quod sua intersit de hoc: quasi dicat in ea parte secus

tus Galenus est, ubi Galenus nec bene dicit, nec sibi constat. & hoc est quod expressit 7. Collectaneorum 29. ut iam dixi. Opinio igitur Auerrois propria in hoc est, quod mittatur sanguis ex contrario latere: imò in phlegmone sinistrae auris ex cephalica dextra. Et hoc ratione nititur probare: Cum morbus initium habet, retractione indiget: hæc autem fit secundum aliquam oppositionem in corpore, scilicet sursum ac deorsum, ante retro, dextrum ac sinistrum. Sed in basilica eiusdem lateris, non est dextrum & sinistrum (non enim sunt diuersæ positiones in animali in eodem latere, imo re ipsa dextrum à sinistro distinguitur) nec ante & retro, nec sursum ac deorsum. Igitur debet fieri minutio sanguinis ex contrario latere. Et quia in augmento quærimus utrumque, sicut in statu solâ euacuationem: igitur in augmento morbi etiâ debemus ex contrario latere minuere sanguinem: non solum in principio. Secunda ratio sumitur hæc: Vbi possumus duas aggregare res utiles, illud facere debemus, tum præsertim in principio, & corpore repleto existente: sed cephalica in phlegmone auris euacuat, & si sit ex aduerso latere, etiâ diuertit: igitur conuenientior est hæc in mittendo sanguinem, quam ea quæ eiusdem lateris. Manifestum est autem Auerroem sic uelle, discrepareque à cæteris, ut solet, omnibus: quia tempus hoc mittendi sanguinem ex aduersa parte ad augmentum extendit, quod nemo alius fecit. Sed rationes, quia aliis præiudicarent non concludentes, soluendæ sunt. Dico igitur, quod diuersio uel debetur parti læsæ, uel quæ iam læditur: si secundum, nondum sumus in initio phlegmonis; ideo sanguis ex contraria parte mittendus est: uel læsæ, & sic in hoc maximè sedandus dolor, nam ille trahit, ut dicemus: hoc autem fit cum deriuatione, & propter hoc dicemus inferius, quid ex hoc sequatur. Nunc satis constat, quod deriuatiua tantum opus est quæ ex eodem latere fit. Ad secundum respondeo, quod antecedens est uerum, sed stante paritate: at in diuersiua non est euacuatione quæ sit notabilis iuuamenti. Cur tamen in exterioribus apostematibus contrarii lateris sanguinis missio præferatur à Rasi, & uidetur sumptum à Galeno, ut diximus in illa autoritate, Pede uno laborante, ex altero sanguis mittendus est: Respondeo, quod uenæ exteriores sunt paruæ in cõparatione ad interiores. Secundo, & initium apostematis illico agnoscitur, & fumus quasi in regimine præseruatiuo, non curatiuo. Tertiò, quia tale apostema est ferme sine periculo, saltè magno: & ideo cum sint duo motus, unus ad partem phlegmonis, alter à parte interiore ad exteriorè: & primus est noxius, augens morbum: secundus utilis, reddens eum sine periculo. At missio sanguinis ex aduerso latere primum motum impedit, non secundum: ex eodem autem latere utrumque impedit: Igitur missio sanguinis, etiam in augmento exterioris apostematis, semper ex latere diuerso tentanda est. Ideo de apostemate auris ad Auerroem, dico: quod si intellige-

ret de exteriori, uerum diceret: sed non ob rationem suam, uerum eam quam modo diximus: si autem de interno, nihil concludit.

Ad Haliabbatem dico, quod difficile est habere uerum sensum ob malam conuersionem manifestam.

Idem dico de Serapione: nam is secundo Breuiarii cap. 21. uult, quod fluente materia, ex aduerso latere sanguis mittatur: iam fluxa uerò ex basifica eiusdem lateris. Et dicit dictū uerū, quod lateralis morbus plerunq; fit à materia biliosa, nam hoc etiam dixit Galenus sexta Aphor. 33. itaq; in hoc cum Galeno, in altero cum Auerroë concordat. Discordat tamen: quoniam Auerroës eò progreditur, ut etiā in iccoris inflammatione sub initio sinistrae basificæ, non dextræ, sectionem præferat: quod ut Serapio quarto Breuiarii cap. 2. sic etiam cæteri auersantur.

Ex hoc tandem fit manifestū, nullum Arabē magis Galeno assentiri, quàm Rasim: nam hic uult, quod in omnibus post principium, & in principio omnibus plenitudinem multam sanguinis non habentibus: & in habentibus, etiam si ab humore procedat bilioso, ut plerunque fit, semper sanguis ex communi latere mittatur. Hoc autem uix unquam exceptio- nem patitur: quare Rasis opinio à Galeno parum aut nihil differt.

Quod uerò ad Haliabbatis recōciliationē secū, (nam dissidere uidetur) & Paulū: Dico, quod in apostematibus internis, postquā iam usus hic loquēdi inualuit sanguinē ex eodē latere mittendum uult Haliabbas: ut in phlegmone iccoris, splenis, renum, uiscerumq; ac uētriculi: in externis ex aduerso, ut dictū est. Lateralē morbū mediū sanxerunt, inter interiorē & externū. nam ex parte terminationis interior est. disrūpitur enim semper interna parte: uerum ratione membri, id est costarū, musculorū, & uelaminis, externum dici potest: quia in nullo uiscerū est. Ob hanc causam generalē regulā dedit mittēdi sanguinē Haliabbas, ex eadē parte in uiscerū inflammationibus, ex aduersa tamen in laterali morbo: quia eum morbum inter eos connumerat, qui in exterioribus partibus accidunt. Sed Paulus aliter sentire uidetur, regulā generalē secutus, quo ad intēctiones diuersas, quæ sunt tres iam dictæ, Diuersio, Deriuatio, Euacuatio. Et sicut duobus postremis idē latus debetur, sic primæ cōtrariū, nec consentiens. Apparet autē hic ex capituli titulo: nā inscribitur de Sanguinis missione. Ideo nihil plus uult ibi, quàm Galenus in libello de Reuulsione, & aliis locis, ubi de ea loquitur. Iam autē semel dictū est, nec repetere pigebit, difficultatē non esse, an reuulsio ex cōtraria parte fieri debeat, sed an omnis: secunda, an laterali morbo per initia reuulsio tantū cōpetat, an deriuationi permixta, in quibus Galenus ab his dissentire uidetur. Sed Auenzoar l. Theisfir tract. 16. cap. 3. dicit, quod ex aduersa iccoraria alterius brachii est mittēdus sanguis: quāuis uisum sit quibusdā nouis medicis, quod ex eodē latere: sed ra-

tiones eorum, dicit, sunt sophisticæ: imò sic agere, nil aliud est, quàm ægros occidere. Hunc frustra ab opinione sua conaberis remouere: nam duo existimat necessaria in initio morbi, reuulsionem, & quòd illa à latere contrario semper fiat: cùm tamen, ut uidebitur, in utroq; decipiatur.

Cornelius Celsus lib. 2. cap. 9. post mediũ, hæc habet: Neq; ignoro quoddam dicere quàm longissimè sanguinẽ inde, ubi lædit, esse mittendum: Sic enim auerti materiæ cursum: at illo modo in id ipsum quod grauatur euocari. Sed id ipsum falsum est: proximũ enim locum primò exaruit: ex ulterioribus autem eatenus sanguis sequitur, quatenus emittitur. Vbi is suppressus est, quia nõ trahitur, ne uenit quidem. Videtur tamẽ usus ipse docuisse, si caput fractũ est, ex brachio potius sanguinẽ mittendũ esse: si quod in humero uitiũ est, ex altero brachio. Credo, quia si quid parum cesserit, opportuniore hæ partes iniuriæ sunt, quàm quæ iam male habet. Aueritur quoq; interdũ sanguis ubi alia parte prorũpẽs alia emittitur. Definit enim fluere qua uolumus: inde obiectis quæ prohibeat, alio dato itinere. Libro autem 4. cap. 6. cum lateralis morbi curam describat, nec quicquam adiciat ad sanguinis missionem: clarum est in generali eum sententia persistere. Idem in duobus proxime succedentibus capitulis, dum de pulmonis ac iecoris inflammatione loquitur, obseruat: nihil ad iam dicta adiiciens. quo fit, ut ipsum Galeno, aut potius ipsi consentientem habeamus Galenum. Hæc igitur uetustiorum placita sint.

Superest modò, ut uideamus, si quæ rationes hoc, uel illud cõuincant: nã quæ duæ suadebãt, ex aduerso latere sanguinẽ esse mittendũ, ab Auerroẽ adductæ, à nobis solutæ sunt: quãquã illarũ declaratio ex sequẽtibus locupletius habenda sit. Est igitur ratio Principis hæc, In diuersione quærẽda est uenarũ cõmunicatio & distãtia maxima: sed communicatio est ex uenis eiusdẽ lateris, nam inter oẽs dextri ac sinistri lateris uenas media est uena magna, quã chilis uocat: igitur cũ distãtia maxima sit inter pedẽ & manũ, ac maior quã inter manũ & manũ, seu latus & pedẽ, maior quã inter latus & aduersam manũ: cõstat quòd saphenæ uena basilicæ erit præferẽda. Pro rationũ autẽ sequẽtiũ intellectu præmittendũ, quomodo homo per quatuor dimẽsiones diuidatur: nã Galenus sexta Aphor. 36. dicit, quòd partes quæ sunt supra hepar curantur sectione uenarũ manuum: inferiores sectione uenarũ pedum. Et in libro de sanguinis missione cap. 18. renes quasi medii statuuntur. Dextrũ uerò ac sinistrum, antè & retro, facile quisq; diiudicat. Attamẽ longe plus interest inter dextrũ latus ac sinistrũ, quàm inter anteriore posteriorẽq; pte: quoniã iter dextrũ ac sinistrũ latus, p totũ corpus, distẽdatur medulla spinalis arteria ac uena magna, quæ illi in pfundiore corporis pte subiacet: cũ spinalis medulla suo itegumẽto foris in dorso pmineat. Quartus modus est eius, q in pfundo iacet, idẽ itra abdomẽ, sexta

Aphor.

Aphor. 7. unde morbus lateralis inter morbos exteriores cōnumerari potest, non enim est profundior abdomine, cum pleura fermè in eius directio sit. Atq; ex hoc alterum certè sequitur, quod ignorare minime oportebat: scilicet, quòd caua uena postquàm iuxta iugulū diuiditur in partem quæ ad caput ascendit, atq; truncum descendantem, ibi etiam dextra sinistraq; bipartitur. pars uerò quæ inferius tendit antequàm ad brachii separationem, qua à corpore diuellitur tendat, tres ramos infra in costas emittit. Primum quidem, qui iuxta pectoris mediū anteriores partes illius usq; ad renem directum nutrit. Secundum uerò, qui proximè ad spatulā iuxta costam quintam finitur, à superioribus illas connumerando: cum tamen lateralia pectoris ut primū & ipsum multis modis diuisum nutriat. Tertium autè, quasi in ipsa spatula latus ac dorsi posteriora nutriendum, ad ipsos usq; renes descendit, ac primi rami particulis iuxta committitur. Illud uerò diligentissime considerandum, ex uena caua à dextra parte maximum exoriri ramum ἀρτηρὴν uocatum, quòd à sinistra parte coniugem non habeat. qui ramum alium ad partem sinistram emittens, per illum singulas inferiores costas enutrit: ipse uerò dissectus in totidem ramos, quotus est costarum numerus illas ex posteriore parte nutrit. Sed huius rami posterioris, qui ex priore dextro exoritur, prouentus non uniuersis hominibus contingit: at ἀρτηρὴν generalis omnibus supra cordis regionē exorients: nouem inferiores, & tres superiores costas nutrit. Porro partes costarum inferiorum ex hac nutriuntur (ut dictum est) uena, quæ coniuge caret partim: partim ex uenis à caua per ipsas directis: ipsa uerò caua iuxta os facrum discinditur bipartito, nutritq; crura, poplites, femora, pedes. Manifestum est igitur, quæcunq; supra cor iacent, ut pulmonem, & costas septem ueras, à superioribus uenis nutriri, quæ à cauæ ramis exoriuntur: inferiores uerò membra ramis à caua inferioribus cordis habita ratione: costas tamen inferiores, maximè dextras, etiam à ramis eius uenæ, quæ supra cor exoritur, & coniuge caret, nutriri palàm est. Vnde neq; illa ratio nos turbat, quòd cum Galenus dicat, sanguinis missionem non prodesse è brachio, cum phlegmon inferiores costas occupat: quòd necessarium sit sanguinem per ipsum cor educere: cum superiores costæ superioribus uenis, inferiores inferioribus nutriantur: nam & si inferioris maximè dextræ partis uena sine coniuge nutriantur, atq; ob id iuuari possint secta interna brachii uena: Galenus tamen censuit maximam partem nutrimenti ex uenis inferioribus, non ex uena illa solitaria deferri: nec in hoc deceptus est. Quare ipse in secundo Regim. acutorum 11. consulit, ut si morbus magnus sit, & febris uehementissima, ut sanguinem mittamus purgatione prætermissa. Cum autem non de pede mentionem faciat, certum est ex interna mittendum intelligere. Nutriuntur igitur & Galeni iudicio aliquo modo costæ

inferiores (& si non ut uere costæ) uenis superioribus. Illud igitur maius est, quoniam pacto, cum iecur sanguinem trāsmittat ad brachiū dextrum, non nisi per cauam uenam, quæ prius in cor transierit (ut etiam Vesalius lib. 3. cap. 7. ac deinceps aduersus Galeni placita edocet, coadiuuante rei historia) in iecoris phlegmone emissus sanguis ex interna brachii uena plurimum iuuat, intercedente corde? Par enim est, uel nihil, aut parum saltem iuuari: atq; hoc ille potius docere debuit, quàm missionem sanguinis in morbo laterali ex quocunq; latere fiat, æqualiter prodesse, ut lib. 5. cap. 9. in fine dixit: siquidem huic opinioni nō adeo fauet experimentum, ut illi quæ in morbo laterali sanguinem mittendum edocet. Nam etsi iecur ex sanguinis missione iuuetur dū phlegmone laborat: hoc est maximè, quia cor refrigeratur. ob id sectionem uenarū manuum in uniuersis febribus, tum phlegmonibus membrorū, iuuare dicam: quòd cor refrigeretur, non quòd iecur exinaniatur. quamobrem pauci, imò uix ulli, ut experimento uidi, iecoris inflammatione liberantur. Et hoc est genus lateralis morbi apud imperitos, quod quia difficillime liberatur, pestilens uocatur. Liberatur autē difficillime, non solum quòd grauissimus sit morbus, sed quòd morbum pro morbo curent: non in hoc quàm in cæteris prudentiores, aut magis oculati: siquidē & lateralis morbi, & iecoris phlegmonis signa apud hos afinos quomodo non confundentur, cum Galenus recitet quinto de Locis, cap. 7. Siculum medicum in seipso aberrasse. Vix unquam (ne absq; uix dicam) quenquam uidi, cui medici tanquam phlegmone iecoris laboranti manus adhibuerint: atq; ideo omnes, quotquot in horum boum curam incidunt, uitam morte commutāt. Præstiterit igitur in his, secundum dissectionis rationem, si modò sanguinis missio prodesse potest, ex pedis uena sanguinē mittere. Sed cur (dicent) magis tamen iuuantur scēta uena in dextro quàm in sinistro latere, nō solū in febribus, sed iecoris phlegmone? Itaq; dimissa hac cōtentione, quæ à Galeni & Aristotelis dissidio proficiscitur, utiliorem exercitationi sententiam aperiam. Etenim cum sanguinis missio ad animi defectionē persæpe cōueniat, & in plerisq; morbis præfens sit auxilium: maxime tamen in tribus cōuenit prima Aphor. 23. & in ardentissimis febribus, & maximis phlegmonibus, & uehementissimis doloribus. In prima igitur occasione plurimum interest, an ex uenis brachiorum, an pedum, mittamus sanguinem. Quippe ex manibus deductus sanguis cor ipsum illico refrigerat: nam sanguinem eduxit ex uena, ubi proxime ex corde progreditur sanguis etiā calidus, ac subtilis, qui superiora petit: quorum nullum in sanguinis missione ex saphena, seu exteriore pedis contingit. Igitur quòd in acutis omnibus, non solum ardentibus febribus, ex brachio sanguis mittendus sit, satis constat. Et si cor torqueatur, ex sinistro magis latere: sin autem plenitudo multa sit, ex dextro aufer

auferendus est. Proculdubio enim sanguis in iecore generatur. In longis autem febribus si ex inferioribus uenis sanguis detrahatur, multo melius erit, quàm si ex manibus: crassior enim existens ima petit, atq; frigidior. Ob hoc & uina cum ad finē deducta sunt, languidiora, & deteriora fiunt.

In inflammationibus autem omnium uiscerum duo queruntur: alterum, ut inflammatio sedetur: alterum, ut sanguis per totum corpus supercalefactus tum cor, pulmo, iecur, refrigeretur. Primæ intentioni conuenit, ut dolor sedetur, reuocetur influens sanguis, & qui iam influxerit à loco ipso retrahatur: ratione autem secundæ intentionis, ut iam docuimus, ex brachio sanguis semper est auferendus: sola enim hæc detractio multum & uelociter cordi, iecori, pulmone, sanguiniq; supercalefactis cōuenit, cum reliquæ sero & parum. Sed in doloribus cum sine inflammatione fuerint, idem quod in febribus querimus: scilicet remissionem motus, sanguinis refrigerationem, & securitatem à phlegmone. Porro duo prima sanguis è manibus detractus solum efficere potest: in hoc ultimo non contemnenda sunt Principis præcepta, ut à longinquo, & per uenas communicantes aliquo modo detrahatur. Igitur ad rationes detrahendi sanguinis in phlegmone ueniendum est. Prima est, In iecoris phlegmone detrahendus est sanguis ex dextra interna, & ex sinistra in lienis phlegmone: igitur ex eodem latere in morbo pleuritico: nam utilitas & periculum paria esse uidentur. Si enim concurreret magis sanguis in hac detractioe, quàm in ea quæ ex aduerso fit latere, oporteret ut eadem ratione in horum uiscerum inflammationibus ex aduersa parte sanguinem detraheremus. At hæc ratio parum mouet: tum quia, ut diximus, phlegmon sub costis aliquo modo intelligitur esse in parte externa corporis: unde sanguis in eum locum influit ex interioribus partibus: quare detractio sanguinis ex eodem latere retrahet sanguinem illum super membra magis intima & principalia. Secundò dicimus, suppositum illud, quantum ad rationem, nihil concludere: plus enim uena pedis cōmunicat iecori, quàm interna, si utraq; ex dextro latere sumatur: uel in liene ex sinistro. Nā ut sanguis ex iecore reuocetur, sexta uena in brachio dextro, requiritur ut uena brachii retrahatur à caua, caua à corde, cor à iecore. In sectione autem interioris tali reuocatur sanguis ex caua, & ex caua sine medio à iecore: quare longe melius quantū esset merito huius sanguis ex iecore per minutionē in pede, quàm in brachio reuocaretur. Sed, ut dixi, modica ex utroq; modo utilitas habetur. Videtur tamē dextra magis sinistra in iecore, & sinistra magis dextra in liene, seu ex brachio, seu ex pede sanguis detrahatur, iuuare: quoniam, ut in fluminibus, quamuis caua sine septo, aliquo omnem contineat sanguinem, qui tamen à dextris influit, in dextra parte manet: & qui à sinistra, in sinistra: & rursus, qui in dextra parte est, dextris mēbris immittitur: qui

qui in sinistra parte, sinistris. Hoc autē, ut dixi, & in fluminibus, & in torrentibus uidemus; atq; eo magis si plenus sit alueus, & cursus non impeditus: quæ duo maxime in cauæ uenæ processu contingunt. Ex hoc manifestè liquet, quantum ratio Auicennæ peccet: nam nulla in causa minus prodesse potest missio sanguinis ex saphena, quàm in laterali morbo. Nam si ad febrem respicias, nihil prodest: si ad euacuationem, uel diuersionem, longe multo minus, quàm in iecoris phlegmone. Nam in hoc iuuare poterit, cum nullum membrum egregium interponatur, ut nec inter sinistrum & lienem: ut nec inter pedes ac renes suos, uel testiculos, aut uteri latera. At inter costas & pedes cor ipsum medio loco stat: quare & auctoritas Mesuæ à ratione dissectionis multū euariat. Sed, ut diximus, ipse etiam noua & ab omnibus explosa commentus est. Sed est aliud considerandum, cur multo maius sequatur iuuamentum ex sanguinis missione in dextra brachii, quàm pedis in iecoris phlegmone: nam sanguis ex brachio detractus cum à corde trahat illo exinanito, cogit ut & ipsum à iecore rapiat sanguinem. Cum igitur cor sit membrum ualidissimum, & cui nullum robore possit comparari, ipsum etiam iecur magna ui exinanit: atq; ita missio sanguinis ex dextro brachio multum iuuabit in phlegmone iecoris, cum ex pede parum: & ita quod posuit Galenus tanquàm ex uenarum communicantia manifestissimum, quanuis sit uerum, non tamen ex illa causa originem trahit hæc ueritas. quippe cum communicantia nulla talis sit: imo maior in pede, ut dixi, cum iecore, quàm in brachio: & ratio dextri & sinistri etiam parum faciat merito uenarum magis communicantium: cum nulla talis sit hæc communicantia maior. sed ratio pedis & brachii, si modò discrimen est, in iecoris phlegmone, in earum sectione prouenit ex fortitudine attractionis cordis. Ratio autem dextri & sinistri ex cursu sanguinis qui in uenis plerūq; facit ut dextra ad dextram & sinistra maxime flectantur ad sinistram. Generaliter autem, ut diximus, euacuatio ex brachiis sanguinis efferuescentiam illius minuit.

Secunda ratio pēdet ex ratione generationis phlegmonis, posita à Galeno libro de inæquali intemperie cap. 3. nam in ea intumescunt uenæ, & arteriæ circuniacentis loci, primo magnæ, inde rami illarum & mediocres ac usq; ad minimas: donec cogantur exprimere sanguinem in concauitatem, & sic generare phlegmonem. Patet igitur, quod dum phlegmon gignitur, circuniacens regio tota simul tumida est, ac præter naturam affecta. Materia igitur, seu sanguis, comparata phlegmoni, fluit adhuc: comparata regioni phlegmonem circūstanti, iam fluxa est. Verum materiæ fluxæ, iuxta omnium sententiam, debetur sanguinis missio ex eodem latere: igitur in phlegmone fiente, cum semper materia iam in circūuicina regione fluxerit, competet missio sanguinis ex eodem latere. Ista ratio claudic

claudicat : nam uel intelligit per materiam fluxam iam quiescentem in loco, & huic certè debetur missio sanguinis ex eodem latere : sed hæc non est quiescens, imò perpetuò fluit in alium locum, ut Galenus testatur : uel per materiam fluxam, intelligit motam è loco suo, & sic nō omni tali debetur deriuatio, sed reuulsio ab initio. & ita ratio reddit ad idem quātum fit ex hoc. Et nota, quòd secundum hoc tamen, ubi ratio hæc supponatur uera, fit secundum genus perniciosæ pleuritidis : & est cū in sinistro latere materia ex uena non coniugata defluerit : nam talis materia nullo modo potest minui ex sanguinis missione : non enim à sinistra, quia nulla illarum uenarum ex eo latere oritur, nec ideo potest trahi, ut ostendam in tertia ratione : nec ex latere dextro. nam cū coniugata exoriatur ex parte inferiore cauæ comparando ad uenas nutrientes costas dextræ partis : sequitur ut longè plus detrahat sanguinis à loco sano quàm ægro. Talis autem missio sanguinis est parum utilis, ut infra declarabo. Tu etiam non potes esse certus, tam in dextra, quàm sinistra, quòd sanguis non fluat à uena sine coniuge, seu solitaria. Igitur cū in sinistra (si modò iuuaret sanguinis detractio) illa esset facienda ex aduerso latere, id est dextro : igitur talis pleuritis ex sinistro latere ualde est periculosa, & incertæ curationis. Accedit quòd propter propinquitatem cordis fit etiam periculosior. Verum cū sint quatuor modi in curatione morbi lateralis, Sanguinis detractio, Victus, Localia, & Medicinæ : Victus rationem nesciunt hoc tempore, nec obseruant : Localia etiam extra tempus exhibent : in medicinis aberrant. Sequitur ut cū missio sanguinis non proffit, ut talem morbum, ex quo plerique necessariò moriuntur ob imperitiam medicorum, uocent merito pestilentialem morbum lateralem. Est etiam animaduertendum, quòd in aliquo mittendi sanguinis more, unus modus pleuritidis erit pestilentialis, qui non erit in reliquo : uelut in sinistra erit letalior his, qui à sinistra, seu ex eodem latere sanguinem mittunt, (cū fuerit propter sanguinem uenientem ex solitaria uena) quàm his, qui mittunt sanguinem à latere contrario. Et ita in phlegmone, quæ fit à solitaria uena, letaliores erunt quæ curabuntur secta uenâ ex aduerso latere, quàm ex eodem. Quare si quis dicat, Igitur tutius semper est mittere sanguinem à dextra. Respondeo : quòd non : nam in omni alio morbo laterali, qui fit in sinistra parte, & non à uena solitaria, mittere sanguinem ex dextra parte est inutile, cū ex sinistra sit saluberrimum. At hoc frequentissimum est ut fiat ab aliis uenis, non à non coniugata. Igitur in omni morbo laterali à dextra parte conuenit sanguinis missio ex dextro latere. In sinistro autem est distinguendum : nam si dolor ad iugulum accedit, ex eodem latere mittendus est sanguis, ut Hippocrates & Galenus uolunt : nam solitaria uena in causa esse non potest, cū eousq; non

pertingat. Et similiter si sit dolor in tribus superioribus primis costis, rami enim solitariae ad illas pertingentes sunt adeo exiles, ut uix possint phlegmonem excitare: uel si excitabunt, adeo leuis erit: ut non multum interfit ex quo loco sanguis mittatur. At morbus lateralis in sinistro latere in parte anteriore pectoris uix etiam potest fieri à uena solitaria: qui autem est in directo quasi cordis sub ala sinistra, hic potest esse à uena solitaria: nam retro est truncus: ideo non facile ibi excitatur phlegmon, impellente natura sanguine semper ad minores uenas: nec ante, quia ibi rami pauci pertingunt: sed in ala seu à latere & parum propinquius anteriori pectoris parti.

Tertia ratio est, quod natura sic operatur: expellit enim humorem peccantem tum sanguinem, tum faniem, ut tertio de Crisi cap. 3. unde ibi docet, quod sanguis ex dextra nare in iecoris affectibus prodest: & idem de sinistra in liene, ut tertia particula Epidem. super tertium t. 78. de Pericle: qui cum lienosus esset, & prima die sanguinem ex sinistra copiosum emisisset, in quarta liberatus est. Et rursus de Metone tertia par. super primum Epidem. t. 24. qui liberatus est ex profluuiio sanguinis in dextra nare in quinta die: cum prius in secunda etiam effluxisset. Et quanquam non constet eum laborasse iecoris uitio, sed lumborum: attamen in utraque parte cum esset uitium, plerumque si paritas sit morbi, à dextro sanguis latere effunditur, uelut calidior. At in Cleonaetide, cui sinistrum latus indoluit (est autem hic proximò præcedens æger) sanguis ex utraque nare effusus est, ac sine ordine: uerum hoc ad trigésimum diem actum est, cum in primo die adesset dolor. Philiscus autem, qui. 18. textu scribitur, mortuus est, cum lienem durum haberet, & ex utraque nare sanguinem paucum merum in quinta die emisisset: nam inconstans hæc est emissio, & ut in Prognosticis inquit mala: tum quia paucus, tum quia merus. Inconstans autem, quia tam ex aduerso, quam ex patiente latere profluxit. Medicus igitur est naturæ recte operantis imitator. prima Aphor. 21. igitur medicus sanguinem ex eodem latere detrahet. Ista ratio est præcedentibus duabus ualidior. Natura tamen cum hoc operatur agit iam constante phlegmone, nunquam autem dum fit: At de hoc apud medicos iam nulla est ferme dubitatio, cum inflammatio perfecta fuerit.

Quarta ratio, & quinta sunt his infirmiores: nam nec semper medicus naturam imitatur, quia lapidem extrahit ex uesica, eruit ranulam, deprimat in oculo nebulam: at (dicis) hæc natura non potest facere. At ego dicam nec natura simul potest mittere in partes contrarias, ac diuertere influentem humorem ab initio morbi, nisi medici auxilio adiuta: quare medicus ad contrariam partem reuellere debet, clarius ibidem in commento 21. dicit Galenus, quod Naturam recte operantem adiuuare debemus: malè autè, retrahere, & impedire. Igitur cum in phlegmone quod fit

fit deriuet materiam in membrum, expedit nobis contrarium facere. Ratio tamen pro Galeno est, quòd qualiscunq; operatio, quæ fit per nō communicantes uenas, est inutilis: talis est quæ fit minuendo sanguinem à latere opposito. & ita hæc ratio est probabilis, & contentiosa: propterea ad ualidiores descendo. Missio sanguinis ex eodem latere plus euacuat, & æqualiter, aut etiam magis diuertit: igitur præponenda est. Ratio per se clara est, modò antecedens ostendatur: nemo enim dubitat, primam esse medici intentionem, prohibitionem inflammationis: sed hæc tollitur, minuendo quod iam conflatum est, & prohibendo ne augeatur: quorum alterum euacuatione, reliquum diuersione constat. Euacuatio ex latere opposito nulla est, uel etiam Arabibus ipsi testibus.

Reliquum est ut de Diuersione dicamus. Iam uerò notum est, quòd sanguis qui in phlegmonem cogitur, (gratia exempli) in dextro latere ab aliqua quatuor uenarum, quæ ex caua, uel eius dextro ramo exoriuntur, cogitur. Si igitur sanguinem ex aduerso latere minues, nō prius eum motum sedabis, quàm totam cauam uenam exinanieris: quòd si credas sanguinem è sinistra parte in dextram delatum phlegmonem excitare posse, tunc necessarium est, ut uel ex dextro latere in sinistrum uenæ notabiles cauæ non ob obuiantes permeent: quod omnino falsum est. Et hic est error uulgarium medicorum ignorantium hoc, ut reliqua omnia artis principia: scilicet, quòd dextrum latus à sinistro ex toto disiungitur, nec nisi per cauam uenam latus lateri commune est, nisi in pauculis sinibus uenarum nullius propemodum considerationis, uel necessarium est ut sanguis adeo concitatus sit ex sinistro in dextrum latus permeans, ut impellat cauam uenam implere uenas dextri lateris: & sic phlegmonem generare. At sic in hoc casu uix effugere potest, quin phlegmon in tanto impetu in sinistro latere prius non generetur: quare diuersio ex opposito latere hunc tantum imaginabilem motū retardare poterit. At & in eo casu nihil proficiemus: nanq; si iam dextra pars phlegmone laborat, & à sinistro latere in dextrum latus tanta est plenitudo, ut non obstante cordis & iccoris & cauæ uenæ capacitate, necesse sit phlegmonem generari: certè uel cuilibet asino clarum esse potest, missionem sanguinis tunc in sinistro latere factam nihil auxilii tantæ plenitudini & phlegmoni quod iam fit allaturam. At è diuerso, cum sanguis ex caua in ramos influat, habeat uerò descensum duplicem, alterum latum in brachii uenam, alterum arctum in pectus: sanguine ex brachio detracto, quis dubitat, quin manifestè sanguis influens ad pectus non retroagatur? Altera clarissima ratio est quòd Hippocrates & Galenus secunda particula super sextum Epidem. 7. & 8. præponunt deriuationem reuulsioni, & de hoc dictum est in octaua Contradictione præcedentis tractationis. Cum enim dolor materiam ad se

trahat 13. Artis curat. cap. 8. & 1. de Simplicib. medic. cap. 26. dum de aceto loquitur, in initio, & 4. Regim. acut. t. 27. & 2. de Differ. febr. cap. 11. sed nullibi clarius, quàm quinto Artis curat. cap. 4. nihil magis trahit materias ad locum & phlegmonas excitat quàm dolor: quamobrem procuranda est sedatio hæc doloris cum deriuatiua sanguinis missione, quæ ex eodem fit latere, & copiosa. Sed de quantitate in libello de Malo medendi usu, satis diximus. Patet igitur, uenam saphenam non diuertere, multoq; minus euacuare in laterum doloribus costarum septem superiorum, ut existimauit Auicenna: non enim directio lateris est in causa, sed uenarum communicantia, ut sanguinis missio iuuat: quamobrem ea ratio extoto nihil concludit: cum tamen apud Galeni dissectionem uim aliquam habitura sit: cum hoc ipse credat cauam uenam iecori committi ex superiore parte corde non intercedente.

Igitur ut tanta confusio opinionum, ad ægrorum utilitatem, & medicorum, quicunq; sint, qui respere uelint, redigatur: hoc modo distinguemus: Si lateralis morbus ex dextra parte sit, sanguis ex interiore uena brachii dextri mittatur copiosus: ubi dolor in septem superioribus costis fuerit, & si multa plenitudo sanguinis in corpore fuerit, die sequenti è diuerso latere, id est sinistro, sanguinem mitte: ex interna brachii, aut in minore plenitudine appone cucurbitulas. quod si non adeo plenum fuerit corpus, sufficiet prima sanguinis missio: (& hoc est quod dixit Hippocrates: Deriuare &c. & Princeps) cunq; ad diuersum trahere uolueris, ut in secunda die, dolorem prius seda, scilicet sanguine ex eodem latere misso. Quàquã postmodum non uisum sit, ut in sententia persisteret in casu lateralis morbi: nam in cæteris hoc egit, ut iecoris & splenis inflammationibus. Si autem morbus lateralis est in sinistra parte, non sub ala, sed in supremo pectoris, uel in medio secundum latitudinem minues sanguinem à dextra: & reliqua ut diximus eodem modo, ut de dextro latere consequenter: scilicet si oporteat sequenti die à sinistra interna brachii. Si autem dolor fuerit in musculis mediis, uel exterioribus, minutio fiat à latere contrario semper: aut non fiat: & in uigore morbi, euacuato corpore ex initio, & cum inedia, uetosa loco applicetur: est enim admirabilis iuuamentum, ut Trallianus & Zoar affirmant. Facilis autem est cognitio huius morbi, quia ad tactum dolet, & parum aut nihil expuit, & non est pulsus ferrinus: nec est tanta spirandi difficultas, imo parua aut nulla: & reliqua, quæ uide ab antiquis. Si autem suspiceris quod sit in latere sinistro, propter solitariam uenam, tunc mitte sanguinem ex dextro latere ex interna brachii, pro uirium magnitudine ac morbi. In hoc autem casu optimum est emplastrum applicare spinæ dorsi ex urticis, matre uiolarum, & oleo uiolato copiose: mitigatur enim dolor, & sanguis refrigeratur, & concoquitur quod factum est, & quod nondum factum est prohibetur. Si uero morbo

morbus lateralis fit in costis quinque inferioribus, infra furculam eniformem: si febris sit ualidissima, sanguinem mitte copiosum ex interna cubiti: uero si febris parua, & dolor magnus sit, ex eiusdem lateris saphena: si neutrum horum adest, extrahendus sanguis non est, sed purgandus æger. Si uero iecur uel lien phlegmone laborat, si febris sit uehemens, ex interna brachii: si parua, ex saphena pedis lateris eiusdem sanguis est detrahendus: quanquam (ut dixi) Princeps in laterali morbo etiam, si non sit in spuris, consentiat: in hoc autem dissentiat. Si autem aliquis sit consuetus incurrere lateralem morbum ex dextra parte in æstate: in uere, minuatur ex sinistra interna brachii: & ita à dextra, si ex sinistra. Quod autem dixi de iecore & splene ac saphena secunda, arbitrio tuo remitto: nam rationes ad oppositum, quas adduxi, ualida sunt. Ego tamen in illorum morbis, qui ex sanguine frigido fiunt, sic agerem, & egi ad hanc usque diem feliciter. In cæteris si regulam hanc præterieris, scias, quod si quis moritur ex ægris, culpa tua illum mortuum: si quis seruetur, fortunæ beneficio illum adiutum. Est & tertium genus lateralis morbi, quod pestilentielle dicunt, quoties phlegmon panniculum pectus diuidentem, aut cor tegentem, inuadit: & hoc etiam putant esse morbum pestilentem & lateralem, quod modicus dolor, ac uix sensibilis, percipitur: & ægri tamen moriantur. Sed nec est lateralis morbus, nec pestilens, sed perniciosus tantum, ratione loci ad quem materia peruenit ob subtilitatem, & caloris innati debilitatem: & quamuis modica in his salutis spes sit, abstinentes tamen ab omni sanguinis missione, seruari poterunt: cum per eam nec phlegmon prohibeatur, nec minuatur, & uires tamen frangantur. In reliquis autem generibus cum tardatur missio sanguinis, ex debito loco tria mala fiunt, adeo perniciofa, ut ex uno eorum uel solo homo mortem consequi possit. primum est, quod phlegmon augetur in immensum, & magis quandoque, quam si nullus sanguis prorsus mittatur: quoniam sanguis agitur, & mouetur. Secundum, quod inculpatus sanguis educitur, unde uires debilitantur. Tertium, quod sanguis phlegmoni circumadiacens corruptus aut niger, aut liuidus, relinquitur in corpore: qui febres excitans inextinguibiles, statim per sepe occidit. Ex hoc autem clarum est, facile cognosci posse ex uenarum dissectione, qua parte sanguis influat cuique parti atque ex hoc deriuare, uel reuellere licere, auertentes motum sanguinis influentis, uel deducentes ad exitum. Quod non intelligentes quidam, magni ponderis rationem negauerunt: non enim parua res est hoc scire. At quomodo quifquam aliquid scire potest, quod sciri non posse putat: Cæterum hac in parte longiusculus fui non solum ob pertinaciam defensorum, ac multitudinem opinionum, sed quod sic omnem mittendi sanguinis rationem in singulis quoque aliis morborum generibus explicauerim.

Vinum qua primum ætate competat.

Infantibus calida leuatio longo tēpore apta est. Vinum dilutius, neq; omnino frigidum. Hippoc. in libro de Viētus ratione priuatorum t. 23. subiicit autem rationem, Vt minus tententur conuulsionibus, & ut maiores ac coloratiores euadant. Habet autem Græca lectio *τὰ πρῶτα καὶ τὰ ὑμῖνα*. quod est dicere, Pueros infantes oportet: & reliqua, ut magis necessitatē inducat, quā utilitatem. Interest autem multum inter hoc, & illud: nam utilia prosequi, bonum est: at necessaria nunquā sunt prætermittenda. Galenus etsi hanc Hippocratis sententiam non existimet, cum inter nothos Hippocratis hunc librum enumeret: subiicit tamen, Vinum ipsos dilutum bibere præcipit, ne plus æquo calefiant. Haliabbas autem lib. 1, Practicæ cap. 22. initium dandi uinum ex quarto anno sumpsit in pueris: atq; sic serius paulo quā his uideatur esse sententia Galeni, & eius qui librum conscripsit de Viētus sanorum: nam Galenus Polybi uel Hippoc. eum esse credit. Aëtius lib. 4. cap. 30. à septimo anno ad 14. uult inchoandam esse in pueris uini exhibitionem. Galenus autem primo de Tuenda sanitate à 14. anno ad iuuentutem statuit initium exhibendi uinum. Sed Paulus lib. 1. cap. 14. post 21. annum uinum exhibet: scilicet Galeno serius. Galenus autem in libro cui titulus est, Quod animi mores corporis temperamentum sequantur, ex Platonis auctoritate Vinum inutile consulentibus, aut pugnatibus censet, uel prolem generaturis: atq; ideo nō nisi corpus exercentibus, uel morbo laborantibus ipsum concedit. Princeps autem tertia primi doc. prima cap. 4. non nisi post 14. annum uinum tribuit, Galenum secutus in libris de Tuenda sanitate: ubi propriæ tractationis locus erat. Pro solutione intelligendum est, quod scopi conseruandæ sanitatis tres sunt, primo de Tuenda sanitate: ut deperditum restauretur: ut excrementa eiiciantur: ut senectus tardetur. Multa etiam sunt indulgentis, non consulentis: sicut dictum Galeni super Hippoc. uel Polybi uerba iam recitata: & similiter de Platonis dicto, istud non est propter corporis salubritatē, sed morum custodiam: nec ad indiuidui utilitatem, sed reipublicæ. Quod Mahometes probè intelligens, bellicam uirtutem ac robur multum, sublato è consuetudine uino, extulit, ut nec uini inopia laborarent, nec corruptione uitaretur exercitus, aut temeritate quæ illius potu maxime aduenire solet, seipsos pugnādo deteriore loco, uel inferiore numero, uel imparibus uiribus perderent. Sed nunc de singulorum salute sermo habetur. Galenus igitur in primo de Sanitate tuenda hæc habet: Sanè uinum quādiutissime qui ea natura puer est ne gustare quidem suaferim: quippe quod haustum & humectat nimium & calefacit corpus, tum

tum caput halitu replet, his qui calido & humido sunt temperamento, quale est eiusmodi puerorum. Atqui nec repleri his caput est utile, nec ipsos supra quam par est humidos calidosq; fieri: quoniam eo iam caloris & humidi perueniunt, ut si paululum utramuis qualitatem auxeris, iam modum excefferint. Cum autem sit omnis excessus fugiendus, maxime hunc expedit fugere, ex quo non corpori modo, uerum etiam animo damnum accedit. Quare neq; iam adultis uinum, nisi modice sumptum, existimandum est esse utile: quod uidelicet ad iram & libidinem precipites facit, & partem animi rationalem turbidam & hebetem reddit. Ceterum his ipsis ad bilis excrementa uel mitiganda uel expellenda est sane non inutile. Non minime uero ad eam siccitatem quæ in solidis partibus, aut ex immodicis laboribus, aut ex proprio ætatis temperamento provenit. Humectat namq; ac nutrit quicquid immodice siccatum est, tum amaræ bilis acrimoniam mitigat ac frangit: præterea per sudores atq; urinas euacuat. Pueri uero, ceu qui talem succum minime colligunt, quiq; naturalem humiditatem plurimam obtinent, ut commodorum quæ uini potio largitur plane non egent, ita incommoda quæ affert tantum sentiunt. Nemo itaq; compos rationis pueros uti ea potione sinet: quam præterquam quod nullum affert commodum, incommodum etiam sequitur. Hic ad sanos habita ratione omnia uini enumerat commoda, incommodaq;: namq; ad ægros uaria sunt, non solum commoda uini in uariis hominibus, sed & in iisdem morbis atq; ægris diuersa uina diuersos effectus pariunt: uelut odorata ac crassa, flaua, dulciaq; optima pectori & longis illius morbis, tussi, atq; orthopnææ. Inimica uero nigra, austera, debilia, quæ tamen caput nec lædunt, nec feriunt, cum priora illius morbis egregie noceant: ut libro de Attenuante uictus ratione cap. 12. scribitur. Vtilitas igitur generalis uinorum triplex est, Calefacere, Humectare, & Excrementa educere. Quod si quis Principem nobis obiiciat tertia primi doc. 2. cap. 7. qui addit, quod cibum penetrare facit: hoc nos in humectatione solidorum contineri affirmamus. Humidum enim uinum est omne, non solum quod tale substantia sit, sed quod bonam faciat appositionem: quare senibus utilissimum: an uero qualitate tale omne, dubium est. nocet autem & tripliciter pueris calefaciendo, humectando, caput petendo. At cum ita sit, patet quod etiam aquosum sit, inutile illis esse: nam & si nec calefaciat, nec caput petat, humidum tamen nimis est, ex qua ad suffocationis aut comitialis morbi periculum perueniunt. Quod si quis nobis obiiciat, Galenum quarto de Tuenda sanitate iubere, ut in diluendo uinum, consuetudinem obseruemus: hic autem dilutum dandum præcipitur. Respondemus: Consuetudinem in solitis obseruandam, atq; in temperaturis iuuenum: nam infantibus aqua, adolefcētibus uinum permixtum dari semper debet,

debet, ne ex contrario in contrarium transitus sit: senibus meracum, in iuuenibus quòd medii sint, obseruanda est còsuetudo, nisi alia obstent nam calidissima, in regione calida ætate media, dare perniciosum. Consuetudo igitur, ut & in reliquis, amplum locum & certum habet, ubi aliæ non superuincunt indicationes. Sed & illud iam apertum est, quonam pacto uinum siccum natura maximè iuuenibus conferat. Nam ætates indigent restaurante simili in qualitate: unde senes humidioribus uictitantes in anasarcam facile incidunt, prohibita uera nutritione: quod tamen apponitur humidum esse debet, & bene nutriens, & etiam liquidum seu molle. Atq; ita iuuenibus uinum natura siccum, & multam faciens appositionem, maxime prodest: qualitate enim simile, & appositione contrarium: nam paucò humido, quod uehementer humectet, necessarium est: & pauca utilior. His duobus modis tum excrementa excernendo, uinum iuuenibus ac senibus utile est. Sed est difficultas, quia Gal. 5. de Tuenda sanitate dicit, uinum non competere in calidissima & siccissima temperatura: nec in calidissima & humidissima, quæ in latitudine sanitatis consistunt: sed aquam magis: & hoc, quia in talibus non qualiscunq; contrarietas est ad præseruandum sufficiens. Igitur nec uinum album opportunum erit, nec iuuenibus omnibus uinum competet. In tēperatura autem æquali in passiuis uinum concedit: dans causam, quia talis in passiuis æqualis existens, immoderata in actiuis esse non potest. Aliàs solitus eram dicere, quod loquebatur Galenus de regimine præseruante, non conseruatiuo, sed responsio nulla est. nā Galenus tertio Artis medicæ docet, quòd omnes intemperantiæ immoderata, regimine indigent præseruante: igitur nulli tali uinum competet. propterea dico, quòd temperaturæ immoderata caliditatis aqua, non uino indigent: hocq; dixit Gal. 8. Artis cur. cap. 3. Pro hac igitur difficultate dico, quòd multum oportet attendere ultra ætates, morem, regiones, temperaturas. Morbosa namq; corpora alia post quartum, ut Haliabbas: alia post septimum, ut Aëtius. Paulus uerò in humida & calida temperatura tempus exhibendi uinum producit. Galenus in inculcata temperatura & ualidis uiribus loquitur. Vinum autem antiquatum bibere si modicè uetustum sit, flauum, fuluum uel, solis senibus conceditur, quinto de Tuenda sanitate, ante medium. In aliis autem huius usus uel ualde antiqui, quo ad cibum, nullus est usus, sed solum ad medicamenta. Pro Hippocratis autoritate respondeo, quòd uult emendare uitium antiquorum, dantium uinum merum infantibus, uel etiam nostro tempore: consulit igitur ut lymphatum propinent. Huius indicium est, quòd dicit minus pueros tentari conuulsionibus: quare comparatio hæc ad aquam non est: neq; enim uerum est lymphatum uinum minus infantes afficere conuulsionibus, quàm merum. Vt enim demonstrauit ex
autori

autoritate 5. Aphor. 5. partic. uinum sua subtilitate mouet conuulsionem: quare comparatio est ad meracum uinum: consulit igitur miscere. Sed cur hoc? an non melius aquam substituere? Respondeo, quod sic: sed cum liber ille ad uulgares dirigatur, existimauit non parituros. Verum cum ibi multa liberius conscripisset: seuerius ea est profecutus in libris qui ad medicos dirigebantur: ut in libris Regiminis acutorum, & Aphorismorum. Sed insurgit dubitatio, nam uidetur ex dicto Aphorismo dilutum nocentius conuulsionibus mero, est enim minus siccum, minusque calidum. Respondeo: crassius est: nam aqua crassioris substantiæ est uino: in fundo enim subsidet: quare minus conuellit uinum dilutum meraco. Sed obiicias ex tertia particula problematum, Aristoteles querens in secundo problemate, Cur dilutum uinum magis inebriat? Primam affert causam, quod dilutum mero sit subtilius: eandem causam reddit in problemate 14. dum docet, cur dilutum magis caput offendat meraco. Sed & in 18. problemate, dum nititur ostendere, cur dilutum uinum meraco & aqua magis uomitum uel nauseam moueat, de meraco dicit, quod minus euertit, quia reprimat: de aqua, quod diluto uino sit subtilior. Respondeo: aqua & ratione qualitatis, quod frigida & humida sit: & ratione substantiæ, quod subsistat, omnino grauior est, causæ in problematibus cum dubitatiue referantur, fidem non faciunt, nisi omnino sine dubitatione loquatur, effectus autem ueritatem in se continet. At uero Philosophus ibi nihil plus uult, quam quod aqua minus in uentriculo subsidet: ideoque tenuior esse uidetur: minus autem quam dilutum uinum subsidet, & hoc meraco, in uentriculo, quia minus nutrit alterum altero: elementa enim non nutriunt: ideoque subtilior uidetur aqua quam uinum, & dilutum meraco: eoque sensu concedimus tenuiorem esse. At propter

hoc non sequitur, dilutum magis mouere conuulsionem. At si obiicias, quia ratione magis inebriat & caput tentat, eadem ratione conuulsionem mouet. Respondeo, hæc uera esse in superflua, non moderata assumptione. Vini igitur utilitates ex his tum sexta Aphor. 31. sunt quinque: Celerrime nutrire, Calefacere, Humectare, Dispergere sanguinem obstructions aperiendo, & Excrementa tum biliosa, tum serosa educere, & quæ ex his sequuntur.

HIERON. CARDANI

CONTRADICENT. MEDI.

CORVM LIBRI II. TRA-

CTATVS TER-

TIVS.

CONTRADICTIO I.

Dialectica an medico necessaria.

MEDICO dialectice est necessaria, in de Constitutione artis medicatiuæ cap. 7. ubi inter septē condiciones medico necessarias connumerat non solum methodum ut habeat, sed ut eo utatur. idem libro de Sectis. 19. & 2. de Simplicib. medic. cap. 2. & idē recte dicebat Auerroës secūdo Primæ philosophiæ 15. quōd Dialectica est duplex: altera generalis, quę docet regulas cōmunes omnibus scientiis: & hæc debet disci ante illas: alia uerō quę propria est unicuiq; scientiæ, & hæc cum ipsa scientia & eius principiis edocetur. Et sic nō una, sed etiā duplex dialectice cuiuslibet erit necessaria. Huius uerō lib. 1. cap. 3. dum de ordine sui libri tractat, dicit, quōd oportet medicū omnes scire sciētias, tum maximē dialecticā, quę omnibus artibus est necessaria. Et hic sermo sumptus est ab Hippocrate libro de Probitate: qui uult medicū esse sapientē, tum maxime philosophū. Galenus etiā 1. Artis curatiuæ 1. uidetur ultra hanc scientiam, necessariā existimare Geometriā, uelut & in de Constitutione artis medicatiuæ loco dicto. sic Hippocrates Astronomiā libro de Aëre & aq̃s. In oppositum inducitur Galenus tertio de Locis affectis, cap. 1. nam dicit: Quæcūq; enim quæstiones usum trāscendūt, qualis sit rerū natura, secundum propriā substantiā indagātes, haud dubie logicæ esse censentur. Sic igitur Chrysippus philosophus cū de animi ægritudinibus scribere instituisset, uno quidē libro cūrādi tradidit rationē, aliis uerō tribus logicas quæstiones est cōplexus: cū primus quidē ille unus nobis esset necessarius. Facile igitur est intelligere, hos tres ultimos iuxta Galeni sententiam medico non esse necessarios, cū de primo tantum affirmet. Hippocrates quoq; Cōs adē in mēdica arte excellēs logicā ignorasse uisus est, cuius usus nondum esset exploratus. Ad hoc dantur duę responſiones: prima est Cōciliatoris differentia prima, quōd Galenus loquatur propriē in eo casu inutilē esse logicā, nō generaliter. Alii dixerūt dialecticē esse necessariā ad inuentionē, non ad artē traditā. Hoc de Hippocrate qui artē inuenit, uerū non esse manifestē intelligitur. dictum aliud est uoluntarium: nec magis de uno

de uno quàm de alio uerū dici potest. Propterea adducitur altera respon-
 sio à quodā, sumpta ex 4. Physicorum 87. ubi Auerroës in cōmento di-
 cit, Per sermones extraneos intelligit dialecticos: nam Philosophus in
 textu dixerat, fieri oportere inquisitionem de tempore prius per rationes
 extraneas, seu ut postmodū docet euentus, sophisticas: nam eas falsas re-
 probat inferius. Est enim prima ratio antiquorū, Tempus cōponitur ex
 futuro, præterito, & præsentē: Præsens nō est tēpus, Futurū & præteritum
 nō sunt: Igitur tēpus ex nō ente cōponitur. Manifestū, quòd nihil conclu-
 dit hæc ratio. Sed responsio ista (uelut & pleraq; illius hominis sunt) est
 apparēs, & sine ueritate. Nā ibi intelligit per rationes logicas quæ proce-
 dunt ex alienis principiis, & etiā nihil cōcludūt: at Galenus ibi uocat dia-
 lecticas quæstiones nō falsas, seu ex aliis principiis, sed tantū quæ nō con-
 ducūt ad finē medicinæ, etiā si ueræ sunt, & ex propriis ueniāt principiis.
 Multū autē interest, quoniā Aristoteles tāquā improprias & falsas uocat
 dialecticas rationes: at Galenus, inutiles. Ideo sciendū est, quòd multū in-
 terest quærere, an dialectica sit medico necessaria, & an quæstiones quæ
 uocātur dialecticæ sint medico necessariae. Est autē quadruplex quæstio,
 ut quatuor res: Prima est Demonstratio: secūda est Ratio cōmunis in-
 quirendi: tertia Propria: quārta est Quæstio dialectica. Demonstratio cū sit
 logica pars, ut subiectum, necessaria est medico, ut omnibus aliis artibus
 speculatiuis. Ratio uerò cōmunis inquirēdi est etiā illi necessaria, sed tamē
 propria medicinæ: ut ista ppositio, A qua per se primò infrigidat: est apud
 medicū nō cōcludēs uniuersalē, ut apud Philosophum: non enim sequi-
 tur, igitur cuilibet competit infrigidandi causa: nam in aliquibus calefacit
 per consequentiam. Communis autem ratio est per diffinitionem & diui-
 sionē: & hæc omnes medico sunt necessariae. Est postmodū Ratio & Quæ-
 stio dialectica: differunt autē, quia Ratio procedit ex cōmunibus, & falsis:
 & hæc pertinet ad artificē, ut reprobet illā, uelut Philosophus facit in 4.
 Physicorū. Est postmodū Quæstio dialectica, quæ procedit ex principiis
 iisdē, ex quibus proficiscitur quæstio medica, sed nō tendit ad artis finem:
 uelut si quis quærat, Cur carnes in aqua nō supernatāt, & panis sic: cū ta-
 men panis sit solidioris & densioris alimenti. Manifestū est, quòd princi-
 piū quæsti medicæ est propositio, & quæsitum est etiam uerū, tamen non
 tendit ad finē artis: ideo quæstio hæc apud Galenū merito dialectica uo-
 catur. plurimū igitur differt hæc ab illa logica ratione re, ut declaratū est,
 & nomine: nam ab Aristotele uocatur Ratio, à Galeno autem Quæstio,
 seu ut dicunt, Problema. Et hoc modo problemata plura, quamuis sint ex
 principiis medicinæ, non tamen sunt medica: uelut tertiæ particulæ pro-
 blematum. Ad medicū igitur pertinent demonstrationis sciētia, uia cōmu-
 nes, & propriæ, tum etiā rōnes dialecticæ, nō autē problemata dialectica.

Præcepta medica an ex proprijs principijs, & an dies indicatorij uim à luna suscipiant.

Singula medica præcepta debent esse uera & ad finem artis assequendum utilia & ex proprijs disciplinæ principiis prodeuntia. libro de Optima hæresi cap. 1. at Galenus 3. de Diebus decretorijs, cap. 9. regulâ & legem quam præscripsit non seruare uidetur: nam uolēs rationem reddere cur x x. dies magis iudicatorius quàm x x 1. sit, hâc init rationē: Circuitus Lunæ in diebus x x v 1 1. & horis v 1 1 1. perficitur: accēssio lunæ ad solē in diebus x x 1 x. horisq; x 1 1. à quibus sublati diebus tribus quibus fermè latitat Luna dum sub Sole coit, relinquuntur dies x x v 1. horæ autē x 1 1. Medium igitur huius temporis, & apparitionis Lunæ, ac circuitus naturalis eiusdem, est dies x x v 1. horæ x x 1 1. Hoc modo prima hebdomada dies habebit v 1. horasq; x v 1 1. & mediâ, & sic in v 1 1. die terminabitur. Secūda finietur in diebus x 1 1 1. horis x 1. atq; sic in x 1 1 1. die. Tertia uerò in diebus xx. horis quatuor & media. Atq; sic ei uidetur bellè ratione astronomica diē x x 1. ad x x. cōtraxisse: in qua causâ quot modis sit ridiculus, nō facile est explicare: tum maximè, quòd ppria, ut dictū est, præcepta trāsgreditur, sed illud tolerabile. nā quotiēs ppositiones quædam quasi primæ sunt, uelut hæ, Septimus dies est iudicatorius uel x 1 1 1. nil prohibet quin ex physica ratione demonstrētur. Est autē ratio hæc physica, nō ut quidā putāt astronomica: nā fundatur in hac ppositione, Operationes in corporibus humanis pendēt à motu ac cœlesti lumine: at medica ars subiicitur philosophiæ, ut in initio libri de Sēsu & sensili: & in libro de Respiratione, cap. 8. in fine. Sed illud dignū primò risu est, quòd dicat, Si qs autē huius subtilitati succēseat, huius disputationis, difficilēq; eā existimat: rem ad eò leuē attingēs, ac puero dignā, ut ingeniū suū in hac re declarauerit in mathematicis fuisse omnino inexercitatū, de quibus tantū gloriatur. Quinimo uerbis rem dilucidā ad eò implicuit cū suis Cētesimis uigēsimis, ac Ducentēsimis quadragēsimis, ut uerè speciem quandā difficultatis addiderit. Quomodo hīc appellabit Decimi elemētōrū rationes, si hæ difficiles ac subtiles sunt: aut his subtiliores Tertiū decimū? aut artem Algebraticam adhuc his grauiorē? uel omnino artem nostram, quam Magnam uocauimus? aut illam quæ ad summum peruenit subtilitatis Archimedis inuētionem? seu de Elicis lineis, seu de Spheroidibus? aut de Sectionis conicæ quadratura? Certè hæc oportebit ad inferos, uel superos relegare, si illa sua tam crassâ supputatio difficilis, aut subtilis, dici debet. Quis uerò unquam audiuit mensē compositum ex duobus, altero quidem imaginario, altero uerò non, ut nec ipse imaginariū ei satisfacere

cere potuerit? Admittere rem imaginariam in rebus naturalibus ridiculum est: quandoquidem nec numerum, nec magnitudines inter causas, & meritò, recipiat Aristoteles. Permiscere etiam disitas in eodem genere causas, res est prorsus exemplo uacans. At uerò miscere rem imaginariam cum re naturali, adeò puerile est, ac indignum Galeni autoritate, ut malim totū quod superest à capite octauo suprà tertii libri de Diebus iudicatoriis superadditum ab aliquo existimare, quàm autoritatem tam grauis uiri uiolatam uideri: qui efficaces etiam rationes antiquorum adeò subtiliter aggreditur, uehementerq; oppugnat, irridet oratorie, ut modò Aristotelem, modò Ciceronem æmulari uideatur. tum uerò uel saltē tot commentis propositū assequeretur: nam uel sic in *xxi.* diem præter omne propositum iudicationem reiicit: statuit enim mensem lunarem dierum ut dixi *xxvi.* horarum *xxii.* huius tres quartę sunt dies *xx.* horę *iiii.* & dimidia. si igitur horas totidem ad numerum adicias quot ad *xx.* dies superabundare cernūtur: fient horę nouem omnes ex *xxi.* die ad iudicium spectantes: quo tempore totum absoluitur. par autem est dies *xx.* horas *iiii.* & dimidiam tempus esse uel medii iudicii, uel initii. quapropter manifeste utroq; modo tāta subtilitate adhuc in *xxi.* diem iudicium reiicit. Sed hæc missa faciamus: ostendamus autem, quòd recte etiam reprehendebat Aueroës tertio Collectaneorum cap. 9. non esse sumendam causam horum dierum ex luna: nam uel uult mediū motum seu æqualem, seu inæqualem: si æqualem, cum ille habeatur ratione centri parui circuli lunę, non oportet auferre tres dies: nam centrum parui circuli nec latitat sub Sole, nec patitur. nec tempus imminui debet, cum perfectio eius sit, quòd sit tempus reuolutionis: quare erit dierum *xxix.* horarum *12.* & ita additis horis 8. diebus *xxvii.* fiet tempus dierum *lvi.* horarum *xx.* & crisiscadet in *xv.* die. Si uerò respicias motum uerum, cum quandoque luna peragret circulum & partes circuli inæqualiter, ut quandoque in *xv.* diebus ex opposito in oppositum feratur punctum, quandoque uerò in *xiii.* sequitur ut *xiii.* & *xv.* dies non minus sint iudicatorii, quàm *xiiii.* at Galenus ipse & Hippocrates eos refugiunt, tum maxime *xiii.* quare ratio hæc dierum non constat. Rursus si tres quartę mensis lunaris sunt horę *iiii.* cum dimidia plus *xx.* diebus: igitur quatuor menses & dimidijs erunt dies *cxxi.* & horę *iii.* non igitur *cxx.* est iudicatorius, qui tantum ab Hippocrate & Galeno celebratur. Sed *cxxi.* aut *cxxii.* quos nunquàm quisquàm iudicatorios esse deprehendit. Tum uerò si hic ordo à mense lunari exoriretur, *xiiii.* & *xvii.* & *xx.* & *xxiiii.* & *xxvii.* essent firmissimi & inuariabiles omnino, at contrà uariabiles qui procul ab his ut *lxxx.* & *c.* & *cxx.* at res contrà se habet: nemo iudicationē in *lxxix.* uel *lxxx.* uel *cxix.* uel *cxxi.* uidit: at in *xxi.* die

crises plurimæ uisæ sunt, & eum præfert Hippocrates in libro de Diebus decretoriis die 20. quamuis non ex Galeni sententia: nõ tamen negat Galenus per sæpe iudicationem etiã in XXI. fieri. At in XXVII. quæ esse deberet ualidissima, cum in illa circulus lunæ perficiatur, secundum Galeni rationẽ, paucę, aut uix ullæ cõspiciuntur iudicationes. Quare manifestũ est, lunæ cursum tum maximẽ tã permixtũ, imò nullo modo, propter hanc ultimam rationem, causam esse posse dierum iudicatoriorum. Quidam conati sunt referre in humorum motum, sed non possunt, quomodolibet statuunt unam in VII. & XIII. & XX. seruare rationem: nam XIII. erit iudicatorius magis, quàm XXIII. nec causam possunt assignare cur inter XI. & LX. & LXXX. & C. & CXX. nulli sint dies iudicatorii. & si aliquãdo bis aut ter animaduertierim factam crism in mediis horum dierum. Ratio autem est clara, quia, ut ex Ptolemęo sumitur in Centiloquio, dies hi cõsequuntur motum lunæ usq; ad reuolutionem, & ideo sunt dies VII. XIII. & XXI. & XXVIII. iudicatorii, & medii sunt indicatiui, IIII. XI. XVIII. & XXV. ut de omnibus quæ infrã XIII. habetur secunda Aphor. 24. At dies uigessimus habet originem à sole & ab illo gubernatur, ideoq; post XI. cessante, uel lunæ, quæ motum suum perfecit, iam nullus dies nisi secundum XX. ut LX. LXXX. C. uim habet iudicatoriam. in XX. igitur & XXI. est pugna, nam XX. sol fauet, XXI. luna: ideo modò in XX. fit iudiciũ, modò in XXI. ratio autem cum sol sit luna fortior edocet, quòd XX. præferatur plerunque XXI. nam in ambobus iudicatio esse potest: contingit tamen & in XXI. aliquando: & hoc testatur Hippocrates, & concedit Galenus. Cum igitur XX. præferatur XXI. necesse est ut XVII. præferatur XVIII. ideo ea ratione prætermisso XVIII. Hippocrates 2. Aphor. XXIII. scripsit XVII. eadem ratione præferatur XXVII. ipsi XXVIII. ubi XX. præferatur XXI. quare & XXIII. erit indicatiuus, nõ XXV. & sic XXXI. & XXXIII. & XXXVII. cõnumerabũtur ab Hippocrate, prætermisiss XXXII. & XXXV. & XXXVIII. nam luna soli paret, nõ sol lunæ. Ideo secũda uigesima dierum eodẽ modo distinguitur ut prima: sed in prima est solũ lunę uis, post secundam solis in secunda mixta, nã termini sunt solis: diuisio autẽ secundũ lunæ motũ. Hac ratione omnia adeò experimẽtis, rationibus, & autoritatibus antiquorum ad unguem conueniunt, ut nil amplius iam desideres. Propterea etiam dictum bene est, quòd breues morbi reguntur motu lunæ, longi autem motu solis, 3. de Diebus iudic. cap. 7. Sed hoc solum relinquitur indiscussum, quid sol habeat cũ uigenariis numeris cõstitutum. Respõdeo, quòd ut luna alligatur motibus solis, sic sol duorũ: superiorum cum autẽ Saturnus & Iupiter singulis annis XX. cõueniant, nec metã hanc egrediantur nisi post annos 81. sol naturam imitatur illorũ, sed non finem expectat: ubi enim illam ingreditur reuolutionem, seu diem quæ ipsum quasi

quasi restituit scilicet uigefimam totidem conuersionibus contrario ordine peractis, illico naturam mouet uniuersalem ac propriam, ut illa materiam excuscitet aduersus naturam indiuidui: illa uerò quod noxium est conetur expellere: nec sol tamen additiones illas recipit, quia impressiones illæ iam sunt in materia conformes naturæ motus syderis, non reduplicationis: ideoq; hæc ratio usq; ad annū peruenit, à quo si morbus etiam producat, alius ordo proprii motus solis exoritur: ut morbi tales non iam per uigenarios dierum, sed per annos computentur.

C O N T R A D I C T I O I I I .

Dies impares an soli iudicatorij.

Febriticans, nisi diebus imparibus febris eum reliquerit, solet recidui. 4. Aphor. 61. cui ferme est simile illud eiusdem particulæ, 29. Febricitantibus si rigores die sexto superueniant, difficile iudicium sequitur. Galenus in 61. Commēto putat per impares dies iudicatorios intelligi debere: nam in eadem particula, 36. sudores tertiani, quintani, & qui in septimo, nono, undecimo, quartodecimo, decimoseptimo, uigesimo, uigesimo septimo, trigesimo quartoq; die fiunt, boni & morbos iudicantes: qui uerò non ita fiunt, laborem significant, & morbi longitudinem, & reciduiam. Auicenna secunda quarti t. 2. cap. 2. reprehendit Galenum in duobus: Primò, quòd retulerit causas dierum iudicatoriorum ad astra: nam dicit quòd sufficit medico scire quòd ita sit, & causam relinquere cū est extra scientiæ pertractationem. uerū si causa sit quærenda, uel ex principiis scientiæ procedere debet, uel ex sensu & experimēto. Sed ad hæc dictum est in præcedenti Contradictione, nec multum est insistendum difficultatibus præter scientiam: quandoquidem quæ in scientia continentur uariæ sint, & difficiles, est tamen textus Philosophi primo Poster. 43. ubi edocetur, quomodo scientia sit una uel plures: tum quomodo eadem res duobus modis possit démonstrari. Sed ut ad propositum ueniam, Princeps de nouo ibi contradicit Galeno in Commento, 61. nam cū Galenus dixisset, quòd per impares dies intelligebat iudicatorios, uel quòd Aphorismus nō erat Hippocratis: Auicenna addit, quòd Hippocrates nondum perspectos habuit dies iudicatorios. Sed seruata autoritate Principis, Hippocrates nō dixit quod ipse innuit, scilicet quòd dies impares fortiores sint paribus: hoc enim uerum esset, nec dignum cui à Galeno contradicatur: sed quòd nullo modo sint iudicatorij. Vnde febres quæ in paribus desinunt, dicebat Hippocrates, redire solent. quomodo igitur xx. xl. lx. c. & xlii. ac alii plures iudicatorij erunt? nam in secunda particula Aphor. 23. acutæ ægritudines in quatuordecim diebus iudicantur. Porro dictum est, quomodo alij dies comprobentur ab Hippoc. 1. Epidem. par. tertia t. 14. est autem

tem primus dies circuituum decretorius, in paribus quartus, sextus, octauus, decimus, decimusquartus. uigefimus octauus, trigefimus, quadragefimus octauus, sexagefimus, octogefimus ac cētesimus. In imparibus autem primus, tertius, quintus, septimus, nonus, undecimus, decimusseptimus. uigefimus primus, uigefimus septimus, & trigefimus. Sciendum igitur est, si probe iudicentur ultra hoc præscriptos dies significant reciduias fore, fientq; perniciosæ. hæc ille. Galenus dicit in commento uariare exemplaria nam inter pares superadditur in aliquibus codicibus uigefimusquartus, ac trigefimusquartus. Dicit etiam, cum in imparibus satis recte dies numerentur, in paribus malè, decimum & uigefimum octauum additos esse, qui nusquam sunt decretorii. Pro hac igitur difficultate primo intelligendum est, enarrationem dierum quo ad numerum paruam uim habere: cum soleant Græci numeros non, ut ego feci, per nomina describere, sed per notas alphabeti, ut Δ quartū, κ octauū, ν uigefimū, & sic de aliis. Vnde factū est expunctis literis, aut iunctis, aut detractis, ut adēpti, aut additi sunt, uel permutati decretorii dies: unde nulla in re maius peccatum, nulla maior uarietas. Quare ratio potius in his sectanda est, quæ quadruplex est: Prima, quod à quadragesimo suprā numerātur dies per uigenariū, ut sexagefimus, & octuagesimus: unde etiā ducentefimus iudicatorius est. Fiunt & medii, ut in imparibus, raro tamē decretorii: sæpe uerò indicātes, & hæc est secunda ratio. Tertia, quod infrā uiginti iudicatorii sunt per septenarium, septimus & quartusdecimus: medii, ut dixi, indicatiui. A uigefimo ad quadragesium componuntur ex uigefimo pari, & septenario impari: unde uigefimus, & trigefimusquartus: & medii horum uigefimusquartus, ac trigefimusprimus indicatiui. Quarta ratio (quæ non cum aliis suprā in præcedēti Contradictione enarrata est) quod iudicationes maxime fiunt in accessionibus dum morbus sequitur: & hæc secundum plurimum tertianæ sunt, ac impares usq; ad undecimum. Hippocrates igitur in 61. Aphor. quartæ par. ut ex proxime antecedentibus & sequentibus uidere licet, de acutis morbis loquitur, non de diuturnis. at inquam qui intra uigefimum terminantur, in quatuordecim diebus iudicantur. ut in 23. secundæ particulæ. aut igitur in accessionis, & sic 1. 3. 5. 7. 9. 11. in impari uel in 7. & 14. & sic etiā in impari. est enim 14. dies impar hac ratione, quod est secundi septeni terminus. Numerat autē Hippocrates dies usq; ad xx. per septenos, secunda Aphor. 24. ideò dicebat tertio de Diebus iudicatoriis cap. 1. acutę ægritudines in imparibus diuturnæ in paribus iudicātur. si uerò iudicētur 2. 4. 6. 8. 10. 11. 12. 13. iudicantur in paribus: atq; sic morbi eueruntur: nā & hos omnes, præter undecimū, apertē Galenus respuit, ut non perfectē iudicātes nisi quod quartus ab aliquibus numeratur. Verū Galenus testatur, se tantū semel uidisse crisim in quarta, & Archigenē solum bis.

bis. quanquam quartam inter iudicatorios & indicatiuos statuat. Ex quo patet, cur xi. sit firmior quarto: habet enim periodum, & accessio- nis ordinem. Ex hoc patet quòd Rasis 10. ad Almanforem. 29. concordat cum Galeno in Epidemiis excludendo uigessimum octauum diem. Sed hunc tamen approbat Galenus 1. de Diebus decret. cap. 10. & 2. eiusdem cap. 6. ex autoritate tamen Hippocratis, quam in commeto refellerat. Sed Hippocrates ipse in 47. libro, qui de decretoriis inscribitur, hæc habet: Fe- bres omnes decernunt quintanæ, septimanæ, undecimanæ, ac septimæ de- cimæ, & unæ ac uigestimæ: quæ autem graues sunt & acutæ, trigestimæ, ac sexagesimæ. Sic terminum isteritiæ quartumdecimum diem ponit: peri- pleumoniam autem quartumdecimum, aut ad supremum uigessimū primū. Ex quo liquet, illum nondum perfecta ratione iudicatoriorum dierū dies integris septennariis numerasse: unde 21. pro 20. & 28. pro 27. celebratur, propterea bene dixit Galenus primo de Diebus iudicatoriis 10. quòd quanquam Archigenes 28. iudicarium dixisset: se tamen malle præpo- nere illi 27. perspecta iam ratione quòd uigenarius numerus maiore ha- beret uim, quàm qui ex tribus septenis conficiebatur. unde tota ambigui- tas ex ista postrema Galeni & Hippocratis consideratione nata est: quòd uigessimus dies ut primus parium reuolutionum uigessimoprimum præfe- rendus esset: propterea bene dixit excusans Hippocratem Galenus secūdo de Diebus criticis cap. 6. quod Hippocrates Epidemia ante Prognostica & Aphorismos scripsit. A signat autem rationem Hippocrates quarto de morbis cur inuasio illorum per dies fiat impares: nam, inquit, tantum temporis requiritur, ut bonus chimus ex uentriculo trahatur ad mem- bra: non enim hoc minore quàm diei spatio fieri potest: quare subiungit, quod morbi impares decernunt 3. 5. 7. 9. 11. tum 14. & 14. uult esse ter- tium ab undecimo sic ut undecim dies sint unus circuitus: nam ea ratio- ne uigessimus primus erit nonus ab undecimo. sed hic liber parum legiti- mus & est, & à Galeno censetur Hippocratis, ratioq; hæc non satis ualida: sed melior quæ secunda Aphor. 24. adducitur. Quod autem addat, ut Ga- lenus dicit, 31. diem loco trigessimiquarti in expositione trigessimisexti Aphorismi quartæ particulæ, perabsurdum quasi est, ex principiis quæ ostendimus: nisi quis malit undecimum præponere quartodecimo: quare indicatiui dies uel ipso teste iudicatoriis sunt ualde debiliores: solus unde- cimus habet, ut dixi, priuilegium propter accessionem tertianam: unde duodecimum & ultimum languentes, in fine primi Epidem. undecimo die iudicatos scribit. Et hæc etiam si quis consideret, uidebit consentanea his quæ scribuntur primo Prognosticorum à primo ad sextum textum. Propter hæc etiam conatur tertia Aphor. 28. Hippocrates deducere mor- bos puerorum ad septenarium numerum, dicens, quòd pueris accidit de-

cretoria ut plurimum in quadraginta diebus, quandoq; in septem mensibus, aliis in septem annis: quam sententiam Galenus repetit primo de Diebus decretoriis, cap. 10. Vnde iam docuimus rationem dierum usq; ad uigesimalum per septenos ad quadragesimalum mixtam suprâ usq; ad cc. per uigenarios, post per mensium septenarios, post etiam per eundem annorum numerum. Igitur in omnibus præterquam à quadagesimo die usq; ad cc. ratio imparis & septenarii obseruatur. Numerum tamē hunc dierū non integrorum esse docet semper Hippocrates tertio Prognosticorū 4. uigesimalū octauum autē antiquo tēpore celebratū etiā usq; ad Archigenē postmodū succedēte 27. exclusum. ut recte Zoar tertio the. t. 2. cap. 2. exclusit uigesimalū octauū diem à iudicatoriis: sic & decimā octauam rectē de uigesima quarta etiam bene dictum est quod indicatiua sit, nō decretoria. quod uerō in cap. 1. ponat uigesimalā quintā diem iudicatoriā, dico quōd comparauit uigesimalam septimā septimæ & uigesimalā quintam quintæ: quia præsupponit ibi uigesimalam diem indicatiuā: qui error quoniā dixit disīūgēdo expecta crīsim in uigesima quinta uel uigesima septima, paruus est: nam uigesima septima fortis est. Et ne terrearis lector ex tanta confusione: uerum rationem positā à nobis diligenter inspicere, & ambiguitatem xx . ac xxi . diei, ac deriuatorum: reliqua erroribus transcribentium tribuens leuiorem efficies laborem: illud semper præ oculis habēdo, quōd regulæ medicinæ non generales sunt, sed quasi semper ueræ. Hoc dixi propter aliqua experimenta, quæ tamen rarissima sunt, aliter succedentia: tum etiam propter quosdam languentes ab Hippocrate in Epidemiis enarratos, qui à regulis prædictis paululum deuiarunt.

CONTRADICTION IIII.

Dies indicatorij post xx . an debiles & an xx . & centesimus sint indicatorij.

Dies indicatorij post quadagesimum sunt debiles, quia raro fit crisis ualida post eam diem, primo de Diebus iudicatoriis cap. 10. & hanc sententiam Rasis confirmat lib. 19. Con. c. unico. ubi totam de diebus iudicatoriis materiam tractat: idem etiam Zoar tertio The. t. 2. cap. 1. Sed huic dicto contradicit Princeps secunda quarti t. 2. cap. 1. adducens rationem: poterit materia esse pauca & uirtus ualida, & tunc confortabitur uirtus supra materiam & fiet motus uehemens. Intelligit igitur Princeps quōd robur iudicii sequatur uim motus ac uelocitatē: sed hæc uelocitas fit propter proportionem uirtutis ad materiam in bona, cum magna extiterit: uel contrario modo in mortali: igitur quamuis debilitetur uirtus in diurno morbo, tamen iudicium & pugna ualida, aliquando apparere potest,

test, & si raro. Causa igitur, quod crises eo ualidiores, quo principio morbi propinquiores, est uirtutis robor: & causa quod in diuturnis post x l. diem raro accidant crises manifeste, est debilitas eiusdem uirtutis. Sed ego duas alias addo rationes contra Galeni dictum. illæ crises sunt firmiores quæ minus nutant, sed post 40. diem 60. & 80. & cæteri per uigenarium firmiores sunt quàm iuxta septimam: nam iudicium (teste Galeno primo de Diebus iudicatoriis cap. 4. & 5.) fit in sexta & octaua frequenter. nō sic in 59. uel 61. aut 79. uel 81. Et si quis obiiciat, quod alijs etiam diebus iudicati inueniantur. Respondeo non apud legitimos Hippocratis libros: ut non in primo, nec in tertio Epidem. Secunda ratio est quod Hippocrates enarrat in fine primi Epidem. crises ualidas post diem 40. ut in ægro Cleonaetide textu 23. & enim octogesimo copiosè sudauit, & liberatus est. Apparet etiam quod multi post 40. diem mortui sunt centesimo uigesimo die, alij octogesimo. Sed cur 100. diem primo de diebus criticis prætermittit? trigessimum etiam iudicatorium esse negat, quem Hippocrates supra commemorauit in tertia parte primi Epidem. t. 14. nec Galenus illum ibi respuit cum tamen decimum & uigesimalum octauum ex hoc numero expungat. Ad has tres difficultates respōdeo, quod ceterimus dies, si error nō est in codice Galeni, nanq; ex Hippoc. prætermisus dicitur, quæ cōstat non centesimū, sed centesimum uigesimalum potius prætermisisse, in primo Epidem. sectione tertia t. 14. uerū meminit utriusq; tamen in singularibus exemplis. Centesimi quidē tertio Epidem. sec. tertia t. 81. Heropytum Abderā cōmemorans, tum Galenus secundo de Diebus iudicatoriis cap. 5. centesimum inter iudicatorios retulit. Centesimi autem uigesimali, Parium adducens, ibidem t. 73. quem ea die mortuū refert. Ego dicam eandem quæ post uigesimalū, rationem seruandam: nam ut trigessimus uix iudicatorius dici potest, ut dictum est, & si medius inter uigesimalū & quadragesimalū: sic etiam post quadragesimalū clariores sunt qui per quadragenarios integros numerantur: scilicet octuagesimus, & centesimus uigesimalus: at his inferiores quasi medii erunt sexagesimus ac centesimus. horum autem robustior sexagesimus. qui enim eadem ratione tenentur eo sunt ualidiores, quo principio propinquiores, ut 11. 17. & 6. 13. & sic de alijs. Omisit igitur Galenus in enarratione centesimum iure, ut omnibus qui ad centesimum uigesimalum connumerari possent, debiliorem: & postquam illud ex Hippoc. citat. pro centesimo apud Hippoc. centesimum uigesimalum legerem. si quis tamen nolit, dicat ibi Hippoc. noluisse ultra centesimum diem loqui, sed rotundo numero rem claudere. Est etiam centesimus uigesimalus, centesimo potentior, quod quartum mensem claudat, qui est medius septimi: sed tamen & centesimus dies in eundem mensem, & si imperfectum, refertur. Sed de trigesimo cadit dubitatio, nam il-

lum omnino iudicatorium negat Galenus : quomobrem cum neminem ea die iudicatum reperiam nec trigessimus primus inter pares possit connumerari, nec illum Galenus arguat : dicerem trigesimum aliquando locum subintrare trigessimiprimi, ut non sit secunda hebdomada seu septimana integra : nam trigesimumquartum pro trigesimo legere non licet : cum eum Galenus in aliquibus codicibus adiectum legat. Igitur forsan hunc defuisse scilicet in codice Galeni suspicetur, & merito. Cum uero quidam secundum priorem lectionem trigesimum quartum adiciere uoluisset sic *λδ*, expuncta ultima litera, ut ex uetustate accidit, remansit nota trigessimus : uel forsan ibi Hippocrates, ut diximus 30. tanquam medium inter 20. & 40. apposuit. Galenus autem ibi dies a uigesimo ad quadragessimum secundum septimanarum uim considerat, quo in casu trigessimus iudicatorius esse non potest. Vt cunq; sit, expungendus est trigessimus ex dierum iudicatoriorum numero. Ex hoc etiam patet error apud Aëtium lib. 5. cap. 25. nam uigesimam tertiam diem iudicariam ponit præter omnium opinionem. Lege tu uigesimam septimam, nam pro *κγ* erat *κδ*. unde lapsus interpretes. Paulus lib. 2. cap. 7. ordinem Galeni sequitur 18. adiicit quasi quintum ut dixi tertiam septimanam, uigesimum septimum autem post 20. primum in ordine facit. Primam uero difficultatem satis soluit hæc differentia : quod dies qui sunt a 40. die debiles sunt ratione iudicii : nam ut Galenus bene dicebat, raro per ueram crism hi morbi qui eum diem transcendunt iudicantur : sed uel sensim, uel per abscissum primo de Diebus iudicatoriis cap. 10. at ratione ordinis fortiores sunt hi qui post 40. eo quod rariores, nam difficilis est permutatio inter illos ob raritatem ac distantiam illorum. Circa quod est aduertendum, dies salutare difficilissime euerit, quam letales : nam si salus futura sit die 40. aberret autem quis paulisper, non sanabitur usque ad 60. uel 80. quoniam natura individui, ut dicunt, non mouet nisi in die conueniente : at si moriturus sit in 60. die aberrando celerius certe morietur. at tam parum poterit aberrare, ut quadragessimum superet. propterea error in salubri morbo diem iudicarium etsi permutet, non tamen effugit : in letali autem morbo quocunque die mori contingit ob errorem. Est etiam ex hoc illud pendens, scilicet quod errores in acutis minus morbum producant : nam ferme ad sequentem diem iudicariam, quæ proximior est, ut II. 7. quam in morbis diuturnis. Periculosior tamen est error, quia materia illa leuis ob motum occupare potest principale membrum : quod in diuturno morbo non accidit, nisi ualde superaugeatur materia. quo in casu in acutis certa ferme mors sequitur. Illud etiam dignum consideratione, Hippocratem & Galenum dies diuturnarum considerare, quasi ex septimanis compositos : sic ut 20. ex tribus septimanis 40. ex sex, sexagesimus ex nouem, 80.

ex duodecim, centesimus uigefimus ex decem octo constaret. At quia 120. dies uerè constat septimanis tantum 17. & una diè, par est ut ob hoc ultra 120. nullum iudicatorium diem statuatur, nisi mensium ratione: quare 200. loco, 210. idest septem mensium, non tanquam ipsum diem proprium, sed ut terminum proximū statuit: nam septem menses lunares dies sunt ducentissex cum dimidio. ob hoc nulla est contradictio inter Hippocratis dicta, nec cum Galeno, cum 200. diebus, aliàs septem mēſibus terminari dicat morbos. Sed tamen si quis ueritati magis studeat, priores quidem dies statuatur 120. 100. 80. ac tales: hos autem cum in septimanas diuiserit, uno sumpto termino, inueniet quod dicit Hippocrates, septimanas quidem non esse integras. Atq; hic est ordo cœlestium cursuum, ut integri cursus spatium potius ad minima diuidatur, quàm ex illis apponi dicatur.

C O N T R A D I C T I O V.

Quartus dies an iudicatorius: & an morbi imparibus diebus exacerbentur.

Quartus dies est iudicatorius. Aëtius lib. 5. cap. 25. & Galenus 4. Aphor. 36. conatur excusare Hippocratem qui illum in Aphorismo præterierit: dicens, quòd ideo hoc accidit, quia acuti morbi maxime imparibus diebus exacerbantur: qui uerò paribus exacuuntur, sunt diuturniores. & primo de Diebus decretoriis cap. 5. quartum diem, 18. & 3. in fortitudine præponit quoad iudicium: nam de indicatione constat, quòd tam sexti, quàm septimi est indicatiuus ibidem. Ordinem autem debiliorum recenset octauum, decimum, duodecimum, sextumdecimum, decimumnonum, mediumq; inter hos omnes robore ac securitate tertiumdecimū. Et rursus cap. 13. Morbi si ualde acuti fuerint, & primo die signa ualde letalia, uel concoctionis apparuerint, morbus ille non ultra quartū diem extendetur: aut enim morietur intra diem illum, aut omnino sanabitur. Hippocrates etiam cum 42. ægrorum historiam in primo ac tertio Epidem. texuerit: atq; in omnibus (præter unam, quam constat secundo uel tertio obuisse die) diem quoq; mortis adiecerit, in tertio segmento tertii Epidem. trium ægrotantium perpetuo meminit: scilicet Phrenetici, & Calui Larissæ, & Periclis Abderæ. 76. 77. & 78. textu: qui omnes quarto iudicati sunt: priores siquidem duo morte, postremus ad salutem. Veruntamen quod hæc ita sint, cur dixit Galenus tertio de Crisi cap. 4. iuxta medium quod Archigenes sua ætate tantum bis crisin uidit in die quarto, & ipse tantum semel cōtradicit etiam in 11. cap. primi de Diebus iudicatoriis his, quæ dicit quarta Aphor. 36. cum dixisset ibi, quòd exacerbationes acutorum fiunt imparibus diebus: si simpliciter intelligit idest sem-

per, 1. 3. 5. 7. & sic deinceps, tunc cōtradicit ei illud quod dicitur primo de Diebus iudicatoriis 11. in fine, scilicet quòd ubi morbus acutus sit, & exacerbatio per pares, certè morbus in quarto, uel ad plus in sexto finitur. Si autem intelligat, repugnante litera, quòd exacerbationes fiant tantum alternis diebus, tunc nō excusabat Hippocratem, cur quantum diem prætermiserit. Forſan ad primum dicemus, quòd ratione quidè quartus inter ualidos iudicatorios recenſeri debet: quia tamen non occurrit imparibus exacerbationibus, ideo raro iudicat, ut dictum est: quoniam iudicationes accidunt maxime in exacerbationibus, & conſistente morbo. Sed reſponſio hæc nulla est, quia omnes medici, inter quos Zoar, & Auerrois, fermè conſentunt, quòd hi dies non ratione, ſed Hippocratis autoritate & experimento ſunt confirmāti. & Galenus 2. de Diebus iudicat. cap. 2. originem & firmitatem experimento, non rationi tradit: ut ille cenſeatur iudicatorius dies ualidus, in quo plurimæ crifes, uel iudicationes fiunt: debilis, ubi nullæ, aut admodum paucæ. Hac igitur ratione, ſi uerum est quod Galenus dixit, quartus dies è iudicatoriis eſſet expungendus De termino etiam acutorum, & exacerbatione in paribus, dicebat Galenus prima Aphor. 7. quòd terminus peracuti morbi est quartus dies, uel parum ultra. Idem fermè 2. de Diebus iudicat. cap. 12. in primis uerbis. & 5. Aphor. 6. cū dixiſſet Hippocrates eos qui diſtentione neruorum corripuntur in quatuor diebus perire. dicebat Gal. hunc eſſe primum terminum dierum iudicatoriorum. Hippoc. etiam in Philoſco primo languente primi Epidem. & tertia par. tertii Epidem. 75. in Pythione id diligenter animaduertit, quòd paribus diebus exacerbabatur: quare manifeſtum eſt, cū in ſexto die mortuus ſit, acutos etiam morbos paribus exacui. Sciendum eſt, quòd Hippoc. in libro de Decretorio, ſtatuit primum circuitum morborum in quinque diebus: ſalubrium quidem: qui in quinto iudicarentur: mortaliū, in quarto: præcedentibus concordans, ſcilicet dictis in primo Epidem. quòd morbi qui exacuuntur in paribus ſunt deteriores. Secundum autem circuitum ad ſeptimum extendebat diem, Tertium uerò ad 11. & quartum ad 14. & ita quintū ad 17. & ſextum ad 20. atque ſic per quaternos extendebat ordinem ut tertio pronosticorum dictum eſt. Dies igitur numero diſtinguuntur in quinque genera: in ualidos, in malos, in mediocres, in indicatiuos, in intercalares. Validi, ut 7. 14. 20. Mali, ut ſextus & octauus. Medii, ut 13. quintus. Intercalares ut 15. 22. 23. Indicatiui ut quartus & 11. Cū Galenus & Archigenes dixerunt in quarta bis aut ſemel tantum uidiſſe criſim, de bona loquuntur: cui textus conſenteit Hippoc. in 4. Aphor. 36. & 3. Epidem. nam ex his duo primi mortui ſunt, ultimus tamen ſudore liberatus eſt: quanquā ex ratione dicta raro contingat morbos ſalubres paribus diebus exacerbari. atque ita prima contradicō ſoluta

soluta est, ex qua secunda clarior euadit, quanquam expositio Galeni in 36. Commento quarta Aphorismorum manca uideatur. Est igitur Galeni sensus, Morbi acuti aut boni sunt, aut mali: si boni, exacerbantur diebus imparibus: quare cum iudicatio bona fiat in exacerbatione, morbus acutus salubris in quarta finiri non poterit: qui uero finietur in quarta, in quarta habebit exacerbationem. Sed acuti morbi, qui in quarta exacerbantur, in paribus exacerbantur: quare tales mali moris sunt. Horum igitur morborum iudicatio mala est: aliter enim non essent dicendi morbi mali, si salubrem haberent terminationem. Igitur quartus dies uel non iudicat, aut male decernit: & ob id iure merito prætermisus ab Hippocrate fuit: & quanquam accadat aliquando bene terminari morbum in quarta, hoc est rarum: & regulæ Hippocratis sunt de his quæ secundum plurimum contingunt, 5. Aphor. 2. quamobrem etiam in præcedenti Contradictione argumentum Auicennæ periclitatur. quandoque enim contingit fieri ualidum iudicium, uerum hoc raro cõtingit: & semper eadem debilior est necessariò post diem 40. quàm si in primis diebus fiat. Propter hæc igitur, & alia, crisis in sexta adeo est detestabilis: quia uel non fit in die exacerbationis, si morbus imparibus diebus sæuiat, & sic reuersionem morbi minatur: aut fit in die exacerbationis, quare morbi qui paribus diebus exacuitur, & ex consequenti qui malum finem sit consecuturus.

C O N T R A D I C T I O VI.

Ordo dierum iudicatoriorum, an xvii. iudicatorius, an xii. & xvi. intercalares, an sextus omnino malus.

ORdo dierum iudicatoriorum talis est, ualidissimus septimus, post 14. inde 9. ii. 20. inde 5. 4. 18. ultimus 3. post male iudicantes ac quasi ex aduerso positi, 6. 8. 10. 12. & 16. & 19. primo de Diebus iudicatoriis capitulò 5. quanquam nunquam iudicium in 12. uel 16. uidisse se affirmet. primo de Diebus iudicat. cap. 2. & 4. Primũ igitur illud occurrit, cur non hos scilicet 12. & 16. inter intercalares potius adnumeret, quàm inter prauos & minus iudicatorios 15. Aëtius etiam lib. 5. cap. 25. ordinem hunc perturbat, nam 17. 4. & 3. præponit. 20. uerò ultimam facit utiliter decernentium. quamobrem in textu primum suspicor legendum cap. 5. 17. & 20. quomodo enim potuit 17. præterire, quem secunda Aphor. Hippoc. nominauit Aphorismo 24. & primo Epidem. sectione tertia t. 14. & ibidem Herophontem iudicatum 17. die, ac seruatum narrat. Sed & eius in eodem cap. 5. iuxta finem meminit Galenus, quanquam locum quo illum collocet non ostendat. De hoc igitur sic statuendum est, ut 17. & 4. ac 3. præponantur quinto, quasi robore æquales, 20. autem non ordine ultimum posuit

fuit Aëtius in robore, sed ut intelligeremus eum esse acutorū terminum. Sed Princeps secunda quarti t.2.cap.8.expungit ē iudicatoriis diebus 1. 2. 13. 12. 15. 19. litera noua addit 16.uult Princeps primum diem non esse iudicatorium: quia non potest grauis morbus tam celeriter finire:nec ualet, Moriuntur in primo die plures,igitur fit iudicatio. Declarabat Galenus hoc cap. 9. tertii libri de Crisimō secundū plurimum in prima die si moriatur,moritur absq; crisi,ut ibi dicebatur: quòd in principio & augmēto morbi hoc accidit, cū materia naturam longo superat interuallo.sed & ipse Galenus 2. de Diebus iudicat.cap. 5. diem primum à Diocle inter iudicatorios adnumeratum non recipit:de secundo nulla est difficultas.12. & 16.iure merito quisq; explodat ē iudicatoriis, cū Galenus in eo iudicium nunquā uidet.15.etiam uidetur Galenus intercalarem posuisse: quandoquidem nec inter hos nec inter illos numerauerit. Differentia igitur solum de 10.& 19. esse uidetur:in quibus rarissime fiunt iudicationes: sed tamen Hippoc.meminit de Pythione tertia par.tertii Epidem.75. sed hoc est rarū & recte à Principe adinaduersum. quod & in 19.contingit. quare neq; inter bonos nec inter malos iure poterant numerari. Galenus tamen ordinem rationis sequutus est: nam diximus, paribus diebus non posse bene decerni. tales igitur cum essent 8.10.12.16. præter sextum, ideo prauis adnumerat hoc sensu: quòd euētu quidē intercalares sunt, ut in quibus uix accidat iudicium:si tamen cōtingat præuē decernere hos dies.18. tamen quia est ad 21. quandoq; indicatiuus: est autem 21. quandoq; decretorius, ut docuimus hac ratione medius.18. bonus, & si debilis sit esse potest. Rasis 19. con. fol. 398. fermē cum reliquis concordat in fol. 399.est error: nam dicit quòd Galenus & Ioannitius non numerauerunt, xi.diem inter iudicatorios.lege 11.non xi.nam de xi.in columna sequente connumerat illum ex autoritate Galeni & Hippoc.primo Epidem.particula tertia.ex 14.enim ægris quos numerat tres,2.& 12.& 14. in undecima die iudicatos scribit, duobus primis morte,Melidia solum seruata. Sæpe uerò celeritas non solum scribentium, uerū & autorum anteuertit. ut enim hic pro xi. debuit scribi secundus, sic apud Galenum, cū semel tantum crīsim in quarta uidisse affirmat, bonā adicere uoluit: uix enim de mala quisquā credat cū pestilentibus temporibus, tum etiam ex doloribus & attonito morbo laborantibus, ubi primam effugerint diem nullam magis quam obnoxiam morti conspicias. Sed dices, Sexta dies non uidetur mala, nam tertio Epidem. par.tertia tex. 84. uirgo in Larissa plane à febre & delirio est liberata, per sanguinē sexta die fluentem ē naribus. Sed addidit duo, alterum (huic non repetiit) tanquā mirum, quòd in sexta liberata fuerit plenē: reliquum causam solutionis morbi: nam dixit, Cū uirgo esset, postquā iudicata fuit,huic primo
mensēs

menſes eruperunt. Princeps etiam ſecunda quarti t. 2. cap. 6. fatetur criſim bonam poſſe dari in ſexta cum urina multa: tum etiam mala: cui Rafis ſubſcribit: uerũ cum icteritia uel exitura: ſed talis criſis nõ dicitur perfectã, & cum hoc eſt ſemper laborioſa. Eſt etiam 1. Epidem. par. 2. t. 83. ubi duorum Epigenis fratrum narrat hiftoriam: nam equẽ bene iudicatus eſt maior, cui decreuit morbus die ſexto: ſicut minor, cui ſeptimo: nam uterque 17. eſt iudicatus: obſcuritatem Hippocratis in textu Galenus in commento aperit. dicit enim, uoluiffe illum, ut natu maior poſt ſex dies, minor autem poſt quinq; in reuerſionem incurreret: uterq; autem à ſecunda inuaſione quinto die eſt iudicatus. Huius reddit rationem: quia omnes qui ea tempeſtate ſeruabantur, per recidiuam ſeruabantur: ut plurimis ſexto die morbus iudicaretur, reuerteretur ſexto die à iudicatione, & rurfus ſexto die, id eſt 18. iudicaretur. unde in textu 85. hæc habet: Nonnullis iudicabantur x 1. repetebat morbus 14. exactẽ iudicabantur 18. Eſt igitur intelligendum, quòd dies iudicatorii uariantur in robore: non tamen ſic, ut intercalares decretoriis præpolleant, ſed ut debiliores aliquando ualidioribus penes anni tempora, ac conſtitutiones, ut 1. Epidem. par. 2. iuxta finem: & per ætates, ſexum, temperaturam, conſuetudinem, libro de Decretorio, & de Diebus decret. Variantur etiam ob errores Medici, ægri, uel aſtantium, 1. de Diebus decret. cap. x 1. Declarabat etiam Galenus 2. de Diebus decret. cap. 7. quòd ut dictum eſt tempeſtates uariãt robur dierum decretoriorum. quare hic 18. dies qui plerunq; inter debiles numeratur, ualidus euafiſt iudicauitq; multos. 1. Epidem. par. 2. t. 83. & 85. Verba autem Hippocratis ſunt uera ex maxima parte, nõ generaliter. Circa hoc eſt notanda regula generalis, quòd dies iudicatorii eo ſunt deteriores, quo fortioribus proximiores, ut ſextus & octauus: nam ſignificant naturam magis aberrantem, ubi minime debuit. Excipiuntur impares, propter acceſſionis excuſationem.

C O N T R A D I C T I O VII.

Purgationes an debeant fieri diebus decretorijs.

Purgationes debent fieri decretorijs diebus 13. & 14. die: per ſuperiora quidem paribus diebus, per inferiora in imparibus. Loquens enim de eis in libro de Humoribus parum ante medium, ſubiicit: *ἀτὰρ εἰ τὰ πρόσω χρόνος προῖκοντα ἀνάγκη οὕτως, οἷον τρισκαίδεκάτιμία. πρὸς αὐτὰς καὶ τρία τρισκαίδεκάτη μὲν, καὶ τὴν πρὸς αὐτὰς καὶ δεκάτη δὲ, ἄνω. πρὸς γὰρ τὸ κρίσιμον, οὕτω συμφέρεται. καὶ ὅσπερ εἰς ὁσάτις, πληρὸν ὅσπερ καὶ τὴν πολλὰ δὲ καὶ δάριον. ταῦτα δὲ ἐγγὺς οὕτω κρίσις, ἀλλὰ προωτέρω.* At contra quarto de morbis, & eſt 34. liber, iuxta medium ferme: cum docuiſſet longa uerborum ferie, ægros imparibus diebus exacerbari, ſubiicit: *Qui*

o febre

febre continua uexantur, si paribus diebus assumant medicamentum, non purgantur: imparibus uero assumentes purgantur quidem à ualido medicamento: multi tamen ob nimiam pereunt purgationem. Quare medici superiores dum imparibus diebus purgarent, homines perdebant, atque idèd maxime peccauerunt: nescire enim uidebantur, quòd humidum corporis nostri imparibus diebus ualdè perturbatur. Et rursus post principium libri de Aëre & aquis: Maxime autem obseruare oportet magnas temporum mutationes, ut neque medicinas in illis libenter exhibeamus, neque uramus quæ circa uentrem, neque secemus donec saltem dies decē neque pauciores præterierint. Periculossima etiam sunt ambo solstitia, maxime uero æstiuum. Periculosum etiam utrunque æquinoctium, maxime uero autūnale. Hippoc. etiā 4. Apor. 14. iuxta Galenū in cōmento 15. uult nos docere, quonā pacto motu corporis augeamus opus hellebori: quæ ratio uidetur generalis. Galenus in libro, cui titulus est, Quos & quādo purgare oporteat, tres dat regulas: Prima pertinet ad accessiones, in quarum initio per superiora, in fine per inferiora purgare conuenit: atque sic non in impari per inferna. Secunda in turgentibus, dum materia est in motu, & sic in die accessionis educenda est per locum continentem ad quem declinat. Tertia in cæteris in hora motus, cum natura cessat aut non perfectè operatur: quare in die accessionis, & in imparibus purgandus est æger. Princeps tamen prima quarti t. 2. cap. 7. post principium, dixit: Et nō moueas in die paroxysmi aliquid quantū possibile est tibi, neque curationē facias. Ad hoc uero Gentilis adducit rationē Tadei, quæ est ualida: aut enim purgāda erit materia cōiuncta, seu putrescens (nam de numero causarum aliās) uel quæ nondū putruit. Si putrescens, illa in accessione ad exteriora mouetur: igitur non cōuenienter medicamēto educitur, iuxta Hippocratis regulam. Si autem antecedens, cum illa quiescat tam in die accessionis quā quietis, tutius in die quietis erit euacuanda. Quia tamen Rasis 16. Con. uidetur rectè satis Galenū interpretatus, dicūt quòd materia quæ est in motu ad superiores partes, leui est educēda uomitorio: & quæ ad inferiores, clysteri. Sed nō uidetur illud rectè adiunctū: quòd si natura torpeat, debeamus exacta die iudicatoria in ipsa purgare, non in ipsa die iudicatoria: sensus enim Galeni & rectus est, quòd naturā rectè operantem iuuare debemus semper, si indigeat auxilio. Ratio quæ solet adduci in contrariū, est, quòd nō debemus iungere in eadē die duos motus magnos, accessionē, & purgationē. Et experimentū uidetur stare pro hac opinione: quia multi adeo grauiter perturbantur, ut de uitæ discrimine cogantur esse solliciti. Aëtius lib. 3. cap. 125. de ueratro agens, cum regula illa ad omnes medicinas expurgantes extendatur, dicebat: In morbis in quibus sunt interualla, dandum est interualli tempore: in quartanis uero, & intestinis fluxione uexat

uexatis, in ipsa acceffione. Exquirenda est igitur ratio omnium horum, nō obiter, sed diligentissima. Hippocrates & Galenus motum humorū optāt ad purgationem, talem tamen, qualis est, quem ars imitari uult: sed naturæ uexationem aut debilitatem uitat. In temporum igitur mutationibus non à natura propria, sed generali, humores mutantur: & in acceffionibus: quare uim natura patitur nec conuenit purgatio nisi eatenus, quatenus motum tentans natura propria, à materiæ malitia uexata, nec potens perficere, iuuatur à medico: ut in uomitibus, & in secessibus per aluum in quartanis. Ex hoc patet, quòd in æquinoctiis, & solstitiis, & temporū mutationibus, in congressibus luminarium, nullus sanus debet purgari: nam natura uim patitur. In motu autem lunæ, coniunctione, uel quadrato, aut opposito in morbis, purgare possumus: sed minus in nouilunio. Est igitur consideratio diligens habenda in omnibus, & iuuamentum motus materiæ detrimento uexationis comparandum. In motibus autem naturæ propriæ & sunt motus iudicatorii, & luminarium, semper melius est purgare, nisi in duobus casibus: uel cū natura completè agit iuxta illud quæ iudicantur & iudicata sunt: & ubi modus euacuationis nostræ à natura disidet. Acceffiones igitur mediæ sunt inter temporum mutationes, & iudicationes, uel luminarium motus: ut enim mouent, impediunt, quia sunt motus naturæ uniuersalis, non indiuidui. ut autem natura propria tentat expellere, adiuuari debet. Quare leuiter in his, & secundum inclinationem procedere debemus. Vnde Principis dictum clarum est: Hippocratis autē sententia prima est intelligenda de iudicatoriis, ut ipse dicit.

C O N T R A D I C T I O V I I I .

Fœtus decem mensibus in utero manet: Septimestris an ante CLXXXII. diem, octimestris an uitalis: Tempus motus & perfectionis tempori formationis an conueniat: Masculus an scemina celerius formetur.

Circa præcedentia est alia difficultas, prædictis persimilis: nam cū dictum sit, rationem dierum iudicatoriorum solum in his esse ueram, qui in morbo nulla ex parte delinquant: est tamen difficultas, quia in partu ubi nullus est defectus, uariatur tamen terminus eius. Hippocrates nanq; in de Natura fœtus, hæc iuxta finem habet: Cū autem in utero puer est, in dies fit ualidior: simulq; ac decimus. mensis iam aduenit, membranas & inuolucra rumpit, & tunc pariendi tempus matri imminet. Si uerò puer patiatur ante statutum tempus, deficiente nutrimento, membranas frangit & erumpit, sicq; legitimum ante tempus partus fit, id est ante decimum mensem. Post pauca uerò causam subiicit huius, dicens:

Quod autem non est diutius foetus in utero decem mensibus continere ostendam: namque nutrimentum, & quo augetur post decem menses non sufficit: quoniam partus creuit qui de sanguine quod est dulcissimum sibi assumens, lactis etiam aliquantum haurit. cum igitur haec minora fiunt his quae opus habet, fitque iam foetus ualidus ac robustus: plusque nutrimenti quam adsit iam desiderat, seipsum agitando, ob id membranas disrumpit. Quod etiam celerius primiparis contingit: nam in eis foetus ante decimum etiam mensem debita nutrimenti quantitate deficitur. Haec ille. Deinde subiicit rationem earum, quae plus aut minus ferunt intra statum tempus, quam breuiter subiicio: Quaecumque parum purgantur sicciores sunt: quare celeriter & ante decimum mensem finiunt foetui alimentum: quare & primiparae generaliter, & multae aliae tales existentes, ante decimum mensem pariunt. Quaecumque uero diu mensibus expurgantur, & multum emittunt sanguinis non deficiente alimento, in decimum mensem, quod legitimum pariendi tempus est, partum differunt. Manifestum est quod Hippoc. in hoc libro (quae Galenus maxime probat, & in de Natura foetus, seu formatione eiusdem, tanquam Hippocratis legitimum citat) tria manifeste nos docet. Primum, quod legitimum tempus & maxime generale pariendi est mensis decimus, non nonus ut communiter creditur. Secundum, quod non est transgredi mensem decimum secundum naturam: quare fieri nequit, ut ad undecimum usque mensem hoc pariendi tempus transferatur. Tertium, quod ante decimum mensem saepenumero, quauis non proprie, secundum naturam parere contingit. Cum haec igitur Hippocrates, & magna cum ratione uoluerit, nunc uideamus, quam difficultate patiantur: in libro igitur de Octimestri partu haec habet: Quin etiam decimestres uocatos dico in septies quadraginta diebus magis nasci, & maxime tales conuenit educari, & perfectissimus hic partus est. In prioribus autem quadraginta diebus, postquam nati sunt, plurimi pereunt. necesse est enim ut quae in pauco tempore multa accipiunt, multum laborent. inde subiicit: Decimestres autem & undecimestres ex septem quadragenis eodem modo fiunt, & ex medio anno septimestres. Plurimis enim mulieribus necesse est in uentre concipere post menstrua, si fuerint. Solutio igitur tempus dare mulieri mensis, in quo ipsa purgatio exit, & tempus hoc quibus minimum fit, tres dies: plurimis etiam multo plures. Sunt etiam multa alia impedimenta, quibus in mulieribus tardatur conceptus. Oportet etiam hoc maxime considerare quod Neomenia, quae est unus dies, mensis unius quasi trigesima pars est: duo autem dies quasi quintadecima: & tres dies quasi eiusdem pars decima, & alia secundum horum rationem. Neque contingit fieri in minoribus aut maioribus particulis solutionem menstruorum, neque conceptum infantium. Ex his igitur omnibus necesse est, circa dimidium mensis, aut ultra, plurimas mulieres concipere: ut saepe undecimum mensem

menſem comprehendant ſeptem quadragentariis, ideſt diebus ducentis ac octoginta. Quoniam enim ultra dimidium menſis concipit mulier, neceſſe eſt ut undecimo menſe pariat, ut in ultima periodo cōſtituatur. Non igitur ultimus pariendi terminus eſt menſis decimus, ſed undecimus. Lex etiam ipſa, ut l. in teſtato. iuxta finem. ff. de ſuis & legit. hæc habet: Poſt decimum menſem mortis natus non admittitur ad legitimam hæreditatem: de eo uerò qui centeſimo octuageſimo ſecundo die natus eſt, Hippocrates ſcripſit, & diuis pontificibus reſcripſit, iuſto tempore uideri natum. At ſecus longe Plinius refert lib. 7. cap. 5. his uerbis: Maſſutius auctor eſt, Lucium Papirium prætorem ſecundo hærede lege agente, bonorum poſſeſſionem contra eum dediſſe, cū mater menſibus quatuordecim partum diceretur tuliſſe: quoniam nullum certum tempus pariendi ſtatutum uideretur. At uerò aliter Hippocrates alibi, Vndecimeſtres, ac duodecimeſtres uiuere non poſſunt, etiam ſi qui fabulentur de his. At contrà Philoſophus ait, Pueri naſcuntur nono; & decimo, & undecimo menſe, quidam etiam decimoquarto. Et Auicenna nono de animalibus: Fidelis quidam mihi retulit mulierem poſt 14. menſem peperiſſe. Sed & Conſiliator affirmat, ſe fuiſſe undecimeſtrem: pater autem meus 13. menſe natum ſe prædicabat. Iuxta hæc alia exoritur non leuis difficultas, quodnam ſit minimum pariendi tempus legitimum, ut foetus uiuere poſſit: Hippocrates nanq; legi iam dictæ ſuffragari uidetur, ut dies ſit cēteſimus octuageſimus ſecundus: unde in libro de ſeptimeſtri partu, Fiunt etiam ſeptimeſtres ex centum diebus & octuaginta duobus, & ſuperante particula. Nam ſi primi menſis dies quindecim computauerimus, quinq; autem menſium centum & quadraginta ſeptem ac dimidium diei. Nam ſi ſexaginta, uno deficiente die, proxime duo menſes efficiuntur. Sic igitur his ſe habentibus ad ſeptimum menſem ſuperſunt dies pluſquàm uiginti, dimidium anni & diei partis, cum quota parte facta. cum ad principium perfectionis hoc partus. Hic clarè initiū ſeptimi menſis diem facit centeſimum ſexageſimum tertium: quicquid ſupra eſt, ſeptimo menſi tribuitur, initium ab ea die ſumēdo. ut gratia exempli centeſimus ſeptuageſimus dies octauus ſit ſeptimi menſis: cum octauus etiam ſit à centeſimo ſexageſimo ſecundo, qui etiam ultimus eſt ſexti mēſis. At libro de Carnibus hæc habet conſentanea prioribus: Infans ſeptimeſtri generatione natus, ratione natus eſt, & uiuit, & rationem habet talis ac numerum uerum in ſeptimanas. Octimeſtris autem nullus natus uiuit unquàm. Nouem menſium & decem dierum natus ſit, & uiuit, & habet numerū uerum in ſeptimanas. quatuor decades ſeptimanarum ſunt ducenti octoginta. per ſingulam enim decadem ſeptimanarum dies ſeptuaginta. habet & ſeptimeſtris partus tres decades ſeptimanarum: & per ſingulam decadē dies ſeptuaginta:

tres igitur decades septimanarum sunt omnes decem ac ducentum. Igitur hac subducta ratione apparet quod dixerat in hoc cōtineri: ut intra tertiā aut quartam decadem numerus dierum cōtineretur: quare ut non vitales ultra ccx. diem: quia non septimani. sed intra sic, nec ultra cclxxx. quia decimum mensem ad decimū eiusdem mensis diem terminat, ne quatuor decades superet septimanarum. Non igitur totus decimus mensis vitalis erit, quod suprà ostenderamus: nec etiam infra clxxxii. quia minus est hoc tempus tribus septimanarum decadibus, & etiam anni dimidio: cum tamen clxii. finem dixerimus esse sexti mensis. Rursus secūdo Epidem. sec. tertia: Quæ apparent in quibus mensibus fiunt labores in circuitibus, quoniam qui in septuaginta mouentur, in triplo perficiuntur, quoniam post muliebria. Sinistra dextra autem hians humiditas propter discedentia dictæ siccissimæ: quoniam citius motum discretum rursus crescit & tardius, plurimo tempore. labores circa tertium diem ultra quinquaginta: & sextum ultra centum. menstrui, secundo & quarto. quæ oportet scire in septimestri uel à muliebribus numerādi sunt nouem menses, uel à conceptione. & in septuaginta & ducentum Græci menses fiunt. & si quid adhuc his & siue masculis uel etiam foemininis. hic uero uidetur consentanea prioribus de septimestri partu proferre: scilicet ut ccx. die nascatur.

Porro in nono plurimum discordare uidetur: nam si cclxx. dies à conceptione numerauerimus. in fine noni mēsis exoriri uidebitur: si à mēstrui tempore, intra nonum mensem (quæ nunc opinio uulgata est) exorietur infans, cum tamen non nisi nono exacto nasci posse uideatur, iuxta auctoritatem eiusdem, in libro de Formatione foetus adductam. Rursus etiam in libro de Alimētis: Ad formationem quinq; & triginta soles, ad motum septuaginta, ad perfectionem ducenti ac decem. Alii dicunt ad formam quadragintaquinq; ad motum septuaginta sex, ad exitum ducēti decem. Alii quinquaginta ad speciem, ad saltum centum, ad perfectionem trecentum, ad discretionem quadraginta, ad transitionem octuaginta, ad egressum ducenti quadraginta. non est & est. fit autem in his plus & minus: & totum & per partem, sed non multo plus aut minus: quæ autem minora tot & quæcūq; his similia, quare hic septimum mensem multum ut prius extendit: cum tamen uix etiam ex sententia sua, ccvii. diem possint superare. at decimum usq; in finem. ac etiam paulo plus. nam decem menses cclxxxv. dies uix excedūt. Galenus autem in libro de Foetus formatione sic fermè distinxit. Tempus primum distinctionis membrorum, in sex diebus fit. Tempus secundum est distinctionis cordis cerebri & epatis. Tempus tertium est distinctionis omnium membrorum, brachiorum, & crurium, & formationis eorum. Tempus autem quartum est complementi eorum. Itaq; non est ausus Galenus hæc tempora numero

mero definire. Vnde etiam manifestum est, tum ex aliis, commentarium de septimestri partu, quod illius maiestatem, nec placita, nec dicendi usum, quanuis titulo Galeni inscriptus sit, eius non esse. Quamobrem in eodem libro de Foetus formatione subiecit: Non mirum si qui anatomia carētes sola ratione innixi, grauiter errauerunt: cum hi etiā qui incisionem exercuerant non minimos errores admiserint. Auicenna tamen nono de natura animalium cap. ultimo, puerum sexto mēse natum bene uixisse refert. Quo fit ut septimus mensis hac ratione nō primus uitalis existat, sed ante illum sextus. Plinius autem non omnes septimestres uitales existimat: unde septimo de Naturali historia cap. 5. Ante septimum mensem haud unquā uitalis est. Septimo non nisi pridie posterōue plenilunii die, aut interlunio concepti nascuntur. Rursus Hippocrates maiorem uidetur his addidisse difficultatem, ex his quæ in libro de octimestri partu quæsiuit: iuxta quæ, tertia emergit nobis dubitatio: an octimestres uitales esse possint? in quo sententiā Hippoc. in eo libro tum horū tum cæterorum subiungamus in initio libri propterea nullus octimestris partus superest, & uiuit tamen ut recitauī sæpe, cum etiam Princeps nono de Natura animalium cap. 5. censeat nec uiuere nec nasci posse: unde male à Conciliatore interpretantur illius uerba. Sed mulieres dicunt hoc, quia accidit eis sanguinis menstruatio. illud autem quod dicunt, erat, quod natus esset octauo mense: subiungit tamen: Et aliquando parit mulier in fine octo mensium: & tunc super caput nati apparent superfluitates spermaticæ, uel aliquid simile luto, uel aliquid simile his quæ mater ipsa comedit. & similiter est autoritas eius uigesima prima tertii t. 2. cap. 1. quam etiam male citat Conciliator: & in cōtrariam illius sententiā: & est, quod natus in octauo mense in quibusdam regionibus nullo modo uiuit: & ubi uitalis est, parum uitalis est, ac raro. Hoc autem dixit, quia Aristoteles in Aegypto affirmat octauo genitos pueros mense uiuere: uult enim hoc Princeps etiam rarum esse. Similiter & dictum Philosophi. 10. Problematum 40. Homo nascitur septimo, octauo, & decimo mense: legi sic debet: Septimo, nono, & decimo mense: nam præterisse nonum non potuit octauum apposuisse: cum dicat septimo de Historia animalium cap. 4. Itaq; fit ne octauo mense nati, non solum non uiuant, sed etiam ipsis emortuis periculum quæ pariunt subeant. Simili modo & qui serius quā undecimo mense nascuntur, latere putantur. Vnde ex his uerbis non iam amplius decimum mensem, ut Hippocrates, sed undecimū pro ultimo statuemus. At quamquam foetum octimestrem sic uitalem esse negauerit, expresse tamen cōtrarium fatetur quarto de Generatione animalium, cap. 4. cum dixit: Cæteris enim unum tempus, homini plura fiunt: quippe cum septimo & decimo mense nascatur: atq; etiam inter septimum & decimum positus:

positis: qui enim mense octauo nascuntur, & si minus, tamen uiuere possunt: cuius rei causa ex his quæ modo explicauimus accipi potest. diximus & de his in Problematis. Quod tamen non inuenitur apud nos, æuo nobis quæ tradidit magna ex parte subtrahente. Sed & hic undecimi mensis nullo modo meminit. Tanta uidetur in hac causa autorum uarietas, & ad semetipsos, ne dicam incōstantia. Hinc exurgit alia dubitatio. An scilicet formationis tempus eam subeat rationem quæ iam ab Hippocrate ex secūdo Morborum uagantiū, tum alibi adducta est, tanquā præfinitam sortiatur? nam & aliās in contrarium illius sententias adduximus. Conciliator nanq; Differ. 49. hoc negat dicens: Nosce quoq; non esse proteruiendum in huiusmodi terminationibus mensium exquisitis & generaliter cuiuslibet artis materiam sensibilem sibi determinantis, propter ipsius uagam atq; indeterminatam naturam. Sed melius tamen est in hoc Aristotelis sententiam tum Principis explorare. Ergo septimo de Historia animalium cap. 3. Mares foetus circiter quadragesimum diem, foemina circiter nonagesimum mouentur: nihil tamen in his certi affirmare licet. & ibidem: Finditur autem foetus hoc eodem tempore, & parum post: effluxiones ante septimum, abortus iuxta quadragesimum. Ea die mas concreuit in aqua frigida. apparentq; genitalia, & oculi. foemina autem quæ intra quartum mēsem eruperit, indistincta est. quæ autem quartum mensem adepta est, finditur, & reliquam distinctionis effigiem breui tempore accipit. Cum itaq; foetus in utero formatur, foemina tardius, quā mas perficitur, in quibuscunq; partibus, & plerunq; in decē menses protrahitur. Et cap. 4. Cum semen uterus conceperit, statim multis se contrahit, donec ad septimum peruenerit mensem: octauo adaperitur, atq; dehiscit, & partus si uiuit descendit mense octauo. Et rursus ibidem: Sed cum cætera animalia omnia singulari ac simplici modo partū suum perficiant, homini uni multiplex datū est, septimo, octauo, & nono, ac decimo mense parere: nonnullæ etiam undecimum tangunt. Foetus autem qui ante septimum mensem prodeat, nullo pacto uitalis est. Qui septimo uitalis hic quidem exit primus, sed magna ex parte infirmior: quamobrem cinnabulis ex lana inuoluunt, & fasciis alligant: & plerique de his quoq; septimo mense natis uiuere possunt. Quomodo autem septimum mensem intelligat quarto de Generatione animalium cap. 10. his uerbis ostendit: Ratione autem optima tempora omnium & grauiditatum, & generationum, & uitarum dimensionem circuitibus sibi exposcunt recipere. Circuitum appello, diem, noctem, mensem, annum, & tempora quæ his describuntur, atq; etiam lunæ traiectiones: sunt enim lunæ circuitus complementa, & silentia, & interpositorum temporū sectiones: ita enim coit cum sole. Mensis nanq; amborum circuitus est. luna autem principium est,

est, ob solis societatem receptumq; lucis: fit enim quasi alter sol minor. post pauca uerò, conuersionis autem horum siderum alia fortassis principia sunt: natura igitur ita sibi uult, ut eorum numeris generationes & obitus numeret. Sed iam ex his alia insurgit difficultas, an masculorum & foeminarum diuersa sint tempora, hæc nanq; quinta est dubitatio Auicennæ. igitur sententia in his ambabus dubitationibus sic se habet uigefimaprima tertii t. i. cap. 2. Spumæ spatium dierum est sex ex principio: deinde post dies tres, in nono scilicet, lineatur embryo: & quandoq; antecedit uel postponitur die uno: deinde post dies sex, & sunt quindecim à conceptione, penetrat sanguinis forma in toto, & fit illud unde creatur: & quandoq; antecedit die uno, uel duobus: & post duodecim dies fit humidum & caro, & discernuntur tria membra manifeste: & antecedit quãdoq; duobus aut tribus diebus: & post nouẽ dies separatur caput ab humeris: & à lateribus, & post quatuor dies sentit, & hoc spatiũ est quadraginta dierum: & quandoq; antecedit ut sentiat in trigintaquinq; diebus: & aliquãdo in triginta, & masculus in illo toto uelocior est quàm foemina, uidetur enim spatium minus formationis masculorũ dies triginta: & partus medietas anni, & quod dicemus in proximo. Iuxta uerò sententiã Principis, & Haliabbatis, foetus qui formatur in xxx. diebus, mouetur in lx. uerum perfectionis tempus est triplũ motus temporis: id est dierũ clxxx. licet tertio Theoricæ 34. ille dixerit, quòd perfectio est dies ducenti decẽ. Sed cur tamen dixit Princeps in uigefimaprima tertii t. i. cap. 2. Facientes experientia & probationes in hoc, nõ iudicant nisi super illud quod præterit res secundũ experientiam eius. & non est impossibile quòd fit istud quod expertum est in fine cadens secundum illud quod diuersificatur: in toto enim illo est plurimum proculdubio. & plurimum est in eo quod diuersificatur: in toto enim illo est plurimum proculdubio. & plurimum est in eo quod plus generatur. Quonam pacto igitur si hoc adeò dubium est, quispiam tam exactè, ut ipse facit, enarrare historiã queat? habet & dubitationem quod subiungit ibidẽ, cum dixit: Determinatio autẽ masculi & foeminæ in distinctione spatii est res quam quædam pars medicorum iudicat audacter & stulte. Hic quis non uidet illum non solum Hippocrati, Aristoteliq;, sed etiam superioribus uerbis contradicere?

His tot tantisque difficultatibus expositis, si quis cupiat euadere, primum illud statuatur, ne miracula in exemplum aut rationem adducat: ut enim recte dicebat Auerroës, in omnibus artibus solent monstra quædam accidere. nam quod aliquis superuixerit natus vi, uel xiiii. mense: illud in experimentum adduci non debet, quod semel tantum ab Auicenna auditum narratur: nam & ego antequam ad rem ueniam, quædam admiranda exempla subiungam.

Vxor magistri Petri Sormani, uenditoris maluatici, (ut sic Creticum uinū appellare liceat) in uia uexillorū Mediolani: ostendit mihi filiā, nomine Clarā, quā diebus c l x v i i l. post abortum masculi foetus quadrimestris Venetiis peperit: & in puerperio lac apparuit: ipsa autē puella exilis, pallida, & macilēta est, annos agēs x v i i l. Mater Augustini Abduę patritii inclyti, narrauit uidisse puerū natū v l. mēse filiū Thomę Suighi, qui superuixit, cū primis diebus lac nō sūgeret, sed immitteretur infundibulo: & tamē peruenit ad ætatē perfectā, cū nec digiti manuū, nec palpebrę essent separatę dum natus est: hic puellus, nepos erat mulieris famosę de uia lata, medicam artem exercētis. Eufragia uirgo Deo dicata in eđe B. Rodogondę, cum mater eius abortissēt puerum v. nonas Iulii: profecta uerō ad coniugem x. calendas Augusti, ipsam Eufragiam peperit v i l. Idus Ianuarii sequentis anni. quare c l x x. die nata est, morbo perpetuo natalium iacturam attestāte: ne quis ad superfoetationem refugiat: quanquam nec hęc minus intempestiuo partu miraculum afferat.

Comitissa etiam de Triultis iuuenulam retulit esse in domo comitis Sancti Secundi, capite admodum paruo, insanamq; , natam ut palām fertur quinto mēse.

Talia singulis diebus accidunt experimēta. quōd si diffidētia uitę horum foetuum, uel negligentia multos superfuturos non occideret, longe frequentiora huius rei apparerent exempla: quę tamen ut ostendam non miracula sunt, sed quanquam rara naturę, tamen legibus continentur.

Alterum uerō in his est animaduertendum, ne ambiguitas uocis nos fallat: uelut cum Nicolaus affirmat natum v l. mēse posse superuiuere: mensem triginta dierū intelligit: infantemq; c l x x x. dies morę in utero materno traxisse. quare hic septimo lunari mēse natus dici debet: cū autem multiplices sint hi menses, tantam uarietatem pariunt, ut plerumque inter concordēs autōres, contradictionem serere uideantur: ob quę diebus ratio ineunda est.

Est & illud considerandum, ne ut frequenter accidit, uitiosa lectio sit, uelut cum diximus, octimestrem nullo modo ex Principis sententia posse uiuere: uerba tamen illa Principis nono de Natura animalium cap. 5. Et aliquando parit mulier in fine octo mensiū: difficultatē & ambiguitatem non leuē pariunt, cū uitiosa sit lectio: uerba enim sunt Philosophi 7. de Historia animalium cap. 4. in fine, quę sic iacent: Plurimis si concubuerint mēse octauo, infans mucore oppletus exit: esculentorumq; quę mater comederit sępe gerulus uenit in lucem. Sic cū Philosophus de cōcubitu dixerit, errore interpretū Princeps locutus uidetur de ortu. Sic & illa uerba ex secūdo Epidem. Quę apparent in quibus mēsis fiunt, sic ex sexto libro emendari debent: quem collectum ab Hippocrate Galenus faretur,

non

non secundum. Quæ apparent in quibus mēfibus sunt suspiciones in circuitibus. quoniā in septem mouentur, in triplo perficiuntur. & quod post muliebria dextra, sinistra autem hians humiditas propter discedentia. diætæ siccæ, quoniam citius discretū, motum, rursus crescit tardius plurimo tempore. labores tertio, quinto, septimo, nono mēse, secūdo, quarto, sexto, ex parua tabella considerāda. Galenus etsi octo libros in sextum Epidemiorum considerit, nihil tamen de hoc scripsit. Sententia igitur est, quod quæ in L X X. mouentur, in triplo perficiuntur. non autem in septem foetus si moueantur, perfici in C C X. diebus affirmat: nam quomodo in septem moueri possunt diebus? ob id iuxta priorem literam legenda sunt uerba sexti Epidemiorum, quod & Fuchsius facit.

Sed neq; omnibus fides tribuēda æqualis est: sed his qui ex aliis desumpserunt: quantum autores primi sentiunt, tantū recitatoribus condonandum: uelut cum Polybius apud Plutarchum quinto de placitis philosophorū causam assignare nititur dimidii anni: id est dierum C L X X X I L. solis motū à tropico ad tropicū. nam hoc est falsum, cum ex tertio magnæ cōpositionis Ptolemæi sol inæqualiter per absidem moueatur & absidis oppositum. At tunc absis fuerat in Geminis, nō in Cancri initio: nec Hippocrates etiā hoc dixerit. Simile est illud Auli Gellii dum exponit uerba Hippocratis, illa parum ante aut post foetum edi posse, ex libro *περί τροφῆς* illius: is nanq; lib. 3. cap. 16. copiosè hanc rem tractat: ac ex aliorum sententia quasi nullum sit iuxta Hippocratem tempus præfinitum: sed liceat excedere paululum, uel etiam antecedere. Sic & Sabini medici auctoritas cum Hippocratis præcepta transgrediatur, octauum mensem illic nō excludit: sed alibi senis diætæ perquirenda. Varro autē decimestres omnino excludit ab hæreditate, in Satyra: cum eodem iure illos recipiat, quo & undecimestres: Aristotelem subannans, qui non solum decimestres, sed & undecimestres recipiat. Num igitur deferendus est tantus Philosophus obiurgium Grammatici? Simili in causa habenda sunt quæ à Macrobio scribuntur, in primo de somnio Scipionis. Nunquid enim ob id in dubium reuocanda erunt Philosophi uerba atque Hippocratis, & Galeni? quod Macrobius dicat ex Caristii & Dioclis sententia, masculum in septē perfici septimanis, foeminam autem in sex? sed tantum habeat hoc dictum auctoritatis aduersus Principes Philosophorum & medicorum, quantum etiam Diocles atque Caristius, non quantum Macrobius.

Sed & illud diligenter considerandum: ordinem esse in rebus, ut quædam rariora, alia autem frequentiora sint: nam plures morbi sanantur in quatuordecim diebus, quàm in quatuor, uel quàm in quadraginta. Media enim extremis frequentius contingunt. Ob id igitur quod (ut Gellius refert) D. Adrianus decretum ediderit, in quo testaretur, se ueterum

philosophorum ac medicorum sententiis undecimestrem partum esse legalem: mulieremq; honestam, quæ post obitum coniugis filium pepererat, infamia liberauerit, hæreditate filio permilla: num ob id, cum decēviri decimum mensem præfinierint edendo foetui, undecimestris partus naturalissimus (ut ita dicam) censerī debet? Nempe non. sed ut rarior, uelut & septimestris. Qui uerò decimo, & nono, maximè secundum consuetudinem, & minima naturæ uiolentia prodire creduntur. At septimestres solum ob id frequentiores, ac magis naturales undecimestribus existimantur, quòd septimestribus indicia immaturi foetus adsunt: undecimestribus autem diuturnioris moræ, quàm in utero contraxerint, nulla omnino signa adhærent.

Est etiam (quod aliàs retulimus) fides libri spectanda, quo ad materiam: nam quæ obiter tractantur non adeò firma sunt, ut quæ ex composito: tum ubi de re ipsa agitur principaliter, ibi summa autoritas: ut in libris de Septimestri ac octimestri partu apud Hippocratem: tum de Historia & generatione animalium apud Aristotelem.

Ultimo etiam diligenter aduertendum, quinam sint ueri ac certi autorum libri: nam nec liber de Alimentis, nec secundus Epidemiorum, nec liber de Carnibus, Hippocratis sunt, sententia Galeni: quamobrem à nobis rectè scripta est uita Galeni: ut Hippocratis non solum & Galeni, sed & Aristotelis Platonisq; tum Ciceronis libri genuini ac ueri ab apocryphis dignoscerentur.

His ergo intellectis, ad conciliandum hæc dicta ueniamus: Ratio temporis foetus ex tribus sumitur, ex Natura, ex Astris, ex Pythagorica computatione numerorum. Hæc omnia attigit Hippocrates in libro de Foetus formatione primum, in libro de Septimestri partu secundum, in libro de Octimestri partu tertium. Quod ad naturam attinet, foetus ut firmior fuerit, & mater debilior, celerius perficitur, ut Hippocrates & ratio ipsa docet: unde decimestres omnes inualidi sunt, quoniam non celeriter mouentur ad exitum, tardeque perficiuntur. Hæc etiam ratione masculi foemini sunt celerioris perfectionis, quanquam accadat aliquando oppositum. unde Galenus Aphorismor. quinta. 42. Contingit enim aliquando, licet sit rarum, quòd concepta foemina sit mare robustior, & multis ac ualidis motibus moueatur. Itaque Hippocrates ex hac proportionem foetus ad alimentum sumpsit rationem tarditatis & celeritatis exitus foetus. Mulieres igitur, quæ multum sanguinis menstrui reiciunt hora purgationis, diutius gerunt foetum. alia uerò etiam his sunt signa consentanea, tardius ire, tardius loqui, tardius etiam dentes producere, laxo corpore esse, & imbelli. Sed Princeps adducit alias causas, uteri paruitatē: nam cum uterus talis fuerit, & foetus ualidus, prodibit in septimo mense abortus:

lutus:uel ad plus in nono. Hæ causæ si ueræ sunt, gemini nunquàm decimum mensem attingent. Alia ratio, quæ ab ipso adducitur uigesima prima tertii, t. 2. cap. 1. in fine: est, quòd qui mouetur in septimo ad exitum, in nono nascitur: & qui in octauo mouetur, nascitur in decimo. Ob id etiam decimestres inualidi erunt, quia motum ex malo sumpserunt initio, scilicet mensis octaui, qui minime uitalis est. Auerroës autem in Paraphrasi quarti libri de Generatione animalium inquit: Natus in septimo mense est multum calidus & humidus: & perficitur eius figura, nasciturq; in hoc tempore, quod est minus tempus, in quo possit perfici figura hominis. Sed qui nascitur in nono, minus habet calidi & humidi, quàm qui nascitur in septimo: & ideo perficitur eius creatio in tempore longiori. Hæ causæ in unum coincidunt: nam calido & humido accidit ut citò crescat & perficiatur, & ut cito ei desit alimentum. Igitur Hippocrates exprimit causam, quæ est finis: Princeps propriam, quæ forma est: Auerroës efficientem & materialem. Hæc intelliguntur de naturali partu: nam datur septimestres uiolentia excusæ, & hoc plerunq; frequentius est: de quibus dicebat Philosophus, quòd aliquando deficiunt foramina illis narium, uel aurium: & experientia docet, quandoq; carent unguibus, & capillis. Sed quomodo hoc, cum Hippocrates libro de Natura foetus dicat: Quando autem summitates pueri ramos emiserint extra, & ungues & capilli radices fecerint, tunc iam mouentur: & tempus ad hoc est puero tres menses: puellæ autem quatuor: sic enim plerunq; accidit. Sunt autem infantes qui ante hoc tempus mouentur. Mouetur autem prius masculus, eo quòd sit ualidior foemina: & primò quidem solidatur masculus, eo quòd ex robustiore generatione fiat: quando autem mouetur infans, tunc etiam lac matri apparet. Quare quomodo exire imperfectus potest septimo mense: nò nisi quia hæc quanquàm tertio uel quarto sumant generationis initium, non tamen nisi nono perficiuntur. Causæ igitur celeris exitus foetus sunt robur eius: magnitudo in comparatione ad uterum: paucitas alimenti: & humidum cum caliditate: nam calor multus refrigeratione multa indiget: quã dum est in utero, assequi nequit. Hæ sunt causæ generales celeris exitus: terminum autem singularem ex his non licet præfigere: in paruitate tamen est mensium septem. unde Princeps uigesima prima tertii, t. 2. cap. 1. & scias quòd mensis septimus est primus mensis in quo parit ipsum: & est foetus ualidus, & naturæ temperatæ, cuius creatio uelox fit: & cuius petitio ad exitum uelocior fuit: & sæpe moritur natus infra hoc spatium: quia tolerat motus uehementes cum debilitate creationis. Nanq; licet sit robustus in radice, est tamen proximi spatii cum creatione. Ex hoc igitur conciliatur dictum Philosophi, & Principis, quod septimestres sint fortes: ratione radices, & debiles ratione spatii gestationis in utero. Est au-

tem omnium natura constantium certus terminus augmenti, & decrementi, ut inquit Philosophus: quare septimus mensis primus est, ultimus undecimus, quo mulier uitalem foetum edere possit. At cum hoc certum sit, de magnitudine horum mensium prius est disputandum.

Mensis quadrifariam dicitur, Lunar, & est spatium æquale illi quod inter duas coniunctiones solis ac lunæ intercipitur: eas quas astrologi uocant medias: de quibus Galenus 3. de Diebus iudic. & 1. Epidemiorum super uerba illa *INTHASO*, dixit, quod multis Græciæ ciuitatibus hic mensis est solennis: & quod Palæstini (antiquissima hæc gens est, quam nos Iudæos à Iuda uocamus) hoc genere mensis utuntur. Et Censorinus de Die natali narrat, apud Græcos annum *CCCLV.* diebus constare. Alphonsus etiam illum agnouit. Constat igitur, quod si annus comprehendit dies *CCCLV.* & menses *XII.* quod mensis est paulo maior diebus *XXIX.* cum dimidio: hoc genere mensis utitur Hippocrates libro de Partu septimestri, sed non computat menses integros, ut uidebimus.

Mensis aliud genus est quod Solare dicitur, *XXX.* diebus constans. hic uulgatus est apud nos: de quo etiam Macrobius in Saturnalibus. Hic autem multiplex æqualis, constans triginta diebus, quinque recipiens intercalares in ultimo, ut anni reuolutio tota expleatur. Aliquando autem in æqualiter distributus est: ut qui in uno dies *XXVIII.* in alio *XXXI.* recipiat: cuiusmodi est apud Romanos, & apud nos, & post Platonē ac Berosum apud aliquot Græciæ populos. Hoc genere usus est quicūque dixit septem menses, dies continere *CXX.* uulgi consuetudini potius, quam exactæ computationi subscribens: cum ut dictum est, septem menses sint dies. *CCVI.* cum dimidio: non *CXX.* nam in foetus gestatione nunquam mensibus solaribus usus est Hippocrates.

Mensis tertium genus est à lunæ reuolutione, quæ in diebus *XXVII.* horisque octo perficitur. Hic, quod sciam, apud nullas gentes in usu est: quod celerius gens quælibet reditum lunæ post solis coniunctionem dignoscat, quæ solo uisu percipitur, quàm ad stellam aliquam uel punctum signiferi constitutum.

Mensis quartum genus est Medicinale: de quo superius in hoc tractatu diximus: quanquam ne somniasse illum Hippocratem aut Aristotelem in hac causa constet, cum nec illius meminerint, sed Lunar: menses & iuxta lunarium magnitudinem computauerint.

Quomodo igitur hi menses, si septem fuerint, numerū *CLXXII.* dierum perficiant, id est medietatis anni, sic intellige. Sex menses, ut dictum est, dies *CLXXII.* expleant, eo quod mensis dicitur, quotiens luna congredditur soli: & illi etiam opponitur. hoc autem in *XV.* diebus accidere potest. reliqui autem quinque menses requirunt dies *XXIX.* & medium. quare in

CLXII. diebus erunt sex coniunctiones, & totidem oppositiones luminarium: quare erunt sex menses. Quicquid igitur superest ad dimidium anni, & est tempus dierum xx. cum dimidio, & tribus horis, totum illud de septimo mense est.

Tertia consideratio est ex numeris Pythagoricis: & est quod hominis partus absoluitur quatuor decadibus septimanarii, id est diebus CCLXXX. nam decem septimanarum sunt dies LXX. & hoc quia hic numerus constat ex quaternario, septenario, & denario, qui omnes sunt perfecti apud Pythagoram, licet diuersa ratione: ex his autem inuicem ductis producuntur CCLXXX. & sunt menses solares æquales nouem, & dies decem.

Considerat igitur Hippocrates tria genera temporum partus: Minimum, Maximum, & Medium: & in his perfectionem ultimam. Vult autem, quod in minimo consideremus menses, & astrorum rationem: in maximo rationem Pythagoricam: in mediis autem utranque. Ratio autem naturalis omnibus communis est: quare ubi una ratio concurrat tantum, tunc uitalis est: ubi duæ, longe plus: ubi autem omnes, hic absolutus est, & maxime uitalis.

His cognitis, Septimestres uitales sunt ratione mensium à CLXIII. die supra: patet, quia sex exegerunt lunares menses, & septimum sunt ingressi: quod si uoluisset tantum natus CLXXXII. die esse septimestres, & uitales: debuerat computare sex menses lunares completos, qui sunt CLXXVII. dies solum: & sic ad dimidium anni supererant etiam dies quinq;: & ita natus in dimidio anni diceretur septimestris, tam hoc modo, quàm primo. Igitur uult clarè, quod natus CLXIII. die sit septimestris: nec potes dicere, quod uelit, ut expleuerit dimidium anni & sex menses: nam sic poterat computare menses integros: nam ut dictum est utroq; modo æqualiter natus in dimidio anni septimestris est. Nec potes dicere, quod ex hac computatione prima dando dimidium primi mensis pro mense, in uiginti diebus reliquis qui supersunt ad anni dimidium, necessario cadat coniunctio uel oppositio alia solis & lunæ, ut sic sint septem menses completi, qui non essent completi ex secunda computatione, dando sex mensibus dies CLXXVII. nam posset accidere, quod in quinq; succedentibus diebus nulla fieret coniunctio, uel oppositio solis & lunæ: & sic non compleretur, uel saltem non adderetur dimidium septimi mensis, quod necessario euenit in prima supputatione CLXII. dierum. Nam si propter hoc dixisset, erat initium perfectionis CLXXVIII. dies, non CLXXXII. quia dando CLXII. diebus sex coniunctiones & totidem oppositiones in sedecim diebus sequentibus quomodocunq; acceptis necessario est una coniunctio, uel oppositio: igitur in CLXXVIII. erit absolutus septimus mensis: nō in CLXXXII. solum. Fecisset etiam Hippocrates mentionem perfectionis septimi mensis,

sis, cuius non meminit: imo uidetur uti mensibus incompletis: & quod plus est, non adducit aliquid, quo possimus coniectari, illum confiderasse, quòd dies xx. qui supersunt ex septimo sint plus dimidio mensis lunaris.

Quòd si dicas, Cur igitur si CLXIII. dies uitalis est, quia septimi mensis initium meminit dimidii anni? Ad hoc respondi, quòd ut CLXIII. dies est primus uitalis in septimestri: sic CLXXXII. est perfectissimi spatii septimestris terminus, illius nati qui in primis quindecim diebus suæ generationis coniunctionem luminarium & oppositionem habuit. Ex hoc patet, quòd uerba Plinii corrupta sunt, & sic debent legi, Ante septimum mensem haud unquam uitalis est: in dimidio autem anni non nisi pridie posteròue plenilunii die, aut interlunii concepti nascuntur. Quis non uidet hanc esse exquisitam Hippocratis sententiam, secundum illos, qui mensis septimi dimidium ultra sex integros requiri uolunt, ad hoc ut uitales sint: cum nos hoc tamen reprobauerimus: nam ad perfectionem talis numerus est necessarius, non ad uitam. Quamuis, ut diximus, nati CLXIII. debilissimi: eo autem ualidiores quo magis ad CLXXII. propinquius accefferint.

Lex autem CLXXXII. diem pro initio termini uitalium sumpsit eorum quos Plinius secutus est in interpretatione decepta. Vel dic, quòd uerius est, legem semper esse de his, quæ frequentius accidunt. At eorum qui ante LXXXII. diem & post CLXIII. nascuntur, etsi uitales existant, maior tamen pars moritur: ea causa, quòd uix ullis accidit illorum, ut plenilunio, uel interlunio concepti sint: quare cum in quindecim diebus quatuor tantum sint uitales, & qui perfectionem septimi mensis præstare possint: undecim autem non uitales, & in quibus non contingit sextum mensem totum expleri: ob id lex sic sanxit. Ut enim rectè Tacitus sub Cassii persona dicit: In omni lege necessarium est, ut aliquibus iniuria fiat: & infantes pro fontibus habeantur: sed legi ipsi sufficit, ut multitudini benè consulatur. Si quis tamen natus intra CLXXXII. diem sex plenilunia, & totidem nouilunia obtinuerit, quod in CLXIII. diebus etiam accidere potest, hic septimestris est, ac uitam, licet nò facile, assequi poterit. Ex hoc patet, quòd mensis septimi spatium est à CLXIII. die usq; ad CCVII. & sunt XLIII. dies: & hoc accidit ex diuersitate congressus luminarium. nam potest & intra CCVII. diem nasci octimestris, scilicet post CXCII. sed non antè: quia in CXCII. possunt compleri septem nouilunia, & totidem plenilunia, & nò antè: sed bene possunt etiam differri ad CCVII. diem. & ideo septimestres usq; ad id temporis nasci possunt. Qui uerò CCX. diem pro CCXII. scripserunt, Hippocratis subtilitatem in hoc, ut nec in aliis pleriq;, sunt allècuti.

Ex

Ex his patet ratio spatii ceterorum mensium: nam octauus potest incipere à CXCII. die, & finem habere in CXXXVI. uerum ut solum à CLXXVII. ad CXCII. necessario septimestri nō alii mensi adnumerari potest: sic à CCVII. ad CXXXI. necessario octauo mensi spatium ascribitur: nam à CXCII. ad CCVII. commune esse potest septimo & octauo mensi: sic ut modò quādoq; unius sit, quādoq; alterius: nō quod unquā possit spatium hoc simul duobus esse commune. Nonus igitur mensis cum singuli dies XLIII. fermè cōprehēdere possint, deducta horarum ratione, quas nunc in cōsideratione nō habemus, initium habet à CXXXI. & extēditur ad CCLVI. Verum ut in ceteris solū qui à CXXXVI. die nascitur, usq; ad CCLI. nono mēse necessariò natus est, eadē rōne decimus mēsis initium habet die CCLII. & finē CXC. solū uero natus à CCLXVI. ad CCLXXX. uerè decimo mēse natus necessariò dicitur: nā et à CCLXXX. ad CXC. natus undecimo mēse dici potest. ex hoc patet, quonā pacto decē mēses dies CCLXXX. impleāt ad unguē: id est septē quadragenas seu quatuor decadas septimanarum. Ultra tamē si nascatur à CCLXXX. die ad CXC. decimestris est: modo nō in plenilunio aut nouilunio, pridie uē, aut postero cōceptus die sit: quare Hippocrates rectē dixit, decimestres & undecimestres, eodē modo, ex septē quadragētariis fieri. Sed & hoc alia ratione, si quidē pridie, uel antē parū quā menses sint defluxuri cōcipiat mulier, natus undecimo mēse creditur: qui tamen nascitur intra CCLXXX. dies: cū enim adieceris dies XXV. prioris mēsis, ad CCLXXX. fient dies CCC. in quibus mulier nō purgatur: hi autē sunt menses decē & dies decē: loquēdo de lunaribus mensibus. solares etiā erūt decē, & insuper dies quinq; quare utroq; modo undecimo mēse natus existimabitur. Cēforinus autē putat decimū mēsem initium habere die CCLXXIII. nā hic est primus dies quadagesimę septimanę, & in totidē diebus sol partes CCLXX. signiferi peragrat. Verum hoc esse nō potest, cū summa perfectio in fine habeatur XL. septimanę. Hoc autē tēpus decimi mēsis antē, & pōst extēditur. Ideo melius est dicere, quod decimestris perfectio est in diebus CCLXXX. quia hoc tempus, ut dixi, est finis decimi mensis, & complementum septies quadraginta dierum.

Sed uidentur quādam dictis ob stare: Primum, quod cū dicat Hippocrates in libro de Natura foetus: Hęc intuli hac de causa, ut declarem, quod infantium sit discrimen membrorum, maximum quidem in puella dierum quadragintaduorum, in puero autem triginta: si igitur formatio est semper proportionata motui, & perfectioni: igitur hęc ratio mensium generalis esse non potest tam masculis quā foeminis: uideretur autem ex hoc, cū tempus perfectionis sexcuplum tempori formationis sit, &

minimum formationis sit dies xxx. perfectionis minimum tempus esse c l xxx. dierum.

Propositiones etiam uniuersales ex sensu suscipiuntur: sed hoc non constat quòd ante dies c l xxx. infans natus uiuat: igitur non est statuendum, quòd natus ante c l xxx. diem sit septimestris.

Philosophus etiam 2. de Generatione & corruptione cap. 10. & omne tempus ac uita circuitu mensuratur: sed non omnis, nam alia maiori, alia minori: quare non poterunt sex menses lunares, si à circuitu sumantur, comprehendere pauciores dies quàm c l xxvii. & ita extendetur terminus initii ultra c l xiii.

Ad hæc propositio illa, Tempus motus duplum est tempori formationis: primo non est generaliter uera: nam nec est philosophi, nec Hippocratis, nec Galeni. Princeps autem, qui eam dixit ut suprâ retuli, fatetur illâ non esse generalē. Ideo etiâ Hippocrates 6. Epidem. uidens quòd masculus citius formatur, nec tamē celerius foemina nascitur: subiecit illa uerba: Quoniâ citius discretum, motum, tardius crescit rursus. Id est, quantū acquisiuit masculus cremēti in formatione, tantū post motum amittit tardius crescens. Ad aliud, constat quidem septimestres uiuere: hos semper in plures dies mulieres referunt ob mensium numerum: qui plerūq; addunt in opinione: si qua enim mulier pariat c l xxx. die, conceperit autem xx. die post menses, opinionem suscipit, quòd c. c. dies fermē infantem in utero tulerit. Sed sufficit ad ueritatem ostendēdam exemplū unum, affirmatiuum: in negatiua autem non est possibile ostendere, nisi assumptis omnibus exemplis: sicut sufficeret ostendere, unam animam mortui, ad probandum quòd anima supersit, nec negatiua probare possumus, ex hoc quòd nullam ostendere posse nobis liceat. Igitur cū constet de aliquibus, ratio Hippocratis potius spectanda fuit. Ad ultimum dicimus, circuitus esse spectandos, uel etiam partes circuituum: nam non solum nouilunia, sed etiam plenilunia magnam uim habent. In causis autem generationis & corruptionis plus facit uis sideris, quàm circuitus: in causa autem uitæ circuitus spectandi sunt.

Supere est difficultas ex autoritatibus libro de carnibus: dicitur quòd foetus septimo die habet loca oculorum, nasum, nares, manus, digitos, pudenda: num hic liber potest dignus Hippocratis grauitate uideri? Repugnat etiam his quæ ille in libro de Natura foetus scripsit, dum ancillæ abortientis narraret exemplum. librum autem de Alimentis Galenus negat esse Hippocratis: similiter & secundum Epidemiorum, ut in illorum expositionibus apparet.

Est etiam sciendum, quòd menses considerantur ut à mulieribus cognoscuntur: id est à purgationibus. Videntur autē hi cōformes lunaribus, cū

cum dicat Philosophus 7. & de Historia animalium cap. 2. Profluuium autem mulierum decrefcente luna contingit: quamobrem nonnulli cauillo sexum foemineū lunæ tribuunt: quoniā simul ut illa decrefcat, & mulier purgetur: moxq; ambæ repleantur. Et Princeps 9. de Natura animalium cap. 6. Mulieri accidunt menſtrua in initio menſis, uel in medio: & forte hoc eſt, quia luna quando mutatur, ideo menſtrua lunā ſequuntur ex toto: & idem erit menſis lunaris & purgationis muliebris: & ideo unius ratione explicata, cognoscitur & reliqua. Sed ſi obijcias, quod Auerroës 3. Collectaneorum 29. dixit, quod minimū tempus interpolationis eſt dierum $\times \times 1$. & maximum $\times \times \times$. quomodo igitur purgationis tempus poterit cum lunari menſe concordare, qui ſemper eſt dierū $\times \times 1 \times$? Reſpondeo, quod cōcordia clara eſt: nam minimū tempus eſt, ſecundū ipſum quo purgatur mulier, dies unus: maximū autē, nouem: quāquā in textu dicat ſeptē: ſed eſt error. Quod & Volateranus lib. 24. ſenſit apertē, cum dixit: Et extenditur tēpus muliebris purgationis ad dies octo: & quādoq; quod tamen rariſſimū eſt, ad dies nouē. Si igitur maximū purgationis tempus, quod eſt nouem dierum, ad minimā interpolationē, uel minimū purgationis tēpus, quod eſt unius diei, ſuperaddatur tēpori maximē interpolationis, cōſurgent utrinq; dies $\times \times \times$. Quare cum Auerroës, ut clarum eſt, exactam rationē numerorū nō curauerit, manifeſtum eundē eſſe lunare, & purgationis muliebris menſem, ſi mulier ipſa non malē affecta ſit.

His uifis ratio eadē quæ ex luna, etiā in menſium purgationibus habetur: nam decimeſtres uocāt mulieres, cum nouē menſtruis purgationibus caruerint: nouimeſtres autem, cum octo: & ſeptimeſtres, cum ſex. Si igitur mulier concipiat in medio menſis, iuxta lunæ plenitudinem, habebit in $C L \times I I I$. diebus ſex retentiones menſtruorū: quare natus tunc, mulieri uidebitur ſeptimeſtris. Si autē concipiat poſt medium menſis, uidebitur etiā ſeptimeſtris ante $C L \times I I I$. diē: ſed non erit uitalis, quia nō eſt aſſecutus perfectionem pleniluniorū, aut nouiluniorū, niſi edatur foetus poſt dimidiū menſis, in quo ſolebat purgationes mulier habere iuxta initium: quare breuiſſimum ſpatium erit, cum cōceptus fuerit in fine menſis ante purgationem: nam editus poſt dimidium mēſis ſextæ purgationis, uiuere poterit: eritq; ſeptimeſtris $C L \times I I I$. dierum: idem ſi fuerit conceptus ante medium menſis parum, & editus poſt initium ſexti menſis: ſummam tamen perfectionem aſſequitur in dimidio anai, quanquam prius ſit ſeptimeſtris etiam. Et quod dico de ſeptimeſtri, dictum uelim de aliis.

Ex hoc patet, quod ſi quis uellet tueri Polybiū, poſſet dicere, quod ſeptimeſtris ſit, quotiens ſol ex ſigno ſigniferi in illius oppoſitū, quod eſt à primo ſeptimum, tranſierit: hoc autē in diebus $C L I I$. fermē cōtingere poſteſt: quāquam talis ſeptimeſtris non poſſit uiuere, niſi cum habuerit fir-

mitatem in utroq; : id est disteterit aliquot partibus ab initio septimi, & à fine primi: uelut si puer concipiatur sole existente in XII. parte Scorpii, & oriatur sole existente in III. parte Tauri, tunc natus erit VII. mense, & tamen in diebus CLXX.

Eadem ratio tenet in decimestri, qui in CCLXXX. diebus nascitur, quemadmodum dictum est: quod potest uideri etiam undecimestris non tantum iuxta CCXCV. nam ponamus quod uigesima die à purgatione sit conceptus puer: infra decem dies numerabitur mensis à muliere: cum uideat se non pati purgationes: inde in CCLXVI. diebus præterit tempus nouæ purgationis cōpletarū. igitur CCLXXV. uidebitur expleisse decem menses. si itaq; pariat CCLXXX. die, uidebitur peperisse quinta die undecimi mensis.

Quod autem conceptiones fiant post purgationem multis diebus, declarat hoc modo: Quæ debent concipere, oportet ut uterus habeat sanguinem: quæ igitur copiose purgatur quāto copiosius, eo diutius: & quāto diutius purgationem patiuntur, eò celerius uterus sanguine repletur: quæ igitur purgantur tribus diebus tantum concipiunt sanguinis in decem diebus, & est mensis tertia pars, quod possunt concipere. Requiritur tamen dies decem antequam possit concipere: & quæ purgantur quinque diebus, requirunt saltem sex dies, antequam cōcipiant. Omnes igitur mulieres quæ purgantur in uno die, uel duobus, aut tribus, concipiunt in fine mensis, uel in medio, uel saltem post decem dies. Igitur omnibus his longius tempus gestationis in utero progredi uidetur. Et hæc interpretatio propior est ueritati: alia autem, quod uni diei tribuantur decem dies, duobus autem dimidium mensis, tribus duæ tertiæ eius, est propinquior uerborum sensui textus Hippocratis.

Verum si quis dicat, quod inconuenit ut menses habeat XLIII. dies: Respondeo, quod mensis in nulla muliere potest cōprehendere plusquam XXX. dies: suscipit tamen uariationem respectu diuersarum, quæ quidem extenditur ad XLIII. sicut signum cœleste exoritur in diuersis partibus anni, in omni parte diei: puta Aries, nec tamen sequitur, quod Arietis ortus possit perdurare per totam unam diem: cum non attingat ad duas horas in medietate nostra habitabilis terræ.

Est etiam cōsiderandū, quod Aristoteles cum dixit, septimestrē foetū esse magna ex parte infirmiorē: intelligit quia maior illorum pars uiolēter, & casu nascitur: nā spontaneus septimestris ut diximus, ualidior est nouimestri, & decimestri: sed hic rarissimus est, ut docuimus rationibus superioribus.

Est autem differētia inter Septimestrē uiolēter natū, & Abortiuum: nam Abortiuus dicitur, quia natus est eo tempore, quo nullo modo uiuere potest, ut trimestris: & quadrimestris: et talis habetur à lege ac si non nasceretur: natus autem uiolēter septimo mēse, etsi parū uiuat, abortus dici nequit: quia tempore

re suo natus est in quo si sponte natus esset, aut minore cum uiolentia saltem uiuere potuisset: talesq; mutant instituta successiōum plerunque.

Circa quod sciendum est: quod temporis prolixitas nunquā per se est impedimento uitæ: sed natura eam non patitur. Breuitatem autem natura fert, sed illa uitæ obest. Vnde quantum sit ratione temporis, octimestris est uitalior septimestri: & nouimestris octimestri: & decimestris nouimestri: & undecimestris decimestri. Causa autem quæ facit ut decimestres uideantur minus uitales, quā nouimestres, est corporis magnitudo, quæ laborem in nascendo præstat, ex quo affligitur foetus. Altera, quod tales, ut ostensum est, concepti sunt plerunque per paucos dies ante purgationem: unde primam formationem impuram sortiuntur. Est & in his qui excedunt dies cclxxx. ratio quadraginta dierum, octimestres igitur quanquā careant & ratione mensium, & quadragenarum, moram tamen diuturnā traxerunt in utero: & ob id plerunq; etiam uiuunt. Et quidam nobilis habēs duos filios, eos habet ambos octimestres: & ambo in infantia usq; ad extremum uitæ discrimen peruenere. Si igitur sit lex (ut apud Armenios) quod maritus possit dimittere uxorem impudicam: & aliquis reuertens ex longinqua regione cum uxore concubat, per duos aut tres dies post iterum abeat, & reuertatur, inueniens uxorem peperisse filium sub certo tempore octauī mensis sospitem, & iam tempore ualidiore factum, uxorem non potest uocare in ius ob hoc. Et similiter si (ut contigit Romæ, Gellio autore) priuilegium sit trium natorum, (quod nunc solum in duodecim obseruatur) habeat autē aliquis undecim filios, & ex certa cōputatione exoriatur illi octimestris, duodecim gaudet hic priuilegio: & si protinus moriatur: & eodem modo mater enixa posthumum octimestrem uiuum, illo paulo post mortuo, excludet agnatos ab hæreditate mariti: ubi seruatur lex ut mater filio succedat. & causa in his est, quod ratio naturalis præponi debet, causis sumptis ex syderibus, & numerorum obseruatione.

Et si quis dicat, Quis magis uitalis est, septimestris, an octimestris? Dico, quod septimestris: quia habet rationem numeri, & moræ, & si in mora uincatur ab octimestri, natus autē intra clxxxii. diem & supra clxiii. parum differt ab octimestri.

Ad id Philosophi, quod foemina tardius formatur, ac mouetur ipsaemet respondet per sequentia uerba: & reliquam distinctionis effigiem breui tempore accipit: quod etiam post ortum obseruat: celerius enim masculis foeminae adoleſcunt. unde in totum Hippocrati. Philosophus consentire uidetur. Fuerunt quidam, qui se explicuerunt ab his difficultatibus, dicentes, medicas propositiones esse tantum ueras ut plurimum: non necessarias. Si per hoc intelligūt, Vt plurimum, id est maiori ex parte tantum,

tunc medicina non plus erit scientia, quàm ludus alexæ: in quo contingit ut plurimum rectè agere. & nulla est tam fortuita res, in qua si mentè adhibeas, non liceat maiore ex parte diuinare. Si autem per Vt plurimum, uelint tantum excludere illam exactam ueritatem, ac necessitatem, quæ habetur in mathematicis quo ad nos, & in sempiternis quo ad naturam: nemo hoc iure negare debet. Verùm in his non miracula, sed regulæ pro lege habendæ sunt: neq; enim, et si cōtingere possit, quisquam filium post XIII. à discessu suo natum mense, pro suo habebit. Vnde rectè dixit Euan gelista, quòd Ioseph uoluit dimittere Mariam, cum esset prægnans, absq; suo congressu: stultū enim fuisset miraculum præsupponere. Sed retinuit, quia occultum miraculum, apertissimum ex Angeli monitu cōfirmavit.

CONTRADICTION IX.

Argentum uiuum si in aurem cadat an plumbo extrahendum.

Argentum uiuum si in aurem cadat, debet extrahi plumbeo stylo, dicebat Rafis 8. ad Almanforè cap. 42. sed Princeps sexta parti t. i. Summa prima cap. 2. dānat hanc curam: hac ratione uel argētum uiuum est in profundo, & ad ipsum radius peruenire non potest: uel est in summo, & tunc saltu & concussione super partem auris eiicitur. Græci non loquuntur de hoc: ueruntamen Paulus lib. 3. cap. 23. & Aëtius lib. 6. cap. 75. de aqua medicata loquuntur: quæ cotto uel lana extrahi debet iuxta illorum sententiam: quare ratio Principis posset debilitari. Sed tamen longe diuersa est ratio argenti uiui, & aquæ: hos nullus concordet cum Princeps dicat (& ille.)

CONTRADICTION X.

Acetum scilliticum an leniat asperam arteriam.

Scilliticum acetum iuuat asperam arteriam, 2. Can. ca. 597. at cap. 652. Sdicit, quòd eam asperiores reddit: cum etiam prius dixisset, quòd confert uocis asperitati: uerùm addit, cum melle sumptum. At uerò quòd iuuat, declarat in secunda autoritate, cum dixit: Exasperat guttur, & duriores illius reddit carnem. Forsitan quis quærat iure, cur duo capita fecerit Princeps imitaturus, ut existimo, Dioscoridem. qui lib. 2. duo capita facit: 159. quidem de Scilla, 160. de Pancratio, quod est scillæ genus debilius. ob id scilliticum etiam acetum quod maiore scilla constat iuuare poterit arteriam asperam, uincente ui scillæ acetum. at quod minore constat scilla, potius exasperabit, quando in eo uincat uis acetī: porrò quòd scilla raucedinem tollat, Paulus declarauit in 3. lib. quòd acetum excitet, diffuse Gal. in libris de Simplic. medic. Coniunctis igitur generibus diuersis maioris minorisq; scillæ clara est differentia. Verùm in 3. libro de Facile parab

parabilibus, iuxta finem (qui liber etsi Galeni non sit, est tamen egregii al' cuius uiri) dicit, quod acetum scilliticum si quis eo utatur, facit ut uox bene habeat: ideoq; uirtus scillæ uincere uidetur in aceto scillitico. Videtur autem Galenus lib. 7. cap. 1. de Compositione medic. secundum locos, hanc dubitationem dissoluisse: nam inquit: Raucedo & asperitas uocis quandoq; fiunt ob materiam defluentem, aut loco immerfam, tuncq; diffecantia & attenuantia maximè conueniunt: eadem non parum nocent, si ex clamore, uel phlegmone oriatur.

C O N T R A D I C T I O X I.

Lactuca an calefaciat, an sanguinis & lactis copiam generet.

LActuca cum in sanguinem conuertitur, plurimum operationis eius est calefacere: secūda primi Doc. secūda: Summa prima cap. 15. oppos. 2. can. 12. cap. 449. ubi reprehēdens eum qui dixit, quod est frigida in tertio: tandem statuit eam frigidam in secundo. Quibusdam uidentur hæ dubitationes leues, cum ipse Princeps eas dissoluere uideatur. Sed tamen non sunt contemnendæ, cum facilius sit inuenire, quàm diluere. Ergo quibusdam satisfactum uidetur, cum dixerit, quod calefacit: quoniam plurimum generant sanguinem: est autem sanguis natura calidus, ob id augmentum naturali calori præstare uidetur. Ad hoc facit, quod Dioscorides libro 2. dicat, eam generare lactis multitudinem, quare etiam sanguinis: siquidem lac est sanguis ad albedinem commutatus. Plinius etiam lib. 20. sanguinem plurimum generare credit. Sed hanc responsionem Galenus 2. de Alimentis euertit, negans eam sanguinem multum producere. Forſitan in hoc Dioscoridem defendemus, dicentes, illam lac generare, non sanguinem. Sed responsioni obſtat Gal. 5. de Simplicib. medic. cap. 21. qui lac generantia etiam in calida & sicca mala intemperie, calida uult esse, & humida. Sed ad primam reuertamur contradictionem: nam & Dioscoridi Plinius aliquando subscripsit, ratus eam herbam nutricibus commodissimam, quod multum ac boni alimenti lac illis suggeret. Conſtat itaq; non sic lactucam calefacere. Alii dicunt, quod calefacit, quia etsi sanguinis parum generet, illud tamen parum augmentum facit in naturali calore. At uerò num intelligunt de sanguine temperato? Hoc non: nam Princeps subiicit, quod talis sanguis per tēpus declinat ad frigidū, & humidum. Vel igitur auget calorem in sanguine, uel in toto: non in sanguine, cum sanguis ille sit frigidior temperato: nec in toto, cum plus generet de humoribus frigidis, quàm de sanguine. Aliter, ut Galenus uult 2. de Alimentis, esset alimentum absolute bonum, non in comparatione tantum ad olera. Dicitur: quod auget calorem naturalem extendendo ipsum ad maiorem materiam, & non augendo illius qualitatem, ut fiat
inten

intensior: & hoc modo calefacere dici poterit: ex hoc sequitur quòd immoderatus eius usus nocere non poterit: quia semper augebitur calor, ubi cōcoquatur. Si dicas quòd nimium refrigerabitur sanguis: igitur talis auctio nihil prodest, postquam minus de calore adest. Respondeo, quòd calor est minor in comparatione ad materiam: in capite 249. Serapionis ex Galeno corrigebat, ubi dicit, *Lactuca & si generet sanguinem multum, non tamen malum: Lactuca & si non multum sanguinem generet.*

CONTRADICTION XII.

Mala granata an uentriculo noxia.

Mala granata nocent uentriculo, 2. can. cap. 320. & cum hoc grana granati nocent uentriculo dicebat ille: & tamen prius laudauerat illa: dicens quòd dulcia conferunt uentriculo, propter leuem uim quam habent astringendi: & cum hoc uideatur damnare acetosa in utroq; casu, ibi dat tamē illa 16. tertii trac. 1. cap. 4. in fine, in cura fluxus cum cotoneis tanquam astringētia. Rasis tertio ad Almanforem 20. Granata remouent uomitum. & Auer. 5. Collect. 40. Mala granata habent mirabilem proprietatem in prohibendo putredinem in uentriculo. Sed hæc nihil ad rhombum: nam dictum Principis uidetur esse de uentriculi substantia. Galenus 2. de Alimentis recitat Hippoc. dictum 2. Epidem. post initium de Charionis uxore, quæ liberata est à cordis dolore, ac uomitu. Illud adiciere uidetur Princeps quòd acetosa uentriculo noceant: nam Galenus ea non sic exprobrat: quin laudet quæ sint gustu iucunda: grana tamen nocent uentriculo, non quia substantia praua: namq; Dioscorides cap. 127. primi libri, hanc diluit difficultatem: omnia enim punica mala uentriculum iuuant, præsertim dulcia: acida uerò æstuanti uentriculo magis conferunt: ob id leuitati intestinorum profunt, Principis autoritate. A cini autem in sole siccati ac in puluerem redacti distillationibus in uentriculum auxilio sunt. Nihil igitur aliud Princeps uoluit, nisi ut ab acinis recentibus, & à succo uehementer acidorum abstinereamus.

CONTRADICTION XIII.

Galenus an dicta repetat.

Galenus primo de Alimentis cap. 1. iuxta initium: Semel duntaxat de quaq; re scribere soleo, non eadem in multis commentariis passim inculcans. idem in cap. 10. eiusdem. at prima Aphor. 12. ut pro infinitorum exemplo unum adducam: repetit dicta: atq; idem quotiens? nam in libro de Propriis libris, recitat quotiens de eadem re tractauerit: præcipue de dissectione: prima igitur autoritas intelligenda est cum tribus exceptionibus. Primò, quando colligit ratione epilogi dicta diffusè ut primo de

de Symptom. cau. c. j. Secundo, cū tractationem longam in libellū redigir: ut j. de Alimentis. j. in fine capituli. Et hoc modo scripsit libros ad Glauconē, cū tamen eadem alibi ipse fermē scripserit. Et hoc testatur in principio libri primi, cū ratione modi tractandi, ut in primo Artis medicæ primo docetur. Nam cū sint tres modi doctrinæ, tres erunt modi etiam tractandi unamquāq; rem distincti.

C O N T R A D I C T I O X I I I .

Lilium an uentriculo inimicum.

Lilium nocet uentriculo, & proprie oleum eius, 2. Can. cap. 444. at 13. Tertii trac. 5. cap. 3. laudat oleum de lilio in uentriculi inflatione. Quidam emēdauit de nigella: & est Melanthium. Galenus autem octauo de Medicamentis secundū locos, dum composita Andromachi refert penultimum auxiliū ad uentriculi dolores, ex Nicostrato habere Iridem: & in Asclepiadis auxiliis quæ exterius applicantur, medicamentū Poliarchi iuxta finem eandem recipit. Data etiam est regula à Galeno 7. Artis curatiuæ, cap. 4. quod odorata omnia uidētur auxiliari uentriculo, ut talia sunt, non repugnāte qualitate. Respondeo, Nigella pro lilio legēda primo est: exterius autē nihil prohibet lilii radicem prodesse, iuxta Galeni generale præceptū: est enim non parū odorata. immixta etiā aliis dolorem leuare potest. unde etiā mandragoram huius causā odoratis admiscemus: quam tamen quantū possumus iuxta Galeni præceptū uitare debemus. Porro inter stomatica medicamenta, Galenus Iridis radicē refert, utpote aromatis uim habentem 7. Artis curatiuæ, si exterius adhibeatur.

C O N T R A D I C T I O X V .

Lens an frigida.

Lens calida est & sicca, Galenus lib. de Regimine uictus priuatorum, Com. 2. at in octauo de Simplic. medic. connumerat eā inter tēperata simplicia. Serapio ex autoritate Hippoc. 6. Epidem. dixit eam esse tēperatā in caliditate: si modò declinat, ad calidum declinat: de siccitate nō est ambiguitas. Verū Hippocratis uerba aliud sonant: inquit enim paulo ante mediū eius libri, *ψυχρότατη βρωμα, φαρμάκων, κρυγγοί, καὶ σκύνβα.* Galenus commento 33. quintæ sectionis exponens: negat lentem frigidam esse. quonā igitur pacto frigidissima esse poterit, cū ad calidū declinare lentem existimet: Quo fit, ut apud Serapionē legi debeat, Et dixit Galenus 6. Epidem. cum cortice igitur calida est, excorticata temperata.

C O N T R A D I C T I O X V I .

Coriandrum an frigidum.

Coriandrum ex terrea parte ac tenui, tum aquea tepente substantia compositum est: inquit Galenus 7. de Simplicib. medic. cap. pro-

prio,

prio, de corianno. Princeps 2. Can. cap. 144. reprehendit Galenum, dicens: quòd aquea substantia frigida est de se: quòd si tepida sit, erit hoc propter substantiam subtilem quæ celeriter separatur. Secundo reprehendit eum, quòd dixerit, contradicens Dioscoridi, ipsum nò esse frigidum: nam illius frigiditatem còprobauit etiam Ruffus, & Archigenes, clari medici. Adducit autem rationē, Succus eius interficit in frigidando, igitur nò potest esse absolutè calidū: sicut ipsum posuit Galenus, quāobrem statuit ipsum calidum modicè: sic tamen ut caliditas illa esset ex partibus subtilibus facillime & celerrime euanescentibus: siccum uerò in secundo. Cùm uerò dixit: Natura frigidū est, in fine primi, usq; ad secundum, loquitur de mēte aliorum. Quia tamen Galenus adducebat contra Dioscoridem argumentum, dissoluit dura apostemata, & non conuenit erisipelati, nisi permixto ex materia frigida, aut iam in declinatione existēti. Respondet, quòd hoc est à proprietate, & quòd frigiditas eius coniuncta parti calidiori, ad profundum penetrat. Hoc etiā secundū argumentū aduersus Galenum adducit Serapio cap. 34. & quāquā uideatur ualidum, non tamē uiderunt Arabes, quòd eadē solutio stat pro Galeno, quæ adducitur pro Principe & Dioscoride: dicet enim Galenus, quòd interficit, non quia frigidum in ultimo, sed quia corruptiūū humani spiritus: caliditate enim penetrare facit malā quam habet qualitātē. Ideo hæc respōsio magis militat pro Galeno, quàm pro Dioscoride. Neq; uerò existimandū est, Galenum latuisse hanc letalē coriandri uim, quam non solum lib. 6. cap. 9. enarrat Dioscorides, ubi de uenenis agit: sed etiā in capite proprio, ubi à Galeno reprehenditur. Turbat autem sensum ad modū ebrietatis cuiusdam, ut fatetur Dioscorides. Quare non frigidum hoc dicemus uenenum, sed potius occulta qualitate homini infensum: iusteq; & audacter Galenum ab infamia liberabimus. Nam quod ad aqueā substantiā tepentem attinet, nemo ignorat illam nò simplicem esse, sed mixtā: nam talem acribus medicamentis inesse necesse est, ut habetur 4. de Simplic. medic. cap. 19. At dicet quispiam, Princeps ipse frigidum fatetur in secundo, siccum in tertio: tractatū secundo de uiribus cordis. Ego hanc autoritatem nulli facio: quandoquidem tractatus ille potius esse uideatur filii Viregi, inuentus inter libros Principis, ut solent aliquādo libri sine titulo inueniri: phrasim enim non redolet Principis: quicquid sit, si modò liber ille apocryphus non est, ab Auicenna ante Canonis librum còpositus esse uidetur. Sed mirum est de Rasi, qui tertio ad Almanforem 17. ponit illud frigidum. & 23. Continentis cap. 651. ponit calidum: & respondet pro Galeno Dioscoridis rationibus, recitatq; Ioannitium dicentem, quòd est calidum, Hippocratis autoritate quæ habetur 2. de Viētus ratione. Verba autem sunt: Coriandrū calidum est, sistit, cruditatē discutit, somnū facit, post reliqua cibaria sumptū. Auerroës etiam ipse

ipse s. Collectaneorū, in dictione cusbera, calidū ipsum statuit: differentiam tamen habere oportet succi, & substantiæ uiridis & ficci.

CONTRADICTION XVII.

Coriandrum an comitali morbo conueniat.

IVxta illud quæri solet, an coriandrum comitali morbo conferat, ut 2. Canonis capite proprio. at prima 3. trac. 5. cap. 11. iuxta principiū, & ego uitupero coriandrū, & eius multiplicationem nisi in sanguinea & biliosa epilepsia: quare non uidetur esse calidū, sed frigidum: nec cōuenire ratione morbi, sed uaporū ascendentiū. Sed quomodo hoc, cum somnū prouocet, & noceat oculis, & inebriet succus eius? propterea uideant qui eo utūtur ad comprimendos uapores: ut in trazea appellata Mediolani: in qua ingreditur cinamomum, coriandrum, citraria, adeò uulgata. constat enim quod addit in causam replendo cerebrū. Sed hoc transeat, cum inter multos error sit minimus: uolui tamen monuisse, si autem in parua quantitate pro uehiculo bonum. Sed dicent quidam, Serapio autoritate Alexandri dicit, quòd confert morbo comitali à uentriculo, prohibendo uapores. Ego Apud Alexandrum Trallianum nihil tale inueni: uerū cum sexcenta habeamus quæ uapores haud dubiè, & absq; noxa, & absq; periculo comprimant: cur in tam euidenti dubitatione, ac periculo, coriandro utemur? quòd constat, usu diuturno cerebrum non mediocriter offendere.

CONTRADICTION XVIII.

Atra bilis an sanguinis fex.

HVmores quatuor sunt, Bilis, Sanguis, Pituita, Melancholia, prima primi doc. 4. cap. 1. unde post medium, ponam autē uerba propria: Cholera autē nigra alia naturalis, alia non naturalis superfluitas. Naturalis est boni sanguinis fex, & ipsius residētia, cuius sapor inter dulcedinē & ponticitatem existit: ita quòd quatuor humorum primus est sanguis, secundus bilis, & in his non est dubitatio: tertius est pituita, quartus autem melācholia, siue niger humor. De pituita est difficultas in generatione, sed in melancholia difficultas est de substantia. Rursus igitur in eodem capitulo inferius loquens de melancholia præternaturali dicit: Alia autē est cinis melancholiæ naturalis. Et rursus cap. 2. Eiusdem melancholiæ autē hypostasiæ causa efficiens est calor temperatus. 2. autē primi doc. 3. cap. 7. dum ponit signa quatuor humorum abundātium, choleram nigram uocat: quam si existimat atram bilem cum supponatur quartus humor, iam contradicit superioribus: si autem fecem sanguinis, ostendemus dicta Galeni de hoc. item quarta primi cap. 4. exemplificans de medicina purgan-

te dicit de illa quæ purgat melancholiam solam, relinquendo alios humores. Idem prima 3. trac. I. cap. 29. cum materiam euacuare uolueris: iuxta medium. declarat ea quæ purgant caput laborans bile, inde ex pituita, & postmodum ex melancholia: & generaliter omnia Principis dicta ad hoc tendunt. unde primo Canticæ 67. & sequentibus, Situs cholera nigra est in splene, nec est falsa opinio ista. Turbulentia autem sanguinis naturalis est: quælibet autem ab ista præternaturalis, quæ proculdubio generatur ex adustione & commixtione aliorum humorum. Auerroës in cōmento cōfirmat dictum, & dat rationem: sicut enim bilis flaua trahitur à polifelli, sic quæ est ut fex sanguinis à splene. Iam uerò declarauerat in uerbo 56. quod corpus nostrum quatuor constat humoribus: sanguine, bile flaua, pituita, & melancholia: hic autem declarat, quænam sit melancholia, quæ est quartus humor: cum iam de aliis dixisset, idem confirmauit. Auerroës 2. Collectaneorum I. iuxta finem, & Haliabbas I. Theoricæ 25. ponit nigram cholera naturalem, frigidam, & siccam, sic se habentem ad sanguinem, ut fex ad uinum. At uerò aliter uidetur sensisse Galenus, qui non fecem sanguinis, sed atram bilem facit quartum humorem: unde 2. de Elementis cap. 6. Hippocratis uerba recitans dicit, *πρὸς δὲ βίβλιν, διήλκας μὲν χολῆς ἀναμείχθαι βίβλιν αἵματι δὲ πᾶντος ὡρᾶν καὶ μέλανα*. id est, Duas quidem biles per totum sanguinem immisceri, flauam & nigram. & rursus cap. 7. *ὅποταν γὰρ πινῇ τις φάρμακον ὃ, πὶ χολῆν ἄγει, πρὸς τὴν μὲν χολῆν αἵματι, ἐπειτα δὲ φλέγμα, ἐπειτα δὲ ὕδρ. πάντως χολῆν ἐμείσσι μέλανα*. id est: Si quando quis biberit medicamentum quod bilem ducat, primò quidem bilem euomit, post pituitam, post hæc autem nigram educit bilem. Inferius uerò dicti rationem reddens inquit, *βαρυτάτη γὰρ αὐτῇ καὶ παχέα καὶ δυσκίνητος*. quod est: Grauisissimus enim hic est, densusq; ac motu difficilis. In his omnibus obseruare decet, quod *χολῆν* hunc humorem, id est bilem uocat: non simpliciter humorem nigrum, sed bilem nigram: fateturq; eum toti immixtum esse sanguini: tum uerò quod hic uerterunt interpretes modò atram, modò nigram bilem nihil afferre differentia: quandoquidem apud Græcos hoc uno nomine constet, quod est *μέλανα* id est nigra. Sola igitur differentia uidetur ex hoc, quod est humorem esse nigrum, aut bilem nigram. iam enim hic sole clarius liquet quartum humorem atram esse bilem. Modò audi quæ dicat tertio de locis cap. 7. Sed ea quam feci crassæ similem esse dixi, in terram effusa non inducit feruorem, nisi fortè in ardente febre ipsam præassari contingat: neque ulla etiam acida qualitate participat: tumque ipsam nominare consueui melancholicum succū, aut melancholicum sanguinem. Hæc enim meo quidē iudicio non rectè atra bilis appellari potest: & 4. A phor. 21. super illud, Deiectiones nigrae qualis est sanguis: cū inquit,

περὶ τῶν διαχωρημάτων αὐτῶν νῦν ὁ λόγος ἔστω, ὅτι περὶ ὀνομάζεται μὲν ὑπὸ
 τῶν παλαιῶν ἰατρῶν μέλαινα, μέλαινα δ' ἀκριβῶς ἔκ' ἐστὶ χολή, τὸ γὰρ
 θοιὸν καὶ διαβρωτικόν, καὶ ὀξῶδες ἔκ' ἔχει. πολλὴ δὲ διὰ πολλοὺς ὀξέ ζυμοί
 πλεῖν γὰρ ἐγγεόμενα ἔστω αὐτῆς, ἀλλ' ἐστὶ ὥσπερ αὐτὴ εἰς τὴν ἐκάλωρ εἴποι
 σαφῶς, οἷον ἵλὺς τις αἷματος οἷα καὶ τοῖς παχέσι δυνάμει καθισταμένοις
 ὑφίστασθαι πέφυκεν, ἢ ὀνομάζεται πτύονα. Quod est: De deiectionibus
 nunc ipsi est sermo, quæ à priscis quidem medicis nigra uocantur, bilis
 uerò nigra exquisitè non est, nam acre, & corrosdens, & acidum nō habent,
 multo uerò magis neq; in terram effusa bulliunt: uerum est sicut si quis
 eius describens imaginem manifestè, diceret ueluti sanguinis limus, qualis
 & uinis crassioribus iam consistentibus solet subsidere, quem fecem nomi-
 nant. His non obscurum est, ipsum sentire, aliam esse sanguinis fecem,
 alium autem humorem atram bilem: nam fex sanguinis, tum cætera su-
 perfluitates, humores non sunt, sicut nec aquositas: unde prima Aphor.
 2. connumerans humores, & quæ continentur in uenis, enumerat primo
 pituitā, & post utranq; bilē, post sanguinē, & serosam superfluitatē: inquit
 enim, καὶ διὰ καὶ ὀξὺς αἷματος, κενῶν. & si serosa sanguinis, ipsa, adici-
 tur superfluitatibus & excrementis suum quasi substantium, nō autem
 humoribus: neq; enim conuenit dicere, Bilis sanguinis: aut, Pituita sangui-
 nis: sed Serosa sanguinis pars, Fex sanguinis, & similia. Differt igitur nigra
 bilis à sanguinis fece. Est etiam nigra bilis frigida & sicca, sanguinis fex
 humida & calida: sicut & fex uini, & olei suorum humorum naturam
 agnoscunt. Non est igitur fex sanguinis atra bilis. Humores etiam actu di-
 stinguuntur apud Galenum, quomodo igitur atra bilis pars synceri san-
 guinis esse potest? nec daretur quartum genus febris, quia fex non separa-
 tur à sanguine. Sed argumentationibus omisissis, seriem Galeni inspiciamus,
 ubi rem ipsam, ut aliàs diximus, accuratissimè pertractat. Cùm itaq; in li-
 bro de Atra bile, cap. 2. descripsisset sanguinem, quòd sit ruber colore, ac
 concreseat: mox serosam superfluitatem, quæ illi innatans inuifitur, post
 subiungit: Πορὸ similis crasso atroq; sanguini humor conspicitur alius,
 quem uomentes & deicientes sæpe excernunt: nec tamen, quanuis mul-
 to tempore sub dio habeatur, gelaescit: atq; huius quidem ipsius interdum
 sensus uomentibus prouenit acidi simul atq; acerbi: quandoq; uerò nul-
 lam, quæ percipi queat, qualitatem habentis. Post in tertio capite, digres-
 sione peracta, inquit: Quoniam igitur non concrefcit, ab atro quidem san-
 guine distincta est: non tamen & ab his quæ proprie nigra nominantur:
 nam & talia sæpenumero uomuntur & deiciuntur, quæ ab atra bile quā-
 plurimum non solum facultate, sed etiam qualitibus quoq; sensibilibus
 differant: quippe hæc neq; accerbitate, neq; acore, manifestè participant:
 cum bilis atra tum gustu ipsam uomentibus, tum olfactu non illis solum,

sed alijs quoq; innotescat:quin ne terram quidem,ut illa,fermentant. Sed quamuis in hoc quoq; aceto similis acerrimo sit, crassis tamen substantiæ partibus pugnantissime disposita est. Ergo quòd atra bilis alia sit à sanguine, satis clarum est, tum eius feces: nam sanguinis fex concrefcit, non solum sanguis: cæteri humores non cõcrescunt: nã & Philosophus cùm causam redderet, cur sanguis coëat, 3. de Natura animalium 19. & 2. de Partibus 4. dixit quia fibras habet: ob hoc detractis fibris, non amplius coit sanguis: neq; igitur humores alij coëunt à sanguine, neq; atra bilis, cùm sit humor: Non est igitur atrabilis sanguinis fex. Auerrois etiam sententia humores potentia tantum in sanguine sunt, cùm corrumpuntur: ut uas fellis bilem flauam continet, 3. Collectaneorum 4. sic lienis atram: ob id igitur, iuxta Auerrois sententiam, atra bilis quæ actu in nostro est corpore, nullo modo in sanguine continetur: at quæ potentia est, quis dubitat magis ex crassiore sanguinis parte constare illam, quàm ex alia? Galenus etiam reddens rationem, cur natura nullum uas peculiare pituitæ constituerit 2. de Naturalib. facul. cap. 9. dicit, quoniam sanguini pituita immiscetur. At si eodem modo atra bilis sanguini commiscenda fuit, non opus fuit liene, ut ab ea sanguis expurgaretur. Si enim bilis flaua sanguini immixta illum reddit impurum: quoniam pacto atra, quæ flaua longe deterior est, sanguini potest immixta esse? Sed iam clarè loquẽtem Galenum audiamus 2. de Naturalib. facul. cap. 9. iuxta medium: In sanguine generando quicquid abunde crassum, ac terreum, ex ciborum natura in nutrimento fertur, nec commode à naturali calore alteratur, id lien ad se trahit: Quod uerò assum, ut sic dicam, usumq; nutrimenti est, fuerit sanè hoc calidissimum, in eo atq; dulcissimum, qualia sunt tum mel, tum adeps, id cùm flaua bilis factū est, per uasa uocata fellis expurgatur. Inde sequentibus uerbis paulo pòst: Pari modo & id nigri succi, quod nondum illam uelut ebullitionem fermentationemq; terræ efficit, est naturale: quod autem in talem mutatum est uim, ac speciem, id iam præter naturam est: ceu quod ex uisione non naturalis caloris acrimoniam adseuerit: ac ueluti cinis quidam euaserit: sic quodammodo fex usta à non usta dissidet: illanq; admodum calida est, adeo ut carnẽ urat, liquefaciat, ac corrumpat: altera quæ nondum exusta est uim habeat refrigerandi, siccandiq;. Demum post pauca: Verùm feri genera, quæ in succis habentur, omnia sunt excrementa, purumq; ab his postulat esse corpus animalis: ea uerò, quæ prædicta sunt, usum aliquem naturæ conferunt, & quod crassum est, & quod tenue, purgaturq; ab iis sanguis, tum per lienem, tum per eam quæ iecinori subest uesicam. Seponitur uerò tanta talisq; portio utriusq;, quanta qualisq; si in totum ferretur animalis corpus, noxam aliquam inferret. Quod enim est crassum, ac terreū, ac prorsus eam quæ fit in iecinore mutatione

tationem subterfugit, lien ad se trahit: Quod uerò mediocri est crassitudine idq; absolutum iam est, id in totū corpus fertur: requirit enim sanguis in non paucis animalis particulis crassitudinem quandam: æquē, ut arbitror, & quæ in ipso feruntur fibras. His exploratis & quæ in 4. capite libri de Atra bile subiiciuntur: quòd ipsa, cum in corpore fuerit, uehementissimos excitat morbos cancrum, lepram, ac talia: ut etiam difficultas intestinorum, si ab atra incipiat bile, letalis sit: intelligendum est iuxta Galeni sententiam, nomen Atræ bilis tria significare: humorem simul cum sanguine genitum, qui in uenis continetur: & de hoc non uerum est, quòd incipientibus morbis si appareat, sit letalis, nec difficultas intestinorum ab ea incipiens mortem affert. Rarissimè tamē accidit hoc, quia uix à sanguine potest separari: ideoq; sine uiolentia non excernitur. Apud Auerroem tamen hic humor non est, sed sanguis niger tantum, & in hoc sensu ueteres post Hippocratē intellexerunt atram bilem. idè Gal. 3. de Locis, hanc significationem & nominum institutionem ad Hippocratis consuetudinem restituit. Est & Atra bilis quæ à liene secernitur: quam haud dubie Auerroës & Galenus humorem actu esse uolunt: sed & his, ut naturalis, sepe expellitur: & in difficultate intestinorum, & in initiis morborum, & tamen sine noxa: melius tamen ab Hippocrate dicitur Nigrum, sine bilis adiectione, ut in Aphor. 21. par. 4. deiectiones nigrae: & ibi, Infra autem nigra deiecta bonum est. Et ego sum expertus hoc anno difficultatem intestinorum adolescentulo sic exortam, nullum timorem attulisse, quamuis copiosum etiam emitteret sanguinem: quia atra bilis hæc naturalis est: & de hac loquitur Galenus & Auerroës, cum quatuor humores enumerant: sed in hoc differunt, quòd Galenus primam exquisitius humorem esse putat, secundam autem Auerroës: qui primam, humorem esse alium neget à sanguine. Tertium genus atræ bilis est, quod exustione, uel putredine corruptum est: & de hoc loquitur in Aphorismis, ubi eam letalem semper pronūtiat. De hoc etiam Galenus sola disserit in libro de Atra bile. hic autem non est quartus humor, nisi humoris nomen extendendo ad præternaturalem: cuiusmodi etiam uitream pituitam humorem dicere possumus. Ad argumēta dicimus, atram bilem per se siccam & frigidam: nec sic omnino est sanguinis fex, sed ut cinis quidam: sanguis autem ater ac niger fex est reliqui sanguinis: sed hic calidus ac humidus modicè est, uelut & uini fex antequàm exiccetur: & olei amurca dum humida est. Humores autem in sanguine distinguuntur, & sic ut unus est spuma, sic alter fex, ut 2. Naturalium facultatum cap. 9. reliqui extra uenas etiam distinguuntur: qui autem est in splene, non est amplius fex sanguinis, sed propriam nigram substantiam habet. Ex hoc patet, quòd dantur quatuor genera febrium tam in uenis, quàm extra. Ad Galeni auctoritatem, non ut

ut immisceretur sanguini caruit uase proprio pituita, sed ut per ulteriorem coctionem transiret in sanguinem. Ob id atra bilis cum esset sanguini permiscenda, nec posset coctione melior effici, indiguit proprio uase, ut quod seculentum esset expurgaretur: nec bilis sanguinem uitiat, imò & ipsa illi est necessaria: quare atra bilis, nisi exuperet nimia quantitate, sanguinem non corrumpit, imò illi est necessaria, ut ex ultimis Galeni uerbis deduximus. Apud Auerroem tamen est alia ratio: cum, ut diximus, fex sanguinis non sit humor actu, sed atra bilis tota in liene continetur. Ad id Philosophi, quod solus sanguis concresecat, dico, quod per sanguinem intelligit aggregatum ex humoribus quatuor in potentia, ut uult Auerroës: aut in actu, ut Galenus: & ita fex sanguinis concresecit: uel quia est atra bilis solum in potentia, uel quia ut in uenis continetur nondum peculiare nomen humoris sortita est. Si igitur exponas Philosophi dictum mutatis uerbis non sententia, omnis tollitur difficultas, hoc modo. Solum quod in uenis continetur, effusum concresecit (nam hoc apud omnes uerum est, seu dicas humores in uenis contineri, seu solum sanguinem) sed atra bilis, quæ in splene continetur, est humor alius omnino à sanguine: ideo non concresecit, nec est de eo difficultas.

CONTRADICTION IX.

Atra bilis an à calore temperato.

EX his emergit dubium, quoniam Gal. 3. Prognosticorum 28. reddens rationem, cur post ætatem consistentiæ adueniant quartanæ, dicit: quia in ætate consistentiæ à calore generatur atra bilis, quæ antequàm euanescat, longo indiget tempore. Vel igitur loquitur de genita in iecore, quæ est quartus humor, & sic non erit hæc atra bilis, fex sanguinis, loquendo de ea quæ est etiam naturalis: uel loquitur de præternaturali, & sic non est uerum, quod non possit consistere in corpore humano sano, quin erodat membra ob suam acredinem, ut dicebatur de atra bile à Galeno cap. 4. Propterea dico, quod atra bilis etiam naturalis fit à calore uehementiore, dum agit in materiam crassiore: & ideo non est uerum, quod omnis atra bilis naturalis fiat à calore temperato. Sed ad dictum Principis respondetur, quod per calorem temperatum oportet intelligere mediocrem, qui ratione siccitatis tamen operatur atram bilem. Sed hæc non uidetur mens Galeni, quia fieret magis in ætate decresciente. Conciliator autem differentia 32. & si non uiderit locum, uidit tamen difficultatem ipsam ex 2. Crisostomi cap. 12. cum dixit: Sanguis ex moderato calore generatur, flaua bilis ex maiore, atra uerò ex sufficienter immodico. Quicquid igitur in sanguine pingue est & tenue, fit flaua bilis: crassum uerò, ac ueluti fex, quâdo immodicè calefactum exaruerit, atra. Respondet igitur,

tur, quod extrema frigiditas parit pituitam, extrema caliditas flauam bilem, mediocri sanguinem. Inter mediocrem caliditatē, & extrema duo, alia duo media locat: à media caliditate inquit generari sanguinem biliosum, à media frigiditate atrā bilem. In qua responsione nō uidet, quod tres uno uerbo intolerabiles facit errores. Primum, quod statuit quintum humorē biliosum sanguinē: patet, cūm constituat quinque etiā caloris genera. Secundum, quod uult atram bilem generari à remissione calore, quā flauam: cuius oppositum Galenus in loco ab eo recitato declarat, cūm dixit: Ab immodico. Tertium, quod uult atrā bilem fieri à calore tēperato remissione: cum Galenus dicat *ἡ ἀμετρος ἰκνάδς*. Satis immodice. Nec est, ut dicat illum de præternaturali loqui, cūm sanguini, pituitæ, & flauæ bili illius generationem comparet: nam & flaua ipsa secundum naturam est. Ipse etiam in 2. Artis medicinalis in capite de signis calidi ac sicci iecoris inquit: Quibus iecur calidum est, & siccum, his flaua bilis plurima est: consistente autem ætate, & atra: sed est difficultas, quoniam 3. de Locis cap. 7. ponitur atra bilis frigida, ac sicca. Respondeo, quod non inconuenit, intelligendo de ea, quæ iam ad formā cineris redacta est. nam exurens talis esse nō potest: nec incoueniens est, quod à calidissimo agente fiat frigida materia, ut de igne & cinere. Pro quo intelligendū est, quod 14. Artis curatiuæ, cap. 9. scribitur, unū esse genus melancholici humoris, seu nigræ bilis, quod ut naturale est quotidie gignitur: putredine uerò correptū, uel calore superassatū, prauas efficit ægrotudines, & calidum euadit ac corrodens. Tu tamen hoc tantū intelliges, cūm collectū fuerit extra uenas: nam, ut dixi, sanguinis sex frigida esse nō potest, donec sanguinis substantia tota exoluta nō fuerit. Gentilis post sex modos exponēdi quos oppugnat, tādē ad hoc uenit: quod dicitur calor temperatus non ratione hominis sani: quia alii etiā generātur humores in sano: nec ratione qualitatis, quia productū esset temperatum, cūm sit frigidum & siccum: sed dicitur ad differentiam superabundantis, à quo bilis generatur: & diminuti, à quo pituita: ita quod non est uera hæc oratio, Calor atrā bilem generās superfluē decoquit, aut diminutē: & ideo per abnegationē dicemus, quod temperatē. Sed ista responsio non tollit difficultatē uerborum Galeni: & etiā Princeps subiungit, quod caliditas iecoris facit ad multiplicationē atræ bilis: quod uerum non esset, ubi illa fieret à calore temperato. Ad hoc dicerent, quod ibi loquitur de præternaturali atrā bile: ut tamen diximus ex Galeni uerbis, etiā in 2. Paruæ artis, hoc est falsum, & experiētia hoc ostēdit: nam multi tales tamen sani permanent, quod esse non potest, ubi atra bilis præternaturalis existat. Ista tamen responsio fuit etiā Iacobi. q. 44. super primā canonis. Vgo exponit dictū Galeni de calore immoderato, ratione producti, non autē causæ efficientis: sic quod solus sanguis à calore fit moderato:

quia solus est temperatus ex humoribus. Si sic, fieret atra bilis ex calore diminuto, quod iam demonstrauius falsum: & hæc imaginationes cōtingunt eis propter ignorantia Græcarū literarū, & malam conuersionem: & quia paruifaciebant etiā Galeni autoritatē. Propter hæc dico, quòd loco, Temperati, debet iacere in litera Principis, Intēperati ut legatur sic, Melancholiæ autē hypostasiæ causa est calor intemperatus. Hoc primò consentit cum uerbis Galeni dicentis, quòd fit à calore satis immodico: consentit cum ratione: nam omne terrestre fit per ulteriorē cōctionē, ut declarat Philosophus de mari: neq; enim aliter potest fieri aliquid humidū terreū, nisi superassetur. Consentit etiā dictis Principis sequētibus, cum inter primas causas generationis atræ bilis multæ ponat primā caloris multitudinem in iecore. Manifestū est autē, quòd dictū illud est cōmune ad omnem atræ bilis generationē: fuisset enim insufficiens, adducendo causas præternaturalis, & nō naturalis, maxime nō addendo nomen distinguens. Apparet etiam ex contextu: nam cum sanguinē dixisset fieri à calore temperato, dixit atram bilem à calore intemperato: opposuit enim atrā bilem sanguini: uelut bilem flauā, pituitā: cum dicat alterā à superfluo, alterā à diminuto calore fieri: sic etiā atram bilem opposuit sanguini in generatione cum essent humores hi oppositi in temperatura. Quid autem melius dicere potuit, quàm calorem intemperatū, id est inæqualem: nam ab hoc propriè fit atra bilis: sicut etiā autūni statum Galenus dicebat (1. de Temperamentis 4.) inæqualem, non intemperatum, ut antiqui quidam dicebant: cuius natura est similis atræ bili, & in quo maxime tempore talis humor generatur 3. Aphor. 22.

Sed dices, Si ad calidū potius declinat, cur magis generatur ex cibis frigidis, ut 2. ad Glauconem, 11. ex farinæ elixatæ, lentium, & cōchlearū esu? Respondeo ex 2. de Alimentis, cap. 44. Lens & brassica æqualiter siccant, humidius tamen est alimentum brassicæ quàm lentis. intelligit, quòd minus elaboratur brassica à calore naturali. Et ob id generationis atræ bilis causa est siccitas & crassities quæ cogit calorem naturalē immodicè agere: sed siccitas per se causa est: porrò farina & salita calida sunt.

CONTRADICTIO XX.

Medicina an Ars coniecturalis.

NON recte uideretur Hippocratem Galenus reprehendisse dicentem, quòd medicina sit Ars cōiecturalis: & quòd Medicus suo fine quādoq; frustretur, prima Aphor. 1. circa initiū: idē paulò post: cum 1. Prognosticorum cōmento 3. & in lib. de Venæ sectione, dicat, eam coniecturalem. Responso haud est difficilis: non redarguit illos Galenus in Aphorismis, qui dicunt, Hippocratē dicere medicinā coniecturalem esse, quoniam falsum

sum dicant: sed quia nō fuisset ad propositum, Hippocratem in Procemio artis maledicere de arte ipsa. Sed cōtrā, quia Hippocrates in libro de prisca medicina hoc fatetur: dicens, nō esse reiiciendā medicinā, eo quod nō semper, nec exactē uerū contineat: sed magis amplexandā, laudēq; dignam, quod proximē ad ipsā ueritatē accedat. Dico quod propositū Hippocratis ibi est, medicinā à calūnia uindicare. Circa quod etiā sciēdū, quod propositio hęc est falsa, Medicina est cōiecturalis: seu pro arte, seu pro sciētia accipitur. Paret, quia est habitus recta ratione directus. Repugnat igitur, Aliquid esse cōiecturale, & sciētificū, uel artificiosum: opus tamē eius, seu exercitatio, est cōiecturalis. Et hoc est quod dixit Princeps, quod est aliqd quod nec dici, nec calamo scribi potest. Sunt autē tria genera artiū: quædā certa per se, & in exercitatione, ut Arithmetica: quædā certa per se, coniecturalia in exercitatione, ut Medicina, & Agricultura: quædā coniecturalia & per se, & in exercitatione, ut Diuinatoriæ: quare nō sunt artes uerē, sed solo nomine: & ideo Medicina, Agricultura, & Nauigandi peritia, & Militaris, et Iurisprudētia, ut uersatur circa diuinationē, sunt cōiecturales, & medio modo artes: ob id solū Galenus in libris Prognosticorum, medicum uati comparauit. Quare soluitur argumentū nostrū, hoc Galenus 1. Reg. acut. 3. dicit, quod ad rectē medendū necessaria est cognitio futuri. & colligitur 1. Aphor. 9. Sed pars Prognostica est coniecturalis: igitur etiam tota ars. Respondeo, quod est talis in comparatione ad opus, sed per se nō. Vnde propositiones medicæ deducta ambiguitate usus nominum sunt firmæ ut mathematicæ. 1. Artis curat. cap. 4.

C O N T R A D I C T I O X X I.

Medicus an debeat imitari naturam rectē operantem.

Hippocrates semper nos adhortatur, ut quæ rectē à natura fiunt, medicus imitetur, 1. Aphor. 2. in initio commenti, dicebat Galenus: Verū istud multas patitur difficultates: nam 4. Aphor. 22. Natura rectē operans nihil ab initio crudum expellit. & in 1. Epidem. sect. 2. Com. 46. cruda uerō, & incocta, & ad malos abscessus conuersa, iudicationis carentiam, uel dolores, uel longitudinem, uel mortes, uel reuersiones. At medico tamen non licet imitari naturam, 4. Aphor. 10. medicari in ualde acutis, si materia turget, eadem diutardare enim in talibus malum est. & 1. Aphor. 24. in acutis passionibus rarō & in principiis medicinis purgantibus uti. tamen in 22. Aphor. modo non turgeant: excipit quæ sint purganda. & 2. Aphor. 29. cum morbi inchoant, si quid uidetur mouendum, moue. Medicus igitur non imitabitur naturam rectē operantem. Item in deiectionibus, 2. Prognosticorum, uersicolor quidem diuturniorem morbum prænuntiat: sed tamen exitialis est. cum tamen dicat 4. Aphor. 21. &

quanto colores plures non prauī in deiectionibus cum medicamento apparuerint, eo melius. Igitur hæc directè opposita: quin etiam in eo Aphor. continetur manifesta contrarietas in operationibus medicamenti, & naturæ sponte operantis. Respondeo, operantem naturam rectè debemus imitari: non tamen quiescente natura semper medicus debet quiescere. Istud tamen argumentū ualet, Natura rectè operans sic agit, igitur & medicus agere debet idem. & natura nunc non potest aliquid excernere utiliter, igitur nec medicus. Cum uerò dicis, Et tamen utiliter medicus purgat uarios humores, & in principio turgentem materiam, & natura non potest. Dico, quòd natura tunc etiam utiliter excernit in omni casu in quo medicus: sed tamen refugimus opus naturæ tanquam malum signū, non tanquam inutilem operationem. Sed medici operatio cum ab exteriore principio proficiscatur, non potest esse malum signum: ideo diuersitas non est ex parte operationis, sed signi: & ideo conuertuntur utilitatis tempora medici, & naturæ. Quòd si dicas, quomodo potest naturæ operatio esse utilis ægro tendente ad mortem? Dico, quòd uocatur utilis respectu operationis tantum, non ad bonum finem assequendum: celerius enim moreretur siue tali euacuatione. Sic dicimus medicum, qui produxit tabifici uitam, utilem fuisse illi: cum tamen tandem sit mortuus. Et si dicas, natura non reponit luxatos artus, igitur nec medicus. Dico, quòd tantum natura non rectè operatur, quia non potest.

CONTRADICTIO XXII.

Si qualia oportet purgari purgentur, an conferat, & an bene ferant.

INanitio si qualis oportet fieri fiat, confert, & bene ferunt, 1. Aphor. 2. & si qualia oportet purgari purgentur, confert, & bene ferunt, Aphor. ultimo. Et in primo loquitur, ut uult Galenus, de operatione naturæ: in secundo loco Hippocratis de operatione medici, ita ut hoc dictum sit generale: & tamen dixit 4. Aphorismorum 22. quòd inchoantibus morbis si atra bilis uel supra, uel infra exierit, letale est. & in sequente Aphor. Quibusunque à morbis acutis, uel diuturnis, uel uulneribus, seu quouis alio modo extenuatis, nigra bilis, seu uti sanguis niger effluxerit de subter, postridie moriuntur: cum tamen aliter dici nequeat, nisi quòd qualia oportet purgari, purgentur. pessima enim, ut dicit Galenus in commento, eadem difficultas. in sequente Aphor. 24. Difficultas intestinorum si ab atra bile incoeperit letalis est. & tamen mali humores excernuntur: nam per qualia oportet purgari, Galenus 1. Aphor. 2. humorē exponit molestiam inferentem, seu qualitate, seu quātitate solis, siue utriusque. Item in suppuratis & aqua intercute laborantibus, 6. Aphor. 27. si uniuer

uniuersim aur pus aut aqua effluxerit, omnes moriuntur, quanquam educatur quod noxium est. Galenus etiam 12. Artis curatiue, cap. 3. dicit, in febre ex crudis humoribus eos qui laborant indigere purgatione: & sanguinis missione: abstinendum tamen ab utroque, cum neutrum ferant. Non igitur ad euacuationem molestantis humoris illico sequitur alleuiatio, & tolerantia bona. Quinimo uidetur magis contrarium: nam quanto deteriores excernuntur humores, eo acrius infestant, ut 12. Artis curatiue, cap. 8. & 5. Aphor. 1. de iuvene, qui cum eruginosam bilem euomeret, conuulsione, & syncope, & sudore frigido correptus est: quæ adeo praua symptomata ne uel nimia ex parte eueniunt, minus molestos euacuationibus humores.

Pro hac difficultate sciendum est, quod Galenus soluit eam pro parte 4. Aphor. 23. cum dixit, quod natura uel morbi & magnitudine uexata, hæc quandoque expellit, illico succedere exitio. & hoc pro duobus Aphor. 23. & 22. Et ratio est, quia talis expulsio non est quanta, pro ratione humoris peccantis: & quamuis sit utilis ratione effectus, est tamen letalis ratione signi: quia significat expulsionem rei prauæ, cuius maxima pars in corpore relinquitur. Vel dic, quod non tota expellitur: si non recipiat responsum, inhærens nimis uel uerborum Hippoc. Prima autem responsio est magis sincera ad mentem autorum. Ad Aphor. 24. dico, quod non est ratione humoris peccantis, sed modi: propterea adiectum est, Si inceperit: non, Si fiat: non enim cocta materia: corpus etiam merito expulsionis alleuiari uidetur, cum tamen ulceris causa tendat ad mortem. Aut dicendum in omnibus his, quod per qualia intelligit humorem iam separatum à iuuatio, & coctum: ut in Commento 22. non autem solum molestum. Et hoc modo possemus dicere, quod talis expulsio est mala etiam ratione causæ non solum signi. Ad id de superatis dico, quod hoc est ratione modi, & per accidens, nam per se sepe iuuantur. Per accidens autem, dicebat Galenus in Commento, duo sequuntur inconuenientia: Casus uirtutis, & Attractio septi transversi ob uiscerum grauitatem, quæ ab aqua prius sustinebantur: & hoc maxime contingit, ubi iecur, lien uel, aut aliud uiscerum scyrrho, quod plerumque contigit, laboret. In puris autem deductione sola prima causa offendit, scilicet difflatio caloris naturalis: ubi adnotanda est Græca lectio quæ sic se habet: *εοικεν ὅτι ὡς μὴ τῶν τοιούτων ἐκ τῆς ὡς πολλὴ τῶν σωμάτων διασπίσεως*. Quod est: Videtur igitur in his ex magna corporum distantia. Intelligit corporum distantiam non uulnus ipsum, sed partes quæ iam prius à puræ obtinebantur: nam illæ necessario in magna suppuratione, cum uniuersum eduxeris pus, multum distabunt. uulneris autem labia minimè, ubi incisio parua extiterit: quæ etiam inuat tamen ad continendum magis calorem: & si concauitas loci inanis magna sit. Ad id quod de febre dicitur, Aliud est, non ferre posse, aliam ob cau-

fama: aliud iuuare, uel nocere: nam tales iuuabuntur purgatione, & uenæ sectione. nec tamen alias ob causas alterum illorum ferre poterunt. Sunt autem causæ stricturnæ uenarum, debilitas iam caloris contracta, & motus materiæ, quæ tamen euacuationi non cedit. Sed tamen Galenus id significare uoluit, quod tales indigent, non quod iuuarentur: quia nondum præparata est materia, saltem ratione purgationis. Ad ultimum dicendum est, quod talis tolerantia & iuuamentum non illico sequitur: imò plerumque defatigatur uirtus, & læditur æger: sed post fomnum apparet iuuamentum. Sed est difficultas magis manifesta: nam Aphor. 23. primæ particulæ dixit: Deiectiones non multitudine sunt æstimandæ: sed si talia deiiciantur, qualia oportet, & ægri facillè ferunt. Si igitur secundum sequebatur ad primum, cur adiecit: est enim nugatio, ut primo Topicorum cap. 2. inquit enim Philosophus, Incommodum est, sæpe idem de re aliqua dicere: quod Xenocrati usu uenit, qui Sapientiam ait esse constitutionem & cognitionem naturarum. Quippe cum constitutio quædam sit cognitio, ita bis idem dixit, adiecto uerbo cognitionis. In eodem errore uersantur ii, qui refrigerationem caloris naturalis, priuationem esse definiunt: nam quum eius quod insitum est, omnis sit priuatio, superuacaneum est nomen naturalis addere. Respondeo, nondum constabat artificiosam purgationem, si sit qualium oportet, iuuatiuam existere: nam in 25. hoc docet. At uerò hic loquitur de artificiosa purgatione. Indicium sunt Aphorismi extrema uerba, Et ubi ad animi defectionem ducere expedit: quare necessario additum est ei quod dixit, Vt qualium esset: ut ægri facile ferant.

CONTRADICTION XXIIII

Dolor iuncturarum an à mala intemperie.

DOlor iuncturarum fit propter temperaturas, & materias malas, 22. tertii trac. 2. c. 5. & rursus cap. 7. cum cognoscitur, quod causa est temperatura simplex, facile est eius regimen. Idem Alexander lib. 4. cap. 1. Aëtius uerò lib. 12. cap. 1. inquit, Communis igitur Ischiadicis, podagræ, & articulari morbo, est ualida alicuius humoris ubertas, quæ affectum articularum nexum occupat. Deinde subdit: Cæterum ad affligentis humoris cognitionem: itaq; nullum in articulis morbum à temperatura notat. Et rursus cap. 7. In uniuersum autem amplius humorum crudorum omnium affectionis causa existit, quod humorum multitudo affectionem inducat. Cum igitur ibi nullam malæ temperaturæ rationem ineat, manifestum est quod dicitur aduersari Principi: tum etià Galeno, qui in libro de Differentiis morborum, singulas malas intemperaturas cuilibet parti corporis contingere posse affirmat. Sed tamen de compositis medicamentis secundum locos libro 10. sub initio eius capituli, quod de Iunctu-

ris inscribitur, hæc habet de podagra, arthritide, & ischiade loquens: Communem habent hi tres affectus humoris redundantiam, quæ affectam occupat coarticulationem: qua expleta in omnem partem circumsitæ particulæ nervosæ tenduntur, & ex his dolor oritur. Manifestum est non solum ex uerbis, sed etiam ex causæ traditione temperaturæ malæ nullum in hoc morbo relinqui locum. Forfitan quis conabitur hanc sedare discordiam, quod Princeps dicat in eo loco cap. 6. quod rarò hic morbus sine materia accidat: unde illud prætermissum, quod rarum est, à Galeno & Aëtio. Principem tamen generaliter loquentem considerasse. Sed hæc responsio uana est, cum curam generalem præcipiat. Maximè Aëtius à sanguinis missione ortum habentem: quæ nullo modo tunc conueniat: quare dicemus, Principem aliud ab his tractare: ille enim de dolore loquitur, qui etiam à mala tēperatura prouenire potest: Galenus & Aëtius de fluxione, quæ absque humoribus fieri nequit. Liquet solutio ex 6. Aphor. 29.

C O N T R A D I C T I O X X I I I I.

Dolor iunclurarum an semper à sanguinis missione initium curationis suscipiat.

IVxta hæc est dubitatio, nam Galenus & Princeps locis excitatis initium curæ à purgatione humoris peccātis exordiuntur: Aëtius autem à uenæ sectione: & ratio est pro Aëtio, quoniam phlegmon est in articulis: & quanquam humores exuberent, in sanguine tamen continentur: nec sunt omnino humores in actu secundum Auerroëm, aut saltem non separati, secundum Galenum: excitant etiam ualidos dolores: igitur ex Galeno 1. Aphor. 23. concurrunt duæ conditiones, quarum quælibet facit missionem sanguinis necessariam. Alexander lib. 4. cap. 1. cum Principe consentit, dicens, Si bilis abundauerit nullo modo curationis exordium à sanguinis missione inchoabis, sed à purgatione: quam tamen humectantium exhibitio, & ut sic dicam præparatio præcedat, cui Paulus lib. 3. capite 78. consentit. Galenus 6. Aphor. 49. declarat podagricorum inflammationes fluxione fieri ad articulos decumbente: inquit enim in initio: *Αἰ ἡ δὲ τὸς ποδ' ἀρ' αὖτος φλεγμοναί, εἴς τὰ τῶν ποδῶν ἄρθρα κατὰ σκήπτου-
τες γίνονται.* quod est, Phlegmones quæ in podagricis fiunt fluxione ad articulos decumbente: at phlegmonis cura propria sanguinis emissionem indiget. Neq; dicere possumus, uniuersam podagricorum uarietatem à Galeno ibi non comprehendit: cum de lentis seorsum, ac crasis, tum etiam subtilibus, ac crasis simul & lentis, mentionem in Commēto faciat. Quin etiam Galenus ipse in 10. de Medicamētis secundum locos, purgatorium nullum descripsit: sed potius uariam mittendi sanguinis rationem deriuatiuam, & auersiuam: quamuis, ut diximus, purgandum censeret humorem.

rem. Sic igitur conciliabitur discordia si humor sit sanguis, aut multitudo reliquorum humorum æqualiter aucta, aut phlegmone ingens sanguinis missionem iuxta Galeni præceptum, ut diximus, exhibebimus: atque sic Aëtio concordare erimus. Confert & semper sanguinis missio, tum maxime nondum confecto phlegmone: ut pote quod fluxionem reuocet. Igitur uerissima sunt Aëtii dicta. Si uerò materia sit humor unus, nec admodum abundans, & iam fluxerit humor, melius fuerit omiſſa ſectiōe uenę purgare: non quod ex ſectiōe uenę non iuuetur ſemper æger: ſed quod uel omiſſe cogimur humoris ſuperabundantis neceſſariam purgationem, aut nimium ægrotantem afficere ob leuem cauſam. Porro damna miſſionis ſanguinis frequentius apud Galenum uidere licet, libro de Sanguinis miſſione. At podagra reuerti ſolet, & frequēs eſt, ſubditis morbus: ob id in poſterum etiam tum Galenus tum Paulus, & Alexāder, & Auicenna proſpicere conſuluerunt: cū uel merito morbi, uel ægrotantis in ea acceſſione ſemper utilis ſectio uenę habenda ſit.

CONTRADICTION XXV.

Iſchiadicis an reprimētia medicamenta conueniant.

Propter dicta etiam emergit difficultas, nam reprimētia medicamenta in Iſchiade ex toto refugit Aëtius, non in podagra. Auicenna in iſchiade ſolum conſulit parcius utendum. Ratio quæ ſolet adduci, eſt, quod talia materiam in profundum compellūt: quæ uidetur in omnibus uigere articulis: uerū dilucidius in iſchia, ob magnitudinem. Dicendum eſt igitur, Principem intelligere, cū nōdum materia influxerit: Aëtium, cū cōperit deriuari. Aliqui uolunt ut non ſuper locum iuncturæ applicentur.

CONTRADICTION XXVI.

Hyperici ſemen an per aluum expurget.

Hyperici ſemen eduxit ex drachma una ſtercus & pituitam: Aëtius lib. 12. cap. 4. Idem uerò lib. 1. cap. proprio: dicit, quod ſemen eius, tum etiam folium, urinam & menſes cit, nulla alui habita mentione. Princeps 2. Can. cap. 363. ambobus locis contradicit in hoc, quod dicit ipſum purgare bilem, quare uirtutem ei largitur medicamenti, non ut Aëtius, deinde, loco ſtercoris & pituitæ, dicit bilem: nulla illorum mentione habita. Dioſcorides cū dicat finire tertianas, & quartanas, & coxendicum dolores: uidetur innuere, quod omnes humores expurget: ſed tamen per urinam tantū, non per aluum: uerū quatuor ferme illius facit genera: Hypericon, de quo lib. 3. cap. 161. Aſcyron, Androſemon, Corim: quāuis diſcrimen inter illa eſſe uelit. Plin. lib. 26. cap. 8. Hypericon cum cori coniungit,

git, duoq; facit genera. Verum ut ad Dioscoridem reuertar, Afcyron biliofa multa excrementa educere fatetur, uerboq; cum Principe concordat, re autem cum Aëtio potius à feipfo difsidēs: nam fic coxēdicis dolores finire illum affirmat, qui plerunq; à pituita fiunt, raro autem à bile, ut omnes teftantur. Androfæmon uerò, quē uocāt fanguinē humanū, biliofa & alui excrementa educere affirmat: de quo Aëtium intellexiffe puto, quāquā Aëtius pituitā legat, & conuenientius pro bile, eadē qua dictū eft ratione. Quamobrem illud primo dictum fit, non Hypericonem, uerum Corim uentrem purgare, & Afcyron bilem: Androfæmo autem etiā excrementa, quæ ambo Hypericoni fine difcrimine uterq; illorum commifcuit: quod ex Galeno apparet, qui Afcyron & Androfæmon in 6. libro ut laxantia fcripfit: non tamen adiecto quid purgarent. Hypericon in 8. libro de Simplicibus medicamentis tanquam folum urinam, & mēfes ciet, reponit. ergo quod uerifimile eft in hoc dicam. Dioscorides de Hyperico modum uidetur docuiffe, quomodo non expurgando per aluum, fanaret tertianas, & quartanas. Declarauit enim quod urinam & mēfes prouocaret: in Afcyro & Androfæmo colorem exeuntium obferuauit, qui uel ex medicamento, uel ex caliditate extenuantis medicamenti, uel materiei putredine, biliofus extat. quem fecutus eft Auicenna illa fub Hypericonis nomine reponens, tanquam notioris. Aëtius autem & ipfe hæc ambo fub illo collocat. uerum materiæ naturam ex morbi potius qualitate, quàm ex colore uenatus eft, quod medicum decet.

C O N T R A D I C T I O X X V I I .

Sanguinis miffio an poft ieiunium conueniat.

PRinceps in cura fciaticæ, feu ifchiæ, uigefima fecunda tertii, tractatu 2. cap. 25. dixit: Et bonū eft, ut patiens ieiunet duobus diebus, deinde fecetur illi uena. Et iam dixerat in quarta primi cap. 20. ante medium, quod ieiunus magis læditur. Sed clarius 2. Aphor. 21. fuper illud, Vbi laborandum nō eft: dicebat Galenus, Aegris cum inedia nullus eft ualidus motus adhibendus: non fanguinis miffio, non alui purgatio, non uomitus excitatio, non frictio multa. Mirum autem eft, quod cum Princeps fuerit adeo diligens in fuis exceptionibus, in ediam tamen abfolutam non connumerauerit, nifi adiecto uentriculi affectu. Quod fi dicatur, per ieiunium, ut quidam uolunt, tranfire materiam pituitofam in fanguinem, ideoq; tale ieiunium non obefle fectioni uenæ: patet quod Galenus loquitur non de ieiunio debilitante, fed quacunque cibi abftinentia: ut patet etiam 5. Artis medendi, de muliere Romana, cui noluit fecare uenam ob cibi abftinentiam. Dicit enim Galenus in quacunq; cibi abftinētia, formidolofum efle magnum motum. Quod fi dicatur, Galenum loqui de ægris febrientibus,

t non

non ischiade: Dico, quòd fundamentum Galeni stat in siccitate, & debilitate uirtutis, non in uno tantum: & quòd dato etiam, quòd merito materiei coniuncte, uel antecedentis, inedia iuuat, non tamè securi sumus quòd materia illa etiam sit in uentriculo, uel iecore, quod requiritur ad hoc, ne æger debilitetur. Dic igitur, quòd duo sunt modi loquendi apud Auicennam Ieiunare, & Abstinere à cibo: primo utitur, cùm intelligit, ut modicum cibum assumamus: secundo, cùm nullum.

CONTRADICTION XXVIII.

Ischia dolor & coxendicis an unus.

Sciatica est dolor qui incipit à iunctura anchæ, & descēdit retro ad coxam, & quādoq; extenditur usq; ad genu, & ad calcaneū: dolor uerò anchæ est ille, in quo est fixus dolor in ancha, qui non descendit, nisi quādo permutatur ad sciaticam, 22. tertii trac. 2. cap. 5. post mediū. Sic differentiam facit Princeps inter hos duos dolores non leuem: cùm per opposita distinguat sciaticam: eodem modo diffinit Rafis 9. ad Almanforē, cap. 90. Eandem differentiam ponit in libro diuisionum cap. 103. quam Princeps adduxit. Aëtius tamè nullam differentia facere uidetur lib. 12. cap. 1. in initio: sed nec Paulus lib. 3. cap. 77. imò generaliter dolorem coxæ ad partem gibbam eius extendi: & etiā descendere usq; ad genua, & sæpenumero ad pedes: quin etiam nec Rafis, nec Princeps ipse, nec Serapio in cura differentiam ullam attulerunt si rectè intelligantur uerba Principis, cap. 27. nam quod dicat, Si dolor fixus maneat in ancha: intelligit, quòd non recedat, non quòd nō cōmunicetur cruri uel pedi: nam & Aëtius inquit in cap. 1. lib. 12. Multis etiā circa inguina dolor figitur, & tum sanè uestica ipsa molestiam recipiens, ægrè lotium reddit: & tunc maxime crus totū à coxendice ad calcaneum usque dolorem patitur: igitur cura eadem est: propter tantā tamen diuersitatem non est uisum Principi, illorū dolorū differentiam præterire: tametsi nulla eius utilitas ad hanc usque diem appareat. Ischia, Polluce in 2. libro iuxta finem, autore, est neruus, uel articulus. uerba eius sunt: καλεῖται δὲ καὶ τὸ νῆρον τὸ συνέχον τὴν κοτύλην πρὸς τὸν μηρόν, ἰσχίον. δμάνομον δὲ ἐστὶν αὐτῷ καὶ τὸ ἄρθρον. coxendices autem κοτύλας, id est osium concauitates.

CONTRADICTION XXIX.

Iberida an ischiadicis summo sit presidio.

Iberida laudat summis encomiis Paulus ad ischiadicos dicens libro 3. cap. 77. In totum uerò hos sanitati restituit iberidis herbæ usus, quam lepidion alij, alij syluestre nasturtium uocant: quæ uerò apud nos fruticosa nascitur similibus lauri foliis, & multo amplioribus, respondere multa

ta experimenta testantur: non solum in coxarum, sed in aliis quoque diuturnis affectibus: per æstatem uerò longe sunt efficaciora. At qui si folia tunc non produxerit, cortex ipsius radice cum adipe suillo contundi, ut emplastri faciem repræsentet. Aëtius autem lib. 12. cap. 2. sic inquit: Quod si uestigium aliquod relinquitur herbe iberidis, quæ & cardamine uocatur, radix sumenda est: etenim figuram, saporem, & odorem cardami habet, hoc est nasturtii: multa autem ubique nascitur, sed maximè circa muros, uias, incultis locis, ac uetera monumenta: folia autem habet nasturtii, uere quidem uirentia, & nasturtio multo maiora: longitudo uerò caulis cubiti est parui, aut paulo amplior: æstate fert lacteum florem, quo tempore est efficacissima: semen habet quàm minimum, quod per totum enascitur caulem: radix uerò acerrimum habet odorem, & maxime omnium nasturtio similem. Hanc æstate recentem effodito, arida enim uires amittit: & diligenter tundito: tunditur autem difficulter: & axungia ueteri modica excipito. Aliam igitur herbam Paulus describit, aliam Aëtius: ille eam quæ nomine caret, hic autem iberida: sed posteriorem Serapio describit cap. 339. quam thapsiam uocat: tum quod notam illam ait Dioscoridi, Galenoque, qui iberida describunt: nihil autem refert, aspirationem ut uideo addideris, detraxerisue: tum quod dicat eam folia fœniculo similia habere, quæ proxima sunt nasturtio, non lauro. Princeps similiter eandem sub seitaragi nomine posuit: cum eam folia nasturtii habere dicat: uerum lacrymam ruthæ etiam agrestis sub nomine thefifæ in medium adduxit, non minimam partem uirium thapsiæ adiiciens. Thapsiæ uerò non meminit in descriptione singularium medicamentorum, adeo ut eam ignorasse credatur. Galenus 8. de Simplicibus medicamen. lepidium tanquam iberida describit, quam Princeps, ut dixi, seitaragi uocat: ergo iberida seorsum à lepidio distinguit Dioscorides, cum capite 162. de lepidio in secundo libro, de iberide autem in primo libro cap. ultimo tractet: tam parua cura fuit simplicium medicamentorum egregiis olim medicis: cum illorum usus non sit ferme necessarius: nisi ubi ex errore deterior, ac penè insanabilis fa-

ctus fuerit morbus: qua ratione etiam medicamentorum transmutationem scripsit Galenus. Nunc sa-

tis esse pluribus uidetur, multa in his nugari, recta medendi ratione prætermissa:

Auicennamque accusare de his,

in quibus & ipse Galenus

minore cum excusa-

tione negligen-

tior fuit.

HIERON. CARDANI

CONTRADICENT. MEDI.

CORVM LIBRI PRIMI

TRACTATVS

QVARTVS.

CONTRADICTION I.

Medicina an cum cibo sumenda.

PEDIT ei, qui uult sumere medicinam, ut summo maneumat, & tardet cibū: deindeumat post tres horas uiginti aureos panis cū uino & aqua pauca: & post sex horas ingreditur balneū, 22. tertii tractatu 2. cap. 7. iuxta mediū. Hic uidentur tres apparētes contradictiones, quarum prima est, quod cū loquatur de laxante medicina, tum quod nullus esset uerborum sensus, ut in antiqua lectione, tum quod esset præter rationē, quia sæpe illa transiret in alimentū si esset ut cassia fistula, uel saccharū uiolatū: tum quod moueret nec euacuaret, ut quarta primi cap. 5. dicitur. oportet autē ne medicinē potator comedat aut bibat, donec medicina suā pferat operationē: quare ante terminū operationis exhibet medicinā: & pro hoc etiā sunt rōnes sex, quas Vgo Senēsis adducit: prima, quod cibus obtūdit medicinā: secūda, quia inclinat uētriculum ad retinēdū quod in illo cōtinetur: tertia, quod medicina poterit impedire cōcoctionē: quarta, quod humores attracti cibū corrūpunt: quinta, quia periculū est, ne aliqd ex medicina cū cibo ad uenas attrahatur: sexta, quia medicina erit causa eiectionis cibi ad intestina. Adde septimā, quia motus motū impedit, nā medicina humores trahit ad uētriculū ab hepate, in cibo hepar trahit à uētriculo: qui duo sunt motus manifestē oppositi. Sed quædā ex his cōditionibus nō uidētur ueræ: nanq; in medicina debili istud est falsum: ut de cassia, quā Mesue suadet dari ante cibū, ut iam dixi, ne in alimētū trāseat: de ualida autē dicebat Hippoc. 2. Regim. acutorū 12. ubi autē quis medicamentū ebiberit, ptisanam protinus sorbendā dato: neq; insigniter minore quā cōsuetū est quātitate. Galenus autem assignat duplicem cibi assumpti cum medicamento utilitatem: nempe retundere malitiam illius, & detergere reliquias. Impedimentum igitur operationis est pro iuuamento apud Galenum, nō pro iactura: cū impedimentum est diminutionis causa, non autem iam operante medicamento: nam sic esset pugna: circa quod obseruandū est pro canone maximo, quāquā hic obiter adiiciatur, post medicamenti completam operationem solum

lūm esse dandum cibum : ut in 13. textu iubet Hippocrates: atq; eum per-
exiguū, ut Galenus consulit in Commento : quanquā secus nunc fa-
ciant medici nostri temporis. Verū ad propositum reuertendo, huic sen-
tentiaē denuo obstat autoritas & ratio Pauli Aeginetæ: is nanq; capite 4.
libri septimi inquit: Aloēs drachma cum aqua mulsa mane datur: qui ue-
speri eam exhibent, aut secundum cibum, noxā inferunt: quippe alimen-
tum in membra digerit. Et rursus cap. 6. Summatim in omni purgatione
efficaci, medicamentum homini ieiuno, & concoctione obita, trades. Non
igitur ullo modo medicamentum cibo miscendum erit. Deinde paulo
post ex Philagrīo Hippocratis uerba iam inducta aliter uidetur interpre-
tari, inquit enim: At si inediam non tulerit, aut uentriculi os ad bilem con-
trahēdam ex longa penuria, uel alia causa paratum habuerit, dabitur ipsi
panis ex uino aquoso, ptisanæ uel cremor, aut chondri, nōdum incepta ua-
cuatione, ut ne cibis corrumpatur: sed protinus ubi medicamentum fue-
rit eporum: sic enim nonnunquā ad celerem medicaminis motionem
pondere suo opitulatur. Igitur singulare facit dictum Hippocratis, quod
Galenus exposuit tanquā generale: additq; causam celeritatem opera-
tionis: cū Galenus potius tarditatem educat, & uim detergendi. Sed
non laborabimus ut modo Philagrīum Galeno concordemus: sed ani-
maduertendum ex Hippocratis & Galeni & Principis sententia, cibum
subtilem, qualis est ptisanæ cremor, uel aliud etiam longe tenuior cum
medicamento sumptum, prius concoqui, quā medicamentum moueat:
cū tamen aliter Paulus ipse sentiat, nec nisi Vgonis tertiam rationem
amplectitur. Forsan quis dicat, Hippocratem ibi cōsulere hoc de medica-
mento pernicioso ac puro: cū Galenus subiiciat odorata utiliter misceri
ad comprimendam illius malitiam: quare tunc cū uentriculum non of-
fendat, minime cibo permiscendum erit: cū tamen constet Galenum in
libro Quos, & quando, quomodoq; purgare oporteat, scripsisse eadem,
quæ in illo Commento tradiderat ad uerbum: cū ibi generaliter homi-
nem quæ facienda sint doceat: quare leuissimum cibum cum medicina,
quamuis usus exoleuerit, propinabimus: tum maximè cum pilulis seu ca-
tapotiis. Pauli ratio & autoritas nos monet ut id caute faciamus, scilicet
ne ullo modo cibi concoctionem opus medicamenti præueniat. Principis
autoritas singularis est in eo casu, consulens ne medicamentum nimis fa-
uiat. At dices, Nonne poterat iuxta Hippocratis præceptū cibo & ipsum
misceri. Respondeo, oportebat illud ad iuncturas usq; penetrare: quare
cibo opus non fuit: in quo diligentiam Principis animaduertere decet.
Cū igitur perficere debeat operationem medicamentum: manifestum
est, quantum aberrant, qui absq; leui detergente prius intra paucas horas
exhibent cibum. Hoc tamen melius à Tralliano declaratur lib. 4. cap. 2.

TRACTATUS
CONTRADICTION II.

Articulari morbo an uinum competat.

Altera contradictio est, quod iubet dari uinum in sciatica. & Aëtius in podagra libro 12. cap. 33. si pituitosa fuerit, suadet uinum dari flauum, antiquum, subtile: sed tamen interualli tempore. At uerò Princeps iam dixerat in fine cap. 7. Et oportet ut dimittat uinum omnino, usquequo sanetur ex eo sanatione integra, & ueniant super ipsum quatuor tempora: & oportet ut hoc paulatim fiat. Et hic loquitur de omni dolore articularum, Trallianus etiam libro 4. cap. 3. ab initio uix ex toto uino interdicit in podagra sanguinea: quare cum id non agat in pituitosa, manifestum est uinū in ea posse adhiberi, Haliabbas octauo Prac. cap. 33. uinum dat cum melle compositum, quod melicratum dicitur, permixtum aqua decoctionis cumini. Paulus uerò libro 3. cap. 78. in fine curationis biliosæ fluxionis, quo etiam pituitosa continetur: uinum haud denegat: concedit uerò manifeste in regimine præseruante. Facile fuerit hanc discórdiam sedare, si illud proposuerimus, Vinum primò secundum Arabes noxium esse podagræ, & aliis iuncturarum morbis: quanquàm Rasis libro 9. cap. 70. dicat, quòd in tēpore incolumitatis debeant bibere uinum antiquum, & purum: utiq; urinam prouocantibus in cura frigidæ podagræ: nec uinum uideatur negare in sciatica: intelligit cōparationem illius ad aquam puram. Græci uerò, & cum illis Haliabbas, qui Arabs Græcus dici potest, uinum dant, & præcipue in interuallo accessionum, & in declinationibus materialium frigidarum: sed in calidis denegant. Ita iuuamenta uini sunt, concoquere crassos humores, digerere, & per urinam prouocare, augere calorem innatum: detrimenta moderari sunt, spargere, & calefacere: quare neq; in calidis, nec dum materia cruda est competit. Flauū eligit Aëtius, antiquum, subtile: uude error utentium albo pro flauo: aut admiscantium aquæ partem. Haliabbatis præceptum intelligitur obseruandum ad tollendum medicamento iacturam: quo in casu etiam medicata propinamus uina, ceu melicratum: non quòd tunc conueniat, sed quòd laborantibus non tantum potus sit, sed medicina.

CONTRADICTION III.

Articulari morbo an balneum competat.

Deinde iubet ut balneum ingrediatur: dicebat Galenus 11. Artis curatiuæ, cap. 20. Balneum duobus modis podagram excitat: primò, quòd humores colliquat: secundò quòd uenas aperit: hocq; modo dum podagræ nocet, febrem iuuat. Iuuat autem duobus modis, dicit: & quòd humores digerit, & quòd calorem febrilem remittit. Hæc sunt generalia iuuamen

uamenta, nam tertium illud solis conuenit patientibus defluxum humorum in articulos: & hanc sententiam idem ipse scripsit Princeps 22. tertii tract. 2. cap. 24. dicens: Et minorentur in balneationibus, quoniam ipsę liquefaciunt humores, & faciunt ipsos currere ad iuncturas. Ex quo patet, quod conuenit cum Galeno in sententia, sed non in reddendo causam, cum sint duę. Et nota, quod cōcedit in hora resolutionis effusionem aquę frigidę, & aquas thermarum. Ex doctrina Hippocratis 5. Aphor. 21. & 25. Verum primum horum paruipendunt medici nostri temporis, ut pleraq; alia optima auxilia. Sed ut ad rem reuertar, Alexander balneum aquę dulcis suadet: ita tamen ut illius effusionis solum meminerit, quę per frigidam fit, libro 4. cap. 1. ubi de lauacris agit. Verum illud mirum, quod thermas omnino prohibeat, Principe eas admodum laudante. Secundo, quod à cibo in calida intemperie balneum exhibeat: uerum in hoc errorem suspicor esse: quis enim nescit, illico crudis humoribus distracta concoctione, artus implendos esse? At Paulus lib. 3. cap. 78. balnea laudat: & in affectus tempore, & in interualli ex aqua dulci prohibet: in humida podagra thermas concedit: at Alexander in frigida, aut pituitosa, admittit balnea dulcis aquę, uolens ea dolore ipsum lenire: quinimo consulit utendum esse illis. Existimo balneum omne ex aqua calida noxium esse, propter rationem ultimam Galeni: aperit enim, ac dilatat uias si solum admittatur: uerum superfusione aquę frigidę addita iuuabit. Cauendum tamen à frigida ex toto, ubi iam tumor in articulis fuerit excitatus, ut Aëtius dicebat libro xii. cap. 48. Principis textus sic interpretandus est: Thermarum aquę ui iuuant, calore nocent: ob id pensanda est utilitas: nam commodę sunt interdum quę ferri plurimum continent: conueniunt interdum etiam balnea dulcis ac tepidę aquę, cum adeò dolor extinguitur, ut fluxum materię prohibeat: quo casu detrimentum iuamento pensatur.

C O N T R A D I C T I O I I I I.

Articulari morbo an coitus competat.

IVxta id accidit dubitatio, nam Princeps cap. 24. iam exposito in præseruatione coitum ex toto remouet. Serapio libro 4. cap. 30. uidetur admittere in corpore temperato, sed humoribus pleno: cum dicat, Non nocet detrimento magno. Aëtius lib. 12. cap. 1. dicebat: Generant hunc morbum immoderatus uenereorum usus: quare moderatum admittere uidetur: sed non ualet, nam loquitur in sanis, non iam affectis. Paulus in biliosa tantum interdicit ueneri: ubi etiam humores non excreuerint, abstinent dum puto: aut si humores prauis etiam abundant: quod ergo est frequentissimum Auicenna tanquam generale proposuit: cum raro, & tunc etiam paruus

paruus error accidat. nam multos nec malos humores abundare oportet nec in affectu esse, ubi nulla ex parte coitus nocere debeat.

CONTRADICTION V.

Humores an actu sint in uenis.

Medicamentum expurgat humores iam actu existentes, non in illos facit Gal. in libello de Purgantium medicamentorum facultate: & exemplum dat de aqua hydropicorum, quam constat actu in aqualiculo contineri: tum etiam de arquatibus: dicebat enim: Si humor ipse per medicamentum gignitur, tantum in illis proderit sanguinem mittere, quantum expurgare: quæ ratio nulla esset prorsus, si ex mente Galeni humor actu non contineretur in sanguine: nam si illi dicant, Non bilem trahit scamonium, sed quæ erat potentia bilis in sanguine actu fit talis: non est autem aqua hydropicorum in potentia in sanguine: igitur nec humores reliqui: item in sectione uenæ iuuaretur arquatus, nam bilis educeretur. Eandem planè sententiam exprimit in libro aduersus Iulianum: dicebat Iulianus: Si humores in homine essent expurgato athleta optimæ habitudinis medicamento uiolentissimo nihil educeretur ex humoribus: sed sola fex, aut cum illa sanguis: sed non sic est, imò in omnibus educitur bilis, ac atra bilis, & pituita: igitur in sanguine illi non sunt, sed fiunt. Poterat respondere Galenus, & dicere, Humores sunt ibi in potentia, & per medicamentum ad actum reducuntur: sed non sic: negat igitur experimentum: nam in exquisitè sano nihil horum apparebit: igitur humores qui educuntur ex corpore, actu in illo sunt. Est etiam ratio pro Galeno, in interpolatis febribus humor expellitur ab ore uenarum ad concavitates: sed hic humor nondum est putridus, nam sic faceret febrem continuam: uel est in potentia in sanguine, & sic omnes homines febrem paterentur, esset enim semper expellendus: uel quia est actu, & sic haberetur intentum: cum enim est actu in uenis, uel quia actu in illis est, uel quia præparatur ad putredinem, expellitur à natura: quomodo enim si esset in potentia tantum, solo naturæ opere posset expelli: Hippocrat. autem libro 1. de Natura humana dilucide à textu 20. ad 23. hoc declarat dicens: Corpus autem humanum continet sanguinem, pituitam, bilem geminam, flauam, & atram: & hæc illi sunt natura corporis, & propter hæc ægrotat, & ualet. Valet autem præcipuè, cum ea inter se uirtutem & copiam mediocriter temperatas habuerint, & potissimum si permixta sint: contra laborant cum eorum quicquàm fuerit, amplius uel, aut in corpore secretum fuerit, neque amplius confusum: necesse est enim cum horum quid separatum sit, & per se stet, non solum ex quo excessit locum morbo efficaci: sed etiam illum, ubi iam substitit, & influxerit nimium, affluentem dolorem & labo-

laborem parere. Vbi Galenus exponēs declarat, quonam pacto cum humor à sanguine fecernitur, duplici modo afficitur corpus: & quòd sanguis ipse non amplius est temperatus, & quòd pars in quam influit humor, læditur. Cum igitur sanguis actu sit, & eodē modo uelit alios humores esse, (miscentur enim illi & inter se) constat humores actu esse. Mixtio enim est miscibilibum mutatorum unio de Generatione & corrupt. textu commentī ultimi. Istud uerò esse uidetur demonstratiuum argumentū, quòd saltem secundum Galenum humores in actu sint in ipso sanguine. quòd cum utraque bilis & sanguis in iecore generentur, pituita tamen in uentriculo fit. 2. Virtutum naturalium, cap. 5. iuxta finem: & libro de Atra bile, cap. 8. in initio, cum dixit: Porro demonstratum est à nobis, pituitosum humorem ex pituitosis cibis in prima, hoc est uentriculi, concoctione generari. At uerò in oppositum est autoritas Galeni 2. de Diff. feb. cap. 9. inquit enim, (postquam superius declarauerat tria esse genera intermittentium febrium, quia tres humores extra uenas, unum autem continuarum, cum sanguis putrescit.) Cum sanguis putrescit, quod subtile eius est, transit in flauam bilem: quod crassum, in atram: si igitur humores actu in sanguine essent, non fieret noua illorum generatio. Secundò, fierēt quatuor genera continuarum febrium, sicut tria interpolatarum, & non unum. Quam sententiam repetit 2. Crisium cap. 12. A uerroēs etiam 2. Collectaneorum cap. 1. existimat, quòd solus sanguis sit proprie intentus à natura: & hoc, quia membra ex illo solo generantur, & nutriuntur: & hoc modo humores sunt tantum in eo in potentia: alio modo ut sunt illius superflua, & sic in generatione eius necessaria sunt in actu. Est etiam ratio: nam ex pluribus in actu non fit unum. 7. Primæ philosophiæ t. 49. sed sanguis est unum per se, tum quia habet unum finem, & distinguitur ab aliis humoribus, & sapor eius est unus scilicet dulcis: nam si esset mixtum, in sputo sanguinis appareret acidus sapor necessariò propter bilem atram, & amarulentia propter flauam. 4. de Simplic. medic. cap. 16. Sed nō sic est: imò cum apparet talis, iudicamus sanguinem uitiosum. hoc inquam experimento in cæteris mixtis manifestum est. lactis etiam partes, quod sit ex sanguine, sunt in eo diuersæ substantia, non autem actu: & dato quòd actu essent tales, cum omnes separatæ dulces sint, manifestum est nihil esse proportionatum bili flauæ, uel atræ. Est etiam necessarium sic dicentibus, confiteri quòd Thurisanus dicit, Sanguinē esse mixtum quoddam ex tribus humoribus tantum, & ita sanguinem nullum esse: haberēt etiam humores duo uasa, sicut bilis flaua uenas, & uesicam quæ sub iecore est: & atra uenas, & lienem: ut libro de Atra bile cap. 8. Hoc autem non est uerum, cum singulis humoribus singula uasa natura decreuerit, secundum naturā existentibus. Conciliator uidit hanc difficultatē Diff. 30. sed

non est ausus eam declarare. Respondeo igitur, quod natura non intēdit apud Aristotelē, neq; apud Galenū, nisi generationem sanguinis, in secunda concoctione principaliter: sed generat utrāq; bilem ex necessitate, sub forma excrementi: & excrementū in actu est. Sed tunc nō propriē dicitur humor, sed superfluum: quia nō habet saporē in actu, nec prauā qualitātē. Superfluum etiā non intelligitur separatū in actu ab eo cuius est superfluum, quare non generat febrem aliā, nisi cū separatur: & tunc fit humor in actu, & accidit alterū ex duobus: uel enim retinetur, & putrescit, faciens febrē sui generis: uel expellitur sine pręparatione ad putredinem, & sic retinetur à uasis ad hoc ordinatis, quia secum trahit aliquid utilis, donec illo separato excernatur: uel extruditur à uenis cum pręparatione ad putredinem, & sic facit febrem periodicam. Cū uerō Galenus dixit, generari flauā bilem & atram ex sanguine supercalefacto, 2. Regim. acut. 31. intellige generationē humorū actu existentium, qui amplius sanguini nō uerē miscētur: unde uterq; morbus regius exoritur. Quod si humores actu in uenis essent, omnes regio morbo laborarent. At si dicas, in morbo regio superaugetur: Respondeo, ualde sapiens esset medicina illa, quæ superflū tantū concoqueret, & quæ rursus educeret: color etiā in sanis, quāquā croceus, nō foret, aliquantulū tamē eius particeps esset. Quinetiā Galenus & Princeps sæpe repetūt sanguinē mittendū esse cum uel ipse abūdauerit, uel humores omnes ex æquo aucti fuerint: quę diuisio nulla esset, si humoribus excrecentibus necessariō & ipse sanguis excreceret. Rabi Moyses 2. particula Aphor. suorū in principio, sententiā Galeni recitat ex quarto super secundū Epidem. quæ talis est: Sanguis est cōpositū ex quatuor humoribus: & cū unus superabūdat, dicitur sanguis ab illo humore denominatus, ut biliosus, uel pituitosus: sanguis autē qui unus est ex illis quatuor, est secundū imaginationē ab aliis separatus. Hęc autoritas clarē docet quod nos diximus: nam si sanguis, qui est quartus humor, est solū ibi secundū imaginationē: igitur & reliqui tres humores: igitur solū aggregatum est in actu, & quatuor illæ partes sunt in potētia humores: ut uerō crescūt partes illæ in potētia talis sanguis dicitur: ut biliosus sanguis, cuius magna pars in bilē trāsire facile posset, aptaq; est. Humores igitur in actu nō sunt nisi corpus ægrum fuerit: humorum tamē materia semper adest.

CONTRADICTION VI.

Agaricus an purget materiam in pectore existentem.

Agaricus purgat materias existentes in pulmone & pectore tenaces ac putrescentes: Mesue cap. de Agarico. At Galenus dicebat 5. de Locis cap. 3. post mediū: Eorū quæ cōtinētur in pectore, uel pulmone, nullum descendit inferius. Intelligit autē per secessum, nā per urinā modū declarat.

Resp

Respondetur ex eodē lib. 6. de Locis cap. 3. in fine, dum dixit, Itaq; quam ob causam pus in pulmone genitum cum urinis (licet raro) excernatur, iam dictū est: id uerò quod per uentrē purgatur, aliā (licet raram, quæ in corporū dissectione apparet) causam habuit: quippe cōcaua uena medio quodā uase stelechiæ uidetur interdū adaptari: proinde nihil mirum aut impossibile est & ex p̄tibus septo trāsuerso superioribus pus in uētrē defluere: nā corporū raros habitus, par est etiā ut rari sequatur euētus. Ergo iam superius eodē cap. 3. declarauerat, quòd pus per urinā ex pulmone excernendū, primò in cor per leuē arteriā ad finistrū uentriculū fertur: quod inde in magnā incidēs arteriā, quæ spinæ substrata est, ad renes primò, deinde ad uescicā fertur: at uerò in quibusdā cum pus etiā per uenas pectoris si morbus sit lateralis, trāsfundatur ad extremū: uena est stelechiæ, id est porta similis arborū caudici, quæ illas pectoris perbreues iungit his quæ ad intestina ferūtur: nam sine illo uase haud hoc fieri potest, cum pectoris uenæ (ut Galenus dicebat 5. de Locis cap. 3.) iuxta exortū septi trāsuerfi finiantur: quare inferius sanies, nisi hoc auxilio in paucis inuento, defluere nō potest. Mesuen tamen haud tam longe prospexisse puto, sed potius è uicinis regionibus existimasse Agaricū aliquid trahere: quod cum Dioscorides & Princeps aliq; classici uiri dicant, illud conferre tabidis, purulentos ipse credidit: cumq; simul purgare glutinosos humores affirmant, ille hæc duo iunxit in unum: existimans Agaricum glutinosos humores, ac purulentos posse ex pectore & pulmone detrahare: quod cum nullus alius dicat, neq; ipse Serapio, causam dedit ut medici recētiores hoc etiam calamitatis miseris purulētis adiiciāt: quo ego cōsilio iam ab hinc quindecim fermè annis ab egregio quodā medico consultore penè occisus sum.

C O N T R A D I C T I O VII.

Epiālæ febres an simul calorem & frigus habeant ex eadem parte.

EPiālæ febres dicuntur à Græcis, in quibus ab interna parte secundum minutissimas partes sentitur (quamuis diuersas) calor simul & frigus per totum corpus: ut non sit ad sensum inuenire particulam, in qua non utrumque simul sentiatur. Cum uerò interius calor sentitur, exterius autem frigus, aut lipirix sunt, aut febrium ardentium genus perniciosum, libro de Inæquali intemp. cap. 8. at etiam 2. de Diff. feb. cap. 6. declarat, quonam pacto, illa sit admodum quotidiana in periodis, longissima etiā, & quæ fiat à uitreo modicè putrescente humore: nam uix putrescere potest. Quodq; eius sint duæ differentix: altera, in qua, etiam si quiescat æger, frigus sentitur: altera, in qua dum mouetur solū. Meminit & harum febrium quasi communi quodam symptomate 3. de Simplicib.

medic. cap. 16. In eadem igitur sententia fermè Aëtius lib. 5. cap. 87. scripsit, Vitreum humorem, & acidam pituitam, cum non putruerint, rigorem inducere. cum putrescunt mediocriter, epialam, quæ ab ἠπιᾶ, quod est mitigo, dicta est: lenis enim febris est. ἠπιᾶσθαι etiam Græci dicunt algorem illum qui febrem præcedit: cum igitur ex toto computruerit, febrem in qua frigus præcedit calorem, generat. Verum hæc non uidetur esse Arabum sententia: nam Princeps prima quarti trac. 2. cap. 49. Empialam uocat, in qua calor est manifestus, frigus autem in profundo latet: de Epiala uerò Græcorum in cap. 61. loquitur nullum ei imponens nomen. Rafis. 18. continentis cap. 3. Empialam appellat febrem ex autoritate propria, illam quam etiam Princeps: sed antè ex autoritate Mesue dixit eam esse, in qua calor interius, & frigus exterius apparet: & in hoc mihi nil aliud dicendum uidetur, nisi quòd mala translatione decepti sint Arabes: error uerò nullius momenti sit, cum Princeps omnium febrium ex pituita consistentium, unum tantum faciat capitulum generale, in quo curam docet.

CONTRADICTION VIII.

Lateralis morbus an in senibus perniciosior quàm in iuuenibus.

Lateralis morbo laborantes iuuenes ex maiori parte seruantur, & senes moriuntur. 4. Contin. cap. 3. fol. 88. col. prima ex sententia Aaron. & adducitur ratio, quia natura senum est debilis ad expuendum materias contentas in phlegmone. Oppositum ibidem fol. 92. col. 3. & adducitur ratio, quia senibus non æquè graui adueniunt symptomata. Hippocrates prima Aphor. 14. dicebat, quòd senes acutas febres non adèd incurrunt. dicebat Galenus in fine commenti, quòd si incurrant, moriuntur. Quare ex hoc etiam uidetur prima sententia uerior, cui exitus, seu rei experimentum accedit. Igitur si dictum intelligatur in decrepitis, quanquam symptomata sint leuiora, comparatione tamen ad uirtutem non possunt talia esse leuiora ei: quare iuxta Aphor. 34. particu. 2. & ratione uirtutis letalior sit omnino: si uerò de mediis senibus intelligatur, tunc rarò incurrunt uehementes phlegmones laterum: quòd si par sit morbus, proculdubio in illis est perniciosus: si autem morbus ad uires proportionem habeat, celerius etiam senex moritur. Accidit autem frequenter, ut in senibus leuissimi fiant morbi, quare diuites senes minus iuuenibus periclitantur, quoniam causis periculosis non se exponunt: pauperes autem contrario modo se habent.

C O N T R A D I C T I O IX.

Phthificis an competat uinum.

Phthificis uinum exhibet Princeps, 10. tertii trac. 5. cap. ulti. oppos. 4. Contin. cap. 2. Aëtius libro 8. cap. 67. inquit: Vinum autem theræum, & scybelites præbeat, mediocri tamen mensura: dicta hæc à locis uina, nam Thera insula est enata in mari iuxta Cycladas, cuius meminit Plinius libro 2. cap. 87. & tamen Paulus dixit lib. 3. cap. 32. de tabidis ex ulcere pulmonis loquens: Potus autem eorum aqua cœlestis erit, atq; inde mulsa ex illa confecta. Idem autem Rasis cap. 60. noni ad Almanforem, ubi ex mente propria loquitur, dixit: insistendum esse potui lactis, uinum tamen subtile & temperatū aliquando esse tribuendū. Dico breuiter, Phthifis proprie dicta, quæ Galeno uocatur phthoë, libro de Diffinitionibus, iuxta medium: cum sit ulceris pulmonis morbus, uinum autem per se repurget ulcera, & materiam in eis contentam, maximè flauum, crassum, dulce, libro de Attenuante uictu cap. 12. uinū postulat sui ratione. Nocet autem in tribus casibus, ubi ulcus ex erosione fuerit, acres enim auget humores, quamuis etiam eos expurget, teste Galeno in ualidis hoc tantum intelligitur. Secundò nocet putrida uehementi febre adiuncta. Tertiò, ubi ex sanguinis sputo spontaneo ortum phthifis habuerit. Rarò autem cum accidat, ut ab his tribus conditionibus phthifis absoluat, ideo non dare uinum tutius est. Erit & id obseruandum, quòd in iuuenibus calidisq; temperamentis, noxium est: atq; ideo tales arcet etiam sanos à uini potu Galenus 5. de Tuenda sanitate, in fine. dicebat enim ille: Si cui ergo intemperie, quæ intra sanitatem existat, calidissimum temperamentum contingat, huic ex toto uinum circuncidisse prodest. Quanto ergo magis ubi tabe laboret calida: atq; eo maximè etiam, si putrida febris adiungatur. Sed nec prætereundus error est Arabum, qui subtile uinum collaudant: at contra Aëtius Theræum ac Scybeliticum quæ uina, ut inquit Galenus lib. de Cibis boni & mali succi, cap. 8. dulcia sunt, & crassissima: quin etiam id laudis genus, expurgandi pulmonem, talibus uinis ascripsit in libro de Attenuante uictu. Quinetiam syreum conuenit quod nostri sapam uocant. Verum cum ille dixisset, adiungenda ea cibis subtilis alimen-
ti: Arabes perperam intellexerunt, uina subtilia phthificis conuenire.

C O N T R A D I C T I O X.

Hippocrates an pulsum agnouerit.

Ex pulsibus signa sumpta prætermisit Hippocrates, uel quia non cognouit, uel quia minimi ea momenti existimauit, 3. de Crisi cap. ultimo, post medium: attamen in libro de humoribus inquit post initium:

Venarum pulsus, caliditas, frigiditas sic medico sunt consideranda. Idem libro de alimentis, iuxta finem, qui 27. est in ordine: Venarum pulsus, & spiratio, secundum naturam indicant hominem recte habere. & 7. Epidemiorum ante medium, σφυγμὸς πρὸ ἀγορεύουσιν, ὥς λαπτῆς θίγεις. id est, Pulsus in temporibus, ut in calore suavi. Respondent quidam agnouisse Hippocratem ut signum robustæ, aut debilis uirtutis: non autem ut letale, uel salutiferum. Sed hi non ad mentem Galeni 2. de Præfatio ex pulsibus cap. 4. ubi docet, mortem etiam inter loquendum ex pulsu imminentem cognoscere. Propterea dico, ut sæpius alias, Hippocratem non fuisse autorem libri de Alimētis, iuxta Galeni sententiam, nec 7. Epidem. uerum cognouisse tamen pulsū uenarum: sed cum non adeo illius doctrina perfecta foret, quippe quā etiam Erasistratus longe posterior ignorauit, aliis signis contentum fuisse.

CONTRADICTION XL.

Intentiones curatiuæ an à tribus sumantur.

Intentiones curatiuæ sumuntur à tribus, à uirtute, morbo, & aëre non ambiente. 9. Artis curatiuæ cap. 14. at prima A phor. 2. ponuntur quatuor, regio, tempus, ætas, & morbus: ubi præter morbum nihil est commune cum priore. Rursus 4. A phor. 2. adduntur præter hæc constitutio, natura ægri, industria, & uictus: eruntq; sic octo. At quarta primi cap. 3. ponuntur duodecim, quæ solēt his uersibus, quanquam satis rudibus, utiliter tamen explicari:

Ars, ætas, uirtus, regio, complexio, forma:

Mox, & symptoma, repletio, tempus, & usus:

Et bene si numeres figuram iungere debes.

Sexcentæ sunt diuersitates in talibus obseruandis: uerum, ut iam sæpius dixi, Galeni locus proprius est inspiciendus: is est nono ut dixi Artis curatiuæ. Sed tamen in mittendo sanguinem addidit ætatem illis tribus, libro de Venæ sectione cap. 9. Respondeo igitur ad auctoritatem primæ particulæ Aphoris. quod regio & tempus sunt pro aëris constitutione: in ætate uires comprehendit. Sunt etiam illi scopi quætitatis euacuationum non simpliciter euacuandi, ut libro de Sectione uenæ cap. 9. in fine. Ad auctoritatē quartæ particulæ, constitutio etiam ad aërem reducitur: reliqua tria nihil per se indicant, sed omnia de uirtute. Princeps enumerat ferme omnia quæ diuersis in locis Galenus adduxit intentionibus curatiuis assequendis utilia. Ad id de uenæ sectione dico, quod tres priores communes sunt omni euacuationi: ætas autem non senilis, sed puerilis additur in mittendo sanguinem: illa uerò præter principales est digna obseruatione: maximè cum quis à solita euacuatione destituitur, quam cap. 6. adiunxit.

Sed

Sed uidetur mirum, quòd ibi in cap. 9. aëris constitutionem inter principales non admittit. Respondeo, imitatur Hippoc. 4. Regim. acutorum 19. propterea obmissam fatetur in fine commenti Galenus aëris constitutionem, quam & ipse in libro de Venæ sectione dereliquit. Quatuor igitur erūt, sed aëris status ad uirtutem referri poterit ut etiam nono Artis curatiuæ. morbi autem pro sanguinis missione tres, febris ardentissima, phlegmon, dolor acutissimus, 1. Aphor. 23. Sed dolor cum à causa calida fuerit, uel ex materia in uenis existente propter dolores qui ex uitrea fiunt pituita in colo, ileo, uentriculoue.

C O N T R A D I C T I O XII.

*Euacuationes ad syncopem an conueniant. ubi de mensura
detractionis sanguinis.*

NEquè compressiones ad extremum ducendæ, periculosum enim: sed qualis natura fuerit eius qui perferre debet, ad hoc ducere expedit. prima Aphor. 3. & Galenus libro de Venæ sectione cap. 12. narrat de tribus ægris, qui per nimiam sanguinis euacuationem repēte mortui sunt. at 9. Artis curatiuæ cap. 10. enarrat tantum duos: multos autem alios perisse intercepto tempore, cum uirtus uitalis imminuta nequiuert restauari. Ergo tantæ inanitionis sanguinis tria dicit esse pericula: Primum, ne repente dum sanguinem fundunt moriantur. Secundum, ne post breue tempus non finito morbo, & prostratis uiribus. Tertium, ne ægritudo diuturna permaneat, aut aliquis malus habitus, ac decolor, cui tandem succedat perniciofa dispositio, qualis est aqua intercus, orthopnoea, uentriculi iecoris uel imbecillitas, attonitus morbus, deliriū. Et tamen prima Aphor. 22. dicebat: Atq; ubi usq; ad animi defectionem ducere expedit faciendum, si æger possit tolerare. Et 9. Artis curatiuæ cap. 4. enarrat duos ægros, quibus ille sanguinem usq; ad animi deliquium detraxit: liberauitq; eos præfenti periculo: cum primus synocha pura, secundus autem synocha putrida laboraret: unde iocus emerfit, Galenum iugulasse febrem. Porro huius sectionis tria commoda enarrat. Primum est, refrigeratio totius corporis, transitusq; illius in contrariam habitudinem. Secundum, alui purgatio, quæ talibus contingere solet semper: uomitus etiam bilis frequēter. Tertium, sudor mollis toto emanans corpore: quare hoc genus sectionis uenæ etiam imperat libro de Venæ sectione cap. 12. iam adducto. Pro solutione animaduertendum, quòd antiqui minorem sanguinis euacuationem faciebant ex uncis duodecim: ut colligitur libro de Venæ sectione cap. 13. cum dixit: Ante x i i i l. annum ne sanguinem detraxeris. Pòst autem, ubi cætera signa adsint, primum quidem ad summum detrahes ad cotylam usq;. Est autem Cotyla, ut inquit Galenus in libello de Ponderib. & mensur.

fur. mensuræ genus, quod oleo si impleatur, nonem continet uncias, vini autem decem, mellis autem tredecim ac semis: quo fit, ut cum sanguis gravior sit uino, leuior autem melle, constat cotylam sanguinis duodecim ferme uncias continere: quod & argumento euidenti cæterorum comprobatur: nam Princeps, & alii classici, & antiqui uiri loca Galeni interpretantes, pro numero cotylarum totidem supposuerunt libras. Igitur prima sanguiniseductio saltem unius erat libræ: at secunda, si quando erat necessaria semper pro dimidio primæ mensuram habebat. Neque te moueat quòd dixerit, ad summum talem esse debere: nam Galenum nunquam inuenies in sanguinis detractioe unciarum numero uti: id planè est argumentum, nullam minorem hac mensura uoluisse sanguinis missionem: quod etiam ex maxima illius quãtitate intelligere licet, quæ est sex cotylarum: id est unciarum $LXXII$. ferme libro eodem, cap. 12. tum uerò cap. 17. pro phlegmone oculorum libras tres sanguinis primo detraxit, deinde post horas quatuor unam, ut sic essent uncia $XLVII$. nec metam dimidii obseuauit, ob nimis copiosam priorem sanguinis detractioe. Si quis igitur maximam illorum temporum sanguinis missionem, ad maximam huius æui, minimamque ad minimam conferat, facile intelliget, minimam antiquo tempore sanguinis detractioem, libra non fuisse minorem, atque id merito: nam ubi opus non est, nullam facere decet: ubi opus est, si non altera præcesserit euacuatio, minor, ac turbat corpus, nec iuuamentum affert: maior autem frequentissimè ista necessaria erit. Cæterum ut ad rem reuertar, autoritas libri Aphorismorum in 3. textu de sanis est, quæ in 22. de ægris. Expedit igitur in ægris modo distinguere. nam Galenus nunquam ad syncopam ægrum deduci uult: unde cap. 14. iuxta initium, libro de Venæ sectione, dum curam phlegmonis tractaret, inquit: Potissimum autem pulsuum mutationi, tanquam iudicio haud quaquam mendaci, animus diligenter est adhibendus: continuoque quiescendum pulsu in magnitudine uel æqualitate uariato. At syncopa 11. tertii trac. 2. cap. 6. est destructio maioris partis uirtutis motiæ ac sensibilis, propter cordis debilitatem factam, & aggregationem spirituum à causa illos destruyente, uel ob paucitatem cogente. Galenus autem 12. Artis curatiæ cap. 5. in initio dixit, syncopem esse præcipitem uirium lapsum. At uerò quid intersit inter syncopem, & animi deliquium, declarat ibidem iuxta finem, cum dixit: Si quidem crudi succi loca spirandi occupent, obstruantque, ac aggrauent, syncopem efficiunt: si uerò nec obstruant, nec aggrauent, animi deliquium. Constat itaque syncopam esse animi deliquio multo grauiorem. Præcipit igitur Hippocrates, non deducendum hominem ad syncopem, sed ad animi deliquium: hoc autem fit, ut diximus, cum manente pulsu, æger animo deficitur. Verum nec hoc facere decet, nisi in morbis molestissimis, & ualidis

lidis uiribus. Validas intellige uires, non solum quæ tunc, sed etiam in posterum hoc sine detrimento perferre possint: ut nihil incurrant eorum, quæ dixerat Galenus 9. Artis curatiuæ cap. 10. Sed hanc etiam mittendi sanguinis rationem Auer. 7. Collectaneorum cap. 8. nititur reprobare tribus rationibus. Prima est, natura non facit euacuationem usque ad animi deliquium, igitur nec medicus, cum sit imitator naturæ, recte operantis. Secunda ratio fuit: non debet euacuari nisi nocitium, igitur non usque ad animi defectionem: nam illa sequi solet cum aliquid etiam utilis excernitur: fit etiam diminutio caloris naturalis in tali euacuatione, ad quam multa mala sequuntur. Respondeo, quod hæc probant de syncopa, non de animi deliquio. demonstratum est autem à nobis hoc in tertio tractatu Contradictione 22. ex autoritate Galeni 12. Artis curatiuæ cap. 8. dico etiam, quod in euacuatione nocentis humoris contingit animo deficere, absque eo quod euacuetur utile quicquam: nam & si non euacuetur utile, resoluitur tamen. ad animi autem defectum non est necessarium minui calorem naturalem: dictum autem Principis: Melius est infra subsistere, quam exquisitissimè euacuare: uerum est, cum finem sumus assequuturi.

C O N T R A D I C T I O X I I I .

Euacuatio ad animi deliquium an detur cum tolerantia, & an Hippocrates in Aphor. 22. primæ particulæ, intelligat etiam de purgatione.

IVxta eundem Aphor. 22. primæ particulæ, est dubitatio primò, quòd Hippocrates loquitur de defectione, Galenus de uenæ sectione. Item quia contradicere uidentur Ducere ad deliquium animi, & Tolerare. Respondeo, Tolerare intelligit Hippocrates cum Galeno ubique in posterum bene ferre, & restitui, ut nihil ex his tribus dictis priore in contradictione sequatur: expositio autem Galeni de Venæ sectione, est super secundam Aphorismi partem, quia illa est generalis. Hippocrates enim solet (ut 2. & 3. Aphorismo primæ particulæ, & plerisque aliis locis) à singulari ad generalem methodum procedere: quod uidens Galenus exposuit ad illius mentem: tum quòd (ut recte ipse dicebat in libro de Venæ sectione) ad determinatam mensuram non licet accedere purgantibus medicamentis, ut sectione uenæ: propterea expurgare corpus medicamento usque ad animi defectionem, scireque illum tolerare posse, est plusquam medici: non sic de uenæ sectione. Animaduertere tamen est operæpretium, tutius in ardentissimis febribus fieri hoc, quàm in phlegmone: quia hic morbus etiam post tantam euacuationem relinquitur: in febre autem unà tollitur, maxime si sine putredine fuerit: febris etiam ardens non fit nisi in iuueni-

x bus

bus robustis, & materia sanguini permixta: at phlegmone senibus etiam, & debilibus frequentius febre ardente contingere potest: in doloribus si causa etiam morbi simul tollitur securissima est:

CONTRADICTIONE XIII.

Febris ex putrido sanguine an detur.

IVxta dicta sæpius uidetur contradictio: quia ut diximus in xii. Contradictione Galenus 9. Artis curatiue 4. ponit duo genera febrium, continentium ex sanguine non putrido, & ex putrido. at 2. de Different. feb. cap. 9. dicit, quod cum sanguis putrescit, subtile eius transit in bilem, & crassum in atram bilem: ac sic nulla erit febris ex putrido sanguine. Idem clare 2. de Crisi, cap. 12. unde dicit: Liqueat autem quod cum is putrescere coeperit, non amplius bonus remanet, sed iam ad amaræ bilis naturam transit: atque in hoc illud seruatnr, triplex esse genus simplicium febrium: quæ enim ex sanguine putrido fit, iam quodammodo biliosa est. Simplicem appellat febrem, non quæ ex uno tantum humore fit, neque enim ea datur: sed in qua unius tantum humoris signa apparent. Ob id Princeps prima quarti trac. 2. cap. 43. nititur Galenum oppugnare duabus rationibus, quarum prima est: quod Hippocrates illam posuit, cum tamen potius Hippocrates contrarium dixerit: nam in fine libri de Natura humana, & in fine primi libri de Morbis, dixit, omnem continuam febrem à bile procedere: quare etiam Gentilis dixit, se hanc auctoritatem non inuenisse forsitan quod 4. Regim. acut. 67. hoc intelligere putauit Hippocratem: sed nil clarum. Si tamen locus est euidentia præferens, is erit in libro de Natura humana: nam cum dixisset in prima sectione textu 8. Quod si aliquid eorum quæ in corpore continetur plus iusto calefiat, aut siccescat, homo protinus languet: subiicit in 20. textu, hominem sanguine, bile, pituita, & atra bile constare: uerum nihil hoc aduersus Galenum, qui & sanguinis febrem absque putredine concedit, & sanguinem etiam putrescere: quare ad rationem Principis deueniendum. Constat autem in hoc uel sanguis, cum est putrefactus transit in bilem? uel cum putrescit? Si primum, istud est falsum, nam crassior pars transit in atram bilem: igitur non totus in bilem. Argumentum hoc est sophisticum, quia iam Galenus fatetur, quod in illa duo simul transit. Sed forsitan oppugnabit Princeps responsum hoc, dicens: Igitur duæ febres necessario euenient: altera ex flaua, altera ex nigra bile: quod totum est concedendum ad Galeni mentem. Secundò dicit, quod hoc fit post putredinem: & interim igitur laborabit febre putrida sanguinis: & non uidet quod hæc est responsio uera Galeni: nam datur illa febris, ex sanguine putrescente, sed est breuissimi temporis. Et ita Gentilis Galenum Auicennæ conciliat. Et quamuis Galenus utrunque genus sanguineæ

neque febris admittat: purum, quod est simplicissimum & breue: & id in quo iam sanguis in utranque bilem transit, quod diuturnum est. Febris autem quæ diuiditur in crescentem, æqualem & decrecentem, non est putrida: ideo non est de consideratione medici. Vltimo dicit, non est necessesse, quòd illud quod fit per putredinem sit putridum: quia putrefacta cum ad separationem deueniunt, non sunt necessario putrida: sicut nec uermis est putridus, qui ob putredinem generatur: nec cinis est igneus, qui ab igne gignitur. Ideo ad hoc diceret Galenus, quòd argumentum non concludit generaliter, in hoc tamen casu concludit: quia separatio hæc fit manente adhuc putredine: non sic de cinere, nec de animali. Secundum autem sensum Galenus non recipit: scilicet, quòd fiente putredine sanguinis trãseat in bilem flauam & atram. Et ratio sua in hoc est satis bona: quia in quocumque minimo tempore potest incipere putredo, non tamen in quocumque minimo tempore ex sanguine bilis fieri potest, sed longa est necessaria transmutatio: & illud quod adducit de exemplo est uerum: quòd omnia possunt putrescere, & manere in suo genere, donec perfecte corrupta fuerint. Turisanus 3. Artis medicæ, com. 38. nititur Galeno contradicere, dicens, quòd talis febris habebit accessiones pituitosæ, quoniam hic humor superabundat in sanguine. Sed quamuis argumentum sit difficile, dico tamen, quòd conuertitur in atram bilem: & quod putrescit est aggregamen humorum in potentia in sanguine, & ita totum putrescit. Igitur dabitur genus alterum febris ex sanguine puro. Dico, quòd nulla causa potest putrefacere purum, quin putrefaciat etiam impurum & ita totam substantiam sanguinis. Gentilis satis bene conciliat Principem cum Galeno: nisi quòd errat in tribus: Primo, quòd nititur conciliare eos, cum uelint esse discordes: quare melius erat dicere, quòd Galenus non sibi contradicit, & quòd rationes Principis aduersus eum possunt dissolui. Secundo, quia præsupponit hanc febrem sanguinis fieri à multitudine præfocante: hoc autem non est necessarium, sed etiam ab æstu, & aliis causis fieri poterit: & tamen uerum erit semper quod dicit Galenus, quòd non remanet per longum tempus quin trãseat in febrem ex bile. Tertiò, errauit cum Principe, quia negauit talem febrem à Galeno esse positam: cum, ut dixi, illam posuerit: uel si credidit positam, breuis temporis illam fore existimauit: cum tamen Galenus breuem eam solum ut simplicem esse uoluerit. Sed si tam breuis spatii est, cur considerat eam Galenus 9. Artis curatiuæ? Respondeo, quòd ipsa non remanet pura diu, sed bene mixta: & in hoc etiam Gentilis non animaduertit: nam seruat intentionem curatiuam, & est sectio uenæ ad defectum animi usque, quæ non conueniret in puro causone, à bile flaua solum excitato. Hanc ob causam Auenzoar 3. Theisr, in

illa febre prius uolebat bilem purgare, quàm sanguinem mittere: quãuis hoc non fit ad mentem Galeni. Propter hæc Aëtius lib. 5. cap. 75. utrunq; genus febris sanguinis posuit: & putrescentis, & non putrescētis. & in cap. 77. eiusdem, differentiam posuit febris à sanguine corrupto, & ardentis febris, quam Græci Causum dicunt. Eadem ratione Paulus lib. 2. cap. 28. maximus Galeni interpret, tanquam confessa à Galeno ambo genera posuit synocharum febrium: & Trallianus lib. 5. cap. 2. hoc idem, & si paulò obscurioribus uerbis, attestatur. Haliabbas etiam, quamuis Arabs, in 8. Theoricæ cap. 4. illam posuit, nulla Galeni contradicentis habita mentione: quo fit, ut omnium interpretum testimoniis, ut nihil plus Galenus uoluerit, quàm febrem sanguinis putridi non diu sine aliorum humorum signis esse non posse. At tunc dices: celerius subtilis pars in bilem transibit, quàm crassa in atram bilem: igitur relinquetur sanguinea febris cum biliosa. Respondeo, quòd antecedens est falsum in uia Galeni, & si consequens nõ multum repugnet illi. Conciliator uerò Differentia 89. hanc mouit quæstionem: uerum in diiudicando parum claudicat, existimans posse diu perdurare, latitantibus exacerbationibus, quod omnino est falsum: nam tertianæ accessiones breui apparent: nec ulla erat excusatio Galeno, ut illam quasi è numero febrium amoueret: si tandiu perdurare poterat. Dixit etiam, quòd extra uenas non datur febris sanguinea, quia subtile transit protinus in bilem: sed tamen datur in uenis. Verum & in uenis tam celeriter transit sanguis in bilem, quàm extra: ideò aliam causam quærere conuenit, cur non detur intermittens. Auicenna autem Galeno contradixit libenter in his quæ ad contemplationem pertinent, nec à iurgiis temperauit, ut 9. de Animalibus, cap. 2. Galenus (inquit ille) dimidiũ solum rerum olfecit, & tamen cum hoc ausus est philosophiam profiteri. Vix credat quisquam tam insolentibus petulantibusque uerbis Galeno Auicennam maledixisse. Auer. 3. Collectaneorum 8. & 4. eiusdem 31. & 7. etiam libro cap. 8. hanc materiam tractat, parum ab hac determinatione differens. Rasis 17. Con. cap. 4. fol. 350. col. 2. inquit: Si sanguis putrescit fit febris & quamuis subtile transeat in bilem, non tamen est febris biliosa, quia nullam ut addurens habet quietem, nec adeò ut ea quæ fit à bile æstuosa est. Ideo existimat, quòd non est à bile febris illa, quia in illa bilis non putrescit. Sed quamuis non fit putridus, putrescit tamen, quia manent causæ putredinis, utpote obstructio: & hoc toto tempore dicitur febris ex sanguine putrido. quia sanguis iam putruit, sed humores nondum putruerunt, sed putrescunt, & sunt in uia. Contrà igitur uno humore putrescente, alii necessarìò putrescunt. Ad hoc alias dicit: quoniam una est præparatio uni & non alteri.

C O N T R A D I C T I O X V.

Peracutus morbus an in tertio die consistat.

Peracutum morbum uocat, qui statim in summo uigore consistit. Statim autem est intelligendum, circa primos quatuor dies, uel paulo ulterius 1. Aphor. 7. sed in Commento 6. eiusdem particulæ inquit: In peracutis autem, qui ad summum uigorem in tertio die perueniunt, uictus summè tenuis optimus est. Respondeo, Peracuti morbi 5. Aphor. 6. in primo circuitu, idest in quatuor diebus finiuntur, dicebat Galenus & 1. de Crisi 16. unde 2. de Decretoriis diebus cap. 12. iuxta initium: Acutus morbus uocatur qui septimum diem excedit: peracutus autem, qui intra illum terminatur. At rursus peracutorum genera duo sunt: Non exactum, quod quartum diem excedit, ad septimum pertingens: Qui uerò sub ipso quarto die finitur, exactè est peracutus. Similiter & acutus exactè non ultra, XIII. diem progreditur, non exactè finitur in x. Rursus alii qui ad x. diem extenduntur acuti prius fuerunt: sed conuerfi in diurnos uocantur delapsi ex acuto. Qui autem post x. diem finiuntur chronici, seu diurni sunt appellandi. Ob hoc igitur rectè inquit Hippocrates in Prognosticis, quòd acuti morbi intra x. dies finiuntur, morbos uniuersos sub duobus dierum terminis comprehendens: acuti autem in quatuordecim diebus finiuntur, cum simpliciter tales fuerint: idest perpetuum seruantes augmentum. Cum igitur in 7. Aphor. præacutos inquit terminari intra diem quartum, uel paulo ultra: non de statu, sed de tota terminatione loquutus est. Quòd autem in 6. Aphor. dixerit, quòd ad summum uigorem in tribus diebus perueniunt, in Græco non habetur, est enim additio falsa. Sed si libet tueri, non terminum morbi, sed illius statum dicas declarasse: nam reliquum ad quartum usq; pro declinatione computari debet uera, aut ad mortem. Porro quòd accessiones per tertium fiant, & in accessionibus morborum status: memini iam me illud superius docuisse.

C O N T R A D I C T I O X V I.

In morbis peracutis an uictu exquisitè tenuissimo utendum sit.

Iuxta illud contingit dubitare, nam cum morbus peracutus est, uictu extremè tenuissimo utendum est. 1. Aphor. 7. Est autem, ut inquit Galenus 1. Aphor. 4. uictus extremè tenuissimus, ad statum usq; peruenire nihil dando: aut mellicratum, seu mulsam tantum. præacuti autem morbi numerantur 5. Aphor. 6. distentio neruorum, attontus morbus 2. Aphor. 42. cinanche & sinanche 4. Aphor. 34. febris pestilens, non tamen ex toto genere, ut apparet prima quarti. connumerantur & 5. Aphor. 30. morbus comitialis, & conuulsio: quanquàm enim acutos nominet Hippocrates

ibi, manifestum est tamen de peracutis debere intelligi. In omnibus igitur his ac cæteris aliis abstinendum erit à cibo. Sed hoc habet difficultatem, quia declaratum est à Gal. in Commento 19. secundæ particulæ, quòd morbus peracutus cito terminatur, & sæua habet symptomata. At uerò accidentibus uirtutem prosterntibus illico dandus est cibus, 1. Aphor. 9. quomodo igitur uictu tenuissimo utendum erit? nona etiam tertii cap. 11. dat oximel & syrupum de melle in præfocatione: igitur non utetur uictu tenuissimo. plus enim nutrit oximel, quàm mellis aqua: tum maximè quòd Galenus in Commento 7. primæ particulæ, uult ut in morbis terminandis in quarta die, uel citra, exquisita inedia possit sufficere. Aëtius quoque lib. 6. cap. 27. in cura attoniti morbi, exhibere nos docet alimenta pauca quotidie leuia, calida. & prima tertii cap. ultimo cibus patiens attonitum morbum sit panis in mane cū ficibus ficcis. Aëtius quoque in cap. 95. lib. 5. docet quòd in febre pestilenti sufficit ut utantur uictu contrariæ qualitatis: nō dicit tenuissimo. & Princeps prima quarti trac. 4. cap. 4. loquens de laborantibus hoc febris genere inquit: Et plurimi eorū qui cibum alacriter sumunt seruātur: cōsultatq; ut capiant ipsum pro uiribus. Aëtius etiam lib. 6. cap. 2. iubet in phlegmone cerebri ut cibentur alica, uel ptisana: neque dicendum quòd de declinationis tempore intelligat, nam subiicit: Morbo autem mitigato dentur oua forbilia & lactuca. Idem in syncopalibus febribus lib. 5. cap. 97. & 98. iubet in ea quæ fit ex redundantia crudi succi, si uirtus deficiat, hominem nutrirī pane & uino: in minuta confertim, non paulatim, quæ ambo à Galeno sumpsit 12. Artis curat. cap. 3. Verū ille hæc concedit tantū his, qui syncope uexantur prostrata uirtute: necesse est enim periculum periculo propellere: cū igitur symptomata grauiā sunt, at uirtus constat, tunc omnino abstinendum est à cibo: neque enim semper magnitudini illorum uirtus succumbit. Oximel autem cibus est medicinalis, uel medicina cibalis, ut 12. Artis curatiuæ cap. 3. habetur. propterea non connumerabitur inter cibos puros & simplices. in 7. uerò Aphor. primæ particulæ, loquitur Galenus sub distinctione: ut uel abstineant in totum à cibo, uel utantur multa, uel modico ptisanæ succo: nam omnibus modis his exquisitè tenuis uictus ac tenuissimus adhibetur. De attonito loquitur Aëtius & Princeps in declinatione: quī enim fieri potest, ut consistente morbo panem & ficus edant? qui nec possint os aperire, uel oculos attollere? Ad id de febre pestifera est exceptio, quia illa nec cōtione habet, nec symptomata ex actione uirtutis, sed ex malitia materiæ: ideo sumus in casu Aphor. 9. primæ partic. in phlegmone autem cerebri, cum sit morbus simpliciter acutus, cibum damus, & etiā quia est morbus compositus. De syncopali febre dictū est, quòd solum ubi syncopis inuaserit, tunc nutrimus si morbus intra septimum diem sit terminandus: quinimo etiam

etiam utimur uictu tenuissimo, etiam si diutius sit permanfura usq; ad septimum diem, modò uirtus sufficiat.

C O N T R A D I C T I O X V I I.

Morbis acutis an necessario febris complicetur.

MOrbus acutus febrem habet necessario sibi iunctam, 1. Aphorif. Commento 7. & 3. de Diebus decret. cap. ult. uerùm 3. Prognosticorum 34. dixit, conuulsionem esse aliquando sine febre, cum tamen numerentur inter morbos acutos. & 1. Prognosticorum 26. distinguit acutos morbos cum febre uenientes ab his qui febrim minime iunguntur. & 2. Aphor. 19. idem agit. & 5. Aphor. 30. connumerat conuulsionem, comitalem morbum, & attonitum, & distentionem, qui sine febre aduenire possunt: idem dico de coli dolore. Respondeo, morbi acuti, qui febrem sibi adiungunt necessario, eam sortiuntur inseparabilem: non tamen omnes febrem sibi adiungunt: hoc igitur uoluit Gal. in 7. Commento primæ particulæ. & 12. cap. tertij, de Crisi, attamen uerba illa aliâ uidentur præferre sententiam, inquit enim ibi: *ὥς δ' ἡ πικροκρῆσις ἐλεγε, τὸ μετὰ πυρετῶν σωεχὲς γιγνομένης συμβεβηκός: ἐξ ἀνάγκης ἔσται τὸ ταχέως κελνεῖσθαι.* id est: Ut autem Hippocrates dixit, cum febre euenientis, accidens est, necessario celeriter iudicari. Quare non omnis acutus cum febre gignitur: interpret non est lapsus. Sed quidam legentes, ut & pleraq; alia, in contrariam directè Galeno sententiam uerba hæc adduxerunt.

C O N T R A D I C T I O X V I I I.

Olera an frigidum & humidum exhibeant alimentum.

DIximus antea, quòd omnia olera aquosum, & tenue, ac paucissimum præbent alimentum, 2. de Alimentis, capite de plantis spinosis. nec potest dici, quòd de frigidis tantum intelligat: connumerat enim Scolymum inter ea, & si aculeatum: quem constat ex 8. de Simplic. medicam. esse siccum in secundo, calidum uerò in fine secundi, uel initio tertii. At uerò in de Dissolutione continua cap. 6. uult, quòd brassica atramentalem gignat. Auerroës quoq; lib. 5. Colléct. cap. 41. uult, quòd omnia olera, præter lactucam & buglossum, melancholiam gignant. Galenus uerò in libro de Attenuante uictu, cap. 2. distinguit: nam frigida & humida aquosum humorem gignere fatetur, exemplificatq; de cucurbitis & atriplice: calida uerò & sicca calefaciunt, & attenuant. Rasis uerò 9. ad Almanforem, cap. 13. inquit: Et deuilet omnia olera, præter humectantia, qui melancholiam patitur. Galenus in Commentario 3. de Diæta fanorum, uult brassicam inter olera calefacere, & siccare: nam Hippocrates in textu ab oleribus esse abstinendum per hyemem admonuerat: quasi quòd olera in-

frigi

frigidet, & humectent. Gal. lib. 2. de Alimentis, brassicam tenue alimentum & siccum præstare fatetur: ad lentem uerò comparata, humidum: idem libro 7. de Simplic. medic. fac. quasi temperatam uidetur existimasse in calido frigidoq; sed tamen exiccantem: unde non recte uidetur Serapio caules inter medicinas in primo calidas collocasse cap. 32. quamuis concordet cum Principe, qui 2. Can. cap. 143. ponit illam calidam in primo, siccam in secundo. Sed hæc obiter: ad rem redeo. Aetn omne nutrimentum olerum humidum est, seu aquosum, tenue, ac paucū: potentia uerò aliud calidum, aliud frigidum, aliud adurēs: crassum autem, aut plurimum esse non potest: uerum etiam ut medicina reliquum nutrimenti exuere potest aut cōdensare, sic & sanguinem, hocq; modo crassum alimentum exhibere. Ratio autem est, quòd ab oleribus nō potest nisi tenue, & paucum alimentum secerni: calidum autem, uel frigidum, humidum, uel siccum, pro oleris ipsius qualitate.

HIERON. CARDANI

CONTRADICENT. MEDI.

CORVM LIBRI PRIMI

TRACTATVS

QVINTVS.

CONTRADICTIONE I.

Caro an instrumentum tactus.



CARO, uel quod ad ipsam habet proportionem est tactus instrumentum, 2. de Partibus animalium cap. 1. & cap. 8. iuxta initium. Videtur autem adducere duas rationes nō leues: quarum prima est, quod omnibus animalibus commune est, necessario debet esse instrumentum tactus: quia tactus communis est omnibus animalibus: animal enim per tactū, ut habetur in 2. de Anima. Sed sola caro, uel quòd ei proportione respondet in exanguibus animalibus, est communis omni animali: quia ut ipse declarauerat, caro est tutela animalibus à frigore, & calore: Est igitur omnibus communis. Altera ratio est, quòd corpulentissimum in animalibus debet esse subiectum sensus tactus: tale autem est caro, ut manifestum est: nullum enim animal magis abundat & ubiq; alia parte simplici, quam isti similem uocant, quàm carne. Manifesta est assumpta prima propositio, quia cum tactus sit ad tutelam animalis, debet esse in quacunq; animalis parte: & etiam corpulentissima, cum

cum primas solus hic sensus sentiat qualitates, & etiam subiiciatur doloriquare opportunum est, ut sit etiam corpulentum hoc instrumentum, aliter cito dissolueretur. Vnde patet cur instrumenta aliorum sensuum omnia latent in profundo corporis: solus autem tactus instrumentum, cum toti corpori, & exterius maxime, esset necessarium, in corpulentissima parte positum est. Prima ratio indiget propositione declarata 8. Phy. 46. & est, quod singulis formis suae materiae debetur: nec potest forma hominis recipi in luto, aliter una species fieret simul per se, & a casu. Sed hic oritur difficultas, quia Philosophus 2. de Partibus, cap. 10. duo vult esse necessaria singulis animalibus: partem, per quam cibum immittat, & emittat: igitur non videtur tactus ob hoc necessario in carne fundari: propterea quidam ex duabus rationibus unam conficiunt. Sed tamen causa sensus alia est a causa operationis. Ideo tales non videtur intelligere quod dixit Philosophus in eodem 2. de Partibus, cap. 1. cum inquit: Operationes ipsae sunt dissimilium, & ex pluribus compositarum partium: sed vis ipsa sentiendi est simplicis partis. Ut igitur instrumenta sumendi cibum sunt composita, non possunt esse caro, aut nervus: sed compositum, seu ut dicunt dissimilare, quod tamen in omnibus inuenitur animalibus. Sed hoc primo habet difficultatem, quia idem Philosophus 2. de Partibus, cap. 10. iuxta finem, inquit: Tactus autem sensorium non caro est, nec pars eiusmodi aliqua, sed aliquid intimum. Idem etiam videtur innuere Philosophus a textu 107. ad textum 116. secundi de Anima, ubi concludit tandem, quod caro non sit instrumentum tactus, sed medium. Adducit autem duas rationes, quarum ultima, quae ponitur in textu, 116. est clara, & est: Sensibili posito supra sensum, non fit sensus: sed sensibili posito supra carnem, fit sensus, ut experimento patet: igitur caro non est primum sentiens, sed aliud. Prima propositio in reliquis sensibus inductione ostenditur, ut patet de colore supra oculum posito. Alia ratio videtur obscurior, quae proponitur in textu, 106. & 107. secundum Averrois expositionem, & talis est: Si sensus tactus sunt plures, caro erit medium, non instrumentum: quia impossibile est ut unum instrumentum inferuiat pluribus virtutibus: at uero sensum tactus diuersum esse ostendit: unde etiam 2. Collectaneorum 13. triplex est sensus tactus: Vnus communis toti corpori, quo sentimus calidum, & frigidum, & reliqua. Secundus, quo os uentriculi hora inanitionis famem sentit. Tertius, quo uirga summitas hora concubitus ueneri, sentit delectationem. Sed tamen de hac multiplici sensus natura non uidetur intellexisse Philosophus in textu 107. sed arguit sensum tactus esse multiplicem, quia sentit calidum, frigidum, siccum, humidum, durum, molle, ac talia. unde diuersitas Averrois est potius ex modo sentiendi, & ex partibus instrumentorum, sicut dixit de carne, quae est in summitate uirga. Quidam dubitarunt frustra, deesse solutionem dubitationis: cum in textu Gra-

co iaceat, ἔχει δὲ πινυλόν. & reliqua: ut ratio prima in nullam uim redigatur: cum fateatur Aristoteles, sensum tactus, quamuis plures agnoscat differentias, unum esse. Secunda etiam ratio uidetur tam aduersus neruos militare, quam etiā aduersus carnē. Sed Auerroës 2. Collectaneorum, inducit simul rationem contra Galenum pro Aristotele, & soluit rationem Galeni hoc modo: Quod debet sentire, medium esse debet inter qualitates, ut iudex 2. de Anima. 118. Sed neruus est frigidus & siccus, & cerebrū frigidum & humidum: igitur nec neruus nec cerebrum possunt esse primū instrumentū tactus. At quia caro declinabat ad calidum & humidum, necessarius fuit ei neruus ad temperandū carnem: ideo caro neruo carēs, obtusi sensus est: non dicit, quod sensu careat. Sed remanet difficultas alia, quia raro uidetur cōcedi quod sit mediū, & sensus tactus plures 2. de Anima. 111. cum iam, ut dixi, difficultatem hanc in 108. sustulisset: propterea Auerroës in cōmento illo roborauit rationē Philosophi dicens: Acutū & graue, magnū & paruum, in sono sub eadē specie uel saltē genere cōtinentur: ideo auditus potest esse unus: sed calidum & frigidum, & graue & leue, non continetur nisi sub homonymo genere: quare tactus nō potest esse unus. Deinde in fine cōmenti grauius agit: & primo uidetur cōsentire his, qui neruos uolunt esse instrumentū tactus: & dicit, Aristotelē in libris de animalibus ignorasse neruos: deinde in libris de Anima, ratione, nō sensu illos inuenisse: quoniam hos post libros de Animalibus cōposuisset. Sed cum dictis suis aduersetur in Collectaneis iam à me expositis, Philosophū etiā indignè redarguit: qui 3. de Historia animalium cap. 5. de neruis plurima differit: cum locus ille etiā ante libros de Partibus constituitur: quinimo habere aliquā uim circa tactus sensum, Philosophi ea uerba ostendūt: nulla corporis particula stupore tentatur, quæ neruis careat. Adducit 2. de Partibus animalium Auerroës cap. 2. quatuor alias rationes, quod caro sit instrumentum primum tactus, non neruus. Prima est: Neruus non ubiq; extēditur, sensus tactus est in toto animali diffusus: igitur cum caro extēdatur, erit caro instrumentū primum, nō neruus: etiā dato quod caro indigeat neruo ad sui temperamētum. Secunda ratio, quæ magis propria est illi (cum prima fermè sit ea quæ Philosophi, nisi quod ratio Philosophi est generalis: Auerroës uerò ut comparatur caro soli neruo, & ideo aduersus Galenum) Neruus est durus, igitur non est aptum instrumētum sensui tactus: nam durities est impedimento sensui: & ideo etiā Galenus duriores ex neruis motui, molliores sensui dedicabat. Tertia ratio: Propriū instrumentum uisus est humor glacialis in oculo: quamuis Galenus fateatur neruos concurrere ad causandam uisus operationem: igitur idem de tactu. Postmodum ostendit etiam primò non solum propriè hoc ei inesse: quia caro est temperatissima partiū similium quæ sint in animali: sed tactus

ctus primo inest temperatissimæ parti, non intemperata, igitur carni, non nervo, uel cerebro. Deinde dat similitudinē inter cor & carnē: nam cor, ut est instrumentū, & membrū principale conseruans totū corpus, & omnes functiones tanquā agens perficit: sic caro tanquam patiens, cum sit membrum, seu pars similis, recipit: ideo hæc duo natura iunxit in unum, fecitque cor carnosum. Tandem cōcedit, animalia aliqua nervo & cerebro carere, ut spongas marinas: & tamē habent hæc sensum, licet obtusum. sententia igitur Auerrois est, quod caro nervo contemperata, sit primū, proprium, & perfectum tactus instrumentum: quanquam in 2. de Anima, paululum ob uerba Philosophi deflexerit, ut quasi cum Galeno consenserit. Nec potest dici, quod credat Aristotelē etiam sic sensisse: nam non fuisset sermō contrarius, imō concors 2. de Anima. 108. cum dictis 2. de Partibus animalium: nec etiam oportuisset dicere, carnē esse mediū, si cōtemperata est instrumentum: nec oportuisset excusare Philosophū de ignorātia nervorum, tempore quo composuit librum de Partibus animalium: quia hoc sufficeret Philosopho, quod caro esset instrumentum tactus: quia de temperamento etsi non dicat, non tamen illū negauit. A uicenna in 2. de Anima cap. 3. idem fatetur, quod caro ut nervorum uirtute temperata, sit proprium & primum tactus instrumentum. Aliud tamen uult 12. de Animalibus cap. 6. cum dixit: Sed consiliū optimum, quod mihi uidetur, est, quod primum sensibile sit spiritus: & ponit ibi quatuor opiniones: Prima, & magis remota est, quod primum sensibile sit solū cerebrū, uel nervus: & contra hoc arguit: quia cerebrum non sentit cum phlegmonem patitur, sed tantum cum eius panniculi. Secundo, quia non ualet, Oculus uidet per uirtutem à cerebro infusam, igitur cerebrum est primum instrumentum uisus, & non oculus: nam medici concedunt primam propositionem, & negant secundam, quæ est contraria sensui. Tertia ratio est alibi dicta, quia cerebrum & nervi sunt extra temperamentum, & cum hoc declinant ad frigidum: igitur cum frigidum aduersetur sensui, non conuenit ut uel cerebrum, uel nervus sit primum sensitiuum in tactu. Secunda opinio est: Dicit quod sit carnea substantia: & hæc est (dicit) dignior quàm quod sit nervus, uel cerebrum: tum quia carnea substantia est temperatior, tum quia per se calidior: & caliditas non impedit sensum. Sed tamen illa (inquit) non uidetur mihi primum instrumentum: & ratio, ut credo, est, quia nisi contemperetur à spiritu, non sentit: & etiam: quia (ut diximus) Aristoteles uidetur negare hoc manifestè: & sic reprobauit primam opinionem, quæ est Galeni & medicorū: & secundā, quæ est Auerrois & Conciliatoris in differentia 42. quæ omnino est falsa. Deinde ponit tertiam, quod cor sit primum sensitiuum & instrumentum ratione carnis suæ: non quia temperatum, sed quia fons est sensus, & calidum: ca-

litas uerò est principium, & fouens omnes operationes. Et hæc uidetur fuisse opinio Alexandri, quanquam uideatur de carne absolute dixisse. Sed tamen nec hanc sententiam ueram esse credit, quia & ipsum cor sentit secundum spiritum, & forsan intelligit, quòd non approximatur sensibilibus sicut spiritus, nec potest uerè dici cor intimum comparatione ad carnem. Relinquitur igitur, ut primū sensus tactus instrumentū apud Auicennam, & iuxta illius sententiam; sit spiritus: quia non potest esse aliud aliud ex his quæ secundum rationem instrumentum dici poterant.

Sed est etiam apud illum difficultas & contradictio cum Aristotele: nam in II. de Animalibus dicit Auicēna, quòd uirtutes naturales sunt in membris consimilibus, animales autē in dissimilibus: sed uidere, & tagere, sunt uirtutes animales: igitur erunt in mēbris dissimilibus, & nō consimilibus. Et hoc cōtradicit directē non solum dictis Philosophi 2. de Partibus, cap. I. iam declaratis: sed conclusioni factæ: quia spiritus non est primò mēbrum, sed pars tantum corporis nostri: & si esset membrum, esset consimile, non instrumentum. Sed hanc difficultatem dissoluit dictum Philosophi primo de Historia animalium, cap. 4. ubi loquens de sensu tactus, idem dicit quod 2. de Partibus cap. I. scilicet, quòd uirtutes omnes, quæ patiēdo perficiuntur, ut sensus, in aliqua consimili parte consistunt: & proprie de tactu exemplum dat, qui sit uel in carne (dicit) uel alia parte consimili, sed tamen sanguinea, aut quæ illi respondeat: ex quo etiam clarum est illū exclusisse neruum, cerebrumq; quæ non sunt sanguineæ partes: tamen etiam carnem neruosam, cum sit dissimilium partium: uirtutes autem agentes in dissimilibus continentur, ut motrix: quare apud Auicennam pro NATURALI, lege PATIENTEM, seu quæ patiēdo perficitur: pro SENSITIVA, AGENTEM. Nec potest dici, quòd sensitua apud Auicennam dicatur, actiua uirtus, cum in hoc Aristotelem Princeps sit secutus, non Galenum.

Sed est alia contradictio in dictis Auicennæ 5. de Anima, cap. 8. dicit enim iuxta medium, quòd cor est sensibilius cerebro, in sensu tactus: & ideo dolores cordis sunt longe maiores & intolerabiles: & uidetur statuere cor primum quod sentit, cum Philosophis. Et in fine capituli uult contra omnia dicta hic, & alibi, quod neruus sit primum instrumentum tactus cum musculis: & quòd forma uirtutis sensitivæ sit in anterioribus uentriculis cerebri. Ad hoc respondetur, quòd hīc loquitur secundum medicos, & sermones magis sensibiles: antè, & alibi, secundum ueritatem. Et quòd hæc responsio non sit uoluntaria, uide quid dicat prima primi, doc. 5. cap. primo. dum de cordis principatu loquitur, inquit enim: Et Philosophi sermo cum subtiliter certificatur, est ueracior: sed medicorum sermo in primis cum attenditur, est magis manifestus. Noluiffe

luisse etiam omnino Philosophum neruum esse tactus instrumentum declarant uerba eius 1. de Anima, cap. 5. inquit enim, *ὅσα γὰρ ᾗναι τῶν ποῖς τῶν ζώων σώματα ἀπλῶς γῆς, οἷον ὀστέα, νῦντα, τρίχες, ἄθροος αἰσθητικὰ, ὡς τε εἰς τῶν ὁμοίων, καὶ τοὶ προσήκει.* Id est: Quæcūq; enim sunt in animalium corporibus simpliciter terræ, ut ossa, nerui, pili nihil sentire uidentur: quare neq; similia sibi: & oportebat tamen. Non ignorauit ergo neruos, sed sentire negauit. & in libro de Sensu & sensato, cap. 2. in fine, dum olfactus sensorium in cerebro collocat, tactus & gustus primum instrumentum iuxta cor ponit. Quare cum omnes, quo ad primum sensitiuum, in corde collocet, manifestum est hic ipsum loqui de instrumento, non de primo sensorio. Quare hoc etiā eius cæteris dictis congruit, quod instrumentum tactus nec est neruius, nec caro, nec neruosa caro, cum talis ubiq; reperiatur, non cor ipsum: nam cor non rectè iuxta seipsum dici potest, sed initium aliquid.

Reliquum est igitur, ut ostēdamus, cur carnem dixerit instrumentum tactus: & ut Galeni rationibus respondeamus, declaremusq; quid hoc sit initium instrumentum. Conciliator uidetur Aristotelem arguere, quod ueram neruorum naturam ignorauerit: nam 3. de Historia animalium, cap. 5. inquit: Nam ossa omnia, seu uicissim foris tanguntur, siue alterum alteri inferatur, neruis ligantur: & circiter ossa quæuis neruorum copia ducitur, excepto capite: nam id futuris ipsorum ossium continetur. Quare manifestum est, ligamenta ossium cum neruis ipsis confudisse, nec illorum propriam naturam agnouisse. In cap. etiam 11. eiusdem libri iuxta initium ait: Sensu cutem carere constat, maximeq; in capite, quoniam nulla interposita carne ibi ossi adhæreat. Et certè hæc prodigiis similia uidentur, cum cutis capitis auulsis capillis dolorem afferat: ligamenta etiam ut commixta neruis maximum dolorem inferunt, ut in eculeo tortis manifestum est: quod tormenti genus Aristotelem non ignorasse, cum antiquissimum sit, uerissimum est. Sed si non de cute capitis uerba habuisset, facile poterat excusari: nam cutis exterior, quam uocant qui dissectionem exercent *τὸν δερμίδα*, proculdubio sensu carere uidetur. At cum de capitis cute loquatur, utrāq; amplecti uidetur. Incusat & Conciliator Auerroem inconstantia, qui modò carnem, modò neruos, modò neruosam carnem, primum tactus instrumentum dixerit: ut etiam in Paraphrasi de Sensu & sensibili, iuxta initium, ubi declarat proprietatem sensus tactus, quod sentiat instrumentum, quamuis, non sit nudum à qualitatibus primis, ipsas tamen primas qualitates, nam ibi carnem posuit instrumentum tactus: & in secundo de Anima, neruos: & in Paraphrasi de animalibus, neruosam carnem.

Quamobrem cum rectum sit iudex recti & obliqui: ideo primo uidendum

dum erit, quidnam senserit Philosophus de hoc. Videtur autem iudicio meo constituere duo, principium sentiendi in corde, & instrumentum ipsius carnem. Cum autem dixit, cutim non sentire: intellexit cuticulam uocatam *ὑπόδημα*. nam hæc proculdubio parum, aut nihil sentit: non autem ex toto carere sensu manifestum est: cum dicat, cutim capitis maximè talem esse, id est sensus expertem. Nam si ex toto cutis sensu caret, cutis capitis in nullo minus potest esse sensitiua reliqua cute. At uerò carnem non propriè sentire uult, sed receptiuam esse sensus, est manifestum, uelut medium quoddam, cum sensus in corde perficiatur: nam in doloribus & uoluptate totus homo afficitur: & hoc est, quia cor ipsum sentit, non autem in uidendo. Gustus etiam quædam tactus species. Primum igitur non perfectum sensitiuum est caro: primum & perfectum est cor ipsum: & propterea bene dixit Auerroës in principio libri de Sensu & sensili, quòd tactus & gustus medio non indigent, ut reliqui sensus: & tamen dixit Philosophus, quòd omnis sensus sit per medium, ut 2. de Anima 98. & 116. exponit Zimarra de medio exteriori. Sed licet hoc sit uerum & Aristotelis, attamen altius insedit demonstratio 2. de Anima 116. & est, quòd sensibile positum super sensum non facit sensum perfectum: & ideo cum sensibile positum super carnem sentiat, sensus perfectus non est in carne. Caro igitur habet duas uirtutes, altera per quam est primum instrumentum sensus imperfectum: altera qua est medium perfectæ operationis sensus tactus. Et ideo dolor cum sit imperfecta quædam sensus operatio, sit posito sensili super sensum. Per carnem autem quid intelligat philosophus, apparet, quòd substantiam generalem, quæ constat ex sanguine, uel ei proportionali, disseminatam per totum corpus, seu neruis commodatam, seu non. Et quòd hoc uoluerit Philosophus patet, quia in eodem 2. libro de Partibus, non dico in diuersis, nunc carnem facit primum sensitiuum in cap. 1. & negat eandem esse expresse, cap. 10. Quare necesse foret, nisi de duobus sentiendi generibus loqueretur, ipsum fuisse maximè obliuiosum. Et si quis quærat, quinam est usus huius tactus imperfecti? Dico, quòd est ad salutem animalis: ideo sæpius dixit, tactum esse non unum numero, cum tamen alii sensus in plures non diuidantur. Sed cur dixit, non in corde, sed iuxta cor fieri? Respondeo, quòd uult carnem, quæ est in circuitu cordis, esse talem: nam sanguis sentire non poterat: alia autem non uidebantur adeo terrea, ut possent esse tactus instrumentum. Ex quo patet, quàm indigne Auerroës conetur relinquere, & coarguere Aristotelem. Nec opinio Auicennæ de spiritu est multum ad propositum: cum hanc quæramus de primo receptiuo, non de instrumento recipiendi: aliter esset dicendum, quòd spiritus esset primum receptiuum cuiuslibet sensus: & si sic, iam erit commune, & nos quærebamus proprium: quare hoc non erit
ad

ad propositum . Ex hoc patet, cur Auerroës modò dixerit carnem, modò neruum, modò neruosam carnem instrumentum : conatus est enim sequi quem iudicabat non unam sententiam tenere Aristotelem . Eadem ratio euertit Auicennam, qui modò cum Galeno , modò cum Aristotele, eoq; suo iudicio à seipso dissidente, sentire uoluit: unde illa postmodum dictorum suorum multiplex contradictio . Rationes autem Aristotelis duæ pro sensu imperfecto in carne, & una pro perfecto in carne cordis exposita sunt à nobis, Ex hoc patet solutio rationis Auicennæ : nam sensus imperfectus est diffusus per totum corpus ad conseruationem animalis , sed perfectus est in corde: nec animal ipso indiget ubiq; , quia talis non est necessarius ad illius conseruationem , sed ad perfectionem . Est etiam (ut nihil, quamuis leue pro Philosophi opinione præteream) illud considerandum, cur penis glans tanto sensu ac tam peculiari prædita sit, quæ carne constat : nam pauculi illi, ac exiles nerui , non per totam carnem disperguntur: neq; cum à capite proficiscantur in ulla alia parte consimilem delectationis uim efficere possunt : quare eius carnis hoc est priuilegium . Stupidum etiam efficiunt Aristotelem , qui neget, sensile super sensum possum sentiri: cum constet, nos ignem, in quacunq; corporis parte ponatur, non leuiter à nobis sentiri . Id autem accidit studiosis uerborum autorum, non ueritatis rei, ut simul cum re ipsa etiam mentem, quam maximè uenantur, eorundem amittant .

Igitur hac nisa opinione, ad Galeni sententiam , ex toto diuersam cum suis rationibus, accedamus : is nanq; non nugis , ut reliqui , sed sensu ipso Philosophum oppugnat: conatus ostendere neruos , non carnem, esse instrumentum tactus . Verùm ante eas inducam rationem communem ex concessis à Philosopho . Idem est instrumentum sensus & motus, 2. de Par. cap. i. iuxta finem, atq; id iure: quorum enim sensus absq; illo: neruus est instrumentum motus, non caro: igitur etiam sensus ? Dico , quòd Philosophus dicit , quòd idem est principium non instrumentum . quinimo Galenus ipse confitetur , quòd durioribus mouemus, mollioribus aptius sentimus ; etsi concedat utrunq; genus utraq; præditum esse uirtute . Galenus igitur primo de motibus manifestis, sic ostendit uirtutem sentiendi in neruis esse, & à cerebro proficisci . Si amputetur neruus, quicquid supra remanet, sentit, & motum retinet: quicquid infra est , utroq; priuatur . Et similiter infert, Si præcidatur spinalis medulla, id enim quod infra est , & à parte præcisæ exoritur, sensum amittit, & motum: igitur cum superiora hæc retineat , erit uirtus sentiendi & mouendi neruo quidem insita , & à spinali medulla originem ducens . unde primo de Vsu partium 16. inquit, Erit igitur neruorum utilitas facultatem sensus & motus in membra ipsa ex principio deducere . Hoc autem iam cerebrum, & medullam spinalem esse

esse ostenderat: unde lib. 16. cap. 2. Quod uerò sensuum instrumenta nervos ad sensum exposcerent, illud iam abunde superius me declarasse puto. Et infra: His autem, quibus exactiore erat opus sensu, molles natura nervos tribuit: his uerò, quæ uoluntarium motum exercebant, duros omnes: quibus autem opus erat exactiore tum sensu, tum motu, etiam utrumque genus. At uerò in 5. lib. cap. 9. tres scopos naturæ in nervis disseminandis declarat ad sentiendum: primum, uelut uidendum, audiendumque: secundum ad mouendum: in his duobus maximis, uel etiam pluribus nervis opus fuit. At uerò tertium scopum doloris sensum statuit: cuius causa nisi aliud adiungatur exilibus opus nervis fuit: quales renibus, & iecori, & pulmmoni natura inseruit: cum instrumenta non essent sensus ullius aut motus. Eandem sententiam repetit in libello de Virtutibus nostrum corpus dispensantibus: quem Galeno ego tribuo, ut etiam librum de Partibus artis medicatiuæ, & de Motibus manifestis: & si initium sit eius, Dixit Galenus: nam hic mos Arabum fuit libros à Græca lingua ad suam transferentium. Sed nec forsitan Introductorius medicorum, & si aliàs de illo non parum dubitauerimus, à Galeno erit alienus. Sed hæc obiter: illud consulto: Videri mihi eos, qui de hoc scripserunt, adeo contemptim hanc tractasse disputationem, ut maxima quibus innititur Galenus argumenta præterierint: quale illud: Quod maximè sentit principium debet esse sentiendi, etiam aliis: tale autem nervus est: 4. Artis curatiuæ, cap. 6. namque ibi dicit: Si nervus lædatur, aut qui ex eo componitur musculus, aut tendo, ubi locus uacuus carne sit, tunc doloris, uigiliarum, conuulsionis, ac delirii periculum instat: decebat autem longe secus esse si quoquomodo caro instrumentum poterat esse tactus.

Tertia ratio pro Galeno est, membra carne nuda, ut dentes, sentiunt secundum propriam etiam eorum substantiam, ut ipse Galenus 5. de Medicamentis secundum locos, cap. 23. & 11. de Vsu partium cap. 7. iuxta initium, & 7. tertii cap. 1. non igitur ex carne sensus. Auerroës negat hæc quæ assumuntur, nam sensum, ut dixi, perfectiorem reddi nervo putati: quia caro redditur temperatior: non tamen non sentit etiam præcisa pars: uerum à maiore dolore minor obtunditur, dicente Hippocrate: duorum dolorum qui secundum eandem partem fiunt, maior minorem obscurat. Ob id igitur non sentit inferior pars, quæ necessario, uel uehementi dolore superioris obtunditur, uel breui emarcescit, & extinguitur. Erunt igitur tria membrorum genera, Carnosa, & hæc sensu prædita simplici: & Nervosa carnea, & hæc quidem perfectæ: & Nervosa tantum, quæ non sentient sensu uero. Sed in hoc aberrat Auer. quia dixit nullo modo sentire: quāvis in nervo expuncto hæc adducat in medium, quæ aliàs scribam Deo uolente dum distinguam, quidnam sit primum quod sentitur.

Nec

Nec illorum etiam opinio probanda est, qui putant alia membra per se sentire, secundum Galeni sententiam. Imò neri per se sentiunt, cætera per neruos. Et si dicas, quòd cutis uolæ manus est instrumentum tactus temperatissimum, i. de Temperamentis, ultimo. Fateor: uerum quamuis sit mixta ex carne & neruo, propter neruum tamen sentit. Dico igitur, quòd sensus magnitudo in neruo uiget: nec est quod respondeat Auerroës secundæ rationi: nam dicere, nō sentire, quia diuisio illa ac incisio quædam sit priuatio, etiā in carne locū habet dum pungitur. Quòd si dicat: Solæ primæ qualitates sentiuntur: at has etiam nudus neruus sentit, igne exustus. Nec hoc repugnare uidetur Aristoteli si neruos ut arterias à corde nasci decernat: non tamē de perfectione sensus cōueniunt, quam Galenus in neruo, Aristoteles (ut dixi) iuxta cor statuit in carne illius. At uerò sensum quo animal est animal, si sensitiua etiā ossibus infusa est, quomodo Galenus neget carni & uniuerso corpori inesse? quādoquidē animal per sensum sit animal, & nutritiua uis cuilibet corporis parti necessariò ob id inest, quoniā undequaq; uiuit: ob quæ tam Philosophus quā Galenus hāc sentiendi uim in toto corpore collocant. Atq; id iure magis Galenus, qui Platonem secutus etiā plantis ipsis aliquod sensus uestigium cōcedat. At uerò nihil refert, seu animā dicas per totum corpus diffusam, seu ipsius facultates tantū, ipsa in corde sedem habente: non enim potest esse uiuens, nisi ubiq; nutriatur: nec sentiens, si aliqua parte sensus expers sit: quare nec capilli uiuunt, qui etsi crescant, sensus tamē omnino sunt expertes. Ergo nec Albertus uidetur rectē Philosophum interpretari, quòd caro neruis immixta sentiat: palām enim est, quòd instrumentum, quod recipit simile, in partibus esse debet. Neq; hi etiā uera dicunt, qui neruum grauis & leuis faciunt sensorium: calidi, & frigidi, carnē: essent quinq; sensibus plures, uno superaddito. nec ratio Philosophi stare, qua putat debere instrumentum toti corpori esse cōmune. At uerò Galenus qui carnē etiā sentire credit, neruorum facultate præditam, nihil in hoc habet Philosopho repugnans: cum duo instrumenta non ponat, sed unum tantum primum: quod etsi ponat, propositionē Philosophi ad specierum formas cōtrahet, non ad cæteras, quæ minus materiæ connexæ sunt: nam & Philosophus ipse fateatur, exanguia sentire per aliud, quā per carnem: etsi carnis id in animali locum obtineat. Cæterum dentes haud sentire dicit, cum quotidie citra sensum ullum exedantur. Dicunt quidam, aduenire dentibus in extremo, quod unguibus: ut superfluum id sensu careat. Verum quomodo si pars illa non sentit, ab acerbis fructibus obstupescunt, & congelantur? manifestum est enim affectum illum dentibus inhaerere, qua parte inuicem committuntur. Quare & aliquid tale inesse illis Philosophus concedet, qualitate etiam altius progrediente. Membranæ autem, & cutis,

exquisitum habent à neruis, uel à corde sensum: porro obtusum, qua parte solum sunt animalis sentientis partes.

CONTRADICTION II.

An finis ipsius medici sit sanitas.

Intentio medici est sanitas: finis autem adipisci eam, in de Sectis primo. At 9. Artis curat. 10. & 13. prima cura habenda est de uirtute, est enim prima illius intentio. Respondeo, Intentiones sunt duæ: altera ad finem, & hæc est ad sanitatem. unde 11. Artis curat. 9. Quicquid scripsi, pro sanandis ægris scripsi. Altera intentio est ad finis media, ut finem nos possimus consequi. Et hoc modo illa partitur in plures: è quibus prima est ad uirtutem, secunda ad morbum: & ita de aliis, ut dictum est. Vel clarius, Intentio medici est sanitas, illa uero à quibus sumitur intentio operandi, sunt alia plura: & sic differt intentio à rebus à quibus sumitur. Circa quod est aduertendum, quòd in Introductorio capite 6. sanitas est scopus medici semper: sed non est eius finis, nisi cum potitur ea. Sicut scopus gubernatoris nauis est, seruare nauim: sed non est illius finis, nisi cum eam seruat. Et si quis dicat, Contrà, quia, 10. Artis curatiuæ 10. Hæticam tertiæ speciei curat, non ut sanet, sed ut reducat ad tabem frigidam: igitur tunc scopus eius non est sanitas. Respondeo, quòd producere uitam, est finis consequens ad id quod primo intendit medicus: id est reducere ad sanitatem. reducit autem ad sanitatem in eo, quòd tollit morbum caliditatis siccitate relictæ: & ita remouendo morbum, inducit sanitatem pro parte. Nam secundo Artis medicæ capite secundo, etiam ægri sunt in sanitatis latitudine constituti. Sed dices, Loquitur de simpliciter, non ut nunc ægris: Respondeo, quòd etiam omnis æger ut nunc aliquid habet de sanitate propria: sicut quilibet æger simpliciter, quem insalubrem quidam uocant, in latitudine sanitatis constituitur: uelut sanitatis simpliciter particeps: tantum enim quilibet habet de sanitate, quantum est id per quod à summo morbus deficit. Et eodem modo considerat medicus de parte decorem augente, etiam præter naturam, ut in infibulandis adolescentibus: tum etiam de castrandis. unde Paulus Aegineta lib. 6. cap. 68. dabat rationem huius: Cum enim potentes, hoc uel illud facere omnino uolunt, medici officium tunc est, quanquam ad sanitatem sit institutus, procurare, quò minore ægri malo ac periculo fiat.

CONTRADICTION III.

An ad medicum pertineat tractare de decoratione.

Circa hoc contingit dubitare: an ad medicum pertineat tractare de decoratione, tanquam de re per se ad illum spectante: cum ut dictum

Etum sit omnia sanitatis causa agat, ut ostensum est in præcedenti contradictione: nam Aëtius in 16. libro de ea pertractat, & Princeps. 7. quarti. Respondet ad hoc Galenus primo de Medicamentis secundum locos, cap. 16. quod decoratio uel est ad reparandum naturalem pulchritudinem, uel ad addendum aduentitiam: prima quidem ad medicum pertinet, non autem secunda, nisi ut diximus in præcedente contradictione. Quomodo autem pertineat hoc ad sanitatem instaurandam, intellige: nam præternaturalis turpitudine uel est iuncta cum morbo, ut sextus digitus: uel est signum morbi, ut uiriligo. Quare medicus ut tollat morbum illum, procurare debet, ut etiam quasi coniunctam uestigium turpitudinis aboleat. Sed quid de cicatrice, quæ iam non est cum morbo, qui possit auferri, quamuis ipsa possit aboleri, nunquid medicus debet eam tollere? Videtur quod sic: quia est res præter naturam, ut Galenus, 14. Artis curatiuæ cap. 16. de mangonibus reparantibus nares puerorum. Sed hoc pro exemplo: nam pars non potest sana diu permanere propria carne destituta. Sed quid cum morbus procuratur à medico, ut cum abscindit membrum propter cancerum, 14. Artis curatiuæ 13. Respondeo, intendit primo, & per se sanitatem: & est ablatio canceri: quæ tamen non potest fieri, nisi cum alio morbo in forma, uel numero, sed tamen leuiore.

C O N T R A D I C T I O I I I I.

An medicina sit scientia.

Galenus principio tractationis Artis medicinalis dixit, Medicinam esse scientiam: & in titulo dixit artem. Conciliator differentia 3. mouet quæstionem. Philosophus 5. primæ philosophiæ uocat eam scientiam: sed Auerroës uult illam esse artem in commento, exponens Philosophum expositione Anglicana. Princeps etiam uult in sua diffinitione prima primi eam esse scientiam. qui tumentur opinionem Auerrois primo Collectan. 1. & 6. Collectaneorum 1. & 7. eiusdem cap. 31. iuxta finem: non solum eam esse artem, sed mechanicam uolunt: eo tamen modo, ut cum artes diuidantur, 2. Phy. 24. in Vtentes, uelut est nauigandi peritia, quæ non facit nauim, sed illa utitur: & Operantes, ut quæ secat ligna: & Imperantes, ut architectura: medicina est mechanica, id est non utens, sed faciens: non autem ut faciat propriè, sed ut præcipiat. Igitur uolunt hi, cum non possint effugere, quin sit scientia, quæ operari doceat, quod tale genus scientiæ cum arte sit idem: & ad hoc adducunt uerba Philosophi, 6. primæ philosoph. 1. uel in Græca sectione. 5. primæ philosophiæ iuxta initium: quæ tamen oppositum sonant ex toto, cum dicat ille: *ἡ μὲν γὰρ ποικιλικὴ ἐστὶν ἐν πλείοντι ἢ ἀρχῇ, ἡ δὲ ὁδοῦ, ἢ τεχνῇ, ἢ δόξῃ*

ἢ δύναμις τίς. ἢ δὲ πρακτικῶν, ἐν ᾧ προαίρεσις. Quibus uerbis duo errores deteguntur: nam practicam, quam hic uocat, non illam intelligit quam 2. Primæ philosophiæ 3. id est quæ est ars, sed prudentiam: quod apparet ex tribus: Primò, quia artem sub faciente, non sub agente collocauit. Secundo, quia principium artis non est προαίρεσις, seu præelectio quædam, seu recta electio, hæc enim ad prudentiam pertinet, non ad artem. Tertio, quia ars est faciens propriè, non agens. Secundus error est, quòd facientem scientiam non unam dixit, sed tres: aliam quidem, cui initium est intellectus: aliam, cuius alia uis quædam: (coniecturalem intelligit uim) aliam quæ est ars. Non igitur tota facienti scientia est ars: nec agendi ulla ex parte: cum tamen Auerroës in suo textu pro agendi peritia, quæ prudentia certè est, artem haberet: quo fit, ut aberrare cogereetur. Manifestum est igitur Philosophum ibi sub scientia tres habitus intellectus, si non plures, quos 6. Ethicorum distinxerat, comprehendisse, Scientiam contemplatiuam, Artem, & Prudentiam. uerùm 6. Ethicorum, scientiam intelligit, ut 2. Metaphysicæ 3. pro communi ad contemplatiuam, & illam cuius finis est exerceri. Non igitur idem est ars, & scientia cuius finis est opus: aliter nec Geometria, nec Astronomia quæ supputare docet, nec Arithmetica, nec Grammatica, nec Musica erunt scientiæ, sed puræ artes: itemq; Fabrilis, & Sutoria scientiæ erunt, artes enim sunt. Medicina igitur scientia est. Sed quare Galenus eam in titulo artem uocat? Quia liber artis medicinalis, non est demonstratiuus, sed diffinitiuus: ideo non ibi scientia trahi potest, sed ars. Secundò, quia cum contineret totam disciplinam, titulus debet esse à maiore parte, quæ est ars, diffinitio à præclariore, quæ est scientia. Sed in Introductorio cap. 5. negat medicinam esse scientiam, si quidem exactam, quæ habetur per absolulam demonstrationem: nam etiam philosophiam ibi scientiam esse negat, & nos etiam aliquid scire. uerum dilucide 1. Artis curat. 4. eam scientiam, & perfectam declarauit: quoniam & ipsa ex indemonstrabilibus demonstrat. Sed quidam dicunt, quòd ut accipit à Philosopho non est medicina, sed philosophia naturalis, hoc tamen est falsum, 1. Post. 42. Dico igitur, quòd scientia quæ ad opus tendit sublata demonstratione est uerè ars, ut Medicina & Musica: aliæ sunt artibus similes, ut Arithmetica. Sed Medicinam esse scientiam, ut à Philosopho accipit, docet Galenus 1. de Elementis cap. 1.

CONTRADICTION V.

An neutrum in primo modo detur.

Galenus in diffinitione medicinæ ponit neutrum: Philosophus negat in Prædicamentis, capitulo de oppositis, dicens: Omne corpus est factum,

num, uel ægrum. Respondeo ut Hali in Commento, differunt solo nomine: nam cum morbus adeo remissus est, ut non impediat operationes, tunc apud medicum non dicitur æger etsi sit tam apud illum, quàm apud Philosophum. Causa autem huius est triplex. Prima est, ex modo auxiliandi: nam ægris debetur curatio, 3. Artis medicin. 6. neutris præseruatio, si sint decidua, uel reassumptio si sint conualescentia, 3. Artis medic. cap. 16. & 17. Secunda autem causa fuit propter dies decretorios, qui nõ ab initio morbi sunt computandi, sed uehementis morbi, cum homo fermè cogitur decumbere, 1. de Diebus decret. cap. 6. Tertia, quia Galenus mutationem posuit quæ sensu non perciperetur, 1. de Locis affect. cap. 2. & 3. de Temperamentis, cap. 4. hanc negat Philosophus, & eius interpret Auerroës 8. Physicæ auscultationis Com. 23. cum igitur hæc Philosophus non consideret: Neutrum, quod re ab ægro non distinguitur, ponere non debuit. Vnde Auerrois fallitur 1. Collectan. 1. Sed contrà, sani & ægri dispositio continuum quoddam efficiunt, igitur in transitu medio dabitur neutrum. Respondeo, quod Philosophus diceret, quod datur ultimum esse sani non primum esse ægri, ut in moriente.

C O N T R A D I C T I O VI.

An neutri dispositio insensibilis sit.

Neutri dispositionem sensibilem esse uelle uidetur Galenus in locis duobus ultimis præcedentis Contradictionis ex Galeno adductis: in Arte etiam medicinali in cap. de signis futuræ ægritudinis, & 1. de Diebus decret. cap. 6. clarissimè autem in de Constitutione artis medicatiuæ, cap. 19. & in de Partibus artis medicinalis, cap. 5. Sed oppositum uidetur in his duobus locis, in libro de Constitutione: ponit enim neutrum nullum sentiens nocumentum: & exemplum dat de eo quem canis rabidus momordit. Idem dicit in libro de Partibus, addens huic exemplo aliud, eius qui uenenum ad tempus sumpsit. Quidam respondent, quod causa est sensibilis, licet non dispositio. Hoc nihil ad rem, cum quæramus, an neutrum corpus primi modi sentiat nocumentum: nec quærimus de medico, qui nec ipse sentit, sed ratione hoc tantum percipit, Potest etiam esse, ut nec medicus hoc percipiat, nesciens canem esse rabidum: nec æger, ut in ueneno quod inscius haufit. Dicunt alii habere causam in se, & ideo ratione causæ illud corpus ægrotare: si sic esset, non daretur neutrum ad ægritudinem terminandum, sed tantum conualescentiæ: quia omne illud causam continet per quam perueniet ad ægritudinem. Respondeo, Gal. 2. Artis medicæ, cap. 2. statuit quinq; genera corporum: Sanum semper, quod nullo modo est læsum: Sanum ut multum, cuius non est culpa in operationi-

bus, nisi cum comparat sano ut semper: Neutrum simpliciter, cuius læsio est aut in causa solum: aut si est in operatione, est cognita solum ratione ea, quod est læsio, non læsionis quātitas: Aegrum autem habet cognitam quantitatem læsionis, non solum læsionem cum ægrum est simpliciter dictum: sed ægrum ut nunc habet læsam in comparatione sui. Eodem modo dico de neutro ut nunc. Ergo omne neutrum habet læsam operationem simpliciter, si sit simpliciter: aut sui comparatione, si sit ut nunc: & talis læsio potest esse sensibilis, non tamen necessario est sensibilis, quia sufficit quod causa sit sensibilis. Sed in hoc differt ab ægro, semper, quod omnis æger seu simpliciter, seu ut nunc, habet quantitatem læsionis sensu cognitam.

CONTRADICTION VII.

An panis sit facilius concoctionis quam caro.

Ratio faciliter transeundi in alimētum sumitur ex temperamento, ita quod sit cibus secundum naturam, 3. de Temperamentis, cap. 2. nam cibi diffinitio est, quod immutetur à natura, nō mutando illam. Manifestum est autem, quod tale necesse est esse simile corpori in qualitate: nam omne agens dum agit repatitur. Si igitur alterius naturæ sit cibus quā humanum corpus, manifestum quod in frigidabit, aut calefaciet corpus: & sic non iam simplex erit cibus, sed uel cibus medicinalis, ut dicunt, aut medicina. Sed in libro de Dissolutione continua, cap. 4. in initio, reducit facilitatem & difficultatem concoctionis ciborum ad quinque causas: quarum prima est, Intemperies ualida: nam illa facit, ut tardè possit assimilari, quia assimilatio est conditio præcedens nutritionem, ut aliàs declarauit: ergo piper & portulaca erunt difficilis concoctionis. Secunda causa est, Ratione substantiæ: & hæc est quadruplex, uel quod sit uehementis duritiei, ut nux indica: uel siccitatis, non intelligendo uirtutem nunc, nam sic reduceretur ad primum modum, ut panis superassatus: tertia, quod sit tenacis alimēti, ut caro magnorum piscium: quarta, quod sit crassi alimentii, ut caro bonis. Tertia autem causa est, Ratione excrementorum, quæ enim plurima continent excrementa, diuturna indigent separatione, ut amygdalæ & auellanæ. Quarta est, Propter aliquod impediens sibi iunctum, ut quæ oleum continent, uelut oliuæ. Quinta est, Causa abominationis: & hæc est duplex, aut generalis, ut cum res est ingrati saporis admodum, uel odoris: alia cum abominatur homo aliquid propter naturam propriam: ut quidam qui non comedunt lac, alii oua: alii comedunt, sed natura refugit propter uim quam habet illi contrariam, & discordem. Additur etiam ratio contrarii: quoniam cibus calidus in frigido corpore celerius concoquitur, quam frigidus: & causa est, quia calidum celerius reduci

ducitur ad temperamentum à frigido, quàm à calido: & ideo hoc uerum est tantum in mala temperatūra, non in naturali: & remanet dubitatio parua, de mala temperie, naturali tamen, sed ualde magnā: sed nunc est sermo tantum de sanis, non multum à temperamento aquali recedentibus. In recensendo autem cibos facili concoctionis, primò ponit Panem benè præparatum: post Carnes auium, & reliquorum: etsi liber hic esset Galeni absque dubitatione, & cum omnium consensu, non esset multum difficile sententiam eius uenari. De temperato autem cibo non solum Galenus illud fatetur, ut dixi in locis prædictis: sed & in libro de Cibis boni & mali succi, cap. 3. non tamen uult ipsum esse temperatum tantum in primis qualitatibus, sed mediū etiam inter tenue & crassum, lentum & friabile, cæterasq; eiuscemodi omnes qualitates. Et Auerroës 5. Collectaneorum 31. dixit, Panem triticeum esse optimum cibum inter omnes, & quasi naturæ humanæ simillimum, ut etiam cap. 3. eiusdem libri declarat iuxta initium, unde dixit, Temperantia propria est cibo, medicinæ intemperies: est enim cibi natura, ut faciliter cōuertatur in humorem similem humori radicali: & hanc primam laudem etiam Zoar illi tribuit in suo libro primo Theisr, capite de conseruanda sanitate. Idem ferme Rafis lib. 3. cap. 3. ad Almanforem confirmat, uolens, ut plurimum salis ei misceatur, ac benè fermentet. Quamquàm nemo sit, qui non uideat mediocritatem, secundum Galenum, excessu fore potiore: & si tamen sit declinandum, tunc coctio, fermentum, & sal, minus afferunt detrimentum aucta, quam detracta. Tertius modus ex facilitate solutionis in aquis sumitur. nam quod facilius soluitur, facilius concoquitur: tum si celerius ac magis tumescat: præcipuè coctum. ut in lib. de Cibis boni & mali succi, cap. 3. iuxta finem. sic enim fructus & multa alia à patre suo probari scripsit, certissimo experimēto. Quartus modus sumitur ex paucitate nutrimenti: nam quod parum nutrit, facilius concoquitur: contrà, quod facilius concoquitur, parum nutrit: & quod plurimum nutrit, ægrè concoquitur. & hæc tria se cōsequuntur, 7. Artis curatiuæ, cap. 6. iuxta medium. Vltimum autem diuisionis membrum non conuertitur: ut quod ægrè concoquatur, necessariò plurimum nutriat: nam difficilis cōcoctionis iam plures causas declarauimus. Quintus modus habetur à Gal. de Alimentis cap. 1. post initium, Quæ facili concoquuntur, facile altera fiunt, & corrumpuntur: quæ uerò difficulter concoquuntur, etiam difficulter in alienam transeunt qualitatem, & tardè corrumpuntur. In his omnibus non uidetur primò Galenus in facilitatis ratione constans fuisse, cum omnino diuerfas illius causas referat.

Ex his tamen causis promptior ad concoctionem panis carne esse uidetur: nam quantum ad temperamentū attinet ab omnibus, ut diximus,

pro

pro exemplo absoluti cibi, ut qui in nulla qualitate exuperet, adducitur. Caro etenim omnis calefacit, ut inquit Rasis 3. ad Almanforem cap. 9. Quantum etiam sit merito conditionum assignatarum in libro de Dissolutione continua, uidetur panis esse gratior carne: nemo enim sustinet esum puræ carnis, cum multi sustineant esum panis solius, ut quotidie multis est in usu. Quod etiam panis celerius in aqua soluatur carne, nemini dubium esse debet, qui uel expertus sit hoc, uel uelit experiri. Nutrit etiam minus panis longè quàm caro, quod Celsus lib. 2. cap. 17. testatur & 3. ad Almanforem 9. caro est omnium quæ eduntur nutriendum maximum: unde tertia primi doct. 2. cap. 7. qui multa carne utitur frequenti indiget minutione. In facilitate tamen corruptionis quamuis panis à carne uinci uideatur: nō tamen adeò longo, ut quidam putant, interuallo: nam panem corrumpi post primam diem affirmat Zoar, capite de conseruanda sanitate. A diuinximus nos olim, cum essemus iuniores, in emendatione contradictionem ex dicto Auicennæ in directo, de qua in 11. libro diximus contradicentium medicorum. Caro etiam non cruda, nam talis edi non confueuit, panis cōparanda est, quæ hyeme diutius pane asseruari potest, quod & si uincat hac in causa solum panem, cum tot modis uincatur, durior erit concoquentibus ipsam quàm panis.

Secunda ratio uidetur sumi ex experimēto, Celerius id concoquitur, quo assumpto, citius esurimus: (Cum fames naturalis inanitatem uētriculi præsupponat 1. de Causis symptomatum, cap. 7.) sed celerius esurimus assumpta libra panis, quàm carnis, ut nos docet experientia: celerius igitur panis ipsa carne transit in alimentum.

Tertia ratio procedit ex autoritate Galeni, qui carnes dabat in cœna, & panem in prandio, 1. Regim. acut. 18. iuxta finem: exemplum adducens de gladiatoribus. Constat autem, quod carnem solam ibi intelligit: quia dixit hoc obseruari ab illis, ut simplicitate cibi omnem deuitenturbationem: quod haud consequi liceret, si utrunq; in cœna assumerent, scilicet panem & carnes. At cœnam copiosiore uult Galenus esse prandio, ut infrā docebimus: quare manifestum est illum existimare, carnem esse difficilioris concoctionis ipso pane.

Quarta etiam ratio ex alia autoritate sumitur 7. Artis curatiuæ, cap. 6. iuxta medium: ubi exhibet primo panem & pisces saxatiles pro leuissimo alimento: inde ad carnes descendit: quod fit, ut panis ab illo in facilitate concoctionis carnibus præponatur.

Alia ratio sumitur ex eodem loco, nam panis facilius cōcoquitur suilla carne: illa enim est (dicit) nimis contumax, eo quod plurimum nutrit. Sed caro suilla est omnibus aliis carnibus in nutriendo commodior, & humanæ simillima, ut habetur 10. de Simplic. medic. cap. 3. & de Gibis boni & mali

mali succi, cap. 4. Igitur panis est facilioris concoctionis, quàm ulla caro.

Àtius quoq; Galenum in libris de Tuenda sanitate secutus, dum senes nutrire docet lib. 3. cap. 30. ter panē illis in die dat: carnes semel. & Galenus 1. de Tuenda sanitate, post mediū, iubet ab lactato infanti primo panem dari, post legumina, & carnes. Itē post pauca: Si negotiis impeditus pædō-triba sit, ut nec lauare, nec fricare puerū possit, modicū panis det: inde hora, qua fermē solet, lauet, fricet, et cibū solitū exhibeat. Prohibet enim quē- quam iusto uesti cibo, antequam fricetur, ac lauetur. Clarissimē hoc 6. de Tuenda sanitate, ante mediū, docuit: ubi impedito uiro negotiis consulit, ut panē sumat hora quarta diei, ita quòd speret decima hora esse cōfectū. Ex hoc igitur duplici modo patet, panē celerius concoqui carne, tum quia intra sex horas, tum quia nō dat carnes cum pane. Nec potes dicere, quòd ratione simplicitatis solū panis eo in casu celerius concoquatur, nam cum pane oliuas, mel, palmulasq; concedit. recitabitur autē autoritas hæc in 18. Cōtradict. huius: dicemus & aliqua in undecima tractatus sexti, huius libri. Hæc igitur argumenta sunt, quòd panis ipse res sit leuissimi alimenti, saltem ad carnis comparisonem: sic ut facilius illis concoquatur.

At qui partem tuentur oppositam, rationes quibus aliquid facilius concoqui Galenus nobis declarauit, singulas seorsum debilitant: ueluti cūm dicimus, temperata facilius cōcoqui: obiciunt nobis uinum, quod cūm nō sit temperatum, facillimē tamen cōcoquitur, 2. Aphor. 11. & oua quæ uel sunt temperata, uel paululū ad frigidum declinant, ut 11. de Simplic. medic. & à Principe in libello de Viribus cordis, & à Serapione dictū est: uel eo magis si temperata sint, ut uidetur sentire Princeps, difficulter tamen concoquuntur, adeò ut candidioris partis, quod ad alimētum attinet, nullus sit usus. Hæc ratio uitiosa omnino est tribus modis: Primò, quod cūm omnia illa quinq; consideranda sint, hic unum duntaxat acipit, & ex eo argumentatur. Secundò, quod de uino adducitur, ad propositum non est, cūm ex alimenti genere, quod cibum dicimus, in potum descendat. Ter- tiò, quod mediocritatē illam quam Galenus non in qualitatibus tantum primis, uerū etiā in crassitudine & tenacitate iubet obseruari, tum aliis, hic solum in primis spectat: cūm non obscurum sit, oui candido nihil esse uel tenacius, uel magis ad glutinis naturam accedens. Qua etiam ratio- ne argumentum de suilla carne dissoluitur: nam & si similis sit substan- tia humanæ profus, 3. de Alimentis cap. 1. nihilominus cum tenaces & glutini similes generet humores, 2. Aphor. 18. meritò difficilis cōcoctio- nis erit. Eodem modo si quis dicat Gallorum testes, quos Mesue in cura phthiſis commendat, & recur gallinæ, tum anseris, quod facillimum est in concoctione, ut 3. de Alimentis, cap. 21. & in de Dissolutione conti- nua cap. 3. & 4. non faciliè aquæ imposita intumescere: cūm tamen pul-

mo & fungi, quæ ægerimè concoquuntur, soleant celeriter inflari. Respondemus, non de aqua frigida Galenum dixisse, sed si incoquatur: at luce clarius est, iecur & gallorum testes celeriter tumescere, & mollitiem nancisci, si coquantur: at contrà, fungi & pulmo tardè. Verùm iecori & ouis illud proprium est, ut diutius quàm par sit cocta durecant: quò fit, ut & tunc coctioni in uentriculo contumacia reddantur. Simili modo oua etsi plurimum nutriant, teste Galeno, facile tamen concoquuntur, reluctante multitudine alimenti: quia temperata sunt, & mollia, si de luteo intelligimus. Omnes igitur hæ rationes esse uidentur, quæ ad cibi facilem concoctionem faciant, non quæ seorsum sumptæ talem cibum illum esse ostendant.

Igitur ad primam uidetur Auerroës 5. Collectaneorum 32. fateri, carnes esse temperatiores pane: tum gallinarum maxime, cum ius earum dicat leprosis conferre, & carnes ipsas nostrum corpus ad temperamentum reducere.

In secunda causa caro uidetur esse nobis conuenientior natura, quàm panis: sed ex usu panis est consuetior. Porro quod ad alias pertinet conditiones, non ulla in parte caro uidetur esse pane inferior, tum præsertim, cum Galenus l. de Alimentis, capite de tritico, panem uelit esse difficilem ac contumacem, si quid desit ex optima præparatione. Absolutus igitur etsi difficilis non possit appellari, in primo tamen genere eorum quæ facile concoquuntur, locari non debet. Quòd uerò aque impositum feruenti celerius intumescat, hoc ad carnes haudquaquam extendi debet, cum Galenus experimentum illud ad grana tantum ac legumina referat. Quòd etiam minus nutriat panis, quàm caro, illud non omnino ab omnibus cõcessum est: cum carnes paruorum auium ut leues, ac parum exhibentes alimenti, debili uentriculo, uel Galeno teste, concedantur. & si modo adhuc caro à pane in hoc solo uincatur, in aliis tamen causis leuis cõcoctionis illum superat. At de corruptione, nemini dubium est, longè facilius putrescere carnem, quàm panem: quare cum difficillimum sit hæc rationibus demonstrare, melius erit sanè ad autorum ipsorum placita, quæ experimento confirmata sunt, confugere. Sed tamen prius secundam principalem rationem diluamus: ante id uerò etiam illud præmittendum, cibum dici concoctu faciliorem, uel quòd celerius transeat in chilum, seu pulticulam in uentriculo: uel quòd celerius in sanguinem, uel quòd celerius ipsa solida membra nutriat. Itaque nobis aliquando celerius contingit post panis assumptionem esurire, quòd minus ex ipso quàm carne nutrimur: rari etiam sunt qui uel solam edant carnem, ut tutò liceat hoc experiri. Illud tamen si concedatur, nihil probat: cum defectionem alimenti in uenis naturalis sequatur fames: hæc autem celerius assumptum panem quàm

quàm carnes sequitur: aliter dicendum esset, rapas etiam crudas, facilius concoqui perdicum carne: cum & illarum esum celerius, ac multo quam panis, fames subsequatur. Igitur alia ratio modicæ nutritionis, alia uerò facilis concoctionis. Arguo etiam quia æquale detrimentum in concoctione panis, est maius æquali lapsu uel defectu in carne: unde Princeps 3. primi doct. 2. cap. 7. in fine. Et scias quod detrimentum panis, cum non concoquitur, deterius est nocumēto carnis, cum non cōcoquitur. Sit igitur propria quantitas panis libra una, & carnis dimidia, & fiat augmentū sextæ partis in utroq;: tunc ex dicto Principis deterius erit nocumentum quatuordecim unciarū panis, quam septem carnis: igitur natura magis laborat in concoquendo uncias septem panis, quæ sunt dimidium illius quod nocet quam uncias tres & dimidiam carnis, quæ sunt dimidium minoris nocituri: sed ut septem ad tria cum dimidio, sic duodecim ad sex: igitur ex regula Geometrica cum utrinq; sit proportio dupla, maior est labor in concoctione libræ panis, quam sex unciarum carnis. Respondeo, quod argumentum non ualet, quia detrimentum illud non est ratione laboris concoctionis, sed materiæ quæ relinquitur: nam ex pane relinquitur materia magis lenta, quam ex carne, eo quod constat ex tritico: at ex carne materia magis inæqualis intemperie & quæ celerius putrescit. At lentor licet non plus noceat ad concoctionem, intemperie, magis tamen nocet ad expulsionem, ut manifestum est. Igitur nocumentum panis non concocti maius est nocumento carnis, cum non concoquitur: & tum cum hoc fiat panem ipsum carne celerius concoqui.

Ad tertiam respondeo, quod ut habetur 1. de Alimētis, cap. de tritico: Athletæ ueri utebantur carne suilla, eaq; admodum copiose, libro Ad bonas artes exhortatorio: quare ob multitudinem alimenti difficilior erat in concoctione primā caro, quam panis: nos autem loquimur de regimine moderati hominis. Dico etiam quod caro semper est difficilioris concoctionis, respectu trium concoctionum, pane: quia data æqualitate etiam boni alimenti, cum plus refecetur in prima concoctione ex carne quam pane, ægrius conficietur maior quantitas, quam minor: & sic data ponderis pari magnitudine carnis & panis, grauior erit caro uirtuti quam panis. Sed nunc sermo est de prima concoctione, quæ in uentriculo administratur. Dico tertio non esse clarum, quod solas carnes in cœna darent absq; pane, cum uix sit hoc uerisimile: sed intellectus Galeni est, quod ultare mixtionē est ualde utile: adeo ut etiā in robustissimis corporibus, qualia sunt athletarum, absq; dubio (1. Aphor. 3. & de Optima habitudine) solum panem darent in prandio: in cœna autem carnes: supple, ultra panem: & si hæc responsio non placet, aliis inhæreas.

Ad quartam dico, quod panem exhibet ob consuetudinē, pisces autem

saxatiles sunt facilioris alimenti carnibus, & ideo comparatio panis et carnis est ibi sumenda à consuetudine: carnis & saxatiliū piscium à facilitate concoctionis: quanquam etiam statim subiiciat gallinarum alas.

Ad quintam dico, quòd panis facilius concoquitur suilla carne, quę est ualidissimum alimentum, ut 7. ipsius Artis curatiuę cap. 6. & primo de Alimentis, cap. de tritico. Et cum dicis, illa est hædulina præstantior: Respondeo, uerum est, non tamen facilius illa concoquitur: & ideò bene dicebat Galenus, quòd in illis qui suillam carnem concoquere possunt, supra omnes alias optimum præstat alimētum: igitur cum hac bonitate alimenti, quā præstat hædinę ac ceteris, stat difficultas ad concoctionem. Sed contrā, quia Princeps 1. Can. cap. 146. dicit, Suilla autem caro & si multum nutriat, & crassum ac glutinosum præbeat alimentum, facili tamen concoquitur, & celeriter descendit. unde subdit, Non eadem est ratio facilis coctionis, celerisq; descensus, cum alimenti crassitudine uel tenuitate. uidetur etiam Auerroës 5. Collectaneorum 32. sensisse, Galenum illā pronuntiasse aptam usui hominum, non athletarum solum. Quinimo etiam Galenus ipse in consilio pro puero laborante morbo comitiali, carnē porcelli concedit. Dico igitur, quòd caro porci annui, & præparati, ut ibi apud Galenum & reliquos, est facilis concoctionis: non solum probatissimi alimenti. & hanc constat esse difficiliorem pane ad concoquendum, nec tamen hædina leuiorē. Sed caro suilla communis est illa, quę solum conuenit grauius & assiduē se exercentibus: & hæc cum ab aliis non concoquatur, si tamen uel ob paucitatem, uel ob præparationem cōcoquatur, & ipsa quamuis iam adulti uel senis suis optimē nutrit, & alimentum solidum, ac minime putredini, aut resolutioni obnoxium, præstat.

Ad reliqua quę adducūtur dicimus, ob consuetudinem nō licere uesci carnibus sine pane. At quis dubitat quòd panis solus nō leuior sit, eo cum carne sumpto? Dico etiam, in hoc cæteras à prima concoctiones obseruandas, quarum cōtemplatione leuior panis ipsa carne proculdubio est. Illud tamen obseruandum, panis concoctionem, difficilem eisdem uerbis declarari: cum potum dari uetet puero, ne panis crudus per uenas distribuatur: quo fit, ut difficulter apud Galenum, etiā concoqui ab infantibus & pueris existimetur. Quòd autem in ablactatione non protinus ad carnes descendit, causa est periculum putredinis: unde etiam legumina carni præponit, quę nemo dubitat illa esse grauiora. caro igitur lacti nullo modo est immiscenda: quo errore hodie plurimi, tum etiam uini periclitantur infantes. Ad id ex 6. de Tuenda sanitate respondebit quis, non tantum coctionis facilitatem, quā paucitatem nutrimenti curare Galenum: hæc autem est in pane.

Quod

Quòd autem caro celerius concoquatur pane, adest autoritas Principis 2. Can. cap. 146. cum dixit: Caro est cibus confortans corpus, & maxime propinqua conuersionis ad sanguinem. Ista uerba etsi multis modis possent perueri ueram tamen Principis mentem, apud illum qui solum ueritatem amplectitur, ostendunt.

Adducitur etiam ratio de corruptionis facilitate: sed non uidetur probare, cum sit tantum conditio singularis, ut sæpe diximus: & lutea etiam ouorum, quæ tardè corrumpuntur, facillime concoquuntur: & secundum quosdam horei fructus cum sint difficilis concoctionis, sunt tamen celeris corruptionis. Alia ratio: Calidior est & humidior pane, igitur facilius concoquetur: nam hæc sunt principia coctionis, ut 4. Meteororum iuxta initium. Hæc ratio patitur difficultates duas: primam, quia diximus oportere esse temperatum, non calidum: secundam ab exemplo, nam sanguis & mel difficiliter cœoquuntur, & tamen sanguis est calidus & humidus, & mel calidum etiam, & cum hoc tenuis substantiæ, & pauci alimenti.

Tertia ratio, caro est suauior & temperata magis pane, igitur facilius concoctionis. Respondeo, utrūq; eorum quæ assumuntur falsum est, tum etiam sequela non ualida est, quod sæpe diximus: caro autem uidetur suauior ob raritatem, nam nemo tandiu in esu carnis perseuerare posset, sicut in esu panis: & dato quòd ab initio posset, propter consuetudinem, nunc caro non est nobis adeo familiaris, ut panis. De temperamento dico, quòd respectu carnis humanæ uerum est: sed antequàm transeat in carnem humanam, transit primo in pulcritudinem in prima concoctione, cui natura panis est propinquior, quàm carnis: & hæc est causa, quòd sanguis, cum nihil sit sanguini illo propinquius, difficulter tamen in sanguinem conuertatur: nam ad hoc ut sanguis in sanguinem conuertatur, duæ integræ transformationes requiruntur, atq; inuicem contrariæ: in pane autem integra una tantum. Quarta, panis est glutinosior carne, & pluribus abundat excrementis, quàm caro: igitur difficilior concoquitur. Diximus quòd prima harum propositionum est uera, sed sequela non est uera, quia est postmodum panis longe temperatior: & posset negari. prima propositio in pane absolute perfectio, & moderatæ quantitatis, ita quòd possit à natura plenè superari: nam cum nō superatur putredo adueniens carni, glutinosam eius qualitatem tollit, quod in pane non tam celeriter eueniens, difficiliorem non procedente concoctione illum carne, & glutinosiorem uideri faciat: at procedente non eadem ratio est. Quòd uerò plures habeat superfluas partes illud non cogit nos fateri, eum esse magis ad coctionem contumacem: imò magis oppositum, cum excrementa non elaborentur à natura. Galenus etiam libro de Attenuante uictu, cap. 6. cum in 8. hædinas carnes solum in hoc probasset, præfert etiam ordeaceum panem tri-

ticeo: igitur hædi caro, quam probat, leuius concoquitur triticeo pane, quem reprobat. Respondeo, ptisanam ordeï præfert triticeæ, panem non panis: quinimo, quod & experimentū ostēdit, crassum, inquit, generāt fucum ordeacei panes, at paucū, & minime sflatuosum: quo fit, ut diximus, etiam ut sint hac ultima solū causa, leuiiores triticeis: quanquā nō obscurum sit, Galenum contrariū sentire: nam his interdixit, triticeis minimē.

Est & alia ratio, sumpta ex libro eodem, capite ut dixi 8. nam caro perdicum melior est cæteris, igitur etiam celerrime nutrit. Respondetur, non ualere argumentum. contrā quia scopus libri de cibis boni & mali succi, est docere, quinam cibi optimum alimentum præbeant: sed scopi libri de Attenuante uictu duo sunt, docere bonos cibos, & leuis etiam simul concoctionis: sed caro perdicū ibi laudatur, igitur præstat utroq; modo. Hæc ratio est aliis deterior, peccat enim duobus modis: nam caro primò perdicis est optimi alimenti in genere carniū, nō eduliorū omnium: secundo leuis alimenti, uel refertur ad nutrimentum quod genitum est, & hoc modo caro perdicis leuis est alimenti: & est etiam scopus eius libri de his tractare: sed ex hoc non sequitur, igitur facile concoquitur: ut dixi de nutrimento mellis. Si uerò referatur ad concoctionem facilem, poterimus hoc negare de perdice: nec est scopus hic tractare de cibis boni alimenti, id est qui facile concoquantur: sed de cibis leue alimentum præstantibus, id est tenue, quod etiam titulus ipsius operis declarat.

Quod si quis dicat, celerius æger à contuso ex carne quā ex pane restauratur pondere utriusq; pari existente: igitur etiam nutritur celerius à contuso carnis. Et si quis dicat, quare damus panem ipsis ægris frequenter, non carnem? Respondebunt quia caro ægrius dentibus conficitur. Dico igitur, quòd celerius reficitur homo comparando ad dies ex contuso carnis, ubi corpus sit mundum, quia est copiosioris alimēti, quā panis: non autem comparando ad horas. imò Galenus dat panem in syncope cum uino, non carnes 12. Artis curatiuæ, cap. 3. in fine: & eodem modo Auerroës. Concludo tandem quòd caro non contusa difficilius concoquitur, quā panis non contusus: & caro contusa pane etiam contuso: cum hoc tamen stat, quòd in utroq; casu celerius reficiatur homo à carne quā à pane: ubi parua carnis portio exhibeatur, ut nō multo serius concoquatur: interponēdo plures horas, & rarius reficiendo cū carnes damus.

Ultimò solet adduci quòd caro pulli uidetur esse similior carni humanæ, quantum ad potentiam, ut ex dicto Auerrois suprā adducto colligitur. & etiam Gentilis uidetur (uolens exponere illud dictum Principis, iam à nobis suprā declaratum, de detrimento panis) reducere hoc ad familiaritatem, ac similitudinem carnis nobiscum: quæ maior est quā panis: quare facilius concoquetur caro, cū sit magis in potentia. Quòd si dictum

dictum Gentilis uerum esset, deterior esset putredo pituitæ, quàm sanguinis: nam cum sanguis magis nobis affinis sit, corruptus minus nocere deberet. Ad Auerroem dico, quòd maior est similitudo inter carnes gallinæ cum carne humana iuncta cum ui quadam immutandi, ut sic sit cibus non purus, sed etiam medicam uim habens iuncta: quod patet ex sequentibus uerbis: quia dicit, quòd curat lepram. Hoc autem non conuenit cibo, ut cibus est: nec possumus dicere, quòd hoc fiat ab exacta similitudine cum corpore humano: nam illam declarauimus maiorem esse in suilla, quantum ad substantiam, & qualites primas, quàm in carne gallinarum: at in solis qualitatibus, maiorem in pane: nam caro pullorum est calidior, & siccior humana carne.

Ex his tandem colligo, quòd Galenus noluit istam comparisonem facere: nam si uoluisset, commodè potuisset in tot libris, in quibus comparat reliqua: ut in libris de Tuenda sanitate, de Alimentis, de Attenuante uictus ratione, de Cibis boni & mali succi. Ratio autem, quæ illum detinuit, debet etiam nos prohibere ab hac determinatione: & fuit triplex, nam duæ referuntur ad experimentum, & una ad finem. Prima igitur est, Inter carnes est maxima diuersitas, nam caro bouum quantum differt à carne passerulorum: Si igitur quis dicat, panis celerius concoquitur carne, falsa erit propositio: & etiam si dicat difficilior: prima propter passerulos, secunda propter bouum carnes: igitur impossibile fuit ordinem inter hæc duo generalem ponere. Secunda causa fuit, quòd uix poteramus experiri hoc: nam caro per se sola ob consuetudinem prætermittam ægrè concoquitur: panis uerò mixta, ob commixtionem, non syncerum præbet experimentum. Sunt etiam modi præparandi diuersi, ob quæ difficilimum hoc erat experiri. Et si tu uelles in eodem homine addere modò carnes, modò panem, peruenires ad impedimentum coctionis, in quo dicebat Princeps, quòd deterior erat frustratio in pane, seu quòd impedimentum sit maius, seu quòd arguat maiorem causam, tanquàm panis concoctio nobis faciliior sit: & ita trahitur ad utranq; partem commodè autoritas illa. Et si uelles stare intra limites in eodem homine, augendo panem, & minuendo carnes semel: & alio tempore augendo carnes, & minuendo panem: illa die qua augeretur panis, celerius cōcoqueret, quàm in die in qua caro augeretur: nec propter hoc sequitur quòd panis celerius concoquatur, quia hoc est merito minoris recessus à consuetudine, & etiam auxilii aliarum coctionum secundæ & tertiæ. Tertia causa fuit, quia nō erat iuuamentum ex scientia huius, cum moderatus usus doceret quid agendum, immoderatus autem in omnibus esset perniciosus: & hoc quo ad sanos: in ægris autem nunquàm ob hanc causam tanquàm primam difficultatis concoctionis uitandum est unum, quin etiam prohibeamus reliquum: & quia

quia carnibus erat adiuncta putredinis causa, ob id nunquam fuit necessaria talis comparatio. Sententia tamen Galeni est, quod carnes perdicum & pullorum parum differant (eo modo quo possunt comparari, nam uiuqueunt, ut dixi) à pane triticeo optimè præparato: & hoc quo ad primam concoctionem: in aliis autem difficilior est caro, ut dixi, data æqualitate ponderis: quia plus de chilo, ut ita dicam, ex pane quàm carne refecatur: quà de causa carnes semel senibus in die dabat, & multis aliis, quibus tamen panem ter aut bis concedebat, Autoritas Auicennæ in oppositum adducta, non cogit nos nisi ad hoc, quod celerrime carne ipsa sanguis augetur, quod uerissimū est: non quod celeriter caro cōficiatur. Ex omnibus igitur quæ celerrimè nutriunt, primum est uinum aquosum, pōst uinum uinosum, pōst aqua carnis recte facta, pōst ouorum uitella, pōst saxatiles pisces, pōst panis, & auium paruorum carnes, inde perdice, & tiliū, cum his hædi ac suis annui, pōst reliqua suo loco, ut in 11. dicemus libro. At illud panis præstantissimum, quod nulli alii edulio competit, ut quibuslibet cibis rectè iungatur simul, nec pugnet: ut ouis, & bouinæ carni, ac suillæ antiquæ: cum tamen cætera iuncta nō paruam noxam inferant. fuerunt tamen ut qui diligentius inspicientes pro obsonio, panis naturam uariabant, 1. de Alimentis cap. de tritico, dum de athletarū uictu loquitur.

CONTRADICTION VIII.

An medicina possint esse plures diffinitiones.

Medicina diffinitur ab Hippocrate, ut diximus, in libro de Spiritibus, & à Principe prima primi in principio, & in 1. Artis medicæ cap. 1. & ab Auerroë 1. & 6. Collectaneorum primis: & Haliabbas 1. Theoricæ cap. 4. in initio, primo diuisit medicinam, deinde diffinit. At uerò dicebat Philosophus 7. primæ Philosophiæ 45. & 5. eiusdem 12. Ea unum sunt, quorum diffinitio una est: quomodo igitur medicina est una, & benè diffiniri potest tot modis? Respondeo, pauci intellexerunt quid sibi Galenus uoluerit: ille enim diffiniuit scientiam, & non artem: & propterea rectè fecit Haliabbas: potest enim homo scire, quod tertianæ frigida conueniunt, & hæc est procedens ex illa propositione, Contraria contrariis curantur, & erit hæc scientia: carebit tamen arte, quia nesciet, quænam sint eligenda: hoc enim docet ars, donec perueniat ad singularium operationem. At diffinitiones, (ut declaratū est in primo de Anima 16. & antè) sumuntur per genera causarum, & ideo omnes sunt imperfectæ: perfectissima tamen omnium est ea, quæ Galeni fuit ab Herophilo sumpta, non solum quod perfectiorem medicinæ partem complectatur, sed quod materiam, & formam, & finem contineat. Est autem Sanum finis medicis: materia autem principalis Corpus, & secunda etiam Causæ, forma autem

Dispo

Dispositio, quæ est sanitas, uel ægritudo, uel medium inter illa. Liqueat autem ex his, quod unius rei possunt esse quindecim diffinitiones, ex quibus tamen una sola perfecta esse potest. Hoc autem dico in his, in quibus omnia genera causarum sunt necessaria: nam quatuor ex causis singulis sumuntur: sex ex geminatis, quatuor per tres causas, & una per omnes; quæ sola est perfectissima. Sed sunt etiam quatuor alia genera posita à Galeno 4. de Differentiis pulsuum, cap. 2. Prima est, quid nomen significet exponens: secunda aliquid attingit de re: tertia multo melius explicat rem: quarta puram rem docet, nulla nominis habita ratione, cum tamen alia omnes mixtae sint.

Variantur & diffinitiones multis modis, ut declarauimus in expositione super primum Artis medicæ: sed præcipue uarietatem sumunt, cum propriæ differentia non sunt nobis in promptu, ut dicebat Auerroës 4. Coeli, in paraphrasi contra Themistium, Sum. 3. cap. 1.

C O N T R A D I C T I O IX.

Morituri an sint solis prædictionibus relinquendi.

Morituros solis prædictionibus scilicet expositis relinquendos, consulit Galenus 1. Aphor. 8. & clarius 2. Aphor. 29. recordantibus nobis, quod deploratos non oportet curare, sed relinquere, & morbi finem solum prænuntiare. Idem etiam 12. Artis cur. cap. 3. Facta prædictione ab omni medicamento egregio abstinebis, immunemq; à calumnia te seruabis. At ut dictum est in secunda Contradictione, Galenus docet 10. Artis curatiua 10. manum laboranti hæctico tertiæ speciei admouere: quamuis omnino ex eo morbo euadere non queat: sed ad summum in senium talē possit transire. Oportet etiā ut uideo mortē in his prædicere: at cum de acutis loquatur, illa omnino certa non esse uidetur, dicente Hippocrate 2. Aphor. 19. acutorum morborum non omnino esse certas pronuntiationes salutis aut mortis. Accedit quod Princeps dicit 4. quarti trac. 2. cap. 10. in fine: Et in his præmissa prædictione, incipiemus à curatione: quia sæpenumero aliqui sanantur absq; spe ulla existētes mirabiliter. Deinde subiungit exēpla illorum, à quibus uterus totus excidit, & quorum parte iecoris præcisa uita superstes mansit. Quidā dixerunt, dictum illud intelligendū de his, qui breui sint morituris: autē Hæcticus diu potest superuiuere. Ista responsio est apparēs, sed non uera: nam Hydrops perniciofa, in qua nulla spes est salutis, curanda erit à medico: uelut si ascites, à scirrho iecoris iam confirmato originē ducēs, hominē teneat: sic & carcinoma confirmatū, & ossi magno uel pectori hæres: & talia, quæ omni Galenus negligere uidetur. nā subiicit, Palam ad uix sanabilia, nuntia de his sanari nequeunt ulcera: & si in 4. de Medicamentis secundū genera cap. 11. dicat, Ad cancerosa ulcera: non

B carci

carcinomata intelligit, sed in quibus corrupta caro est. quod ipse declarat in serie uerborum euestigio, cum chironia illis iungat: quâquam nec apud Galenum impossibile omnino uideatur cancri ulcus rectè curare: nam de carcinomate nondum abrupto, haud dubium est, si modò initiū duxerit. Ergo duo necessaria uidetur ad hoc, ut rectè medicus manū morbo letali admo- uisse uideatur: Primū, ut diu ille superuiuere possit. Secundū, ut formam aliā mitioris morbi auxilio medici adipiscatur. Tum uerò & id præmissa prædictione fieri debet, ut Galenus dicebat 10. Artis curatiua. In acutis autem morbis nō omnino certā præfensionē Galenus interpretatur, quia non de omnibus. Confirmat hoc experimentū Galeni in libro de Prædictione cap. 11. & 13. & 14. tum etiā ratio, multis enim uetulis, essent medici inferiores: quod an falsum sit nescio: Hippocratis tamē sententiā prorsus indignū haberi debet. Saltem igitur ad propria signa referendum erit, nō cōmunia, eaq; inuicta: & profligata partiū altera, natura illius, uel morbo. Princeps autem consiliū nobis dat, quod altius menti debet insidere: nam de sagittarū extractione ibi loquitur: unde fit, ut nō adeo certa mors in his quæ casu accidunt pronūtiari debeat, ut in sponte nascētibus morbis: nam sponte nascentes morbi, nec corpus habēt integrum, nec causa carent, quæ morbo perpetuo hæreat: at qui infligitur casu, uel uulnere, cum corpus robustum alioquin inueniant, nec causa morbi morbo iuncta sit: ob id fit, ut multi ex his sanentur, qui aliās deplorati existimantur.

CONTRADICTIO X.

Lens cum acetosis an in laterali morbo conueniat.

ET maximi quidem erroris est, tribuere in potu infrigidantia uehementia, uel astringentia, nisi in facto ex bile. Auicenna x. in trac. 5. cap. 3. in primis uerbis. Inde sequitur oppositū hac serie: Et cibi eorū sint sicut lentes cum acetosis. Reclamat hic illico Fuchsius, En uidete quam fidem debeatis uestro huic Arabi tribuere, qui quatuor in uerbis sibi contradicit tam periculoso, ingentiq; ac etiam absurdissimo errore. Sic ille in Paradox. 12. secundi libri: adducit autem multa ad ostendendum propositum: quæ tamen ad duo hæc tendunt, quòd maxima pars curæ ad hoc instituitur in laterali morbo, ut sputum facile fiat. Quod uerum non est ab initio morbi, quo in tempore Auicenna astringentibus uidetur uti: nam litera noua, ut patet, omnem dirimit litem, Auicennamq; à calumnia uindicat, cum ob id iubeat nos abstinere à lentibus & acetosis. Sed nec ob unum uerbum tantus uir damnari debuerat, quod uel librarii, uel translatoris, uel etiam culpa manus, dum aliud scribit quàm mens ipsa præcipiat, accidere potuit. Adde quòd tueri possumus, quanquam Gentilis illū dicat de apostematibus loqui, hæc dixisse de pectoris doloribus

bus, ut titulus ostendit. Alterum ut doceat illum sibi contradicere. Igitur primum, quod supponit ex 1. Aphor. 12. nullo modo ad propositum est: aliud enim est signum naturæ, aliud opus medici. nam si sputum ab initio morbum decurtat cur non maturantia emplastra statim ab initio expedit? At dicet, nocebunt, materiam quamplurimam ad locum attrahendo. At ego dico, astringentia ab initio furentis materiæ ad locum impetum sistunt, plusq; iuuabunt materiam minuendo, quàm coctionem tardando nocebunt. Quod uerò nitatur probare astringentia non conuenire, palam est, omnes autoritates quas adducit, loqui de materia iam concocta, quo in casu nec Auicenna hæc dat, sed ab initio morbi solum. Sed dicet, cur igitur & suus expositor Gentilis, à quo forsan hanc accepit contradictionem, nam ille eam exponendo animaduertit, illum in hoc relinquit? Respondeo, quoniam periculosus est si in alia materia fiat hic error: cum uerò scribamus doctis ac indoctis passim, ideò non solum recta, sed in quibus non facile quisque aberraret, scribenda sunt: ut enim in adagio, πολλοί τοι ναυπηγόμοι, παῦροι δὲ πλάγκοι. suspectum igitur ob ignorantium auxilium relinquit Gentilis. Conatur autem ostendere lentem esse astringentem. Quid plura? Galenus 1. de Alimentis cap. 18. fatetur, modò sit cocta, & non decorticata, uehementer astringere. At uerò decoctum eius, non solum non astringit, sed etiam laxat: quare si acetosa addantur, ut ille iubet, non astringet equidem, sed bilis tantummodo furentis frenum erit. Verùm non ille ab astringentibus cauendum docet, sed ab astringentibus frigidis. Lens autem quasi temperata est inter calidum & frigidum. Oportebat sanè omni fienti phlegmoni adhibere ab initio reprimentia: inquit enim Galenus tertio artis medicinalis, cap. 12. Prius in phlegmonibus à parte repellendum est, mox dispergendum: à patiente uerò loco astringendo ac refrigerando repellemus. ergo cum pectus respirationis sit instrumentum, calefacientibus ac mollientibus indiget. ob id igitur Princeps solum ante initium phlegmonis dum dolet, sed & in calido morbo modicà refrigerantibus, tamen moderate etiam astringentibus, nec nisi etiam emendatis utitur: unde artis summum, ubi error maximus esse credebatur ostenditur. Nemo autem ignorat quæcunque ad fastigium subtilitatis perueniunt, plus ad ostentationem artis, quàm ad exercitationem pertinere: nam neque Galenus illa sua ad animi deliquium uenæ sectione uti nos suadet, nec in uentosis, ut aiunt, doloribus cucurbitula, sed melioribus memoratis, utitur securioribus. At uerò necessitatem libri Auicennæ quisque ad medendi usum intelligit, ob iudicii illius grauitatē, & librorū qui ex Galeno iam perierunt, casum: nam neque Galenus mutilus & sparsus ad promptam medendi opportunitatem aptus est: nec Paulus aut Aëtius necessaria omnia collegerunt: & si

quisquam nunc etiam aggrediatur id facere, ut in eundem librum omnia ex Galeno medicæ artis præcepta in unum conferat: præter id quod utilissima Arabum experimenta prætermittere cogetur, totamq; librorum qui ad Auicennam peruenerunt, ad nos autem non peruenerunt Galeni doctrinam, easdem quas Auicennæ liber patietur difficultates.

CONTRADICTION XI.

Medicina an tota tradatur in libro Artis medicæ.

Galenus in proœmio Artis medicæ uidetur polliceri se totam artem modo diffinitiuo traditurum, quod tamen non facit: nam de Elementis, & de Humoribus, tum etiam de Dissectione nihil dicit in eo libro. Respondeo, dissectio traditur ordine diffinitiuo etiam in aliis, & non est proprie scientia, sed ars: est etiam prolixa tractatio, quam nemo recte in compendium reducat. qui uerò conati sunt hoc facere, nulla in parte magis peccauerunt aberrantes & confundentes. quamuis nullos alios minus quàm Galenum deceret hoc facere, cum in multis aliis libris eam scripsisset. Sunt & qui existiment eam non esse medicinæ partem: tum quòd belluis etiam communis sit, tum quòd medicinam ob id scientiam esse fateri cogantur. Humores & Elementa sæpius recenset, quamuis nullam de his propriam tractationem faciat: hoc autem in his sufficit, quando in talibus hæc tractatio futura sit breuissima. Sed si modo insufficiens non est, dicendum est, Medicinam scientiam esse, cum traduntur humores, elementa, dissectio: hæc autem præterire licet, cum sub artis modo, non scientiæ, ut in arte medica fit, pertractatur. Quamobrem ut Galenum à calumniis uindicemus, medicinam esse scientiam fateri necessarium est.

CONTRADICTION XII.

Insensibilis in qualitate mutatio an detur.

Insensibilem prorsus mutationem refugere uidetur cum Philosopho Auerroës 8. Physicæ auscultationis t. & Con. 23. seu mauis dicere sectione. Et fundamentum huius opinionis triplex est: Primum, si daretur (gratia exempli) ut gutta lapidem cauaret sensim, sensus circa propria sensilia deciperentur: essent enim omnia in perpetua mutatione, cum tamen quiescere uideantur. haud uerò conuenit, ut natura sensus nostros sic finxerit, ut nihil certi sciant. Secunda ratio: Si quod mutatur, in actu est, infinitas partes habere non potest: nam sic actu infinitum esset, nam infinitum non nisi in his quæ potentia sunt, datur: sed quod mutatur
suis

suis partibus actu est, dum fiunt, & dum corrumpuntur. Igitur partes has impossibile est esse infinitas. Tertia: Omne infinitum pertransitur uel nunquam, uel in tempore infinito: sed lapis cauius fit: igitur pars quæ exciditur non habet infinitas partes. At Galenus longè aliter censet, nam 1. de Locis affectis, cap. 2. iuxta finem, & ipse guttæ lapidem cauantis exem plum inducens, inquit: Si mille guttis lapis sensibili parte excauatur: aut præcedentes præparant, aut excauât & ipsæ, aut nihil omnino operantur: si nihil operantur præcedentes, nec ultima, quæ illis æqualis est robore, non superior: si excuant, nec nisi sub millesima, ut ita dicam, uel ultima gutta sentitur cauitas: luce clarius est, insensibilem priorum fuisse operationem: quod demonstrare uolumus. At de præparatione nihil dixit, nec ibi, nec 3. de Temperamentis, cap. 4. quod tamen maximè erat opportunum cum ad id retugiant Peripatetici. Conati sunt quidam Galeni rationem confirmare: nam alia non uidetur qualitas addi posse à præcedentibus aquæ stillis, quàm quæ aquæ conueniat: at si laxum aquæ immittas uel per annum, non excauatur: quod tamen falsum est, si in fluentem imponatur: motu enim & aqua longe plus minuitur, quàm ex gutta assidue cadente. At non animaduertunt quid in medium ualidius afferat Galenus contra Philosophum: quamuis illum nō uidisse ea in parte eum existimem: nam longè acrius solet inuehi ubi aduersus placita Peripateticorum disputat. Igitur hoc est illius fermè argumentum: quanquàm seriem uerborum inspicienti opportunius ibi pro cōclusionē ponatur. Fit erosio adeò leuis in uisceribus, ut eam homo non sentiat: ualidam tamen erosionem sentit: idē sit de caliditate: quare & erosio & caliditas causæ dici debent, quæ sensum tactus mouere possint, & tamen præ paruitate fallunt. Igitur multò magis in cæteris sensibus, qui tactu minus certi sunt, contingit hoc. Inde 3. de Temperamētis subiecit. Si omnes has paruas noxas sensus sentire cogeretur, quid aliud pateremur, quàm sempiternæ, ut dici solet, dogma passionis? Ergo sensus propter res ipsas inuentos Galenus uult: ut scilicet, cum aliquid excelleret, quod uel prodesse, uel nocere posset, sentiretur. Aristoteles autem propter sensum uidetur rerum ordinem constituisse: quia sensus, non quantamcūq; minimam rem assequi potest, idē nec res ipsæ ad quantamcūq; paruitatē scindi possunt: sed ueluti cum Epicureis sentiat per minima ipsa mutationes fiant. Et quanquàm rationes Philosophi acutiores uideātur, opinio tamen Galeni magis consentit his, quæ apparent, nam multa uidemus quæ sensum adeò permutantur, ut homo non ea percipiat, ut filii incrementum coram matre: quod etsi lateat eam per singulas partes, non tamen latet postquàm multum creuerit, & hæc est causa quod absentes, id melius agnoscuat. Infinita facile pro Galeno esset adducere experimenta: ratio tamen illa prima, non

multum uidetur pro Galeno faceremam, ut dixi, Philosophus diceret, excuari lapidem in aqua: adesse etiam humidam præparationem per quam à lapide pars illa celerius disungeretur: tertio, quod difficilius posset reprehendi si dicas, partes minimi quæ, dū est iunctū lapidi, actu sunt, separari ab alijs circumiacentiū minimorū partibus, sic tamen ut illud minimum non fateamur partes habere quæ per se esse possint: nec tamen illæ erunt infinitæ, sed tot, quot minima, quæ minimū in lapide ipso tangunt: hoc enim necessarium est, non solum uerum, apud illos qui hæc minima ponunt. Quidam conati sunt illos concordare. Alii quidem sic: Insensibile duplex, aliud quod adeo paruum est, ut etiam per se sumptum quouis modo, sentiri ob suam paruitatem non potest: aliud quod quanquam per se posset sentiri, comparatum tamen ei cui adiicitur, uel à quo aufertur, nequit: ut granum frumenti quod nō adeo paruum est, quin percipiatur, additum tamen acervo magno, non sentitur, nec oculus differentiam posterioris acervi à priore agnoscit: primum igitur insensibile negat Philosophus dari, nec Galenus illud concedit: nō tamen negat Philosophus dari hoc insensibile, quod fit per comparisonem: & hoc est quod Galenus ponit. Et ideo pueri crementum est sensibile primo modo, quod per se posset agnosci à sensu, ut granum illud frumenti seorsum: non tamen in comparatione ad puerum.

Alii dicunt, quod mutationes istæ apud Philosophum fiunt per sensibilia in actu: quia sensus decipi non debet: uerum ut motus possit uerè dici continuus, fit per insensibilia in potentia: & hanc mutationem Galenus uocat insensibilem: & sic discordia est solum in uerbis & nomine insensibilis, non ex re. Sed ista opinio non concordat illos, nam Galenus uult, quod in actu prima gutta aliquid excauauerit quod insensibile fit ob paruitatem, & in hoc differt à Philosopho, qui nihil ponit excauatum, quia non sentitur: quare esse excauatum lapidem, & non esse, iam sunt contraria: contraria etiam sunt illud minimum non sentiri, & ubi ponatur sentiri, igitur Galenus in duobus contradiceret Philosopho. Contra primam argumentantur quidam: quia Galenus in 3. de Temperamētis dicit: Qualitatem acquisitam adeo leuem esse, ut non sentiat: igitur cū illa mutatio absoluta sit, patet Philosophum illam non concessurum. Responso ad hoc clara est, Quicquid sit de Auerroë, Philosophus mutationem in qualitate non per minima, sed & ipsam insensibilem statuit, comparisonem ad uehementiam habita, non autem ad subiectum. Verba eius subiungam ex loco illo: *ὁμοίως δὲ καὶ πρὸς ἀλλοιώσεως ἀποκαστῶν. ὃ γὰρ εἰς μετέωρον εἰς ἀπεργον τὸ ἀλλοιούμενον, ὅτι τὸ αὐτὸ καὶ τὴν ἀλλοίωσιν, ἀλλ' ἀθροα γίνεται πλεονέκτως ὡς πρὸς τὴν πᾶν.* Id est: Similiter autem & in qualitatum mutatione obseruandum est: non enim si quod qualitatem acquirit in infinitum potest

potest diuidi, propter hoc & ipsa qualitatis inductio: sed confertim fit sæpenumero, ut congelatio. Quis non uidet ex exemplo, si uerba non adeo illi clarent, intelligere Philosophum, acquisitionem per subiecti partes simul fieri minimas, non autem respectu qualitatis: nam glacies fit in magna aquæ parte simul, etsi forma illa in quacunq; minima parte nõ simul, sed sensim inducatur. Inde ex hoc errore obortæ tot difficultates: unde etiam sibi his, quæ in sexto eiusdem operis dixerat, contradicere uidebatur. Ergo si uerba ad qualitatem ipsam referantur, quis non uidet, exemplum esse falsum? quis enim unquam uidit repentinam congelationem humidorum? at magnæ partis simul quotidie uidemus. Quare in utraq; causa Galenus ad unguem Philosopho concors est: nam inductio qualitatum, quo ad uim, continua est, & ab insensibili auctione procedit: quo ad subiectum certam necessariò occupat quantitatem, quam minimum eius rei appellamus: seorsum quidem semper sensibilem, in comparatione autem totius, cuius est pars, sæpe insensibilem.

C O N T R A D I C T I O X I I I .

Hippocrates dogmaticus fuit,

Hippocratem autorem huius libri dogmaticum esse in tota hac ostenditur commentatione. 1. Aphor. 1. Oppositum in Introductorio, cap. 4. Rationalis sectæ princeps fuit Hippocrates: Methodicam Themison Laodiceus Syrius incepit, absoluit Thessalus Trallianus. In libro etiam de Optima secta ad Trasibulum, cap. 4. ostendit eas esse tres, Dogmaticam, Empiricam, & Rationalem. post hæc à cap. 13. usq; ad finem libri, Methodicam, seu Dogmaticam oppugnat: maxime autem cap. 17. ex Hippocratis uerbis. Igitur Hippocrates non fuit Dogmaticus, aliter damnaret proprium magistrum, & etiam ex propriis illius dictis. Hoc autem non ibi solum, sed deinceps sæpe, usq; ad totius libri calcem. Plurimæ alię sunt autoritates, quæ id clarius luce ostendunt, per libros Galeni sparsæ. Solutio igitur ex libro de Sectis, ad eos qui introducuntur, cap. 2. & 13. habetur. In priore enim ostendit duas fuisse antiquissimas sectas: Empiricam, & Rationalem, seu Dogmaticam: nam sic tunc appellabatur, cuius ut dixi Hippocrates princeps extiterat. Quare dictum in Aphorismis inuiolatum manet. in cap. 13. declarat his duabus post longum tempus successisse Methodicam: quæ etsi cum Rationali & Dogmatica in significato propinquitate conueniret, re tamen ab illis non minus quam Empirica differt. Igitur Rationalis & Dogmatica una est, secunda Empirica, tertia autem Methodica illis posterior. Cum uerò antiquum esset nomen Rationalis sectæ *λογικῆς*, & illi tamen qui eam sectabantur *δογματικοί* uocabantur, ita ut aliud esset nomen sectæ, aliud sectatorum: ob hoc, quæ una erat, duo nomi

nomina fortita est. Impropie igitur dixeris Sectam dogmaticam, uel Medicos rationales: proprie uerò Sectam rationalem, & medicos dogmaticos. Hæc igitur non tam est dicenda contradictio, quàm declaratio confusionis horum nominum.

CONTRADICTIONE XIII.

An continens, seu coniuncta causa detur.

TRes sunt causæ dispositionum corporis, Primitiua, Antecedentes, Coniunctæ: secunda primi, doct. 2. summa primæ cap. 1. & Ioannitius in Isagogis idem confirmat, ceteris fermè omnes Arabes: unde Auerroës primo canticæ Commento 176. Causæ duplici genere continentur: aliæ quidem exteriores, quæ & primitiua uocantur: aliæ internæ, & harum quæ remotæ sunt à morbo, uocantur antecedentes: quæ uerò illi sunt proximæ, intellige ut nihil sit intermedium, uocantur coniunctæ. Et in Commento sequente ostendit secundam differentiam antecedentium, & coniunctarum: nam sublata coniuncta aufertur morbus: ut ablata putredine, febris: sublata autem antecedente, puta humorum multitudine, quæ est causa obstructionis, inde prohibita transpirationis, inde putredinis, non aufertur febris: quoniam coniuncta manet, antecedente sublata. Galenus etiam in Introductorio cap. 8. (nam cum eruditis uiris ego certans, meum inscitæ testimonium non dimittam: tarde enim accedens ad disciplinas, difficulter dicta ueterum reperio, nisi caput, seu sectio adiungatur. Non me præterit, non esse hoc classicorum uirorum exemplum: sed postquam illos æquare ingenii felicitate, & autoritate non possum, liceat uel mihi & in hoc ab eis discere: præsertim ductore Alciato, qui & ipse putro aliqua causa honestiore inductus, non civilem legem, nec codicem, sed ad unguem locum adiungit: quanquàm is è regione persæpe, ego uero cui non tam prospera scribendi occasio affulit, quæ nunc corrigo sic emittam; si in posterum reliqua emendandi tam bona Principum nostrorum gratia, ac liberalitate, fortuna detur, qualem plures experiuntur, meliorem forte illis ordinem subiiciam: neq; enim obscurum est ignotos homines, etiam rudi minerua scribere solere) quinque causarum genera refert: Continentes, ut spina ac telum: quibus positus morbus necessario adest, sublatis autem aufertur. Præcedentes, seu Internæ, quæ ab euidentibus uel præparantur, uel adiuuantur: ut plenitudo, quæ ex nimio alimento fit. Porro Euidentes uocat, quæ Græcis dicuntur Procatartica, uel Antegressæ, quæ cum aduersam ualitudinem crearunt, separantur: ut frigus, & nimia exercitatio. Concausæ, quas Græci Synætia, quæ morbum creant simul iunctæ, cum quælibet tamen per se sufficeret: ut ad urinæ suppressionem lapis, & uesicæ inflammatio. Auxiliares, quæ per se neque-

queunt, sed aliis iunctæ ualent morbum gignere: uelut libido articulari morbo, causa est Auxiliaris. Manifestum est igitur, quoniam pacto plura sint etiam tribus causarum genera: sed etsi uelimus, Adiuuantes & Concausas, per tria illa cōmodè distribuemus: erunt enim omnes uel Continētes, uel Præcedentes, uel Antegressæ illarum singulæ. Meminit & Continentium causarum autor libri de Diffinitionibus, exemplum dans de uesicæ lapide: nam eo existente, morbus adest: sublato, tollitur. Inde etiam 7. Aphor. 30. super illud: Quibus in alui profluuiis excrementa spumosa sunt, iis ex capite pituita defluit: Galenus ostendens, nō omnino hoc certum esse, aliā causam assignat, quæ est, ut uasa quæ ad uentriculū pueniūt, talem humorem spumosum effundant in ipsum. Volens autem generalē quendam modū huius symptomatis ostendere, subiicit: Fieret enim quādoq; & in ipso uentriculo unam habens, ut quispiam diceret, causam contentiuam, quomodo cunq; excernatur aut fiat, antecedentes uerò plures. Est autē huius pituitæ causa contentiua, flatuosus spiritus. Clarū est quid sint, & quomodo distinguantur, illum ibi planè ostendere. In libro etiam contra Iulianum, continentem causam morbi dari docuit: uerū cū illam negaret hoc argumento Asclepiades, Continens causa est, qua sublata tollitur morbus: sed sublata multitudine persæpe morbus relinquitur: non est igitur ipsius morbi causa continens plenitudo. Respondet ad hoc Galenus, (nam iuxta mediū paulò post hæc disputatio exoritur) Membrum quod plenitudine laborat, ea sublata penitus sanitati restitui. Inde hanc subiicit sententiam, ut paucioribus eam uerbis explicem: Diximus alibi de continentibus causis secundum Stoicorum opinionem, quorum tam nomen, quàm res ipsa inuentum est: nec rectè illo nomine uti recentiores medicos: nos tamē, ne de nominibus litigemus, illas ut sic nominentur cōcedere: nō quòd aliquid sint eorū, quæ uere sunt: sed quæ in sola tantum cōsistāt generatione. Inde cōcludit, multos sanata multitudine protinus curatos esse, ut hāc causam nemo possit negare: primò etiā de causis pulsū cap. 1. Quia uariat usum pulsus, causa externa, intercedētibus aliis præcedētibus, cū hic una cōtinēs sit causa pulsus, etiam ipsos pulsus immutat: neque enim ulla possit cōtinēs causa immutari, ut cōstans maneat effectus. Qui uertit, dum solocissimum admittit, corrumpit sensum: cū usus pulsus seu *χορῆς* causa sit cōtinēs. Ego necessitatē, uel indigētiā potius uertere, ibi igitur cōtinētis causæ pulsus & reliquorū duorum generum, satis apertè, dum quis etiā febre correptus est, meminit. In libro etiā de Renum affectibus, in fine, dixit, Et si animus erat tractare de quibusdam, puta, an lapis sit causa uel morbus: etsi causa, an cōiuncta, uel præincipiēs. unde illā in factō morbo uidetur admittere. 2. etiā de Symptomātū causis, cap. 2. & tremoris, & palpitationis manifestius causam ostēdit cōtinēntē: aer enim

inclusus quàm diu durat palpitationē facit: sublato eo, tollitur palpitatione igitur ex diffinitione cōiunctæ causæ intentū sequitur. illā autē infrā docebimus ex Galeno. Idē de horrore rigoreq; Galenus quoq; in libello de Historia Philosophorū causæ cōtinentis meminit cap. de principii & causæ differētia. & rursus 2. Art. curat. cap. 4. & alibi tum 10. Ar. cur. cap. 10. & 1. super 3. Epidem. cap. 2. cū itaq; tremores habeāt causam, ut ita dicam cōtinentē, uiriū imbecillitatē. & in 4. eiusdē libri cōmēto, docet eos, quōd dum fiunt etiā sunt affectus ut cōuulsionē, tremorē, & alia eiusmodi plura. & in libro de multitudine, cap. 3. & clarius 4. multa de continētē causa disseruit. At uerō nec in cōtrariū pauca adduci solēt: nam illud aduersus Asclepiadē, primo, ostēdit factorū morborū nullā esse causam continētē. quæ etiā sentētia uidetur excipi à Galeno 2. Aphor. 22. Fientiū morborū cura est causæ remotio, factorū autē ipsius morbi. Quōd si continens causa in factis datur, duabus curis necessario opus erit. primo etiam Artis curatiuæ cap. 8. Quartū uerō ab his genus statuito quod sit morbi causarum: atq; harū, quæ quidē in ipso animalis corpore consistūt, antecedens nominet: quæ extra primitiuū. Idē fermē in libro de Causis morborū, cap. 2. in fine, cuius seriei initii est, Rursus igitur: ostendit tantum duo genera causarū præincipientiū, seu externarū, seu primarū, & antecedentiū, idem & in de Causis peccateticis. Decebat autē Galenū in his tribus locis meminisse cōtinentiū causarū. In primo, ob curā quæ illis debetur: in secūdo, quōd de causis sit propria pertractatio: in tertio, ut rectē primitiuæ causæ ab aliis omnibus disiungerentur. In Aphorismo quid attinebat Galeno distinctionem asserre fientiū morborū, & eorū qui iam facti essent, curamq; diuersam iniungere, si omnes morbi causis cōtinentibus iuncti sunt? In libro etiā de Multitudine, cū reliqua duo genera attigisset, cōtinentiū nō meminit, in 3. etiā Artis medicinalis libro, cap. 5. cui titulus est, de Solutione continui, in fine, Galenus docet tria causarū genera: quoddā quo in temperies iam facta curatur, & uocatur Curatiuū. Secundū, quo quæ nōdum inducta est, prohibetur: & hoc duplex, aliud Conseruantium, aliud Præferuantium. Tertiū genus quod fienti conuenit, mixtū ex præseruatio & curatio genere: Iam enim (inquit) factū morbū curare oportet: sed eū qui nondū adest, futurus tamē est, prohibere cōuenit ab ea, ne fiat, quæ est in corpore causa: eius autē qui adhuc sit, quod factum est curare expedit: quod uerō futurū est, prohibere ne fiat. Manifestū est ex his, causam ab effectu separari posse, affectū uerō ipsum sine causa curari debere. Quod si cōtinēs morbi iam facti causa assignetur, dupliciter peccabit Galenus: primò quōd nō solū morbū iam factū curare expedit, sed etiam causam: nec ullū erit inter fientē morbum, factumq; discriminē Medico, cū duplici in utroq; auxilio indigeat, 8. etiā Artis curatiuæ, cap. 1. Itaq; si iam præsens febris

febris est, causa quæ eam excitauerit desit, huic tantū sanandæ cōsiliū dirigetur, ut refrigeretur. At si in generatione adhuc est febris, causa quæ eam accēdit, submouēda est: si pars eius est genita, pars uerò adhuc gignitur, utriq; consulendū est, primò causam subducendo, deinde extingūdo, quæ ab illa facta est febrē. & 11. eiusdē cap. 10. in initio: Ergo qui febrē curare uolet, necesse est putredinē inhibeat. Ita duæ indicationes se exhibēt, altera à putredine, altera à febre. At à febre rursus duæ: altera ut febris portio, quæ iam accensa est, curetur: altera, ut quæ in generatione ipsa est, inhibeat. Rursus à putredine duæ erunt indicationes: prima, ut quod putredinis iam factū est, sanes: secūda, ut quod in generatione adhuc est, prohibeas. Porro quod in generatione est, id perspiratio impedita gignit. Nihil enim prohibet sic illam nominare clarioris doctrinæ gratia. Ita ab hac aliæ duæ indicationes nascētur: altera, ut retentū iam uacuetur: reliqua, ut quod retinendū est, prohibeatur. Si igitur putredo febris causa est coniuncta, haud indiget depulsa putredine refrigeratione ulla: nāq; ex cōiunctæ, seu cōtinentis causæ diffinitione liquet, sublata causa effectum tolli. Quin etiā idem cap. 4. eiusdē libri, Quæ igitur ex tali affectu febris exoritur, necesse est synochon, id est continentē esse. Nec fieri potest, ut ea sanetur, nisi prius inhibita sit putredo. Ea uerò manente, causa inhiberi nequit: quare summouenda prius est causa, si modò ipsa putredo sit prior, mox post ipsam febris sanari debet. in libro etiā de Differentiis symptom. cap. 1. in ultimis uerbis inquit, quin etiā præcedentes in corpore animalis morbū causæ symptomata dicūtur: nec meminit cōiunctæ ibi. Hæc Fuchsius, & Brasauolus contra Montnum scribunt: quæ quidem ego, cū hos modestos homines, præter etiā eruditionem agnoscam, atq; citra omnem adulationē in magna huius ætatis labe, raros, non conabor euertere: sed tamen inquirendæ ueritatis gratia, dubia quædam circa hæc mouebo: admonēs, lectorem ut possit & quæ Conciliator ipse differentia 159. scripsit, quam obiter, & ualde pauca, considerare.

Duo igitur à me uidenda sunt: primū, an Galenus hanc causam adesse morbis crediderit: secundū, an & si Galenus, ut ipse testatur, uitādi sophismatis gratia, uel studio antiquis cōtradicēdi, quo ad immoderantiā usq; tenebatur, illam negauerit: an forsan tamē necesse sit eam admittere? Neque enim in hoc recentioribus, quod sæpius testatus sum, fauco: quibus sufficit dixisse, hoc Galenus affirmat: nanq; si sic Vesalius fecisset, utiq; multa quæ in lucem prodierunt, laterent. Certum est autem etiam illum in rationibus & clarissimis rebus defecisse, quod nos mox subiungemus: uelut cū hominem uel æqualem dixit esse inter elementorum excessum, uel illorū æqualitati ualde uicinum: cū & secum Auerroës ipse deliret. Homines igitur sunt: si ratio uel experimentum manifestum ob-

stet, etiam si nullus aduersetur, eos relinquam. Nunc autem in hac causa ex una parte Galenum, non satis sibi firmè constantem, habemus: ex altera Arabes omnes in unum consentientes: num igitur rem obiter tantam tractabimus: pro causa tamen illud adducit, etiam præter Galeni auctoritatem, putredine sublata febrem relinqui, uaporibus illā fouentibus: quare non esse ullam continentem causam, ex eius generis causæ diffinitione. Brasauolus ex Leonicensio illam admittit, sententia Aphor. duorum iam recitatorum, & quæ etiam in libro aduersus Iulianum profertur adductus: uerum in fientibus morbis, in factis autem negat omnino.

Ergo primo de Symptomatum causis, cap. 2. partū ante medium, inquit: Quippe laxitatis generandæ causa (ut sic dicā coniunctæ) tensio est tunicæ rhagoidis. Hic symptoma habemus uitiū uidendi morbum latitudinē pupillæ, qui causa est symptomatis. Laxitatis, seu latitudinis, quæ est morbus, cōiunctā & adæquatam causam, qua posita ponitur, ablata aufertur, tensionem rhagoidis tunicæ. Sed dices, Cur ergo dixit (ut sic dicam) coniuncta, & non absoluto liberoq; sermone: nam & Græcè habetur: *ὡς ἀνέπνευσ*, ut quis dixerit. igitur nomen potius quàm rem reformidare uisus est. Sed sunt qui reconciliare Auicennam Galeno conantur: dicentes, per causam coniunctam utrunq; eum intellexisse, quæ medio caret. Auicenna sic illam definiente, secunda primi doc. 2. cap. 1. Galeno autē in primo de locis, cap. 2. dicente, ignem esse causam ultæ partis, qua separata, quiescit affectus: assistente, præsens est: ut gladiū etiā uulneris. Igitur propinquissimā innelligit, non quæ coæquetur, nam sublato gladio, manet uulnus: & igne, iustionis noxa. Ergo sic dabitur 2. etiam de Natura humana, Com. 1. repletio non est morbi causa coniuncta, quia inter illam & functionis læsionem alia media sunt, nec ipsa per se ledit. Sed si modo ita est, quàm absurda dubitatio Galeni esset, an detur coniuncta causa? cum palam sit, in omnibus morbis eam esse necessariam, si per coniunctam causam eam, quæ medio nullo hæret morbo, intelligamus: nam talē in omni esse necesse est. In libello etiam aduersus Iulianum, causam diffinit continentem, dicens: quod est eā, ex qua fit aliquid, & cum ea illud idem cessat. Et primo de Differentiis symptom. (caput numero, nō librū significo) inquit: *ἡ δὲ τὴν αὐτὴν τὴν μέντοι διάθεσιν οἱ ἔμνηνες ὀνομάζουσι πάθος. ὡς περὶ τὸ πεποιηκός, ὅτι ἐπὶ τὸ ποιεῖν, αἰτιοῦ. καὶ τὸ γὰρ εἶδὲ τοῦ ἀπλῶς αἰτιοῦ ὅτι ἡ μέντοι διάθεσις, ἀπλῶς ἐστὶ πάθος, ἀλλὰ καὶ αὐτὴ κατὰ γὰρ τὸν ἀκριβῆ λόγον, γεγονὸς μὲν πάθος ὅτι ἐπὶ τὸν δὲ ἐπὶ.* Quod est: iam autē & ipsum manentem affectū Græci Morbū uocant: quædam modū & quod fecit, nō autē amplius facit, causam. Et si neq; hoc simpliciter causa, neque manens affectus simpliciter est morbus. Sed exquisite loquenti, morbus est affectus factus, non autem qui fiat. Deinde infra subiungit, iuxta capitis finē, diligētī dis-

put

disputatione peracta, ueram morbi finitionē sic: Morbus est affectus operationem absq; medio alio uitians. Quotquot autem præcedunt affectus & ipsi per morbum operationem lædentes, tanquā medio quodam interueniente, causæ dicuntur. Actionis uerò ipsius læsio Epigenema est, cuius genus symptoma: nam id est quicquid præter naturam accidit corpori, etiam si à morbo non procedat: ita tamen ut morbo, si adsit, posterius sit: nam aliter uel morbus, uel causa esset, nō symptoma. Ergo hæc iam à nobis permilla sint tanquā fundamenta exquirendæ sententiæ Galeni, non ad uerba illius respiciens, sed mentē potius. In quo tamen curiosos hoc ac sibi credentes monitos uelim, pro ~~mihi~~, quod est passio & est genus, me morbū uertisse, illius speciē: tū ut clarius esset, quia affectus confirmati morbus species est: quare omnis morbus iam factus est, ex Galeni sententia, si exquisitè morbi nomen assequi debet: tum etiam ut non Latinam uocem uitaremus. Igitur febris quid sit de putrida nunc loquor interrogarem? ut uerò mihi uideatur causa omnino non est: quia primò, & absq; medio, uitiat operationem. Est igitur morbus, uel symptoma. Nunquā autem inueni febrem per se consideratam symptoma, uel epigenema esse: quamuis in cōparatione phlegmonis, uel ulceris, talis dici possit. Est igitur febris proculdubio morbus: huius causa est putredo aliqua (dicit) ex antecedentibus, 11. Artis curatiuæ, cap. 9. in fine. unde iuxta medium: Sanè scire licet, difficile esse, aciq; iudicio indigens, febrem, putredinem, & effētricem causam, ubi ipsa scilicet quoq; adest, inter se conferre. Ergo inter putredinem & febrem nullum uidetur medium statuendum. Sit igitur causa febris prima, putredo, id est inter quam & febrem nihil omnino sit intermedium. Erit igitur calor ipse in corde accensus febris: quod & Auicenna prima quarti in febris diffinitione expressit, capite primo. non igitur inter febrem & calorem quicquam medium statuitur. Hoc solum uerò deficit putredini, ne causa coniuncta dici possit, quòd ea amota adhuc febris manet: nam hæc erat, ut dixi, secunda illius conditio. Amota autem putredine, adhuc febris manet, quæ refrigerantibus indiget, passim enim hoc Galenus declarat. Sed hic multa sunt dubia, Vapores medii sunt inter putredinem & febrem ex illorū sententia, quomodo igitur putredo febris causa esse potest prima? Quòd si negas hos esse causam distinctam: quero, an uapores sint febris ipsa? certè non, imò febris est calor iam impressus ex uaporibus. Sublatis igitur uaporibus amplius febris non est, quod est ex ratione causæ coniunctæ. Præterea quænam febris manet amota putredine? Vel putrida: hoc autem falsum est, nam & sic rursus amouere ipsam putredinem oporteret: uel Hectica, uel Ephimera: hoc autem nihil est contra Auicennæ dicta. nam non hectica uel Ephimera putredinem dicit causam esse coniunctam, sed solius putridæ.

Si uerò dicas, esse symptoma: nec hoc Auicennæ contradicit: nam morbum remoueri, remota causa coniuncta dicit, non autem symptomata. Rursus pro partibus putredinis, febris etiam partes sunt, hoc enim experimento liquet. Vt igitur, si ab initio pars putredinis prima remoueretur, sic etiam febris: ita tota putredine sublata, tota febris. Galenus etiam concedit, in morbis fientibus, curam esse per causæ solius ablationem: at febres putridæ sunt morbi fientes, non facti, essent enim hæctica non amplius putridæ, quare curabuntur sublata putredine. Quod etiam Galenus uidetur fateri in libro aduersus Iulianum, cum dixit: Quod si liceret bilem stante febre uniuersam euacuare, tunc solueretur morbus illico, propterea prohibemur à calore febrili. Sed dices, Quid ergo Galenus uoluit, cum dixit, duas esse ad curandum febres iam factas intentiones, quarum altera putredini, quæ prima est, altera febrì, quæ posterior debetur? Respondeo, uereri Galenum ne interim calor febrilis hæcticam aut colliquationem adducat. Igitur intentio ad putredinem, solum natura, non tempore, prior est, ea quæ est per refrigeratiam. Ambabus igitur simul utemur, ne ex affectu in affectum transeat. Quare præseruatua quædam est curatio morbi, causæ autem uera, & exquisita. Quod si ad sublatam iam putredinem calor remanens transferatur, duorum alterum necesse est esse, ut uel scilicet calor ille non sit morbus, sed symptoma, quod frequentius euenit: uel ut sit hæctica: quorum neutrum Principi aduersatur. Seu igitur cura debeat calorì existenti, dum putredo adest, quæ mens uidetur esse Galeni ubiq; in locis adductis: seu post remanenti iam febrì hæctica, seu symptomati, apparet nihil horum obflare, quin febris putridæ coniuncta causa, sit putredo ipsa: quandoquidem amota putredine, febris putrida tota tollatur. Quis enim adeò obscurè Galenum interpretabitur, ut audeat illi imponere, quod senserit febrem manere, & adeste putridam, ex toto sublata putredine? Ergo causam huius uerisimilem quasi ille dedisse uidetur: cum dixerit, primam intentionem ad putredinem habendam esse, secundam autem ad febrem ipsam. Sed non tempora distinxit, uerum necessitatem: ne quis primo refrigerantibus mentem intenderet, quæ postmodum putredinem possent augere: quare ex his non difficile est uidere, quid uoluerit Galenus his in locis, quæ ab his adducuntur. Sed prætermisit nomen coniunctæ causæ; tunc ut ille fatetur suspectum, satis est rem ipsam illum præterisse. Dixit autem de hoc diffuse ac distincte, in libro à se scripto disputasse, quem uerisimile est ad Arabes peruenisse: quanquam, ut plures alii, qui ad eos peruenerunt Galeni libri, nobis perierint. Neq; credendum est, cum Auicenna & cæteri in hoc Galeno non profiteantur se contradicere, hoc genus causæ somniasse. At uerò obliuies, ex primo de Differ. feb. cap. 5. quod post febrem calor quandoq; ma-

net per diem integrum, uel etiam per duos dies, ut ephimeræ speciem referat. Hoc nos non negamus: sed putridam febrem esse, non fatemur: quod si per uapores, ut ibi Galenus concedere uidetur, sustentetur: dico tunc, uapores ipsi iuxta Arabes, febris putridæ causa coniuncta erunt, non humor putridus: sed nec hoc Galenus dicit, quod humor putridus, sed quod putredo ipsa causa esset febris. Quamobrem si quis absque affectu rem hanc expenderit, uidebit Galenum nomen continens causæ potius, quam rem ipsam declinasse: quanquam & illud in his qui fiunt morbis, aperte confiteatur. Arabes uero non nomina, sed solum res curantes, Galenum secutos, eius rationem habuisse. Sed nec Fuchsius, ut uideo, auctoritati 7. A phor. respondet: cum ibi Galenus morbum, non rem naturalem describat, cuius sit ea causa continens. Sed symptoma est dicit, morbus autem symptomatis causa continens esse potest: ut etiam lapis in uesica, difficultatis urinæ. Fateor hoc non conuincere: illud uero satis est apertum, quencumq; posse Galenum Arabibus non magna cum difficultate reconciliare. Forsitan, quod credo, aliqua his sunt argumēta, quibus has nostras expositiones, tum rationes, possint euertere. Ego cum non uideam illas, his quæ scripti acquiescam: non negans tamen aliquos esse forsitan morbos, sed non putridas omnino febres, qui contentiua causa, cum iam firmati sint, careant. Verum de hoc posterius considerabimus: nunc satis sit, ostendisse eam quæ relinquitur febrem, summotâ putredine, putridam non esse: aliter non teneret Galeni argumentum. II. Artis curatiuæ 10. Febris putrida est, igitur putredo, igitur prohibita transpiratio: nam post ablatam putredinem manente febre putrida, hæc omnia falsò deducuntur. At dices, cur igitur factis iam morbis cura ad causam dirigitur? Respondeo, quia 2. A phor. 22. uidebat morbos esse, qui omnino continente causa carerent, ut hæcticam ipsam. De putridis autem; si non diuersam à seipso ibi sententiam scripsit, cum fientibus cura debeatur causæ, quia continens est, factis autem non, quia deest causa continens: putridis igitur, cum sanari nequeant nisi sublata putredine, continens causa est humor putrescens, uel putredo ipsa. Igitur quod intellexit ibi clarum est: putridas siquidem aut fieri tantum, aut partim fieri, & partim factas esse: quare omnibus putridis causa continens, uel Galeno ipso teste, semper iuncta est.

C O N T R A D I C T I O X V.

Tertiana & quartana an ex toto genere salubres.

Tertiana febris, & quartana, tum etiam quælibet quæ ad solutionem peruenit, periculo uacat 4. Aphor. 43. imò dicebat Galenus, si tertiana longas habuerit accessiones, omnino uacabit periculo: sed & si cum hoc duodecim horarum spatium non impleuerit accessio, brevis etiam erit.

Reddit

Reddit rationem horum: omnis morbus periculo non carens, est uel cum phlegmone, uel cum humorum prauitate: sed in his ambobus, febres necessariū est esse continuas: igitur quæ uacant continuitate, periculo etiam uacant. 3. etiam particula primi Epidemiorum Galenus Com. 4. dicebat super illud: Quartana securissima & longissima: quod hoc est uerum merito febris, nisi aliquis tumor in splene adiungatur, 3. super 3. Epidem. Com. 72. segmento 1. inquit: Scimus quod Quartana est toto genere securissima secundum Hippocratis mentem. Rasis tamen dicit 10. ad Almasforem 22. quod tertiana notha, non est absq; periculo: & quæ ex pituita accidit, licet interpolata, non est secunda. Auicenna etiam prima quarti tract. 2. dicit, quod Quartana coniungitur tumori splenis perducit sæpe ad hydropem, & mortem. Non igitur uidentur primo omnes interpolatæ febres uacare periculo, cum tertianæ nothæ, & quartanæ quotidianæ periculum non leue minentur. Accedit, quod non uidetur Galeni ratio in Aphorismo sufficiens, cum multi ex tumore in splene moriantur, iuncto quartanæ febris: non igitur semper periculum est ex phlegmone, uel humorum prauitate. Respondeo: apud Galenū omnis interpolata est securissima: quandoquidem se iacet media hyeme curasse senem sexagenarium, ac etiam natu maiorem, triplici quartana laborantem Eudemum: libro de Præcognitione cap. 3. Est autem periculū si quisquam aberret in cura: ut de adolescente qui fermè ex notha tertiana obiit. 1. ad Glauconem cap. 8. item ubi alius adiungatur morbus, ut de quartana & tumore splenis. Rasis autem periculum erroris æstimans, omnes morbos dixit non esse securos in quibusliceret uel minimo errore ægrum periclitari. Tales igitur sunt quotidianæ, & his minus tertianæ nothæ. Quartanas autem securiores pronuntiauit, quamuis cum tumore splenis securæ omnino dici non debeant. Sed hoc non merito febris est, sed adiuncti morbi: igitur Galenus rem ipsam nudam spectat, Rasis euentum. Pura tamen tertiana periculo uacat, si non grauiter erret. Mortuus est tamen auunculus meus ex ea Gothardus Cardanus LXXXIIII. natus annos: alium etiam interemit infcitia medicorum grauis, ut illum ætas. ex errore tamen non in mortem illico prolabitur: ut notha quæ in uirtutem non leuiter affligit, 1. ad Glauconem 10. sed in notham aut duplicem tertianam transit. Rationes autem quas ibi Galenus adducit ad acutas referas, quæ non nisi eo modo possunt esse perniciose: nam de longis securi non sumus, quod tumor in aliquo uiscere non sit. Vnde 2. Aphor. 19. pauci sunt morbi diurni in quibus nulla sit in aliqua parte humorum crassorum, uel lentorum, tumorem durum excitantium potius, quam phlegmonem copia. Ergo tales ut solum ex intermittentibus quartanam admittunt, sic maximè de quartana nos Galenus & Auicenna admonuerunt. Sed de quotidiana aliqua remanet dubitatio: uerum

uerum si modo accidit, nec antiqui animaduertisse uidentur, nec rationi esse consonum. pituita enim cum in tumorem collecta fuerit, & computruerit, necessario sanguini admiscetur, & phlegmonem excitat, ac cum eo continuam febrem. Si autem non putrescat, in scyrrhum trāsit, & melancholicas, quamuis pituita sit, excitat febres.

C O N T R A D I C T I O X V I.

Ossa an sentiant.

N Vllum præterea ossium sentit, præter dentes, aliquid penitus. prima primi doc. 5. cap. 5. unde Galenus 16. de Vsu partiū 2. Ossi nulli aut cartilagini, aut ligamento neruus est insertus: quoniam hæ partes nec sensu, nec motu indigent. Aristotelē memini me in prima Cōtradictione adduxisse, negantem ossibus sensum, tum etiam ligamentis, cum illa sub neruis comprehendat. etenim hæc Cōtradictio in primæ supplementū à nobis scribitur, quoniā digna sunt scitu, quæ hīc pertractantur. At quomodo iam ad ligamenta neruus non uenit, cum tendones neruis ac ligamentis constet: ut primo de Motu musculorum iuxta principium: atq; alibi sæpius. Apparet autem & motus causa illud factum esse: quādoquidē si roboris & coniunctionis merito factū esset, os ossi firmitus uel cum illo iungi poterat quā solo ligamento: quare ligamentum ad firmitatem non solum, sed etiā ad motū factum uidetur. Quin etiā ossa, & ligamēta, ac cartilagine sentire Galenus affirmat lib. de Multitudine, cap. 5. dicens: Ossa quædā sensum habēt gravitatis: quædā uerò tum ossa, tum aliarū partiū sensus omnino sunt expertia, quòd ad illa neruus non ueniat. Hoc idē existimat Auenzoar libro 1. trac. 9. cap. 19. adducit autē tres, ut mihi uidetur, à paucis intellectas rationes. Prima est, quòd dentes sentiunt, qui sunt ex ossium genere: sentire autē per se inest partibus animalis quibus inest: & quod per se inest, omni inest, per se enim hæc est, Dens sentit: & hæc, Os sentit: quare & Omne os sentit, uera est. Item, Ossa nutriuntur & crescūt, etsi uenis careant: quare etiam sentiunt, etsi neruos non habeāt. Videtur autem mihi ratio ualida plusquam prima fronte appareat. nam 2. de Anima 31. in sensitiuo uegetatiuum, ut trigonum in tetragono: igitur in potentia est uirtus nutriendi in sensibili. Vbi igitur sensibilis facultas non est, in eo quod animam habet sensibilem, ibi non est nutritio: at ossa nutriuntur, igitur uel etiam sunt sensibilia, uel duæ erunt prorsus animæ. Tertia ratio, Ossa non putrescunt, & seruantur in uiuentibus, at in mortuis corumpuntur: hoc igitur non ex alio est, nisi quia spiritu tunc uitali, & animali, destituantur: ubi uerò animalis spiritus, ibi etiam sensus. Ergo quia his obstabant autoritas Galeni, & ratio, & experimentum, ad experimentum quidem iam respondimus: quòd duorum dolorum, qui secundū ean-

D dem

dem partem fiunt, maior minorem obscurat: at os lædi non potest, quia membrana, uel caro lædantur etiam, quæ cum acutissimi sint sensus, hebetem ossis sensum ex toto tollunt. Auctoritatem Galeni exponit, quod senserit illa parum sentire; uelut dicimus, aliquem esse absq; collo, qui col- lum habeat breuissimum: & aliquem sine memoria, qui modicam habeat memoriam. Ad rationem uerò, quod neruis destituantur, respondet: quod & uenis, & arteriis: pari igitur ratione & nutritione, & innato calore: quæ tamen perabsurda sunt: proculdubio enim augentur & uiuunt. Nec ab- surda est omnino hæc ratio: nam uel sentit corpus solū ea parte, qua neruus est, aut etiam his, quæ illi proxima sunt: si quidem primū, ossa nō sentient: at nec tota cutis, non totus uentriculus, non intestina. Melius igitur est, ut quemadmodum contingit de solis luce, ut alia quidem per nerui præsen- tiam sentiant, alia autem per uirtutem ab illo manantem: atq; hoc modo, quod dubium non est apud me, ossa sentiunt: animam enim habent, aut facultatem eadem ratione sentientem, qua & nutrientem: & hæc fuit Ga- leni sententia, ut dixi, libro de Multitudine. Galenus tamen in 9. de Do- gmate Hippoc. & Platonis, non procul à fine, ostendit, cum plura sint quàm trecenta ossa in homine, ad singula uenam pro nutritione deriuari. Sed, ut diximus, uena quidem ad os ipsum bene deducitur, at in os non pe- netrat, penetrat tamen illius contentum ac sanguis: sic ex arteriarum pro- ximarum ui, coloratq; eodem modo etiam sensus. Sed non eodem modo apud medicos ueritas, quo apud Philosophos spectanda est: nam medicus rectè dicet, atque utilius ossa non sentiunt: cum si dicat ossa sentiunt, nec animaduertat ossium sensum parum & rarò percipi, integra existimabit sæpe ossa, quæ sunt corrupta, uel fracta. Rectè igitur Galenus dixit, ossa nō sentire: utilitati consulens operis. uerè etiam Auenzoar, cum dixit ea sentire, sunt enim animata. Aristoteles autem terrea non sentire dixit, uel quia non omnino sentiant ut pili, uel parum admodum ut ossa. Galenus autem ad ligamenta non uenire neruos docuit, quoniam quædam eis ca- rent, nam non ob ligamēta neruus transmittitur: sed tendines fiunt, ne os ab ossē citra sensum separetur: at ligamentorum substantia cum dura sit, sensum uix ullum admittit: neruea tamen tendinis pars sensu prædita est.

CONTRADICTIO XVII.

Dolor an sentiat.

DElectatio & dolor omnibus sensibus contingunt, non tamen pari euidētia: sed in oculis minus quàm in cæteris euidēter: in tactu autem & gustu ualde manifestè: ab iis deinceps in odoratu & post hoc in auditu primo de Causis symptomatum cap. 6. inde etiam probat Platonis dict

dictum, in Timæo, quod est, uiolenta passio quæ præter naturam est, cum simul multa & celeriter fit, dolorem infert. Et iterum infra: Reditus ad naturam simul & celeriter eius quod iam diuelli cœperat, uoluptatē affert: Quo fit, ut Galenus dolorem esse quandam speciem sensus uelit, sicut & uoluptatem, non autem sensus obiectum: nam causam sensus iam exponit, ut quoddam diuellatur, uel ad naturalem redeat dispositionem. Esse etiam in omnibus sensibus, hoc manifestè declarat, non posse esse obiectum sensus alicuius: id enim luce clarius est. & 2. de Locis cap. 2. ut dolor est tristis sensus, sic uoluptas est blandus. Et 2. de Generatione & corruptione Philosophus 7. & 8. declarans quæ tactus sint obiecta, non enumerat dolorem: sed primas qualitates, tum graue, durum, aridum, asperum, crassum cum suis contrariis. Rationes etiam non leues hoc declarant: Prima, necesse esset ut sensibile possum supra sensum, sentiretur: nam dolor si sentitur in neruo, cum sit in eo ipso, manifestum est sensibili posito supra sensum, fieri sensationem: quod est contra Philosophum 2. de Anima 116. Item, necessariæ essent duæ sensationes: prima, qua causa doloris sentiretur, puta frigus: altera, qua dolor: aliter oporteret confiteri, quoddam frigido tanquam obiecto tactus approximato tactui, ut conuenit, non tamen proueniret operatio sensibilis in sensum. Item, sic esset sensus absq; sua causa: quia doloris causa iam non sentitur. Tertia ratio, Dolor est tristis quædam sensatio, igitur sensatio non potest sentiri: aliter sensus esset ut intellectus, qui suum intelligendi actum intelligit. Item sensibilis proprium est, ut in quantum tale, perficiat sensum, quamuis aliquando ob magnitudinem lædat: sed nullus dolor perficit sensum, imò corrumpit illū. Item non esset necessaria phantasia in tactu, si dolor posset sentiri: at hoc contradicit Philosopho 2. de Anima 20. Assumptum declaratur ex uerbis eius: Vbi sensus, ibi contristans, & delectans: & ubi talia, est appetitus fugiendi, uel assequendi, in perfectis quidem animalibus, etiam in absentia obiecti: in imperfectis autem præsentia obiecto ipso. Vnde cauda lacertæ dum est præcisa, dolet: & nititur excutere dolorem illum. Et talis appetentia, phantasia, seu imaginatio quædam est. Igitur si dolor esset sensibilis, non esset postmodum tristitia ipsa: quare superessent solum obiectum & phantasia, & non modus sentiendi: unde non erunt tria, sed duo tantum, obiectum & imaginatio. Sequitur etiam aliud contra Philosophum ibi: nam sic erunt genera quædam sensibilia, dolor, & uoluptas: igitur non erit necessarium in aliis obiectis, ut sit dolor uel uoluptas: quare non erit necessaria imaginatio. sicut non est necessarium quoddam cum sentio asperū uel lene, ut sentiam graue uel leue. Sed ibi est quædam difficultas in uerbis Auerrois: nam uolens ostendere, quoddam imaginatio sit necessaria in omni sensu, sic argumentatur: Sensus non comprehendit nisi existens actu:

sed imaginatio, seu desiderium, est eorum quæ non habentur: igitur imaginatio est necessaria ultra sensum. Et iam dixerat, quod imaginatio animalium imperfectorum non est nisi cum obiecti præsentia: & nunc dicit, quod est cum absentia, & quod est absentis obiecti. Respōdeo, Imaginatio semper est absentis: nam fugere cōtristās, est desiderium absentiae eius quod iam adest: & desiderare delectans, non est in quantum habetur, sed ut non habetur. Hæc tamen desideria non mouentur nisi præsentē obiecto ipso: sicut senes non appetunt uenerē, nisi in præsentia obiecti delectantis: & tamē præsentia obiecti illius, non solum non est eadē numero, sed nec specie, cū præsentia res ueneræ. Alia igitur est causa excitans, alia autē est res quæ desideratur: prima est actus, sed secunda est in potentia. Ergo, ut ad principale reuertar, in oppositum plura sunt, & primo autoritas Hippoc. 2. Aphor. 6. Quicumque dolentes parte aliqua corporis plurimum dolorem non sentiunt, his mens ægrotat. Si igitur dolor non est obiectum sensus, sed sentiendi quidam actus, Aphorismus contradictionem implicabit: nam simul sentient, & non sentient. Ad hoc non difficile est respondere: quia Galenus in commento exponit, per dolorem causam quæ uerisimili ratione dolorem incutere deberet, ut erisipelas, & phlegmonem: sed sunt alia quæ magis premunt, nam Princeps 2. de Anima cap. 3. iuxta medium, inquit: Nam dolor, & remedium doloris, sunt de sensibus tactibilibus, (ego lego de sensibilibus tactibilibus) & adducit ad hoc rationem hæc: Omne quod cognoscitur in permutatione ipsa, & non cum iam acquisitum est, est obiectum sensus: nam uidemus quod calor hectici non percipitur ab hectico, quia iam est acquisitus, etiam quod sit ualde magnus: & calor tertianæ percipitur à patiente, quia immutat: sed dolor percipitur in permutatione, & similiter causa doloris, & sic de uoluptate: igitur tam dolor, quam causa doloris, sentiuntur. Est autem ratio ad hoc ualida, & tangitur à Conciliatore. Sensus tactus est datus nobis propter salutem, ut possimus contraria fugere, 3. de Anima. 63. sed dolores possunt prosternere uirtutem, secunda primi doc. 2. cap. 22. igitur dolor est proprium sensibile. Sicut enim datus est nobis sensus caloris, ne exuramur: sic etiam doloris, ne pereamus. Est etiam discordia inter Principem & Galenum: nam Princeps in 2. de Anima. 3. statim post illa uerba adducta, non uult dolorem esse nisi in sensu tactus: & dicit, quod læsio quæ accidit in uisu, est merito animæ, non uirtutis uidentis, & hoc iam, ut dixi, est contra Galenum. sed hoc absque dubio, ut declarauī, Auicenna ponere cogitur.

Pro his intelligendū est, dolorem percipi, cū id sensus ostendat, nam omnia animalia eum fugiunt: non igitur ab intellectu. Videndum est igitur, à qua potentia, an interiore, an exteriorē: & si ab altera illarū, utra uis sit, an percipiatur ut obiectū, an sit modus quidam percipiendi: non enim potest

potest esse sensus met ipse: quia sic omnia essent cum dolore uel uoluptate, imò omnia cum dolore & uoluptate simul, si idē esset tactus & dolor, & tactus & uoluptas. Relinquitur igitur, ut sint quatuor modi quibus possimus imaginari quòd dolor percipiatur: dico autem, percipiatur, non autem sentiatur. Vgo in quæstione uir admirabilis suo tempore recitat quatuor opiniones de hoc: & prima est Conciliatoris differentia 77. quòd dolor uerè sentiatur. Et ad hoc adducit duas rationes: prima est, ex sensu. aliquando homo percipit dolorem, & nullam aliam causam, ut ipse de se testatur de dolore spatulæ: igitur cognoscit dolorem sine alia re: & non nisi per sensum tactus, igitur dolor uerè sentitur. Secunda: Sicut delitia coitus sentiuntur à sensu tactus, & nulla alia causa, sic de dolore: oppositorum enim eadem est ratio.

Secunda opinio est, quòd dolor sit sensatio ipsa exterioris sensus sub forma cōtristantis, & ad hoc est ratio cum autoritatibus Galeni, & Auerrois, & Philosophi: & est, quòd Philosophus facit tres ordines, Sensum, Contristationem ipsam, & Appetitum fugiendi tale cōtristans, 2. de Anima 20. sed in imperfectis Auerroës uult, quòd talis appetitus non sit in interiore sensu, quanto minus dolor: ergo erit in sensu exteriori: & hoc, quia per se talia imperfecta carent interiore sensu. Et hæc est uera opinio, & ratio ipsa est demonstratiua.

Tertia opinio dicit, quòd dolor est operatio uirtutis appetitiuæ, sicut etiam delicia nam sensu comprehendente, appetitiua iudicat fugiendum uel quærendum: & hæc appetitiua tamen est in sensu ipso exteriori, ideo differt à secūda opinione uerbo tantum, non re ipsa: & uidetur conformis sententiæ Philosophi loco adducto, & etiam 2. Ethicorum cap. 9.

Quarta opinio est Vgonis, qui uult, quòd dolor sit: obiectum uirtutis imaginatiuæ coniunctæ sensui exteriori. Et hæc uidetur melior tertia opinione in hoc, quòd appetere & fugere licet fiant à cognoscente, sunt tamen posteriora ipsa cognitione: & quāquā, ut dixi, Vgo fuerit talis uir, de quo dixerit Sabellicus in 4. libro decimæ Aeneadis, quòd solus omnes Græcos, qui cūm Paleologo ad concilium uenerant, sustinuerit, cum eis sæpe in sacra pagina dimicans: non tamē uidetur sua opinio esse adeo uera ut secūda, nec ad mentem Philosophi & Auerrois: nam, ut dixi, imaginatiua est propter obiectum absens, non præsens: sed dolor ut præsens primò sentitur, non ut absens, antequā indicet de fuga, secundum Philosophum in textu: dicit enim, quòd prius percipitur, ut triste quā appetat fugam: igitur dolor erit modus sentiendi. Et si dicas, quòd imaginatiua percipit, & appetitiua fugere docet, aut sequi: Dico, quòd hoc ultra id quod non est ad mentē Auerrois, ponit tres uirtutes, cūm duæ sufficiant: tū maximē, cūm in animali imperfecto nec illæ duæ re ipsa distinguantur.

Pro solutione præsentis dubitationis, quam mouent recentiores, & præsertim Iacobus, qui tres facit quæstiones: primam 54. secundi Artis medicinalis: in qua quærit, an dolor sit operatio sensus tactus: & sequentem & aliam super 6. Aphorismo secundæ particulæ, in quibus quærit, an dolor sentiatur. Dico, quod dolor & delicia non sunt obiecta sensuum exteriorum, sed modi sentiendi: nec sunt operationes phantastice, sed bene mouent illam ad fugiendum, uel insequendum: & hoc in uia Galeni & Aristotelis, nam autoritas 2. de Anima 20. & 1. de Symptomatum causis 6. hoc demonstrant: & quod Auicēna errat in hoc, quod putat pertinere ad solum sensum tactus. Reliqua tamen argumenta sunt maxima ex parte solubilia ut Conciliator soluit. Ad primum igitur dico, quod in uia Galeni non est inconueniens, quod insensibile positum supra sensum sentiatur: in uia autem Aristotelis declarauimus, in prima quæstione quod propositio illa intelligitur de perfecto modo sentiendi. Sed adhuc relinquitur difficultas de delicia. Ad secundum respondeo, quod tunc causa non sentitur, cessat enim propter uehementiorem sensationem: nam si duorum dolorum, qui secundum eandem partem fiunt, maior obscurat minorem, ex Hippocratis sententia: quanto magis obscurabit dolor causam suam, sicut patet etiam experimento: nam cum quis comburitur: primò sentit calorem, post calorem & dolorem, ultimo dolorem solum: nec est inconueniens, quod tactus percipiat duas qualitates simul, modo non eiusdem formæ, in eadem parte, ut calidum & asperum. Ad tertium: Reflexitur ut Conciliator, nam sensatio & modus sentiendi, non sentiuntur: igitur si dolor sit modus sentiendi, non percipietur sensu, quod est contra experimentum. Respondeo, quod sensatio non percipitur, quia est ipsum percipere, aliter daretur processus in infinitum: & per hoc ad confirmationem, nam intellectus non dicitur reflecti supra se, eo quod percipiat intelligēdo, sed quoniam intelligere se cognoscit: at sensus sentit, non autem sentire se sentit. Et si dicas, Non posset cognoscere differentias dolorum, si dolor esset sensatio, & non obiectum: Respondeo, quod modi sentiendi diuersi sunt, sicut & obiecta: sed differentia cognoscitur ab imaginatiua medio memoriæ, & auxilio uirtutum interiorum: uelut si quis uideat album, percipit magnitudinem, etiam cum hoc & formam, & tamē differentiam horum diiudicat solum aliqua uirtus interior: nam modi cognoscendi differunt ex parte obiecti: & obiectum est causa doloris, non ipse dolor, ut iam supponitur: quia ista duo argumenta sunt pro Conciliatore, reflectente illud quod adduximus nos contra ipsum. Ideo argumentum illud habet uim aliquam. Ad quartum: Hoc totum erit obiectum dolor, & delicia: & delicia est commoderatum, dolor autem immoderatum. Ad quintum: Magis concludere uidetur oppositum: nam si dolor est modus sentiendi,

suffi.

sufficiet ipse absq; phantasia, ut indicet de sui fuga sensus. Sextum autem ut dixi, concludit in uia Philosophi ut patet.

Sed pro solutione argumentorum Conciliatoris, & confirmatione opinionis Galeni, dico, quod Thurisanus 2. Paruæ artis 88. declarat, quod ad dolorem tria requiruntur, membrum sensibile, immutatio ad contrarium naturæ suæ, & quod sit subita talis immutatio. Est autem duplex: Fienis; & est symptoma: & Factus, & est morbus: ut etiam Conciliator differentia 73. ubi quærit, an dolor sit morbus uel symptoma. Et hæc est sententia ferè Gal. 3. de dogmate Hippoc. & Platonis post medium, quod apud Græcos dolor & ægrotudo idem significant: sed ibi accipit dolorem pro animi affectu, & æstu, & similiter ægrotudinem. Sed clarum est, ut in 14. Quæstione declaratum est, quod quamuis dolor possit impedire operationem nedum lædere, quia tamen nō est affectus, semper enim fit, & omnis morbus est affectus, libro de Symptom. differentiis cap. 1. ideo omnis dolor est symptoma. Thurisanus igitur pro Auicennæ opinione argumentatur, uolens ostendere, non fieri dolorem nisi in sensu tactus co. 88. secundi Artis medicinalis, quæstione 5. & est fundamentum: Vbi non est perceptio causæ doloris, ibi non est dolor: sed in alio sensu non est perceptio causarum doloris, quam in sensu tactus, quia mala temperatura, & solutio continui, solum à tactu percipiuntur, & hæc sunt solum causæ doloris secundum omnes. Verum dico, quod delicia est in omnibus sensibus, ut auditus harmoniam percipiendo, & oculis colorem pratorum florentium: igitur & dolor est in quolibet sensu. Verum quia sensus tactus diutius retinet impressionem primarum qualitatū, eo quod est materiæ uehementer immerfus: ideo dolore & delicia uehementius afficitur. Vnde etiam Philosophus intemperantiam solam constituit circa sensum gustus & tactus: quia retinentes impressionem uoluptatem plurimam efficiunt, ac etiam diu manentem: causæ tamen doloris sunt tres, nam dissolutio harmoniæ in sensu quolibet dolorem efficit: sed quia non adeo grauis est, nec forsitan sine altera præcedentium fit, ideo medicis sufficit connumerasse duas: ergo etiam reductio ad harmoniam, deliciæ causa est in sensu.

Est igitur sensus primò, uirtus sensitiui, & est in capitulo relationis 3. primæ Philosophiæ 7. & 5. eiusdem 20. & est in comparatione ad sensibile, & habetur à generante 2. de Anima 59. & ideo dicitur haberi ab intelligentia, & dicitur dans hoc sensum agens & est impressio cœlestis 12. primæ Philosophiæ 18. & 2. de Generatione animalium cap. 3. & hoc modo dolor non potest esse sensus. Secundò, sensus potest capi pro forma qua sensibile in uirtute recipitur, & sic dolor est sensus uel modus eius. hæc distinctio habetur 2. de Anima 53. & 138. & 139. Sed quidam arguunt hoc reprobantes: primò, quia sensus repente immutat, & dolor manet: igitur do-

lor nullo modo potest esse sensus. Item si exterior sensus posset diiudicare de sensibili, frustra ponendus esset sensus communis, qui nō propter aliud positus est, quā ut iudicet de sensibilibus, ut cap. 7. libri de Sensu & sensato: & in 2. de Anima ab Alexandro declaratum est. Respondeo igitur, quod dolor repente immutat: & permanētia est propter causam quæ manet, ut in aliis sensibilibus, quamvis non sit adeo manifesta differētia causæ & sensus in dolore ut in aliis. Ad aliud dico, quod sensus communis est propter obiecta diuersorum sensuum. Ad primum Conciliatoris dico, quod dolor est modus quo percipimus, uel ipsa cognitio: & hæc est etiam melior, quā quod sit obiectum: est enim proximior imaginationi quā obiectum: & ideo tantum confert ad salutem animalis hoc modo, quantū alio: sicut sciētia nos æquē benē docet, & instruit, & melius quā quod scitur. Ad secundum & tertium, causæ sentiuntur scilicet uel solutio continui, uel mala qualitas: ut 2. Collectaneorum 29. & 3. eorundem. 31. Hoc enim omnino est contra medicos, negare causam nō sentire: uerū ipsa nō percipitur cognitione intellectuā, sed hoc nihil refert. Dico igitur, quod causa est illa quæ percipitur saltem cognitione confusa, & modus percipiendi sub ratione contristantis est dolor: & quandoq; accidit etiam, ut causa ualde inimica naturæ non sentiatur nisi hoc modo: sicut patet de ueneno letali agente à propria forma, & non à qualitate manifesta. Sed doloris perceptio duplex est: alia qua percipimus causam contristantem, & hæc etiam inest caudæ lacertæ cum præcisa est alia qua scimus nos dolere, & hæc solum perfectis animalibus inest. Ex solutione autem huius quæstionis duo admiratione digna cognoscimus: Primum, quod quædam sunt sub sensu, quæ tamen non percipiuntur nisi auxilio intellectus, & ita aliquando intellectus melius percipit sensibilia, quā ipse sensus. Sed enim mirabile est totiens nos dolorem sentire, adhucq; ignorare an ipse sentiatur, an potius sensus ipsius pars quædam sit. Secundum, cur dolores sæpe subito abscedant absq; causa manifesta, nonnunquā propter præcantationes: non sic febres, alii ue morbi. Causa clara est: dolor enim pro singulo instanti fit, est enim mutatio quædam: unde nihil mirum in instanti desinere, quod etiam in instanti fit.

CONTRADICTIO XVIII.

An prandium coena maius esse debeat.

Calenus septimo Artis curat. cap. 6. post medium, consulit ut copiosior sit coena prandio, & ad hoc adducit quatuor rationes: Prima est: Longius spatium est inter coenam & prandium, quā inter prandium & coenam: & longiori tempore debetur copiosior cibus, nō solum ad restaurationem, sed quia melius concoqui potest: igitur coenæ plus debetur cibi, quā

quàm prandio. Secunda: quia cœnæ succedit somnus, & somnus adiuuat ad cōcoctionem, ut expresse habetur ab Hippocrate 1. Aphor. 15. & 6. Epidem. par. 5. Aphor. 10. Labor articulis & carnibus: cibis, somnus uisceribus. & ibi etiam Aphor. 30. Sanguis in somnis ad interiora magis refugit. & Galenus 1. de Symptom. causis, cap. 8. iuxta princ. Igitur in toto eo tempore uidetur animalis uis quiescere, naturalis autem uehementius operari. Id autem inde ex hoc quis coniectet, simul quòd fatigata prius postquā dormitum est, uires recipit, potissimùm cùm post modici cibi assumptionem quis dormierit: simul quòd dormientibus nobis nutrimentum non in uentriculo solum, sed etiam in tota animalis mole concoquitur. Idque etiam Paulus testatur lib. 1. cap. 97. dicens: Itaque somnus uiriū animalium requies est, utili humido cerebrum madefaciēte proueniēs: qui si rectè nobis accedat multa præstat cōmoda: cibum elaborat, humores concoquit, dolorem lenit. Et 2. primi doc. 2. cap. 13. Cumq; somnus inuenerit materiam aptam ad concoctionem, concoquit eam, & ad naturam sanguinis conuertit. & 3. primi doc. 2. cap. 9. Somnus temperatus uirtutem naturalem potentem efficit ad operationes suas perficiendas, & cibum cōcoquit, & animalem uirtutem quiescere facit. Tertia ratio Galeni est à quiete, nam quies facit ad concoctionem: unde lib. de Cibis boni & mali succi, cap. 3. post initium: Nam sicut bonæ ualitudini exercitatio maximum affert commodum, sic qualiscunq; motus assumpto cibo admodum noxius est. Quies igitur succedens cœnæ, non prandio, uberiorem admittit cibum.

Quarta ratio est sumpta ab experimento athletarum: qui assumebant carnes tantum in cœna, uel etiam cum pane, in prandio autem proculdubio solum panem, ut diximus in 7. Cōtradictione. Et quia ad hoc respondebat Conciliator differentia 121. qui hanc quæstionem ibi tangebat (ut sui est moris) copiosè, quòd Galenus ibi loquitur de Regimine resumptiuo, ut dici solet, instat quidam, quòd rationes concludunt de omni: & etiā Galenus exemplum dat in duobus extremis, scilicet consumptis, & tabe uentriculi laborantibus, & athleticis: ut per hæc extrema omnia media intelligamus. Alia eius autoritas habetur 2. de Regimine sanit. iuxta initiū, ubi (exponens Hippocratis uerba 6. Epidem. Labor, cibis, potio, somnus, uenus, omnia mediocria) inquit Galenus: Tempus signauit ipso sermonis ordine: quippe sanitatis tutelam à labore auspicabimur, quem excipiet cibis, inde potio, post somnus. Alia etiam sententia habetur 5. de Tuenda sanit. ubi narrans uictum Antiochi medici, qui annos excefferat octoginta adhuc ualidus, dicit, quòd hora diei tertia, uel ad summū quarta, panem sumebat cum melle attico crudo, uel cocto: inde post horam sextam diei fricabatur, exercebatur, lauabatur: post prandebat, sumens primò quæ aluum deicerent, post pisces saxatiles mediocri quantitate: in

E

cœna

coena autem cibum qui non facile putresceret, far cum mulso, uel auem cum simplici iure: atq; hic, ut refert, ea uictus ratione sensibus illæsis, & membris integer mansit usq; ad extremum. Sed & in 6. eiusdem operis libro cap. 9. dicit: Ergo quod ipse facere assueui, diebus his quibus propter infirmos uisendos, aut ciuilia negotia, putauit me ad balneum serius accessurum, id dicere non grauabor: ponatur dies is horarum tredecim æquinoctialium, in decimam uerò corporis curandi spem esse: hoc casu uisum est mihi, circa quartam horam, simplicissimum esse sumendum cibum: is autem est solus panis: quibusdam autem non placet solus panis absq; obsonio, sed cum palmulis, uel oliuis, aut melle, uel sale sumunt: sunt etiã qui post eum bibunt. Ego uerò nec à tali cibo unquam bibo, & solum panem comedo. Sit autem horum cuiusq; modus, qui decima hora concoctus esse possit: quippe si exerceri se cupiant, eo pacto maxime citra noxã se exercébunt. Si quidem nonnullis graue in cõmodum accidit, cum repleti cibo se exercuerint: quibusdam enim caput impletur uaporibus, aliis ponderis sensus, aut distentionis in iecinore, uel etiam utriusq; sentitur. Volui in hac paulò longior esse describenda sententia, tum quòd nec ademptis ullis perfectà uidebatur, tum etiam quòd quæ adiicerentur in sequetium intellectum necessaria esse existimaui. Sed ad rem reuertor, Hippocrates (seu qualiscunq; fuerit libri de Viãtũs ratione autor) in 3. eiusdem operis libro, statim post initium, hanc habet sententiã: Per hyemẽ semel comedere expedit, nisi uenter omnino sit siccus, nam tunc bis: atq; in prandio parcẽ cibis siccis, asperis, calidis, uariis, meris. Non est obscurum, his uerbis cœnam uberiorem admittere. Haliabba quoq; primo Practicæ 13. coena autem est laudabilior prandio, eo quòd quisq; stat quietus, & dormit: quare immergitur calor fundo uentriculi, & corporis, concoquitq; plene cibum, ac bene: nec nocet cœna, nisi habentibus oculos debiles. hæc ille, ubi de cõsuetudine in numero sumendi cibum loquitur. Quinta ratio: adicitur à Fuchio, qui in paradoxo 21. libri 2. eam difficultatem tractat (ut sui moris est) eleganter, est autem talis: Post cœnam frigus succedit, hic autem ut in temporibus coctionem adiuvat: dicente Hippoc. 6. Epidem. par. 6. Aphor. 4. frigidior, frigidior in tempore & regione calidior erit. ubi Galenus in cõmento ostendit, frigidum nobis exterius occurrens, calorẽ intrò pellere, ac ualidiorem eò reddere. Adicit & sextam rationem, quòd si contingat non concoquere, pleno assumpto cibo in prandio, demum ex cœna, in id incidimus de quo Hippocrates dicebat 2. Aphor. 17. ubi cibus præter naturam plus ingestus est, hic morbũ facit: nihil enim deterius est, quàm crudis adhuc in uentre existentibus alimentis, nouos alios superingere. Palam igitur est, post cœnam succedentibus quiete, tempore prolixo, & somno, tum quia non adeo periculũ est de cruditate, tum ex athle-

tarum

tarum & Antiochi exemplo, tum propter noctis frigus, copiosorem cœnari prandio esse oportere. Quòd autem non solum somnus concoquat, sed & uigilia afferat cruditates, ostendit Hippocrates 2. de Victu in acutis 55. Vehemens (dicens) uigilia, potus, cibosq; tum crudos, tum incoctos reddit: nam uigilia partes exteriores calefacit, internas refrigerat: ut 6. Epid. sectione 4. Aphor. 13. enidenter: Vigilans calidior exterius, interius frigidior: dormiens autem contrà. Et si quis obiiciat, quòd rusticorum est bona temperatura, & habitus laudabilis, 1. Aphor. 3. qui tamen exerceant se à cibo. Respondent quidam ex Galeno 1. de Alimentis 2. eos licet diu uiuant sani, morbos tamen ualidos ob hoc incurrere, quamuis robustissimis uiribus præditi sint. Et si quis etiam obiiciat, quòd ex copiosa cœna caput impleatur: Respondet Fuchsius ex Aphor. 67. quar. par. Galeni uerbis, quæ sic se habent: At profectò ut à cibo ad somnum conuersi implent caput, sic in plethoricis dispositionibus, somni ipsum replètes aggrauant: somniq; proculdubio semper nocerent, quatenus materiam ad profundum & uiscera trahunt, nisi coctionis ratione plus afferrent utilitatis, quàm sit damnum, quod ex motu ad interiora cõsequitur. Verùm in oppositum multa sunt, & primo autoritas Auicennæ, à Conciliatore adducta, tertia primi doc. 2. cap. 7. Et qui exercebantur antiquo tempore, contenti fuerunt carne sola in prandio, & pane solo in cœna. Sed hæc autoritas est falsa, quia seu Auicenna habuerit falsam Galeni translationem, seu nos falsam Auicennæ, satis constat illum loqui de athletis, de quibus diximus ex 1. Regim. acut. 18. in fine, propterea ad alias est transeundum. Galenus igitur 5. de Tuenda sanit. statim post Antiochi exemplum, aliud recitat Telephi Grammatici, qui longe diutius uixit Antiocho medico, nam ad centesimum annum fermè accessit: inquit ergo is: Mel crudum; alicæ cum aqua coctæ permixtum, edebat hora diei tertia fermè: septima prandebat, oleribus primò sumptis, inde piscibus saxatilibus, aut auibus: uespere autem pane cum uino permixto contentus erat. Ad hoc respondet quidam, quòd Anthiocho magis credendum est. Sed ut uideo, qualis medica regula erat, panem cum melle edere, inde intra quatuor ad summum horas fricari, exerceri, ac etiam lauari: quare cum hoc, ut recitauit, à Galeno reprehendatur, & meritò: ut quòd non solum medicinæ, sed etiam cuiusque civiliter saltem uiuentis modum excedat: nam, ut dixi, non uidetur ante sextam horam etiam simplicissimus cibus concoqui posse, ut panis, ex 6. de Tuenda sanit. loco iam recitato. Exitus ergo spectandus est, qui in Telepho longe melior fuit, ut qui ex extrema senectâ annis illum uiginti superauerit. Alia habetur autoritas à Principe, adducta à Conciliatore, ubi Princeps ponens curam morbi comitalis, prima tertii trac. 5. cap. II. iuxta principium, inquit: Et ille, cuius natura non sustinet,

ut solum semel in die cibum sumat, accipiat eius duas tertias in prandio, & reliquum, scilicet tertiam partem, in coena: post subtile, id est leue exercitium. Sed & in hoc uel Princeps habuit falsam Galeni translationem, uel nos Principis, nam in consilio Galeni pro morbo comitiali, in puero post medium, inquit Galenus: Et capiat puer tertiam partem panis in mane cum fructibus, & in coena duas tertias cum carne. Et si quis dicat, quod Princeps uoluit Galeno contradicere tam in hac, quam in prima sententia: dico, quod de prima patet quod non: quia est historia, cui Galenus proximior erat, cum fuerit Auicenna antiquior mille annis, & in hac secunda, suo more, adduxisset Galeni prius dictum, deinde rationem, qua cogitur sentire oppositum: ut facit de uirtute medicinarum attractiua, de principatu membrorum, & de alijs multis. Mesue uero in de Cura catarrhi, in initio, dicit: Et alleuietur coena, & si potest prohibeatur omnino. Sunt etiam multae rationes ad hoc, propter quas Conciliator credidit, copiosiores cibum esse sumendum in prandio. Prima est, calor naturalis robustior est in die, quia iuuatur a sole: igitur tunc plus est sumendum cibi. Alia ratio est, Plus sumendum est cibi in aestate, quam in hyeme, quia in aestate maior fit resolutio: igitur pari ratione plus in die, quam in nocte. Tertia: Natura in hora somni intenta est concoctioni noxiorum humorum, & distributioni, igitur non est impedienda cibo, sicut nec in hora crisis: hi autem noxii humores partim sunt ex cruditatibus coaceruati, partim etiam superflua alimentorum, ut feces, urina, sudor, & similia. Quarta ratio: In nocte propter meatuum obstructionem fit minima resolutio, igitur tunc cibum minime competit: quia excrementa obruunt uirtutem, & impediunt eam, fitque hac etiam causa minor resolutio. Quinta: quod uirtus est robustior, minori igitur indiget cibo: nam cibum est principali ratione constitutus ob uirtutis defectum. Sexta, quae est omnibus ualidior: quod cum exercitium debeat fieri expletis omnibus concoctionibus, si quis copiose coenat, mane nondum erit perfecta concoctio in iecore, quare nec poterit utiliter exerceri. Ista tamen rationes parum concludunt: nam ad primam diceret, qui oppositum tueretur, quod antecedens est falsum, saltem de interno, quia exit ad circumferentiam, ratione uigiliarum, & caloris, & lucis. Ad secundam, Antecedens est ualde dubium, imò uidetur potius non ex sententia Hippocratis: & sequela est nulla. Ad tertiam: Non sunt primo plures excrementorum partes ratione corporis, sed bene ratione suorum uasorum: sed tunc naturam non impediunt, sunt enim quasi essent extra corpus: & etiam in die natura ad harum excretionem sollicitatur: similitudo autem ad materiam morborum claudicat, nam non est haec corrupta, & ideo non indiget concoctione, nec separatione, sed sola expulsionem, in qua etiam, cum prauitate careat, parum natura laborat. Ad quartam pro parte dictum est, cibum autem debetur non causa praesentis resolutionis, sed eius quae fa-

Qua est in die, sicut etiā de hyeme & æstate declarabat Galenus, 1. Aphor. 15. Ad quintum: Primò non est uerum, quòd solum uirtutis causa in sanis exhibetur cibus, 1. de Tuenda sanit. cap. 2. sed bene in ægris: nam in sanis, propter restitutionem effluētis perpetuo materiæ, etiam cibus exhibetur. Nec illud etiam est uerum quòd uirtus in die, sit debilior: imò si debilior esset, non plus, sed minus dandum foret: quare tribus modis peccat argumentum. Ad ultimum, illa autoritas Auerrois, 6. Collectaneorum 2. non dicit hoc: nisi quòd exerceri debent completa concoctione, & quòd tunc sequuntur iuuamenta: istud igitur debet intelligi iuxta sententiam aliorum. Aëtius igitur lib. 3. cap. 2. uult, quòd non fiat uentriculo uel intestinis cibo oppletis: intelligit igitur absoluta secunda concoctione, quæ in iecore celebratur: sed subiicit, ut non iam diu, sed illico sit absoluta, & hoc in ualidis etiam tantum exercitiis: nam deambulatio absoluta prima cōcoctione noxia non est. Sed his prætermisissis, alias adduco rationes, & quas tetigi in libello de Malo medendi usu, abusu octauo, leuiter tangam. Prima igitur est de consuetudine, nam 1. Aphor. 17. condonandum est aliquid consuetudini, & 2. Aphor. 50. expressè dum inquit Galenus: Cibi & potus naturam aduentitiam faciunt, & maxime in uentriculo: cum Hippocrates solum dixisset, Assueta longo tempore, etsi deteriora essent, minus infuetis molesta esse. Et quanquam uidetur Galenus, in fine libri de Assuetudinibus, laudare mutationem prauæ consuetudinis: attamen intelligit hoc in his, qui malis ualde cibis utuntur: sed nos hanc differentiam prandii & coenæ non adeo perniciosam statuimus. Secunda ratio, Si uenter sit ualde robustus, & alia membra imbecillia, tunc melius erit parum in coena comedere: unde si iecur sit debile, nec lædetur prima concoctio, ob uentriculi robur, nec secunda ob somnum, & sic ille deget sanus, qui permutato uitæ genere breui moreretur. Tertia est, ratione de stillationis: nō, ut quidam credunt, ratione quòd caput repleatur, hoc enim nihil esset: nam quantum est merito huius, minus de pituita gignitur hora somni, quam in uigilia: quia melior coctio in illa hora celebratur, quam in alia: unde etiam Rasis 4. ad Almanforem 4. dicebat, Et melior hora sumendi cibum est illa, cui succedit somnus: & Galenus in de Dissolutione cōtinua, cap. 1. post medium: Et melior hora assumptionis cibi est post motum, quem postmodum sequitur somnus, nam tunc calor naturalis optimè cōcoquit. Causa ergo est alia, & est, quòd ille qui patitur descensum pituitæ ad uentriculum, uel ad pulmonem, patitur maxime in hora assumptionis cibi, propter uapores ex uentriculo ad caput ascendentes: si igitur tunc uigilet, adiuuatur à resolutione caloris diei, & sic pauciores ascendunt uapores. Secunda causa est situs, qui non adeo permittit uapores & materiam ad caput deferri. Tertia omnibus aliis ualidior est, quòd expuit magnam

eius partem uigilans, & etiam educit per nares, imò ferme totam, quod non potest facere dum dormit. Et si dicas, quòd h'c casus est singularis: Dico, quòd est ualde generalis, tum maxime omnibus studiosis. Et si uis cognoscere illos, cibabis eos æqualiter & in prandio, & in cœna: & si uides quòd ante cœnam esuriunt, quamuis minus temporis intercesserit, & in mane uix esuriunt, nisi post multas horas: tunc scias, quòd hoc est merito pituitæ ad uentriculum per fominum descendens, ideo talibus conuenit prandium cœna copiosius. Quarta ratio est, ab experimento: sunt enim proprietates in hominibus, ut aliquis melius ferat prandium, quàm cœnam: sicut aliqui non ferunt oua, uel uinum, uel lac: in his acquiescendum est experimento. Hæ quatuor rationes singulares sunt, sed còcludunt, & non est ab eis descendendum. Adduco modò quinque alias rationes, quæ sunt quasi generales: & prima est, ubi uera ratio haberi non potest, experimento standum est: sed ueritas est, quòd illi qui ualde diu uixerunt, plus comederunt in prandio, quàm in cœna: ut patet etiam ex exemplo Galeni de Telepho Grammatico: & ita ego multos interrogauit de hoc, qui ad centesimum ferme annum peruenerunt, & omnes uidentur fuisse in hac consuetudine: imò Conciliator adducit etiam exemplum de Antiocho medico, ad hoc ut plus assumeret cibi in prandio quàm in cœna, sed tamen præpostere, non enim Galenum intellexit. Verum est, quòd pro uita septuaginta, aut octoginta annorum regimen de cœna copiosiore sufficere potest, sed non pro ualde longæua: & causa est, quia ad ualde longæuam uitam, oportet quòd calor naturalis sit adeo potens, ut possit utranque concoctionem probe administrare: sed hoc non contingit, nisi possit primam sine auxilio somni, & longi temporis celebrare. Igitur cum in secunda perficienda melius sit, ut liber sit à prima, patet eos qui eò ætatis peruenire debent, tales esse natura & consuetudine, ut breuissimo tempore absoluant primam concoctionem: & tunc sumus in casu quasi secundæ rationis adductæ prius. Secunda ratio est, Homo habet plus de spiritu in hora prandii, quàm in hora cœnæ: igitur melius còcoquet prandium, quàm cœnam. Assumptum est clarissimum, quia nulla intercessit causa restaurans spiritum inter prandium & cœnam, qualis inter cœnam & prandium: nò somnus, non quies, non animi relaxatio. Vnde etiam uidemus, quòd ea hora prandii, & parum ante, sumus alacres, uegeti, robusti, & hoc est ratione spirituum reparatorum: unde etiam est problema Philosophi, quare mane melius discimus. & hoc maxime est ubi non tardemus horam. Vnde ex prandio tempestiuo tria lucrantur: primò, tempus idoneum usque ad cœnam. Secundo, quòd homo est robustior, quia proximior horæ somni præcedentis. Tertio, quòd hora est frigidior: quæ frigiditas iuuat ad concoctionem cibi: & plerumque uidebis eos, qui diu, & sani uixerunt, tempestiue sumpt

sumpſiſſe cibum: contrà qui tardè, ualde morboſos fuiſſe, & breuis uitæ.

Tertia ratio: Detrimentum quod ſequitur. cœnam copioſam, eſt inemendabile, & longe maius eo quod ſequitur ad prandium: igitur cum uiuere non peccare liceat, tutius peccabimus in prandio. Quod autè ſit uiuere emendabile, patet: nam ſi fit uenenum, aut cibus ualde malus, ſomno ſuccedente non poteſt euomere, nec poſſumus aliis auxiliis occurrere. Patet etiam experimento: quot enim moriuntur, ex attonito morbo poſt cœnam, dum in lecto ſunt: horum enim magnum numerum uidi, & poſt prandium nunquam. Sic mortuus eſt Cardinalis Carraciolus noſtræ ciuitatis gubernator, & infiniti alii. Patet etiam, quod detrimentum ſit ſemper maius, cum eo peruenit, quod ſomnum impediatur, aut minuat: nam hoc ex prædico non contingit. Ideo iacturam cœnæ prandii dimiſſio non corrigit, ſed prandii errorem cœna poteſt emendare. Accedit, quod plurimi, tum maxime uxores habentes, in nocte coitu utuntur: hic autem ſuper repletionem peſſimus: & etiam filii qui gignuntur, uel morboſi ſunt, uel ſtolidi: quorum contrarium euenit ſi cœna leuis ſit. Quarta ratio eſt: ualidior ſit reſolutio in die, quam in nocte: unde ſi quis modò interponat horas decem inter prandium & cœnam, magis eſuriet hora cœnæ ex æquali cibo, quam hora prandii interceptis horis quatuordecim, igitur maiori indiget reſtauratione. Accedit, quod homo hora prandii habet mundum uentriculum, ideo tuto comedere poteſt: non ſic hora cœnæ. Et ſi dicas, quod poterit comedere ſolum panem, exemplo Galeni: Dico, quod ſi poſtmodum hora labatur, ſequitur magnum detrimentum: & ſi quis reſpiciat ad rem ipſam ex ieiunio ueſpertino, aut leuiſſima cœna, nemo incurrit detrimentum ſenſibile: ſed ex ieiunio à mane ad ueſperam, aliqui incurrunt mortem, plures uertiginem, & talia. Detrimentum etiam corruptæ coctionis nocturnæ impedito ſomno, non poteſt corrigi à iecore, & ideo commune ſit omnibus coctionibus: ſed detrimentum prandii, cum emendetur à ſomno & cœna leui, non permeat ad alias coctiones, niſi leuiter. Ideo cum detrimentum unius coctionis ſit ualde minus detrimento plurium ſimul, patet periculoſius peccari in cœnæ copia, & in prandii tenuitate, quam in prandii copia, & cœnæ tenuitate. Ultimo uidentur hi ignorare facultates naturales, & anatomiam: nam cum uentriculus æqualiter à dextro in ſiniſtrum extendatur, ut cucurbita magna, habens fundum à parte poſteriore quaſi, in ſiniſtra parte (quamuis Galenus dicat in dextra: ſed hoc parum refert ad noſtrum propoſitum) & pylorum, ſeu portanarium, ſeu os in ſuprema parte dextræ partis, ex quo prodiit duodenum ſerme iuxta iecur: manifeſtum eſt, quod homine ſtate nihil poteſt effundi, etià aperto oſtio, niſi ille potu uſus fuerit maximo, uel omnino grauiter ſe cœcutiat: quia graue non poteſt ſponte aſcendere: & ſic non aſcendet cibus, nec ex conſequenti deſcen-

scendet ad intestina, donec fuerit cōcoctus homine stante: post coctionem uerò ascendit, expellente uentriculo, & trahente simul iecore. Sed decumbente homine, & maxime super dextrum latus, poterit descendere totus cibus ante coctionem, si os uentriculi sit apertum: quia tunc erit ex situ in humiliore uentriculi parte, ut liquido cōstat ei, qui uiderit dissectum hominem, & non canem, uel simiam. Quare non est quòd tantū iacent hunc suum motum: nisi quis saltaret, aut ligonizaret, aut ueheretur equo tortore, aut rheda ualde incondita. aliter maius est periculum ne cibus crudus transeat ad iecur hora somni, quàm deambulando. Et similiter uidentur ignorare facultates naturales: nam etsi cibus non perfectè concoquatur à uentriculo, concoquitur ab intestinis, quæ eadem sunt prædita facultate, nam ex eadem constat substantia: & etiam chilo nutriuntur, quem ad se traxerunt: non uillis, ne quis hoc per errorem me dixisse putaret: sed naturali uirtute, qua etiam iecur fungitur, quànquàm & ipsum sine uillis. Si igitur error accadat in prandio etiam, emendabitur cōcoctione intestinorum facta nocte subsequente, coena leui succedente. nec somno priuabitur: quia non est ex intestinis tam facilis aditus ad cerebrum, nec tanta cum corde conuenientia, sicut ex uentriculo. In regimine tamen restaurandi corporis facilius est pinguescere ex cibo assumpto in coena, quàm in prandio, & uirtutem recuperare. & hoc Galenus uoluit. & hac causa athletæ ad uires & carnem instaurandam, carniū quantitatem immensam in uespere comedebant. sed horum constitutionem non probat Galenus 1. Aphor. 3. nec in libro de Bono corporis habitu, nec in Exhortatione ad bonas artes: quinimo & breuis uitæ, & morbosæ illos esse affirmabat. Exemplum igitur eorum, ad restaurandi uires & carnem argumentum conducebat: non quòd tanquam extremum in medium adduxerit: cùm locus ille nō esset ubi tractaret de sanorum institutione. In maximè autem occupatis publicis negotiis, nemini dubium est, bonum tunc esse, si corpore & mente egregiè laborandum est, cibum ad uespertinam, & horam quietis transferre. Sed dices, quomodo potuit Antiochus cōcoquere panem & mel in quatuor horis? Respondeo: cibo simplici concoquendo non est aliquis terminus constitutus: sed ob paucitatem, & caloris robur, in diuersis diuersa habet concoctionis tempora: nam in aliis in octo horis, in aliis in sex, in aliis in quatuor, in pueris etiam in tribus uel duabus horis panis solus concoquitur. Dicemus autem aliàs de hoc loco suo. Ad id uerò de 2. de Tuenda sanis. respondeo: ubi nullo modo sit peccandum, symmetriamq; illam exquisitè seruandi in ciborum mentura locus detur: instituendo corpori, nullo morbo, nullaq; consuetudine iam detento, uberio-rem cibum in coena, quàm in prandio conducere. Cæterum an hoc etiam, ut dixi postmodum, ad uitæ immensum spatium assequendum conducatur, relu-

reluctante simul experimento, etiam ipsius Galeni, & ratione adducta, nō fat scio. Sed tamen regula illa Galeni illic ad Polycleti statuam pertinet, corpus postulans temperatum, & nulli alii uacans, nisi studio seruandæ sanitatis. & quanquam Celsus & ipse libro 1. cap. 2. consulat, ut cibi copiam somnus subsequatur: nulli tamen suis Romanis, qui sic cœnabant, longæui minus fuerunt.

HIERON. CARDANI

MEDICI MEDIOLANEN.

LIBRI PRIMI CONTRADIC.

MEDIC. TRACTATVS

S E X T V S.

CONTRADICTIO I.

An dispositio fiens possit esse morbus.



MULTOS sanè scio non leuem suscepturos admirationem, quòd aliud institutū bonæ ualitudinis, aliud diurnæ uitæ esse decreuerim. sed equidem longæuam uitam faciunt, non solum copiosius alimentū in prandio, uerum etiam cibi pauci nutrimenti, nulla, aut modica exercitatio, & crassum alimentum: cum è diuerso ualitudini profint, cœna uberius, frequēs exercitatio, cibus tenuis, ac multi alimenti. Quisq; enim experietur, si ouorum uitellis, pane artopiro, pullisq; uescatur, quā sanā deget uitam, modò se optimè atque opportunè exerceat. At uel sic agendo ante quinquagesimum penè annum, uerus senex erit: non quidem capillorum canitie, & frontis rugis, quæ minimum obsunt, quāuis turpia uideātur: sed omnibus uirtutibus inualidus. Quamobrem rectè nobis Celsus cōsuluit lib. 1. cap. 1. cauendum esse, ne in secunda ualitudine aduersæ præsidia consumantur. At uerò ualidum exercitiū, si cum cibus robustioribus in iuuentute iungatur, longissimam senectam, ac ualidam præstare poterit. Nam quæ absq; exercitiū senectus aduenit, quāquam ritè in reliquis uitæ diurnitatibus prospectum sit, nō ualidas uires secum, ut alia referre potest. Sed de his hæcenus: nunc ad institutum propositum reuertor. Dicebat Galenus 2. Aphor. 22. quòd morbi quidam facti sunt, & quidam fientes. Oppositum in de Differentiis symptom. cap. 1. Affectus est, qui iam consistit: Passio autem, quæ fit. Et affectus quidem alius est cum quo operationes illæ sunt, & hic uocatur Sanitas: & is, cum quo operationes læduntur, Morbus. Et hoc iuxta medium: inde in fine

F cap

capitis, uolens differentiam declarare inter Symptoma & morbum, dicit: In morbo duo sunt necessaria, quòd sit effectus, & quòd sit operationē lædens: quorū neutrum symptomati est necessarium. Respondeo: Symptoma ibi cōmuni modo ad morbū extēdi potest: & sic omne, etiā quod lædit operationes, potest dici morbus. Quia tamen uolebat effugere cōtinentes causas in illa tractatione, & iam effugerat in prioribus libris: manifestū est, quòd coactus fuit dicere morbum omnē iam esse consistentē. Quia tamen medicus non curat nisi morbos, & quidam erant morbi etiam fientes, uel lædebatur operatio per dispositionem nondū fixam: coactus est in Aphorismis facere duo genera morborum: & ut fugeret continentem causam, dicere, quòd tales non erant uerē morbi, sed symptomata. Ex quibus sequitur tertium, quòd symptomata aliqua indicant per se de cura. & talia uocantur morbi, licet improprie.

CONTRADICTION II.

An consuetudo mala sit seruanda.

Sicutum permutans prauum, & exercitationibus addat aliquid, ex consuetudinis permutatione iuuabitur: libro de Assuetudinibus, ultimis uerbis. His malam docet uertere consuetudinem. At 2. Aphor. 50. etiam bonam: cum inquit: Oportet igitur ad insueta permutari, docet autem Galenus esse in commento quod & primo de Alimentis 2. repetit, familiaritatem uentriculi cum cibis ex consuetudine. nam nō solum agit in cibos, sed patitur: unde ex longo usu similibus factus, celeriter transmutat quod durius: ac melius quod est deterius. In 5. autem de Tuenda ualitudine, post medium, aliter docet: Nam senes, inquit, quam habent cōsuetudinem, & si prauam, seruent: nam immutandi cum tempus longum sit, illis fructus operæ peribit. At iuuenibus, etiam si ab ineunte ætate cōsuetudo contracta fuerit, expedit in meliorem transferre: nam aliquando illius utilitatem percipere poterūt: unde sensim permutandā, nemo nō intelligit. At post hæc adducit rationē unā, quòd exiguus error sit consuetudini inhære: nam pauca sunt male cōsuetudines: nam homines prauis nō libenter assuescunt, neq; his à quibus lædi solent. Ipse etiam Galenus 2. de Temperamentis, cap. 4. Consuetudinem naturā quandam acquisitā uocat, laudatq; antiquos hoc dicentes: & Princeps tertia primi doc. 5. cap. 1. Summæ probās hoc, dicit: nō esse permutandā consuetudinē, nisi in ualde malis: atq; id etiā sensim. quod & Galenus fatetur 5. de Tuenda sanitate, ubi suprā, de exercitio loquēs, sed in tertia primi doc. 2. cap. 7. ille uerò in quo mala nutrientia concoquuntur, non gaudeat ex hoc, quia in temporis successu, generabuntur ægritudines pernecantes. Gentilis exponit, Valde mala. Pro concordia horum oportet scire, consuetudines esse alias in genere

nere ciborum, alias in hora uel quātitate eorum, uel exercitio, uel balneo: item alias in senio, alias in iuuentute: tertio differre, quoniam alię sint ualde malarum rerum, alię mediocriter. In senibus non sunt permutandę consuetudines malę mediocres ullę: nec ex malis ualde, nisi quę in prauis cibis sunt: quoniam larga est transmutatio. & in his quę sunt à priuatione ad habitum, uel contrā, licet permutare etiam non solum in mediocriter, & ualde malis, uerū etiam bonis consuetudinibus: aliter nūquam Telephus Grammaticus & Antiochus medicus, ad usum ter comedendi in senio peruenerint: cū tamen peruenerint. §. de Tuenda sanitate. In decrepitis uerō reliquarum consuetudinum, ne pessimarum quidem, fiat immutatio, ut nec ciborum: nam non pessimi esse potuerunt cum quibus ad eam ætatem peruenerint. Omittere autem aliqua, non solum utile, sed etiam necessarium. In iuuenibus autem, ac primi senii uiris, qui quasi consistere uidentur, nequaquam ciborum ratio immutanda, in horis, uel qualitate, uel quantitate, uel ordine, si ualde mala non fuerit. In omnibus autem existimandum est, non esse consuetudinem ullam, in qua homo æger decumbat, aut morbis plenus uitam agat: nam in his audacter immutabimus. A dolētes uerō & pueros, non tam dicimus permutare consuetudinem, quā instituere. Ergo si quis de potu, aut copia coenę uel prandii, uel de uenereis à coena, uel matutino interrogetur, experimentum sequatur iuuantium adolescens. in leui enim discrimine, iudex est experimentum: iuuenis uerō in coeptis perseueret: nam mala non potest esse horum consuetudo, nisi mediocriter, quę iam parta est. in cibis autem ab initio solidioribus assuescere studeat. Verū in his omnibus aliquādo ob periculum necessitatis, licet non relicta consuetudine, sed aliud tentando, ab usu aliquantulum diuertere iuuenibus, rursusq; illico se recipere: senibus nunquam.

CONTRADICTION III.

An contrarijs gaudeat qualibet intemperies.

Contrariis melius degunt ætates & naturę seu regionibus, seu locis aut cibis, 3. Aphor. 3. similibus autem malę: nisi temperatę prorsus extiterint. Idem fermē in Com. 18. eiusdem. Addit uerō ibi duo: primum, quod pueri sub initio æstatis melius degunt, adolescentes autem uere: & quod uer ceteris medium est: non malum, nec prorsus bonum. At 3. Artis medicinalis, cap. 3. intemperata corpora, duplicem habent uiuendi rationem: quę enim parum labuntur, similibus conseruari debent: calida calidis, sicca cecis: atq; ut generaliter dicam, materias agnoscens ea conseruabit, similia in omnibus similibus asserendo: licet & ad melius illa traducere contrariis inhærendo. Igitur non est hoc generale præceptum, ut

F 2 simil

similia noceant, & contraria iuuent. Rasis 17. Con. cap. 6. in principio dicebat, quod aer bonus est omnibus bonus, ex sententia Galeni 1. de Tuenda sanis. & hoc, quia temperatis conuenit ut similis: intemperatis, ut contrarius: igitur omnibus. Quandoque tamen eligimus aerem similem, ad conseruandam naturam iam intemperatam. Sed in Col. 3. eiusdem cap. dat aliam solutionem: & est, quod aer semper debet esse ut medicina: siquidem contrarius temperamento & ætati, nisi intemperatis: & hoc est, quia cor calidum & siccum, non expurgabitur in aere calido & secco, & sic etiã in Regimine conseruatiuo, aer tamen contrarius est eligendus. Sed paulo post ipse non sibi constans dicit, quod natura, & ætas gaudet in consimili aere: & debilior redditur in contrario. Respondeo primo quo ad Rasis, sic debent intelligi eius dicta: aer nunquam debet esse similis in Regimine conseruatiuo, nec multo minus reductiuo, uel præseruante: cibus autem in conseruatiuo similis esse debet. Galenus 3. Artis medicinalis, docet quomodo conseruetur corpus in eodem statu: non tamen declarat, quod omnes causæ conseruantes in hoc statu, sint utiles: nam aer semper dissimilis est eligendus: quia similis traducit hominem necessario ad ulteriorem intemperiem. Autoritas succedens est manca, nam sic legi debet: Quæ autem est temperata, gaudet suo simili, & debilior redditur a contrario: aer autem bonus omnibus est bonus propter rationem dictam: non tamen optimus: nam melior est, qui temperiei malæ directe opponitur. pro conseruatione autem, licet etiã uti aere consimili in modica intemperie, sed cum permutatione quandoq;: sed periculosum est hoc consilium ne ulterius labatur. Liqueat autem, quod duabus ex causis uel etiam tribus recte dixit Hippocrates 3. Aphor. 10. Autumnus tabidis malus: est enim malus, quia inæqualis, & quia frigidus ac siccus, & quia tabidorum intemperiei magna ex parte similis.

CONTRADICTION IIII.

Absinthium an noceat uentriculo.

ABsinthium facit sodam, propter nocumentum quod facit in uentriculo 2. Cant. 2. cap. 2. de illius succo loquens. & parum infra: Succus eius est malus uentriculo, & semina eius nocumentum inferunt illi: & proprie ori illius, propter falsedinem quam habent. Alia litera habet herbam loco feminum. At Galenus lib. 6. Simplic. medicamento- rum, cap. proprio, in fine literæ, A. dicit eum esse uentriculo amicum, ac illi plurimum conferre, succum tamen herba multo esse calidiorem. Rasis quoq; ad Almanforem 3. lib. cap. 25. dicit, quod robustum facit uentriculū. & Auerrois 5. Collect. 42. dicit, quod est medicina iuuans uentriculum. Quinimo Princeps ibidem, est medicina mirabilis ad reducendū appetitū, cum

cum bibitur succus eius decem diebus. & 13. tertii tract. 1. 25. sirupus absinthii laudatur plurimum in morbis uentriculi, & præcipue frigidis. libr. etiam 8. Artis curatiuæ cap. 5. & passim aliis in locis, pro fomento applicat ori uentriculi ad ipsum roborandum. Et in cura syncopis ex humoribus calidis os uentriculi lædentibus, 1. ad Glauconem cap. penul. ante finem non parum, absinthii comam in melicrato decoctâ abiicit, exhibetq; decoctum: at etiam peccante antè pituita in ipso, attamen oleum in quo absinthium incoctum fuerit applicat. Hic quidem animaduertere decet, dum uenterculus pituitam in se continet, absinthium primò non conuenire. nam illam retinet, bilem autem expurgat, non solum similitudine, ut Auerroës inquit, sed alia etiam ex causâ, quam inferius declarabimus. nec conuenit supercalcfacto uentriculo succus, ob immoderatam, sed consimilem intemperiem. Hæ ambæ causæ in 6. de Simplicibus medicam. cap. proprio, expresse habentur. Alia postmodum est ex speciebus illius distinctio, libro eodem cap. de Abrotano: ubi dicit, quod Seriphium uentriculo est inimicum, ob faldedinem suam: sed & Santonicum etiam stomacho inutile est: solum autem absinthium, & proprie Ponticum uentriculo auxiliatur. sed 11. Artis curatiuæ, 16. magis adhuc rem arctat: nã dicit: Ex omnibus absinthii generibus, in solo Pontico amaritudinem superat uis astringens, ob id solum Ponticum utile: cætera calida nimis sunt, ut in de Simplicibus medicamentis ostendit. Est etiam Ponticum odoratum, cum reliqua foedo sint odore. Ob hæc igitur Auicenna cum Ponticum deesset illi, ob regionis distantiam cautè absinthio, tum magis succo & semine, utendum consulit. Quinq; illius species facit odoratum tamen, ac Nabathi, probat seu Tarsense, quod pro Pontico substituendum est. At sirupus ut incolumior, sic minus ad ea quæ confert etiam utilis habendus est. Videant igitur medici nostri temporis, quàm tute absinthium exhibeant, cum tot modis nocere possit: nec enim ullus est illius usus salubris, nisi Pontici: quamuis omne absinthiū appetentiam excitet.

C O N T R A D I C T I O V.

Nerui, uenæ, arteriæ, an membra simplicia.

Compositio partium corporis duplex est: alia quidem quæ solis constat elementis, & sunt similes, ut arteriæ, uenæ, nerui ossa, caro, cartilagine, membranæ, libro de Differentiis morborum, cap. 3. Nerui igitur, & uenæ, ac arteriæ, sunt omnino membra simplicia. At 10. Artis curat. cap. ulti. cum enumerasset inter composita membra uenas, & arterias, musculosq; subiicit: At uerò nec neruosa, nec fibrosa, nec membranosa natura eandem generationem habere cernitur, scilicet quò possit corrupta de nouo regenerari. ut de carne iam dixerat. Hic igitur constantius neruos inter

simplicia membra adnumerat: sed de uenis, & arteriis, à priore sententia discrepat. Sed & in de Inæquali intemperie, cap. 2. eadem fermè habet: nam inquit, ὅσα καὶ χόνδροι, καὶ σπώδονες, καὶ νεύρα, καὶ ἀρτηρίαι, καὶ φλέβες, ὑμῶν τε καὶ σπέρματος ὀνυχές τε, καὶ δέρμα, καὶ πτελὴ. ταῦτα δ' ὅκτι ἐγγωρεῖ τέμναι, εἰς ἑτέρον εἶδος, ἀλλ' ἐστὶν ὁμοιομερῆ τε καὶ πρῶτα, πληρῶς ἀρτηριῶν τε καὶ φλεβῶν, αὐτῇ γὰρ ἐξ ἑωῶν τε καὶ ὑμῶν σὺγκινται, καὶ οὕτως καὶ ταῖς ἀνατομικαῖς ἐγγωρεῖται σπινελεῖ γινώσκοντες. Græca libuit adicere, quoniam Linacer nimis, ut uideo, oscitanter uertit, aut qui typis mandarunt: tum ob admirationem etiam eorum quæ à Galeno scribuntur: sunt autem hæc Latine: Ossa, cartilagoq; & ligamēta, & nerui, & arteriæ, uenæ, membranæ, & caro, ungues, & cutis, ac pinguedo. hæc autem minime licet diuidere in aliam speciem: sed sunt similes, ac primæ, præter arterias, & uenas: hæc enim ex fibris & membranis componuntur, quemadmodum in anatomicis administrationibus dictū est. Hic palam neruos, ut prius, inter simplicia membra adnumerat: atq; uenas cum arteriis inter composita. Rursus duo superaddit, scilicet cutim etiam ipsam simplicem esse: ac uenas, & arterias, non tantum fibris, sed etiam membranis constare. At in de Partibus artis medicatiuæ, cap. 3. uenæ, nerui, & cutis, sunt partes in quas diuiditur caput: harum autem singulæ in partes diuiduntur: arteria quidem in duas tunicas, quarum unaquæq; constat ex uillis, uelut & uenæ, ac etiam nerui. In capite uerò 4. subiungit: Instrumenta quidem sunt uenæ, arteriæ, nerui, musculi, tendones, oculi, matrix, intestina, cor, & reliqua talia: simplices autem partes, fibræ, membranæ, ligamenta, os, cartilago, pinguedo, & caro utraq; propria scilicet, & quæ affusio uocatur, unicuiq; uisceri alia, & quæcunq; his similia. Palam est igitur difficultatem esse de uenis, de arteriis, tum de neruis, ac etiam de cute: nam in his omnibus non satis sibi constare uidetur Galenus, an simplices sint, an compositæ. De cute etiam Galenus libro An sanguis in arteriis contineatur, dicebat, quod uenis & arteriis referta est. Sed & in 3. de Alimentis cap. 4. dicit, extremas partes cutacea & neruea natura constare: quod & in 4. Regim. acut. Com. 102. testatur, dicens: Cutis animalium carnea substantia frigidior existit. At in de Temperamentis 1. cap. ulti. iuxta medium: Cutis est neruea substantia sanguine prædita: cum enim caro sanguine abundet, ob idq; calidior sit, & humidior: neruus uerò sanguine nimis destituatur, ob idq; frigidus & siccus: cutis ipsa, sanguine & neruo constans, quoddam est medium. Auicenna autem prima primi doct. 5. cap. 1. enumerans simplicia membra, ponit os, cartilaginem, ligamentum, neruum, uenam, arteriam, membranam, & carnem. Hic uerò pinguedinem prætermittit, cum Galenus ibi adnumeret, unde quarta exurgit contradictio Ungues etiam inter quæ membra collocari debebunt. Duplex etiam ligamenti genus facit: primum.

primum, quod ossa colligat, & est ligamētum propriū: aliud quod chorda dicitur, quo musculus ossi cōmittitur. Diffinit etiam simplex membrum, quoniam illud est, cuius partes diffinitioni totius subiacent. Respondeo, Componuntur sex modis partes in corpore nostro. Primus est, cū pars ex multis instrumentis componitur, diuersis forma, & substantia, & operationibus: uelut caput ex cerebro, oculis, & auribus: & hoc membrum est compositum proculdubio. Secundus modus est, cū pars componitur ex pluribus diuersis in substantia, subseruientibus tamen omnibus uni operationi: ut oculus ex pluribus tunicis: sic nasus, & auris: & hæc etiam membra sunt composita omnino. Tertius modus est, cū membrum componitur ex pluribus partibus similibus in substantia, quarum quælibet tamen componitur ex aliis habentibus diuersas functiones, similibus tamen: uelut caro, id est substantia propria uentriculi, & coli intestini, & arteriæ: nam hæc constant duabus tunicis substantia similibus: & aliqua illarum constat ex pluribus uillis, quorum quidam attrahunt, & alii retinent: & hoc modo talia sunt simplicia ratione diffinitionis: & ad mentem Galeni in libro de Differentiis morborum, & Auicennæ locis allegatis: & multo magis omnia quæ sequuntur. Quartus modus est, cū mēbrum componitur ex partibus simplicibus in forma, sed habentibus diuersas tamen functiones, ut uenarum tunica, uesica fellis, & urina: habent enim tunicam unam constantem ex pluribus fibrarum generibus, quarum functiones diuersæ sunt: & hæc tamen membra composita appellantur à Galeno in de Inaquali intemperie: ideo neruos ibi etiam inter simplicia reliquit, quod non ex uillis diuersarum functionum autoribus componantur. Arterias, quod tertio modo. Venas quarto modo cōpositas à simplicibus exceptit. Sed non uidentur nullo modo nerui simplices esse: nam 7. de placitis Platonis & Hippocratis, fol. 2. inquit: Vniuscuiusq; nerui natura triplici constat substantia: media quadam & intima, arborum medullæ quàm simillima, & quæ haud dubiè ortum habeat ex ipso cerebro: exterioribus duabus, quarum prima ex tenui membrana ortum habeat, altera uerò quæ ex crassa & dura. Respondeo, quod melius est neruos uocare membra composita ratione membranarum, instrumentum tamen sensus & motus est medulla interior, quæ sola est neruus, quamuis totum neruus ob sermonis breuitatē dicatur. Sed rursus de uenis dubitatur, nam uerè composita membra esse uidentur: accidunt enim eis morbi in compositione, ut obstructio, libro de Morborum differentiis, cap. 7. & hac de causa dicuntur membra instrumentalia ratione figuræ, non autem compositionis: illam tamen figuram habent, ut sunt partes membri instrumentalis, non autem per se. Omnia igitur membra aut sunt simplicia, aut instrumentalia, iuxta quamlibet diuisionem, sed tamen non coincid

incidunt diuisiones ipsę. Sunt & media, si quis uelit ponere, ut nerui, uenę, arterię: item os cum sua medulla, & caro cum osse, & membrana cum osse uel pinguedine, & possunt dici instrumētalia imperfecta. Manifestum est autem quòd talia ponere est necessarium. Quintus modus est, cum ex similibus in forma, sed nulla diuersa functione pręditis, componuntur: ut nerui ex uillis longis tantum: atq; hoc modo in de Partibus artis medicatiuę, etiam neruos inter composita membra numerauit, componuntur enim ex uno uillorum genere. Sextus modus est, cum omnia constent ex elementis, atq; ut sic ad simplicitatem, hoc nihil officit apud medicos, cum tamen composita uerę sint, uirtute saltem: constant enim calido, frigido, sicco, & humido singulę nostri corporis partes, quanquā simplicissimę. Sed quę quinto, quarto, ac tertio modo componuntur, omnes compositę ad aliarum comparationem, ex quibus cōstant, dici possunt. Ob id Gentilis Auicennam ibi exponens dixit, illum membra enumerasse simplicia apparenter, non solum uerę: nam talia putat esse artariam & musculum: sed artaria est simplex membrum tertio modo: musculus autem secundo tantum, componitur enim ex ligamento, neruo, & carne: hoc autem, ut dixi, medici nunquā solent simplex appellare membrum: nec Auicēna hoc dixit, sed solum musculi cordam. A deps autem est pars simplex quinto modo, & sic Galenus eam recte ceteris adnumerat: sed cum membrum non sit, recte prętermittitur à Principe, cuius mens est solum membra corporis adnumerare, non partes. Non esse autem membrum ostendit, quòd nec trahat, nec contineat, sed hæreat alteri, nec concoquat: oportet autem membra his facultatibus prędita esse. De unguibus Conciliator tenuit iuxta dictum Galeni 2. Artis medicinalis, cap. 3. in differentiis 54. quòd non uerę nutriantur: quia non secundum omnem dimensionem, sed in longum tantum augentur: uerū & dentes tales sunt, & tamen uiuunt. Galenus primo de Vsu partium cap. 11. uult eos non secus ac pilos semper in longum augeri. At in secundo anatomicarum aggressio- num sub ipso fine, substantiam unguium declarat esse aliam ob omni alia: recipere autem in radice, qua ultimę digiti iuncturę alligatur, neruos, uenas, arterias: quę tamen haud in ipsum perueniant, quoniam nutritione non indigeat, sed solum ut in longū augeatur, ut pilus. Ergo unguis membra non erunt, non enim prędita sunt facultatibus inferuentibus: uerum unguis ungui succrescit: pars est tamen simplex, ac à ceteris diuersa corporis humani, quam pręterire etiam potuit quandoq; quòd sensu & nutrimento destituatur: potuit & rursus adnumerare, cum alligata sit corpori, non ab eo absoluta, ut pilus. Aristoteles 3. de Natura animalium, cap. 9. ac 2. de Generatione animalium, cap. 4. iuxta finem, tribus rationibus declarat differentiam unguium ab ossibus: primum quidem, quòd unguis ex

cute

cute accipiant originem : nam albi sunt quibus alba, nigri quibus nigra: nō sic dentes, cūm Aethiopicus sint candidi, perpetuō etiam crescunt: & licet dentes etiam sic crescant, uidentur tamen pro finis ratione augeri. Tertiū, quod maius est, quōd tunc maximē augentur ungues, cūm reliquum corporis contabescit, ac minuitur: unde in ægris maximē crescunt. Quo fit, ut cum natura animalis parum aut nihil commune habeant. Ob id meritō ungues etiā præteriri possunt, cūm membra adnumerantur: nam & Philoſophus cum cornibus ac pilis, quasi inter corporis nostri recrementa eos iunxit. Haud tamen male mihi uidetur Vesalius lib. 1. cap. 2. & 34. censere illos ex cartilagineum esse natura. Porro quod ad cutim attinet uel pro *στέφμα*, legatur *ἐπίδερμης*: hæc enim omnino pars est simplex: aut si constanter literæ inniti uelis, (quanquam & illud pro *στέφμα* intelligi poterat) dicas, cutis naturam ac substantiam, ut multis in locis, à uenis ac arteriis & neruis nudam esse simplex membrum: quod quamuis sanguine constet, ac sua substantia, cūm tamen sanguis non sit membrum, simplex dici potest, ac debet. Cæterū quōd simplicia membra ex humoribus non constituam, iuxta Principis dictum, sed ex elementis, nemo admiretur: nam ille sic censuit, ut ostendam.

C O N T R A D I C T I O V I.

Neutrum tertij modi an à Galeno diuidatur.

Nemo est hercle, qui non uideat, quinque nos contradictiones in unam coëgisſe, quōd ob rerum ipsarum affinitatem inuicem conueniant. Neque enim in tanta rerum mole longi esse debemus: quippe si Galenum imitari uoluerimus, soli contradicentiū medicorū libri, hominē tota uita legēdo fatigabunt. cūm tamē præſter & alia illos legere poſſe. nam si uel Galeni uestigia ſequi uoluīſſemus, non pauciora, imō longe plura, ac maiora uolumina, ex hoc tantū opere cōfecīſſemus. At quā præſtantior est Fuchſii breuitas, ac Hermolai Barbari, inutiles Marcelli Virgilii prolixitate, qui ſibi, aut ocium habētibus, tot nugas ſcripſiſſe uiſus est. Galenum putant ſe imitari, imitentur ſanē, in ea ſolum parte in qua ille meritō culpandus uenit, cūm tamen prolixitate ſua ſaltem claritatem rerū nobis addiderit. At hi in herbis deſcribendis, neſcio quid alti, ac ſubtilis negotii habeant. Sed quid cauſæ eſt igitur? Non aliud, quā quōd ſcientes pauca, multa ſcire uelint uideri: ob hoc igitur chartas implent, graues ipſis, & legentibus, & orbi: unde fit, ut nullus eorum, qui ſic ſcripti ſunt, librorum, diuturnus eſſe poſſit, mundo tanquam inutilem ſarcinam elidente. Verū cūm Galeni uitium multi imitentur, uix unus aut alter, ex tot illius uirtutibus unam uel ſaltem æmulatur. Has autem dico inuentionis ſtudium, contemptum contentionis, quæ ex uerborū ui exoritur, diuidendi

G ration

rationem, demonstrandi acumen, exercitationem in disciplinis omnibus, rerum ipsarum contemplationem, claritatem orationis, assiduitatem studii, ueritatis amorem. sed nec illorum sicca breuitas, quamuis prolixitate horum longe sit præstantior, adeo est laudabilis: cum tamen se Aristotelem, non ea dicam parte, qua uituperatione dignus sit, sed qua laudari non potest, abunde imitari persuadeant. Debent igitur uerba, ut uestes corporibus, sic illa rebus convenire: quam certe mediocritatem multi seruauerunt, ut Conciliator, ac Vesalius: qui si nihil aliud præstitissent nobis, uel hoc solum dicendi genere laude digni erant: cum tamen copiam, & etiam claritatem addiderint, utriq; suæ arti stylo satisficientes. At dii boni, quot pro paucis? atque idem in diiudicandis uiris uitium, eademq; culpa. Sed nos iam illos sequimur his magis, quos damnamus. Licet quandoq; delassatis paululum digredi, tum præsertim, si cum uoluptate euagandi utilitas reprehensionis coniungatur. Verum ad institutum iam reuertor: uolui tamen commonere lectorem, quod & ab initio fecisse in epistola memini me, ut nil putet à me relictum eorum quæ proposuerim. Velut dubium aliquibus erit, quod uenas ac arterias membranis constare Galenus dixerit, ut in præcedenti Cōtradictione declaratum est. Hoc autem de arteriis tantum dictum esse Galenus uoluit: sed ex cōmuni loquendi genere cum utraq; fibris constare dixisset, membranas adiungens, non cōmodè arteriis tantum applicare poterat. Eiuscemodi leuia, non tam obiter, quam libens, frequenter soleo præterire, quod ex iam dictis haud obscurè intelligantur. Itaque Galenus 1. Artis medicæ, cap. 3. Neutrum signum, causam, & corpus, diuidit in Simpliciter tale, & quod Vt nunc: postmodum unumquodq; horum in tria genera: scilicet, Quod nec particeps est sanitatis, nec ægritudinis: Quod utriusq; & Quod unius modò, modò alterius. In 6. autem capitulo, cum declarasset primum & secundum Neutri genus, quonam pacto simpliciter dicatur, id est Semper, Vt multum, & Vt nunc: tertium membrum quod Neutrū est, quoniam aliquando ægrū, aliquando sanum, nō per membra diuidit. At omne quod competit generi, competit & contentis sub eo speciebus. Gentilis existimat, & ei assentitur Iacobus de Forliuo, quod hoc corpus non uerè possit inueniri. Galenus etiam non diuisit in Semper, & Vt multum: quamuis in Simpliciter, & Vt nunc. Tamen de Neutro ut nunc, nō uidetur magna difficultas: nam cum corpus quod sæpe sanatum est in uno anno, & non contracta ex generatione dispositione accepimus, sæpeq; ægrotauit, tale in eo anno dicetur Neutrum ut nunc, tertii modi: quod à re ipsa, non quia aptum sit dici debet: neque opus esset duplici illo sensu, Vt nunc, quem illi Galenus tribuit. Sed de Semper neutro, uel Vt multum, magna est difficultas. ut & Thrusianus in 19. commento primi Artis medicinalis declarat. Nam si est aliquod corpus tale à ge-

nerat

neratione, quod ualere possit in pueritia, (ut Galeni exemplo utamur) ægrotare autem in iuuentute: uidetur ob id, quod (gratia exempli) sic- cum sit nimis: unde humido pueritiæ contemperetur, in iuuentute uerò deficiat. At tale proculdubio ægrum est Vt sempernam eam contraxit à generatione temperaturam, per quam labatur ad siccum cuiuscunq; æta- tis temperamenti respectu. Aegrotare enim, uel non ægrotare, nihil fa- ciunt ad sanitatem Simpliciter, sed Vt nunc, ut 2. Artis medicinalis, cap. 1. cum dixit: quod sana Vt nunc, sunt quæ Bene ualentia solemus appella- re. Et rursus in 1. lib. cap. 4. cum dixit, quod sanum Simpliciter, est quod talem à generatione dispositionem contraxit. Et clarius cum subiecit, id solum esse sanum Vt nunc, quod bene nunc ualet, cum tamen à genera- tione male sit cõstitutum. Respondet igitur Thrusianus, quod tale corpus Neutrum dici poterit duplici modo: uel comparando ætatem pueritiæ ætati pueritiæ temperati: uel sumendo ambas simul ætates pueritiam & iuuentutem. Addit uerò hoc, quod talia corpora ab initio etiam sub neu- tro primi significati comprehendere poterunt. Sed, ut uideo, adhuc difficul- tas manet: si enim ut dixi tale ab initio sit, ut ægrotare debeat, multò ma- gis erit ægrum, quàm quod tale est simpliciter: nanq; horum, quæ simpli- citer ægra sunt, plurima diutissimè sanitate Vt nunc fruuntur. Quare Ga- lenus corpora ea censet simpliciter neutra tertio modo, quæ nascuntur sa- na Vt multum, uerum adeo imbecilli consistentia, ut leuiter ægrotent aliqua in ætate, alia uerò firmiore consistente natura diu ualeant. Quod si pertinacius resistas, uolens ut imbecillitas hæc à temperamento pendeat: dicito id esse tale, quod adeo ægrum est, ut etiam cogatur uere decumbe- re per ætatem aliquam: sicq; Neutrum hoc erit plusquam egrum simpli- citer: quia nec omne Simpliciter egrum, neutrum tertii modi esse potest, sed quod uehementer labitur ad morbosam naturam, ut uix consistere queat. Vel melius, Dic illud esse, quod ab initio quidem temperatum fer- mè est, labitur autem in intemperiem (quam morbum Galenus appellat) ætatis successu, uel contrario modo reuocatur: ut sic non æger sit Vt nunc ille, sed sanus Vt nunc: Simpliciter autem non æger, quia non talis à ge- neratione, uerum ei similis, quandoquidem intemperiem secum innatam habeat. Porro tantæ difficultatis causa est, quod cum simplex omne ad ge- nationem referatur, seu ægrum, seu sanum, uel neutrum sit: quod uerò præsentem consistentiam decernit, Vt nunc dicitur: Neutrum tertii mo- di cum præsentem, seu acquisitam dicat consistentiam, omne quasi Vt nunc est. hoc autem ei repugnat, quod est à generatione: ob id Neutrum tertii modi Simpliciter constituisse difficillimum certè fuit. Quamuis re ipsa docente, satis inter utrunque sit discrimen manifestum: nam quod sponte in aliquo anno, sæpe ægrotat, & rursus sanatur, Neutrum tertii est

modi, Vt nunc : quod uerò tota uita id agit, id certe semper Neutrum dici potest. quod uero in maxima uitæ parte, Neutrum ut multum : atque ego, ut recte meam constitutionem intueor, ab ortu ad annos usque octo. Neutri tertii modi Vt nunc, proculdubio dispositionem subii : à generatione uerò eiusdem modi simpliciter sumpti : nam uix una est dies per quam totam ualeam, nec tamen unquam decumbo. Simpliciter autem ægrum est, quòd maxima parte ætatis decumbere natum est : at uerò non ob id ægrum Simpliciter, nam ab ægro Vt nunc disungi nequiret : sed ob decumbere natum, quia est Simpliciter ægrum.

CONTRADICTION VII.

Neutrum secundi modi an sit quod ægrum parte est, & parte sanum.

A Egrum dicitur corpus, quod uel in simplicibus malam habet temperiem in omnibus, uel in aliquibus : aut in compositis peccat, uel unitate : aut in simplicibus simul delinquit, ac etiam compositis. Vnde quidam lectionem illam : καὶ ἢ τοι πάντων, ἢ τινῶν, ἢ καὶ ἐκτέρον, perplexe interpretati sunt : cum alii etiam magis deliquerint, dicentes uel in utrisque peccare scilicet, & in omnibus, & in aliquibus. Quod quàm sit per absurdum, nemo non uidet : nam Aliquibus uel ratione ab Omnibus distinguitur : & sic repugnat. In omnibus simul, & in aliquibus peccare. Vel unum sub alio continetur : & sic quod in omnibus peccat, necessariò peccat in aliquibus. Referatur igitur καὶ ἐκτέρον, ad δημομερῶν καὶ ὁμογενῶν, quæ proximo loco scripserat : scilicet, quòd ægrum sit corpus, quod labitur in similibus partibus, uel instrumentis. seu in horum speciebus omnibus, seu aliquibus ipsorum uitiorum. sic ut omnibus, & aliquibus, ad uitiorum species referatur : utrisque autem ad partes, in quibus uitia sunt. Sed hæc relinquamus, quâdoquidem nihil adferant comodi ad præsentem Contradictionem : siquidem iam dixerat in primo eiusdem cap. 3. (cum hæc quæ adduximus scripsisset in 2. cap. secundi libri) Neutrum secundi modi dici, cum corpus partim esset ægrum, & partim sanum. Tale igitur, cum ægrum sit simpliciter, (ut declaratum est) erit, inquam, simul ægrum & neutrum. Respondetur, quòd haud inconuenit, idem posse dici neutrum secundi modi, & ægrum : sed solum primus modus cum ægro stare non potest. Sed hæc responsio falsa est : nam neutrum esse, & ægrum, inuicem pugnant : quoniã hæ sunt dispositiones, in quas corporum habitus diuiditur : ad omne neutrum secundi modi, sub neutro continetur. itaque dicendum est, quòd Neutrum solum dicitur, quod sic leuiter in parte nobili ægrotat, uel in ignobili etiã grauiter, ut totum corpus ob hoc ægrum dici non mereatur.

Cont

Contrà, quia in lib. de Morborum differentiis, cap. 8. si digitus deficiat morbus est. Dico, est morbus partis, non totius. Contrà, quia 1. Art. med. cap. 5. ægrum simpliciter est cum laborat in similibus uel compositis: Respondendo, deficit ualde quod infra patet.

C O N T R A D I C T I O V I I I.

Sanum corpus an sit, quod in solitas operationes exire potest.

Galenus secundo Artis medicæ cap. 76. ibi: Cum uerò sit eorum differentia duplex, docet corpora illa sana esse, quæ in solitas possunt exire operationes. quæ uerò non possunt, alia quidem ægra, alia uerò neutra, prout impedimentum leue, aut graue fuerit. Et in 2. Artis medicæ cap. 1. Corpora quæ sana sunt ut nunc, quæ & bene ualentia dicuntur. Igitur ex hoc uidetur, quod cæcus à natiuitate sanus dici debeat, & similiter mæcus. At in de Differentiis morborum cap. 7. & in de Causis etiam morborum, cap. 7. ægri sunt quicūq; laborat morbo aliquo. At hic quid duplex, inquit: à generatione, et cōtractus post natiuitatē. Quare cæcus à natiuitate æger est, & non sanus. Idem 3. Artis medi. cap. 5. Id uerò etiam ratione ostēditur: Videns si oculos amittat, eger factus dicitur: at multo magis laborat, ac difficilior, qui id uitii à generatione contraxit. Propter hæc dixerunt quidam (ut Hali, & Iacobus de Forliuio, quo nemo est dilucidior in exprimenda sententia, quā uis seculo rudi, ac bonarū literarum infcio, floruerit) quod sanum semper, & ut multū, in extremo magnitudinis sanitatis sunt. proximū est sanū ut nunc illis. In opposito limine est Aegrum ut semper, & ut multum: uix aliquid sanitatis habetia: quibus proximum est Aegrum ut nunc: media inter hæc Neutra sunt, quæ æqualiter fermè ægritudine & sanitate participant: sed si ex eadem parte id accadat, Neutrum fit primi modi: sin autem diuersis partibus, fit Neutrum secūdi modi: si autem neq; his, neq; illis simul, sed diuersis temporibus, Neutrum constituitur tertii modi. Sed hi extorquent literam Galeni in duobus locis, in primo Artis medicæ cap. 4. dicentis, salubre esse corpus quod tale est à generatione: igitur non quod intensam fortitur sanitatem. & in 2. libro cap. 2. cum dixit: Quo fit, ut tota sanitatis latitudo in tres partes diuidatur, quarum singulæ latitudinem habent nō paruam. Atq; in prima quidam salubria corpora, in secunda neutra, in tertia insalubria cōstituuntur. Post quæ deinceps sequuntur quæ iam ægrotant corpora, quæ sensibilibus operationum læsionibus distinguuntur. Nemini igitur dubium esse potest, ægra corpora, sub latitudine sanitatis nulla contineri: quin etiam alia esse ægra, alia uerò insalubria. Propter hæc Thrusianus credidit, Sanum, Aegrum, & Neutrum, esse talia quidem simpliciter, si à generatione originem habeant: uerum nunc Sanum cum Neutro uel Aegro simplici-

ter idem facit: adducitq; Galeni testimonium ex textu superiore, cum diuisit latitudinem sanitatis in tres partes: nam ubicunq; est fanitas, ibi & sanum corpus: igitur infalubre & neutrum sanitatem cum habeat, sanum erit: & non simpliciter, non enim posset esse simpliciter ægrum, uel neutrum: igitur sanum est ut nunc. Galenus etiam non pertractauit de signis, nec causis sani ut nunc: igitur præsupponit, in libro Artis medicæ, quod comprehendatur sub ægro, uel neutro simpliciter. Adducit & rationem, quam demonstrare credit: Sana corpora à generatione quæ debilem sunt consecuta sanitatem, sana tamen sunt: quæ cum non possint simpliciter esse sana, ut nunc necessario erūt: quia nulla sunt sani genera alia. Sed hæc quidem à mente Galeni aliena sunt: cum sanum ut nunc à generatione constituat: ægrum uerò & neutrum à tempore præsentis sumat. Propter tamen rationes intelligendum est Galenum non permiscere sanum ut nunc, cum simpliciter sano: nec multo minus cum ægro, uel neutro, cum simpliciter sana salubria uocet: & simpliciter ægra infalubria, quæ uerò ut nunc, sana uel ægra. itaq; sana corpora à generatione debilem consecuta sanitatem, uel ut sic, sana nō sunt, nec ægra, nec neutra: sed salubria uel infalubria, uel quæ neutrius dispositionis uim habent. Nec me latet tamen, per salubre sanum intelligi, per infalubre ægrum: cum tamē uult alterum ab altero distinguere absq; uerborū ambitu, ægrum uocat corpus quod à propria recessit temperie, infalubre quod ægrū dicitur simpliciter: id est, non à principiis generationis sanum seu non rectè temperatum, aut non aptè compositum. Sic reliqua, & quæ nos prætermisimus, ex illo facile dissoluuntur. At præsentis sanitatis signa non prætermisit: neq; curam custodiendi illa iuxta secundi libri finem ac tertii initium: quanquàm cum ægra corpora ut nunc, quæ illis opponuntur, necessario lēsas habeant operationes solitas: quare nec sana, nec ægra latere poterant: at salubria & infalubria, cum ambo propriis nō destituantur functionibus difficilius erat distinguere. Alii dixerunt, corpora salubria esse, quæ sanitatem tueri possent. Hanc si perpetuò, sana semper dici debere: si non semper, sed diu, sana ut multum: si autem parum, sana ut nunc esse appellanda. Eandem rationem in infalubri & reliquo ineunt, ut aptitudinem, uel potentiam exprimant: nanq; & Galenus in de Optima cōstitutione, cap. 3. dixit, sanum corpus in optimo statu est, quod semper sanum permaneret. Diffinit etiam Galenus corporum genera, quorum & signa posuit in 2. libro: at ibi declarat signa corporum, quæ nunc talia sunt, non quæ à generatione: igitur per simpliciter talia, potentiam intelligit: & per ea quæ ut nunc, actum in unoquoq; genere. Sed hæc opinio uera non est: quoniam Galenus nunquàm ea diffiniuit per hanc potentiam, sed per contractam à prima generatione dispositionem. Penderet etiam sanum ut nunc, & ægrum
ut

nunc, quodāmodo, ex simpliciter sano ægroq̃. Sed si modo intelligit hanc potentiam in simpliciter dictis, sani puta ad sanam consistentiam: aut igitur quod semper sanum dicitur, sanum est semper, quia temperiem illam natum est perpetuo custodire: atq; sic proculdubio omne corpus, etiam ægerrimum, sanum simpliciter dici poterit: nam omne corpus, si debito regimine utatur, similem fermè ei, quam à generatione contraxit, temperaturam conferuabit. Si uerò de sanitate ut nunc loquantur, quod certum est illos intelligere: aliter autoritas ex libro de Optima cōstitutione nulla erit: tunc propositio assumpta falsa est: nam frigidum & siccum, & rara textura corpus, ægerrimum est, si multum in intemperie labatur, & uix unquā ægrotabit: at calidum & humidum, modico ex excessu, si densa sit textura, frequenter ægrotat: nec tamen simpliciter ægrum erit, imò sanum ut multum. Galenus etiam signa horum corporum sumpsit maxime ex operationibus diminutis, aut perfectis: at si potentia ad morbos constituebat ægrum corpus simpliciter, nullum aliud signum erat considerandum, cum esset hoc diffinitiuum. At pati faciliter à causis morbosis, inter alia signa adnumerat: nec aliis id præponit: imò multa existimasset signa ualidiora hoc ipso. Nec unquā ad causas morbosas comparat in generali ratione sumptas, sed calida (exempli gratia) calidis, frigida frigidis: cum tamen oportuisset hac ratione omnibus morbificis causis talia comparasse. Respondeo igitur, corpora simpliciter talia dici debere, quæ à generatione eadem sunt: differunt tamen sana à sanis, ægra ab ægris, & neutra à neutris: quia connata intemperies uitiat operationes: aliquas alias omnino augere uidetur, quanquā nunquā perfectiores efficiat: eas etiam, quas uitiat, non tollit, aut corrumpit, uelut morbus de nouo superueniens facit, qui uix uestigium illius relinquit. Quin etiam respectu sensus patientis, læsio illa, semper & omnino insensibilis est. qua causa cæcus à natiuitate proculdubio, sanus est ut nunc: nam nisi audiret ex aliis hominibus, concessam esse animalibus uidendi facultatem, nec pro cæcitate doleret, nec existimaret, uidendi sensum hominibus conuenire: quod in belluis, quæ sic nascuntur, perspicuum est: cūq; cæcus febre laborat, ægrotare dicitur: ante igitur sanus erat: at non simpliciter, igitur ut nunc, sanus dicendus est. Si etiam illum interrogas relicta febrē, quomodo se habeat: respondet, bene ualere: at bene ualentia corpora iuxta Galenum diximus esse quęcunq; sana ut nunc uocantur. Quęcunq; etiam corpora, ob intemperiem à generatione oblecta & simpliciter, l. Artis medic. cap. 4. nihil prohibet sana esse ut nunc: quare nec si ab initio statim in compositione deficient. Quinimo ibi Galenus non plus de temperatura expressit, quā de compositione. Auicenna 2. l. doct. 1. cap. 2. sanum accipit, non in communi, non simpliciter, non ut nunc, sed quod utranq; habet sanitatem scilicet
simpli

simpliciter, & ut nunc: ideo non sequitur Galenum nec expositores intellexerunt illud, nec differentiā. à Galeni autem sententia in libris de Morborum causis ac differentiis est, quod morbi sunt duplices, à generatione, & post contracti. Qui à generatione contrahuntur ægrum corpus constituunt simpliciter: at hoc nihil prohibet, quin sanum ut nunc dici possit: sicut quod ut nunc ægrum est, simpliciter potest esse sanum & à generatione. Qui uerò amisit oculos, & si non grauius ægotet quàm is qui sine illis natus est, attamen ut nunc æger solum est: quia in genere leuius est ægrotare morbo ut nunc, quàm simpliciter: eo quod omnis morbus simpliciter, est inemendabilis: omnis autem ut nunc in genere suo morbus, curationem admittit: quamuis contingat aliquos morbos simpliciter curari posse, uelut in his, qui non perforato ano nascuntur, aut quibus iuncti sunt digiti: uel in quibus sunt uno plures, quàm esse debeant. Rursus multi morbi noui curationem non admittunt: ut ualidus morbus attonitus, brachium præcisum, cor uulneratum: in genere tamen curationem exposculant. unde etiam qui minus periti sunt, quandoque manum admouent curandi causa. Sed intemperies à generatione contracta inemendabilis est. ut Galenus censet 6. de Tuenda sanit. quæ uerò ualida est, ut in fine primi cap. habetur, etiam obnitente auxilio medici ante senium mortem affert. sed de his aliàs. Verum & si quod læsas habet operationes ægrum est, non tamen omne quod ægrum est læsas habet operationes non enim hæc conuertuntur: sed ex harum differentia propositionum Galenus sibi ipsi concors redditur. Memineris etiam eius quod supra diximus, scilicet ægrum habere sensibilem læsionis quantitatem, non solum læsam operationem sensibilibiter, nam & hoc habet neutrum. Non igitur hæc obstant, nec quod qui ut nunc est, aut fermè semper magis lædatur: aut quod persæpe periculum uitæ afferat: quin morbus ut nunc solum dici, non autem simpliciter mereatur. At cæcus à natiuitate cum simpliciter sit æger, non dicetur ut nunc: non quia grauius non sit, esse ægrum simpliciter, quàm ut nunc: sed quia diuersa sunt, ut iam dictum est, genera. Cum autè in libro de Optima constitutione, dixit, sanum illud ad amussim toto tempore ualere: ob id declarauit, non propter id dici debere tale, sed ad talem constitutionem hoc sequi: quod & uerum est, & nos fatemur: diuersas etenim constitutiones, diuersæ ualitudines consequuntur: sed non ab his, quod tales sint, rationem sumunt, præsertim cum, ut diximus, generale hoc minime sit. Quod uerò salubrium & sanorum differentiam Galenus expresserit certum est, & nobis consentiens: sed non ob id, quod salubria sint, quæ semper sana esse debeant: dixisset enim, alterum ad alterum dici: sed quod Salubria sunt quæ perfectas habent operationes, & temperiem, ac compositionem optimā: Sana uerò, quæ solitis possunt uti operationibus, quamquam

non

non perfectis: & quæ temperiem accommodationem, quam ab initio fortita sunt, præter ætates uitata non habent. De his uerò determinat in 2. huius Artis medic. libro: cùm, ut dixi, consistentiam naturalem uix quicquam possit immutare: quod & si contingat, signa addidit quibus id dignosci queat. calidum enim hepar habens & non à generatione arctas habet uenas: latitudo igitur est eius, qui tale ab initio illud contraxit: quare de his secundum naturam talibus existentibus, non iam factis loquitur. Concludo igitur, quod luce ipsa manifestius est, qui habent læsas operationes, ut cæcum etsi à natiuitate ægrum esse: nam est simpliciter æger, igitur æger: non tamen est æger ut nunc, qui à natiuitate est cæcus.

C O N T R A D I C T I O IX.

Temperatura æqualis an detur.

CORPUS temperatum non est inuenire, nisi in longis temporum interuallis: libro de Optima constitutione, cap. 3. & 2. Artis medic. posuit illius signa cap. 2. quæ nulla essent prorsus, si ipsum esse non posset. Quod si de latitudine intelligas, frequenter inueniri posset. declarat etiam 2. de Temperam. 1. & 1. de Temperam. cap. ult. per exemplum aquæ permixtæ, quod de uera, non illi proxima temperie hic loquitur. Idem se declarauit 1. de Tuenda sanitate, cap. 5. cùm dixit, eam esse momentaneam: at si non esset exquisita, momentanea esse nequiret, sed diuturna etiam foret. Haliabbas etiam sic Galenum interpretatur, primo Theoricæ cap. 1. iuxta principium, dicens: Et æqualis temperatura de uere æquali dicitur, cuius distantia ab extremis una est: & hanc uix est omnino inuenire. Aëtius etiam lib. 4. cap. 53. & Paulus lib. 1. cap. 60. signa horum ponunt. Sed Aëtii conuersio, & si recognita à Cornario sit, cùm de capillorum colore agit, corrupta est: debet enim legi, Habuerit uerò dum puer est capillos flauiores: consistente autem ætate fuluiores: flauus enim color remissior est fuluo. Adest autem ratio etiam pro Galeno triplex: Sensus tactus debet esse in medio qualitatuum omnium ut iudex 2. de Anima 118. sed homo habet perfectissimum tactus sensum 2. de Anima 94. igitur homo est naturæ temperatæ in medio qualitatuum. Et propter hoc dixit Galenus 2. de Temperam. 1. quod maximè uola manus talis est: quamuis hoc principali dicto non parum repugnet. Secundum argumentum est Galeni 1. de Temperam. cap. ult. Si terra aquæ misceatur, & glacies aquæ feruentissimæ, nonne ex prima mixtione medium inter siccum & humidum progignetur? quod autem tale est, etiam medium & æquale ab hominis sensu percipitur, & diiudicatur: sensus igitur hominis intemperie exactissima constat. Tertiū: Homo habet perfectissimas operationes

H bell

belluarum comparatione: ipsæ autem calidiores sunt, ut leo & canis: aut frigidiores, ut lepus & formica: uel sicciore, ut auium rapacium genus, & insectilia: & humidiores, ut pisces. Cum igitur homo in quodam medio consistat, uerisimile est medium illud ad amussim obtinere debere. At in oppositum. Primò Galeni ipsius sententia est 1. de Temperamentis cap. 1. dicentis: Constare animalium corpora calidi, frigidi, sicci, humidique; mixtione: nec esse horum omnium parem in temperatura portionem ab antiquis abundè demonstratum est, tum medicorum tum Philosophorum præcipuis. Sic etiam Auicenna prima primi doc. 3. cap. 1. Medicus debet physico credere, in his quæ ab illo accipit. & hoc est quòd non datur temperatura æqualis uera, sed solum secundum iustitiam: id est, homini maximè conueniens pro suis operationibus. & 12. de Animalibus, cap. 1. Temperatum quod medici contemplantur, non est uerè temperatum, sed pro operationibus conueniens, & forsitan quòd hominis temperatura est proxima ualde illi uero temperamento. Deinde subiungit: Et quamuis hæc non sit uera æqualitas, rarò tamen reperitur, & non nisi in ætate quæ est consistentiæ, & in cute solum, & cutis adhuc temperatior pars est quæ in manus uola, & huius adhuc index digitus. atque huius iterum summæ partis cutis optimum tenet temperamentum. Idem fermè 2. de Anima, cap. 3. iuxta finem. Et quòd magis mirum est, Auer. 2. Collectaneorum, cap. 1. inquit, Et error quem fecit Galenus, in ponendo temperaturam æqualem, est paruus: ideo de hoc nihil uolumus addere ad id, quòd ille dixit. Et concedit, quòd cutis uolæ manus, maximè digitorum, est æqualis intemperie elementorum, saltem quoad sensum. Ostendere autem nititur Auer. non dari æquale intemperie, quòd ex elementis constet: & ad hoc adducit tres rationes: & quartam nos homini peculiarem adiiciemus. Prima est, & secunda, primo Coeli 7. Si daretur temperatum æquale, quiesceret in quolibet elemento, & etiam inter duo elementa, quæ sunt aër & aqua: sed tale non datur: igitur nec æqualibus elementis constans. Sequela secundi est manifesta: quia non esset graue, nec leue: & ignis & aër tantum traherent sursum, quantum aqua & terra deorsum. Sed prima sequela fundata est super hoc, quòd forma mixti est forma elementi prædominantis si sit inanime mixtum 4. Meteororum, in commentò magno, quòd est ante initium libri: in primo enim folio dixit, quòd cum qualitas actiua prædominans in mixto, continet passiuas, & illis dominatur, mixtum manet, nec corrumpitur: & post iuxta finem dixit, quòd in habentibus partes quæ sunt instrumenta, & innuit uiuentia omnia 2. de Anima 6. forma illorum est alia à forma temperaturæ: & iam, ut dixi, declarauerat, quòd forma temperaturæ cuiuslibet mixti, est elementum prædominans, uel ab illo. Ex quo pat

patet, quòd omnium similium partium animalis, formæ, & etiam mixtorum non uiuentium, sunt ab elemento prædominante illis, & quòd in omni mixto perfecto prædominatur calidum & humidum. Ex hoc habetur fundamentum ultimum, quòd in omni animali calor prædominatur: nam animalia sunt calidiora mixtis reliquis: & iam in omni mixto dicebat Auerroës ibi, calor dominatur, non frigiditas: idem de humido. Quo fit, ut omne animal ad calidum & humidum declinet. Ideo dicebat Auerroës 5. Collectaneorum, cap. 24. post medium: Omnia quæ uiuunt, seu plantæ, seu animalia, calorem habent prædominantem: & animalium calor est maior his quæ nascuntur ex terra, & ob id non inuenitur ex terra ortis calidum actu, ut in animalibus: & ideo dubitauit quomodo possint animalia esse pro cibis homini: & multò minus plantæ, cum sint frigidiore. Sed in cap. 30. eiusdem 5. libri ante medium dixit, quòd sanguinea animalia sunt calidiora & humidiora non habentibus sanguinem: quare patet, quòd homo non leuiter, ut dixerunt iam Princeps & Auerroës sed multum ab æqualitate temperantiæ remouetur uersus calidum & humidum. multò minus temperatum dici poterit. Adiuuat hoc, quod dicitur 2. de Partibus, cap. 7. Homo calidissimum & humidissimum habet cor, ac pulmonem: atque ideo crescit solus inter animantia erectus. Et similem uidetur pro longitudine uitæ causam assignare Philosophus libro de Longitudine & breuitate uitæ, cap. 2. quòd scilicet sit calidissimus ac humidissimus inter animalia. Ideoq; dicebat rectè Galenus in libro de Formatione foetus, pag. 2. & in de Inæquali intemperia, cap. 5. si in sinistrum cordis uentriculum uiuentis animalis digitum immiseris, maximum calorem experieris. Tertia uerò ratio ab Auerroë fumitur 4. Meteororum 10. & 10. primæ Philosophiæ 23. & est: In omni generatione oportet esse aliquid quod misceat, & agat: quia ab æqualibus in uirtute, & si actio in uia Auerrois detur, non tamen mixtio, cum necesse sit adesse motorem. Igitur in quolibet mixto prædominatur aliquod elementum. & ideo dixit, & de Generatione 48. quòd Galenus posuit temperaturam æqualem: & quòd ipse demonstrauit in 4. Meteororum, quòd non datur. Sed dicet forsân aliquis ad secundam rationem, quòd oleum & lignum quiescunt inter elementum aquæ & aëris. Dico, quòd oleum quiescit super aquam, non ratione loci, sed quia non potest descendere ob aquæ grauitatem: & non uidetur quòd sit adeò remotus à leuitate aëris, sicut ab aquæ grauitate, quia totus consistit in loco aëris: & etiam non potest esse, medius inter siccum & humidum, cum sit humidum fermè ut aqua. Sed ligna omnia sunt graui, & magis participant terra & aqua: quod quasi uidetur fateri Philosophus 2. de Generatione & corruptione, scilicet: & experimentum simul

respondet rationi, & rem declarat: nam si à ligno pars aëris quæ inter illius cavitates continetur excludatur, in profundum mergeretur lignum: ob idq; Buxus & Ebenus, secundum Philosophum, & Guaiacanum aquæ immerguntur. Sed ut uideo Auicennæ opinio & Auerrois absque longè magis est Galeni opinione. si enim hominis natura temperata non est, temperamento autè maximè proxima: fiet ut aliqua temperatura, imò plurimæ, perfectissima illa hominis sint temperatiores: nam quæcūq; temperaturæ mediæ essent inter optimā hominis & mediam ex elementis, quas necesse est non paucas esse, etiam secundū speciem, temperamentis à medio sensim recedētibus, optima illa erunt temperatiores: atq; ut uideo, in Conciliatoris argumentū incidemus: ut melancholica sit optima temperatura æqualitatis proximior. Hac de causa ille Differentia 20. coactus est post multa fateri aliud ab opinione, & eo quod in 18. Differentia affirmauerat: & ideo dixit, quod tale corpus recedens à iusto & perfectissimo ad æquale, non est melancholicum, sed temperatius primo & perfectissimo: sed quod tale corpus est momentaneum, quia non potest in illa temperie diu permanere, & quod nunquā tamē ad exactā æqualitatem accedere potest. Et quis non uidet quod hæc sunt meræ nugæ? etenim si temperantia æqualis elementorum, in medio est fermè latitudinis humanæ temperaturæ, par est proculdubio, ut illi tanquam perfectissimæ assignemus naturæ humanæ temperiæ absolutissimæ: & operationes absolutissimas in illa esse censeamus. Addit uerò ibi de Christo multa, non solum impia, sed absurda: & dum Philosophum agit more quorundā, qui optimum argumentum existimant Philosophi impietatem, & in leges iacta probra: & medici maledicere de Arabibus, cum hi Galenum solo nomine salutauerint, illi uerò in lege quidem superstitiosi, in philosophia autem inanes sint & fatui. nam Philosophus non hæc acta diceret ut postmodum in causas reduceret naturales. quemadmodum Conciliator, & Pomponatius facere nituntur, fabulosis absurdissimisque imaginationibus: sed ab ipso Philosopho edocti, & Auerroë, tum Aphrodiseo, cæterisque Peripateticis, qui non cum nugis Platoniorum, non dico Platonis (nam hic minime est superstitiosus) consenserunt: negandum est simpliciter acta esse quæ dicuntur. ut 2. primæ Philosophiæ inquit Philosophus, & in disputationibus Auerroës, & Aphrodiseus in libro de Fato: fabulas enim hæc nuncupant. At hos longè magis pios illis esse constat: quod saltem ueris miraculis fidem non subtrahunt, nec Christum faciunt, aut Mosem impostores. Sed hæc extra aleam, de re ipsa dicendum est. Sed tamen sic, ut primò uideamus, cur corpora hominum in aqua mergantur dum uiuunt: & à morte ipsi aquæ supernatent: cum tamen post mortem grauius cadauer efficiatur: aqua impletis partibus quæ dum homo uiuet

ret aëre implebantur. nam si corpus humanum temperamento proximum esset tum maximè aqua resistente non parum, tum aëre in pectoris cauitate contento atq; etiam arteriis, dum homo uiuit mergi in aqua non deberet. Itaq; non protinus emergunt, sed cùm computruerint, indicio est, quòd prætumida sunt cadauera omnia cum supernant, quæ autem putrescunt, calorem habent prædominantem, ut inquit Auer. 4. Meteororum in Commento magno, folio primo. Rara igitur tunc fiunt, & leuia animalium corpora, impleturq; aqua & flatu, ob idq; non amplius subsident. Emergunt autem uiuentia omnia, antequam suffocentur, bis aut ter ad aquæ superficiem: tum homines, ni præpediantur, ut in gurgitibus accidere solet, aut ob uestes. Hoc autem ob aërem contentum in thorace contingit. Quare si ad molem spectemus, hominis corpus plus habet grauium elementorum, quàm leuiū. Quamuis non una horum sit ratio: nam Aristoteles refert 23. Problematum 26. falsam aquam uino supernare, cùm tamen grauior sit dulci, cui quotidie uidere possumus uinum superesse. & plumbū sub eadem superficie aquæ immergitur, cui lignum maioris ponderis nec latius innatat. Attamen si ratio Auer. uera est, oporteret hominem naturaliter, dum uiuit, aquæ supernare. Similiter iuxta Galeni sententiam, si uera sunt Philosophorum fundamenta. Aequalia igitur elementa in mixto tribus modis dicere possumus: aut magnitudine, uelut si pugillus aque ignis pugillo immisceretur: Aut sub eadem materie quantitate: nam ut exemplo ostendit Philosophus 2. de Generatione 37. aqua multiplicatur dum in aërem uertitur: si igitur ex pugillo aque fiant duodecim aëris, cùm aliquid componetur ex aquæ parte una, & duodecuplo aëris æqualiter constare dicetur ex his elementis. Tertio cùm sub eisdem uiribus: sed hoc non uno modo: nanq; æquari possunt calor & frigus, non tamè leuia in eo grauiq; ac rursus grauia & leuia, non autem calor ac frigus, siccum & humidū. Videntur igitur argumenta Auerrois prima ostendere, nō dari æquale ad pondus: quod Galenus nō solum non negat, sed ut dixi cōfirmare uidetur. Sed in qualitatibus tamen non uideo quomodo Galenus statuere possit hominē temperatum: nam cùm cutim uolæ talem, ut diximus, constituat: partes autem omnes internæ calidiores sint non parum cute, manus, os, gula, uentriculus, cor, iecur, cerebrum ipsum quod frigidissimum iuxta omnes inter membra fermè existimatur, ut in 6. libro declaratur: necesse uidetur corpus humanū calidis ac frigidis non æqualiter permisceri: neq; iudicium ad id ferre possumus, cùm magna caloris uis, iuxta Philosophi sententiam, cœlestis sit, non elementaris. At ex his ratio 3. Auer. quæ sola aduersus Galenum est diluitur, cùm miscēs calor sit cœlestis cum eo qui est elementorū mixtus. Postquam igitur nihil firmum habemus, nec ex sensuum consensu, nec ex ratione

tione: par est, ut omnino Galeni sententiam tueamur: tum maximè, quòd
 Philosophi uerba 2. de Partibus cap. 7. iuxta finem, ad id tendere uidean-
 tur: inquit enim, cerebrum ob hoc constitutum frigidissimū, quòd cor &
 pulmo sint calidissima: quamobrem temperiem dilexisse uidetur. Solū
 igitur modus huius temperamenti requiratur, nam prima ratio pro Ga-
 leni sententia haud inualida est, nisi sensus humanus de his rectè diiudicet,
 fateri etiam cogimur, nec de ipsis ullam scientiam haberi posse. Dico igitur
 continentia ipsa carnes, ossa, neruos, uenas, neruosa, membranae, carti-
 lagines, ligamenta & pinguedinem simul sumpta, declinare ad frigidum
 & siccum, sed eò minus, quòd moles horum maior est contentis: contenta
 autem sunt calidioris & humidioris temperamenti: & hoc uoluit Philo-
 sophus 2. de Partibus, loco adducto. Hæc omnia simul iuncta æquale mi-
 xtum in omnibus reddunt: cavitates ipsæ calidiores omnes, & humidiores
 quàm par sit, os, uenter, pectus, cerebrum: at solida frigidiora: cutis uerò
 manus, absolutissimum medium obtinet, finis causa ut percipere possit
 qualitates, & formæ, quia tantum recipit de calore influente, quantum
 illi est necessarium ad temperamentum medium. ob id etiam intempera-
 torum leuiter, tactus est absolutissimus, temperatorum autem certus. Cæ-
 tera enim membra uel ob propinquitatē nimis inflammantur, uel ob cau-
 itatem nimium replentur sanguine, uel ob soliditatem ab eo destituuntur.
 Relinquitur igitur ut sola cutis temperata esse possit. Quodcumq; autem
 corpus æqualem in cute habet temperiem, temperatum est: quod autem
 in una tantum parte, non est omnino temperatum: sed per æquales recef-
 sus utrinq; uelut calidioris cordis, & frigidioris iecoris, temperati falsam
 quandam præbet imaginem. Cerebrum autem ob multitudinem arte-
 riarum, quoniam in eo necessariò oportebat gigni spiritum animale, tum
 ob substantiæ mollitiem calidum non leuiter euasit, quamuis suapte
 natura sit frigidissimum: atque eo modo calori cordis contra opponitur.
 Galenus etiam 1. de Tuen. san. cap. 5. & 6. ponit hanc æqualitatem cum
 quadam latitudine, & dabat exemplum de citharistis, qui in neruorum
 lyrae tensione paululum dissident: unde alter alteri superueniens mutat.
 Sed non sustinetur humanum corpus in aqua dum uiuit homo propter
 tria: primum quòd aqua hæc leuior est pura, & ob id non tantum resistit.
 indicio est quòd frigidissima non est. Secundum quòd mouetur, & flu-
 etuat: & ob id etiam rapit motu suo. nam & partes inuicem aquæ hoc mo-
 do merguntur, aliis supra emergentibus. quare maxime periclitantur ho-
 mines in aquis inæqualiter currentibus: semper autem iuxta uortices: mi-
 nime autem in quietis: minus etiam in his quæ recto alueo, sensim fluunt:
 nam motus qui non rapit, sustinet. Tertium est quòd non recte aquæ se
 superstatamus: uidi autem puerum & familiaribus qui adeò bene aquæ se
 sup

superextēdebat, ut diu sine motu sustineretur resupinus. Sed hæc nos non fatigant qui tenemus æqualitatem intemperie qualitatum esse posse, corpore tamen plus habente de grauitate quàm leuitate. Quod uerò dictum est de animalibus ex Collectaneis ad carnes non ad reliquas pars refertur. His uerò quæ ex Meteoris adducuntur, respondemus: Calore cœlesti adiuuante, elementarem in generatione superare frigiditatem: nam sententia Philosophi clara est 2. de Generatione animalium 3. Ad uiuentium genituram, cœlestem calorem concurrere: in reliquis mixtis nihil prohibet dominari calorem in generante, non autem in eo quod gignitur. Ad Galeni auctoritatem dico, quòd subiicit, se etiam de hoc suam explicasse sententiam: quasi hæc non illius sit. Et quamuis ita sit concors Galenus cum Auer. de æquali ad pondus: rationes tamē illæ non demonstrant quia corpus non in medio duorum elementorum, sed in extremo, ubi se tangunt, quiesceret, ut de oleo dictum est: id est, partim in unius, partim in alterius loco.

C O N T R A D I C T I O X.

Corpus humanum an medicinæ subiectum.

Medicina tractat de corpore humano, ut sanatur uel à sanitate remouetur. Ex quo colligitur, quòd medicinæ subiectum sit corpus humanum, ut sanitati & ægritudini subiicitur: prima primi cap. 2. de Medicinæ subiectis. & sic exponitur à Gentili ibi: sic Dinus censet: sic Conciliator etiam tenet in differentia 6. Pro hoc etiam adduco rationes, quia sanitas non potest esse subiectum neq; synonymum: neq; paronymum: igitur nullo modo. Nam si synonymum, non extendetur nec ad causas, nec ad signa: quia hæc ad corpora referuntur: nec paronymum, quia sic erit de sanis, ægris, & neutris: nam hæc ad sanitatem dicuntur, ut primo Techni. 2. igitur cum scientiæ fecentur ut res, 3. de Anima 38. erunt tres scientiæ medicinæ. Auerroës etiam primo Collectaneorum 1. Artes practicæ tria continent: Primum est, scire loca suorum subiectorum. Secundum est, scire finem quæsitum ad ducendum ipsum in loca sui subiecti. Tertium, scire media quibus inducitur finis in loca subiecti. Si igitur sanitas est subiectum, subiectum inducetur in subiectum, & infinita alia, ut liquido apparet, sequuntur incouenientia. Est etiam illud manifestum ex 2. de Anima 27. quòd artifex supponit suum subiectum, deinde diuidit illud per genera, & partes, ac species: sed nos non inuenimus, quòd Galenus diuiserit sanitatem in partes, eo modo quo corpus humanum, ut in humores, elementa, temperaturas, mēbra similia & instrumentalia. deniq; in totam illam dissectionem: quare corpus humanum erit uerum subiectum. Auerroës etiam in paraphrasi primæ Philosophiæ, dat distinctionem modi consideran

derandi Philosophi naturalis, & supernaturalis hic enim considerat formam & finem, inquit: ille efficientem & materiam. Liqueat autem medici considerationem esse naturalem: quare non considerabit de fine suo, tantquam de subiecto, quare non de sanitate quæ est finis medici, 1. Ethicorum 1. Dicebat etiam Philosophus 1. Posteriorum 25. quod scientia tria considerat, affectus, subiectum, principia: sed de corpore humano affectus ostendit medicus, quia sanitas & morbus sunt corporis affectus, libro de Symptomatum differentiis cap. 1. iuxta medium: quare sanitas non potest esse subiectum. Finis etiam & materia non coincidunt, sed diuersa sunt, 2. Physi. 23. sed sanitas est finis medici, uel saltem eius adeptio, lib. de Sectis cap. 1. igitur sanitas non est subiectum. Nec etiam uideo, quomodo sanitas, uel sanum, possint esse subiectum: nam non adæquatum, quia medicus etiam considerat de morituris, quo ad prædictionem, etsi non quo ad curam, nisi ut iam dictum est: nec potest esse principale, quoniam etiã de belluarum sanitate consideraret: nec commune, nam etiam de ægris considerat: quare nullo modo subiectum dici meretur. Galenus etiam in Introductorio medic. cap. 6. reprobat eos qui dicebant, quod Medicina est scientia sanitatis conseruatrice, & morborum repultrice: dicens, diffinitio est per ea quæ semper insunt: sed non semper medicina hoc consequitur, sed aliquando frustratur: igitur si sanitas esset medicinæ subiectum, aliquando scientia esset absq; suo subiecto, quod esse non potest. Illud etiam dignum est consideratione, quoniam si sanitas est subiectum, erit medicina de necessariis per se, & ita non erit ars. 6. Ethic. cap. 4. quoniam ars solum est de contingentibus. Galenus etiam 3. de Simplic. med. cap. 5. quicquid medicus considerat, in ordine ad humanum corpus considerat, atq; in hoc (dicit) differunt à philosopho naturali, qui omnia considerat, comparando ad totam rerum naturam. At in oppositum uidetur esse sententia Galeni in de Partibus Artis medicæ cap. 8. ubi dicit, quod sicut proprium subiectum in philosophia naturali est generatio, remotum autem corpus generabile: sic in medicina proprium & propinquum est, dispositio corporis, remotum autem corpus humanum. Sumuntur etiam rationes: nam corpus humanum est pars subiecti philosophiæ naturalis, ut ibi ait Galenus: igitur ratione subiecti non distinguetur ab aliis scientiis medicina. Alia ratio est, quod tota Ars potest per solam experientiam tradi, sine subiecti hominis cognitione, uel corporis causis, aut partibus: ut in Introductorio, cap. enim 2. declarat quod medicina tota potest solo experimento tradi: & dat exemplum de barbaris. in 3. autem cap. declarat, quod cum rationalis quatuor rebus innitur, in naturæ, causarum, signorum, & curæ cognitione, solum empiricus considerat symptomata, & negligit naturam & causas. In cura uerò procedit uel per historiam, uel per similitudinem auxiliorum, uel per

per contrarietatem. Idem clarius lib. de Subfiguratione empirica cap. ult. ubi dicit: Hic igitur libellus à me propterea scriptus est, ut ostenderem, aliquem empirice medendi artem posse constituere: dimissa omnino inquisitione de rei substantia, quamuis multum difficile sit hoc ad assequendum. Item 3. Artis curatiuæ, cap. 2. Empiricus solum coarguitur, quòd nesciat inuentorum reddere rationem. 3. etiam de Crisi cap. 8. monetur medicus, ut credat inuentis solum, rationem non quærendo. Si igitur cognitio humani corporis, & causarum eius necessaria non est, sed sanitatis tantum, scientia autem & ars, non possunt sine sui subiecti cognitione consistere: manifestum est, corpus humanum non posse esse medicinæ subiectum. Propterea Thadæus Florentinus dixit, quòd subiectum in medicina est triplex, Considerationis, Finis, & Reductionis: uelut etiã in metaphysica: nam ibi subiectum considerationis, seu prædicationis (ut ipse dicit) est ens, de omni enim ente considerat: subiectum autem finis est Deus: reductionis autem, substantia: ut enim omnia ad substantiam reducuntur, sic etiam omnia propter primam causam considerantur: Igitur in medicina considerationis subiectum res est omnis medica, ac regula quæ ad illam artem spectat: finis autem, sanitas: reductionis uerò, humanum corpus. Sed omisso exëplo metaphysice, dico quòd nos debemus distinguere, & quærere uerum subiectum: nam Deus non de ente demonstratur, nec de substantia: sed sanitas de corpore demonstrari potest. Vnde qui hoc dicunt, affectum seu passionem auferunt, conduplicantq; subiectum absq; necessitate. Conciliator Differentia 6. quatuor finxit conditiones subiecti: sed proprium subiecti est, ut de eo præcognoscatur, quid, & quia est: tum quòd omnia in illa scientia considerata, ad ipsum, seu eius affectum reducantur. Vltimo, quòd de eo proprius quidam affectus demonstretur, per quem ab omnibus aliis sui generis habitus ille intellectus distinguatur. In puris tamen artibus ut solum doceatur sufficit. Proprium autem dico affectum quarto modo. Homo igitur uerissimum subiectum est medicinæ, nec ut corpus tantum, namq; & de animi affectibus & operationibus considerat. Sed si malis Corpus humanum dicere, non prohibeo: modò ne iungas, Sanabile, uel Aegrotabile, nam hæc iam ad affectum, non ad subiectum pertinent. Ad opposita autem argumenta respondeo: quòd & si Galeni liber ille sit, nihil plus uult eo in loco Galenus, quàm quòd si medicina sit per partes diuidenda, nõ ex ratione subiecti corporis humani, cum subiectum id sit commune Philosopho, sed addito affectu proprio, tanquam propinquo subiecto: non artis inquam, aut scientiæ, sed eius à quo ratio diuidendi sumi debeat, cõmodissimè diuisionem illam ineamus. Id uerò non pro inconuenienti habemus, quòd de eodem tractet Philosophus ac medicus: sed tamen diuersa ratione, non sanitatis tantum uel morbi, nam & hæc

Philosophus considerat naturalis, sed ex modo considerandi. Est autem hic quadruplex: primus, quod physicus generaliter, medicus per species usq; ad extrema, diuidit. Naturalis ut à sola natura proficiuntur, medicus ut à natura artis beneficio adiuuanda, aut non adiuuanda. Naturalis ægrum aliud cenfet esse à medico, utpote generalius quoddam, atq; communius: cum in eo neutrum claudat, medicus alterum ab altero seiungat. Naturalis etiam omnis corporis uiuentis sanitatem intuetur, hominis solius medicus. Deniq; quantum discrimen adiciere liceat: naturalis sanitatem & ægritudinem ex æquo contemplatur, medicus autem propter sanitatem plerumq; considerat morbum. nequaquam autem propter illius naturam. Est uerò considerandum, an etiam ob uitæ longitudinem medicus, nulla habita sanitatis ratione, aliquid consideret: & an daturus sit uiperas in cibo, ad senium protrahendum, etiam si lædant accipientem: ut in hoc casu, potior sit aliqua ei cura, quàm ualitudinis. Cum autem dixit Philosophus secari scientias iuxta subiectas res, intelligit quæ sub eadem ratione considerantur: sic ut alias distinguant res ipsæ, & quibus res unæ sunt uaria considerandi ratio. Ad aliud dico, quæcunq; de corpore humano dicta sunt, sanitati ne subiectum esse possit, tum etiam sano repugnare longè magis. Quare nihil plus ibi Galenus uoluit, quàm quòd ars medica, non scientia, absque rationibus demonstratiuis, non absq; cognitione corporis humani, tradi potest: quod seriem locorum inspicienti liquido constat: quare duplex fallacia fit. Ad Principis auctoritatem respondeo, illud explicasse non solum subiectum, sed subiecti rationem principalem, quæ est affectus proprius. Sed est difficultas ex Galeni uerbis i. Artis medic. cap. 3. ubi dicit, quòd medicina non est omnium: Si autem homo esset subiectum, uel corpus humanum, esset medicina omnium corporum. Item medicus non considerat sanitatem momentaneam i. de Tuenda sanitate, cap. 5. Respondeo: Prima auctoritas à paucis bene intelligitur: nam Galenus uult ibi solum declarare, quòd medicina non est singulare, quia nec omnium, sunt enim infinita: nec paucorum, quia inartificiosum. Sed est de omnibus speciebus, sanorum, ægrorum, & neutrorum. Et ideo non ualet, Est de homine ut homo, igitur de singularibus per se sumptis. (quauis in genere ualeat) igitur de omni homine. Ad aliud respondeo, quòd homo habēs sanitatē momentaneā, est de consideratione medicæ: aliter nullus esset homo de cōsideratione medici, ut patet: nam secundū sententiā Galeni, omnes homines, imò omnia, sunt in perpetuo fluxu: dispositio tamē secundū quam quilibet est, cum non sit perceptibilis à sensu, est remota à consideratione medici: quia medicus est artifex sensibilis, ut dici solet: & hoc pauci, aut nulli percipiunt, cur sic dicatur. Omnes enim artifices, qui cum hoc etiā sunt sciētes, ut Musici, & Geometræ, etiā perc

percipiunt rem prout est, & indiuisibile, quia tale indiuisibile puta diapason, potest esse firmū & nō fluens: quia nō est in materia generabili, & corruptibili ut sic. Ille etiā Astrologus, qui cōsiderat luminariū cōiunctionē, quæ est momētanea, quamuis nō maneat, cōsiderat tamen, quia nihil uult operari circa illā. Cū igitur medicus sit sciens, & nō purus artifex, & habeat operari circa subiectū suū, & subiectum non cōstet unquam sub uno affectu propter materiā: cogitur medicus solus inter omnes sciētes diiudicare ex sensu, nō ex rei ueritate: & ob hoc sensibilis artifex, cū tamē oēs artifices sensibiles sint principaliter nūcupati. At exēplū de homine quomodo naturalis sit, subiectum scientiæ simul ac medicinæ ex mundo accipe. hic enim est subiectum naturalis Philosophi, & Astrologi, non autem coelum, ut quidam putant: sed hos distinguit ratio cōsiderandi. Vnde eodem modo Philosophus naturalis etiam ā primo Philosopho ratione considerationis separatur.

C O N T R A D I C T I O X I.

Olera an facilis concoctionis.

QUod autem & pani, & multo magis lactucæ & betæ, multa trāsmutatio requiratur, quomodo sanguis fiat, omnibus patere arbitror. de Natural. facult. cap. 10. ostēderat autē rationē: quoniā oportebat colorē ac substantiā sanguini similē fieri. Porro sanguis rubeus, & substātia crassior lactuca esse uidetur: nam sanguis, ut ibi dicit, carni proximus ualde est, nisi quod illa cōcreta est. Lactucā autē Galenus 2. de Alimētis cap. de lactuca, oleribus aliis prætulit, cū inquit: Sciendū autē, quod cū omnia olera sanguinē paucissimū gignāt, & prauī succi: lactucā non multū quidē generare, neq; mali succi, sed neq; omnino laudabilis. Oliuas uerō duriore substantia esse cōstat, magisq; ā sanguinis natura remotas, quā lactucā: & tamē in 6. de Tuēda sanis. inquit, (quod & aliās recitauimus) Quibusdam solo pane uesti absq; obsonio nō placet, sed cum palmulis, oliuis, melle, aut sale sumūt. Sit autē cuiusq; modus qui decima hora concoctus esse possit. Iusserat autē ut quarta hora cibum hūc sumerēt: igitur in sex horis sperat palmulas & oliuas cum pane sumptas cōfici posse. Difficiles autē palmulas cōcoctu 2. de Alimentis, peculiari quadam noxa dixit: quod sit, ut tripliciter hic sibi non constare uideatur. Nam primò palmulas concedit, difficiles concoctu in tam breui temporis spatio absoluendas. Carnem autem prohibet, quam uidetur facilem proposuisse, ut diximus, ex primo Facultatum naturalium. Secundo olera improbat, sed tamen cū leuiores sint, cur non exhibet magis quā palmulas, quas dixit dolorem capitis, & obstructionem iecoris concitare? Nec est quod dicas, illum alienū, non proprium morem recensere: nam utrunq; probat, sed proprium. tamē ut me-

liorem præponit. Tertiò lactuca uidetur esse secundum frigiditatē fontanæ aquæ, 6. de Simplicib. medic. & in eodem mitiorem ac tepidiorem frigiditatem attriplici inesse ostendit: nam in primo gradu, ac sub leui temperie, ipsum constituit: remotior igitur à sanguinis natura est lactuca, quàm attriplex, & tamen meliorem gignit sanguinem (ut declarauimus) quàm attriplex, & facilius concoquitur, cap. de attriplice. 2. de Alimentis. nam lactuca estur tam cocta, quàm cruda: attriplex crudū omnino inutile. Perit igitur ratio illa à Galeno scripta in primo de Facultatibus naturalibus. Præterea nunc quod de turbatione dici solet 1. Regim. acut. 18. ubi nihil magis cōcoctioni obfistere creditur, cum lactuca nihil tale habeat, 2. de Alimētis, cap. proprio: neq; enim aluum aut sistit, aut lenit. Illud mirū, cur 5. de Tuenda sanit. ubi de Regimine senum loquitur, exēplum etiā adducēs Antiochi medici, & Telephi Grammatici: & 2. de Alimentis cap. de oliuis, quomodo laudet hæc ante cibū, quæ proritare habēt aluum, exhibens ex garo oliuas, quæ sunt proculdubio concoctu difficiles. & 1. Regim. acut. 18. illos maximè improbet, qui ius & garū cum oleo cerebro miscent: nam hæc turbant, & cōcoctionem impediunt, inquit, cogentia descendere quæ sunt difficilia concoctu, quale cerebrum est. Hæc sunt difficiliora forsan, quàm quis putet. Sciendū tamen aliquid dici difficilius, uel respectu primæ coctionis, uel pluriū, uelut caro in prima coctione nō admodū est difficilis, ut diximus in Cōtradictione 7. tractatus 5. & sic hoc modo lactuca carne difficilius concoquitur: quia tamē longe plus alimenti refecatur ex carne, quàm ex lactuca, ideo in secunda & tertia coctione, caro plus exhibet negotii, quàm lactuca. Hac igitur ratione, cum omnia olera parum nutriāt, ut declaratū est, omnia sunt facilioris coctionis, quàm caro, uel panis: nisi si quid obstat propriū, ut in radicibus durities, in urtica uis agrestis, & malè tractabilis: in aleo immodica caliditas, in melongena fungosa substantia, in ebulo odor prauus. Olera igitur, ut brāsica, blitum, lactuca, attriplex, & talia, leuius concoquuntur, quàm panis, caro uē: nec discrimen latet, aut mediocre in hoc est. Galenus autem 1. de Facultatib. naturalib. solū rationem substantiæ declarauit. Vnde si quis tantum lactucarum comederet, quod sanguis ex ea prodiret tantus, quantus ex dimidia carnis libra, tunc non solum lactucæ illæ difficilius concoquerentur, quàm caro illa, sed etiam strenue offenderent hominem. De temperamento uero, lactuca minus cōcoctioni apta est, quàm attriplex, ratione frigiditatis: non autem humidū, nec substantiæ: nam attriplex humidum in secundo habet temperamentum, substantiamq; duriores: lactuca uerò friabilis ac mollior: si tamen senescat, affligit grauius uentriculum, quàm attriplex, ob immodicam intemperiem. Consilium uerò in 6. de Tuenda sanit. est, ut non cibi leues sumantur, sed

sed qui parum nutriant: quia periculum est de obstructione iecoris potius, quàm de uentriculo: unde periculum exercitii maius est ob secundam, quàm ob primam concoctionem. Secundum est, ut quæ sumuntur non descendant faciliter: ob hoc nec mel, nec palmulæ, nec oliuæ, si sine garo sumantur, disconueniunt: neq; enim descendunt, nec multum nutriunt. Deteriores tamen palmulæ ex his omnibus sunt: tum oliuæ, si ex garo sumantur. Pessimum omnium; si potus adiungatur magnus, nam paruus quandoq; est necessarius, ut cibus dissoluatur. & quamuis grauis noxa ex multo potu præsens accedat: si tamē absint nutrientia copiose, nō multum iecur periclitabitur obstructionibus. Sed olera & quæ aluū proritare possunt, conueniunt ante cibum, si parum potus aut nihil, nihil nutriens, panis parum adicias: nam sic detrimentum primæ coctionis in uentriculo intestinorum uis & ipsa concoctrix supplebit. His rationibus, non conuenientibus oculis, intendere opus est, & subtili intellectu. nam fermè ausim antiquos dicere, non plenè illas assecutos: cū tamen maxima bonæ ualitudinis tuendæ ratio ex hac contradictione pendeat. Sed & si quis proritantibus aluum in totum abstineat, non parum ad uitæ longitudinem confert.

C O N T R A D I C T I O XII.

Materia quæ concoquitur an necessario in alimentum transeat.

SCio quàm multos torquebit Telephi Grammatici exemplum, qui Olera esitabat ante carnes: & quod Galenus præceperit absq; discrimine, ut mollientibus aluum ante cibum utantur senes: & quod 2. de Alimentis cap. 22. docuerit etiam malas cum garo & oleo à Rhetore, ante carnem etiam suillam fumi solita: & quod Auicennæ hoc sit etiam præceptum. Verum nos optimam docuimus institutionem, quæ proxima illi est nunc dicetur. Nam in quibus cibi è uentriculo non facilè exeunt, tum maximè si quies subsequatur, tales etiam cum nutrientibus, quæ turbant, leuiter accipere possunt: unde in cœna etiam magis. Quædam autem mouent simul ac astringunt, ut oliuæ non admodum maturæ: & harum usus forsan non periculosus, quippe qui ad coctionem & moram astringentem uim obtineat: ubi in excrementa abierit, falsedine gari expultricem proritat. Rhetoris tamen regimen haud probandū est: sed &, ut uidetur, male prospera utebatur ualitudine. Verum patefacta ueritate ad alia potius transeundū erit. Galenus in Medicinali arte lib. 3. cap. 6. inquit: Coctio est quæ putredinem finit, manente substantia. Loquitur autem ibi de coctione materiæ febris: quamuis omnes transtulerint mutationem qualitatis quæ certe aliquid communius coctione continet. Galenus iterum in 1. de Differentiis feb. cap. 6. dixit: Species putredinis esse innumerabiles:

genera autem tum in febribus, tum in phlegmonibus tria. Primum cum natura euincit putredinem, fitq; pus in phlegmone, uel humor in urinis subsidens, nam talis inquit humor non absolute putridus est, sed uim aliquam continet coctionis. In secundo autem (dicit) genere sunt, cum uis coquendi adeo imbecillis facta est, ut nullam in putrescente humore ad benignum faciat transmutationem. Inde subiungit, de primo genere loquens, Altera autem putrefactio, quam & coctionem esse diximus. Sed tertium genus est, cum semiputridus humor est: nam tunc ad integritatem, pro magna parte saltem, reduci potest: ut 2. Aphor. Com. 17. iuxta finem. Ex his liquet, coctionem aliud esse omnino à nutritione. Philosophus quoq; in 4. Meteororum 17. inquit: Aliis ad quandam subiectam formam contendit: ubi scilicet humor, qui torrebatur, aut elixabatur, uel putrescebat, uel alio modo incalescebat, talis tantusq; euasit. Tunc enim utilis est, & concoctionem recepisse dicitur, ut multū, & quæ in tuberculis collecta sunt, cum ad suppurationem peruenire: & lacrymæ, tum sordes quæ in oculis obortæ sunt: & cætera simili modo. Hoc autem omnibus obtingit, cum materies, atq; humor ipse uictus fuerit. Hæc autem est, quæ in ipsa caliditate, quæ in ipsa natura est, definiri solet: nam hoc tandiu natura est, dum in ea ratio ipsa inest. Quocirca & eiusmodi, & urinae, & alui sedimenta, & omnino corporis excrementa, sanitatis indicia sunt: & cōcocta dicuntur, quod humorem à calore uinci significet. Superius autem declarauerat, finem coctionis cibi esse nutritionem: hic uero quod alius sit finis huius coctionis, alia forma. Auerroës uero in Commento dixit: Et hæc concoctio fit, quando nulla pars eius quod concoquitur, apta est transire in id, quod eam concoquit. Ex hoc igitur patet, quod aliud est genus coctionis, quam alentis: aliusq; finis, quam assimilatio. Nec obstat, quod Aristoteles definierit in principio cap. coctionem sic: Concoctio quidem igitur perfectio est, à naturali & proprio calore, ex oppositis passiuis. quod Alexander 14. questione tertii naturalium questionum sic explicat: quod sit perfectio acquisita in passiuis oppositis, à proprio calore. Nam hanc diuisit postmodum ratione finium: quædam enim nutritionis causa est, quædam euictionis, ut in tuberculis, ac excrementis. Non igitur omnis coctio nutritionis causa, neq; assimilans: quamuis omnis coctio eodem modo in passiuis fiat, & ab eodem calore. A uicenna etiam prima primi, Doct. 6. cap. 3. iuxta principium idem sensisse uidetur: sunt autem uerba: Nutritiuæ uero operatio in his quæ superflua sunt erit, ut si possibile fuerit, in nutrimentum ea permutet: quæ actio etiam concoctio nominatur: aut ut præparet ea facili expulsiōi à membro, attenuando crassa, inspissando tenuia, diuidendo quæ tenacia sunt: & hæc operatio dicitur maturatio, seu coctio. Ex quo patet, quod & sensit Auer. 7. Collect. 9. concoctionem nocitui esse ad expulsiōem.

pulſionem, non ad nutritionem, tanquàm ad finem: formam uerò eſſe fa-
 cilitatem expulſionis, & non aſſimilationem membri. Adduco etiã duas
 rationes pro hoc: natura agit ad finem proprium, & non imaginarium:
 ſed proprius finis noxiū humoris, qui emendari non poteſt, eſt expulſio,
 non nutritio: igitur præparat ad expulſionem, non ad nutritionem. Nec
 ualet quod dicat Villanouanus, cuius eſt inuentum hoc non inelegans,
 ſcilicet, tueri partem oppoſitam eſſe unum opus naturæ: nam uidemus
 quòd eadem natura diuerſas habet functiones iuxta diuerſa obiecta: ſu-
 perflua enim expellit, utilia attrahit: igitur etiam aliam habebit opera-
 tionem ſpecie diſtinctam circa expellendum humorem, & circa eum quo
 uult nutriri. Alia ratio eſt, quòd ſequeretur, quòd puris color, quando eſt
 abſolutum, eſſet diuerſum pro natura membri, & nō ſemper album. Op-
 poſitum dixit Galenus 1. Prognosticorum, ultimo: & omnes cōcedunt: ſe-
 quelam deduco, nam natura per te intendit illud aſſimilare naturæ mem-
 bri. Sunt autem membra omnia diuerſorum colorum, uelut iecur eſt ru-
 brum, igitur fanies in eo rubra eſſet laudabilis. Diceret ad hoc, quòd con-
 coctio fit à membris quæ ex ſemine ortum habuerunt: omnia uerò illa
 candida ſunt. Sed hoc eſt falſum, nam uenę ſunt rubræ, & propter hoc ſan-
 guinem generant rubrum. & certe quomodo ſi iecur concoquendo deal-
 bat, in rubrum tranſmutat ſanguinem. & Galenus 1. Virtutum natu-
 raliū (ut diximus) cap. 10. docuit, quòd oportet nutrimentum tranſmu-
 tari ſecundum colorem eius quod nutrire debet. Palàm etiam eſt, car-
 nem exteriorem eſſe rubram, & maximè muſculorum: & tamen ſuppu-
 ratio bona ſemper ex toto eſt alba. In oppoſitum uidentur uerba Galeni
 2. ſuper primum Epide. 44. cūm enim dixiſſet Hippocrates, Maturatio-
 nes excrementorum undiq; tempeſtiuæ, aut bonæ, & decretorii abſceſſus
 ſunt conſiderandi. Galenus declarans inquit, *πῦς γὰρ τις ἐστὶν ἢ πῦρ ἀφύ-
 σις ὁ πεπρωμένος τῷ νοσήματι*. Coctio enim quædam eſt eorum quæ præ-
 ter naturam, morbi maturatio. Subſequuntur autē. Hæc autem concoctio
 in coquentis ſubſtantiam deductio quædam eſt eius quod concoquitur.
 Ergo ubi corpus bene habet, cūmq; ei quod concoquitur, naturæ inter-
 cedit familiaritas cum concoquente, mutatio fit totius concoquendæ ma-
 teriæ, aut maxime eius partis, minimumq; ſuper eſt ſemicoctum. At uerò
 cūm præter naturam affecta fuerint, quod accidit, cūm à natura immu-
 tantis aliena fuerint, quod aſſimilatur paucum eſt, excrementum uerò ſe-
 micoctum multum. Et ut in ſanis corporibus excrementa, ſic etiam in
 ægris concoctionem indicabunt. Liquido igitur apparet, iuuantis humo-
 ris & nocentis unam eſſe coctionem à natura intentam, non ſolūm ratio-
 ne agentis caloris, ſed finis, qui eſt nutritio, & formæ, quæ inducitur, eſtq;
 aſſimilatio. 2. quoq; Aphor. 47. Quæ pus generat tranſmutatio, medium
 inter

inter putredinem, & nutritionem, modum obtinet: cum ab utroq; calore simul fiat, & naturali concoquente, & eo qui præter naturam est putrefaciente. Sed & in 8. de Medic. secundū locos, cap. 8. declarat iuxta medium, coctionem esse mutationē, qua aliquid in id quod nutritur, ex eo per continuam assimilationem transfertur. Declarat autem ibi eam esse, & uitiosorum, & bonorum humorum. Verū nullibi clarius quā in 5. de Simplic. medic. cap. 6. uerba illius sunt hæc: Etenim cum tres in animalū corpore mutationes sint: una planē secundum naturam, cum cibus in uentre concoquitur, aut in uisceribus, unde succus fit, ex quo unaquæq; pars nutritur. Altera planē præter naturam, in omnibus putrescentibus: & hæc inuicem contrariæ sunt. Tertia mista & media, naturalis ac eius contrariæ particeps. Siquidem mutationi secundum naturam duo hæc insunt, ut à calore naturali superetur quod mutatur, & ut familiare corpori euadat: ei uerò quæ præter naturam fit, mutatio fit ab aliena caliditate, & ad nihil utilis. Media uerò earum quæ suppurationes comitatur, ab ingenito fit calore, non tamen planē dominante, & in materia non prorsus benigna, neq; tamen omnino aliena. itaq; ut naturales mutationes à simili calore foris admoto iuuantur, sic & suppurationes. Quare coctiones mirum in modum adiuuant puelli, tum etiam catuli admoti uentri: confert enim fomentis uberius hoc, quoniam illorum calor fomenti calore nobis est familiarior. Quapropter quod ad mouēdum pus adhibebitur medicamentum, natiuo calori similē habere debet. At uerò quale illud? cum febrium, ut diximus, & phlegmonum penitus, quod ad hoc attinet, ratio una sit, tum in sputis, 1. de Crisi 18. iuxta finem. & 2. Prognosticorum 46. & 4. Regim. acut. 77. & 78. declarat in eodem libro textu 44. dicens: Corpus quieti permittere, ungere, & æqualiter contegere oportet. Vbi Galenus inquit: Coctio nuncupatur nutrituræ substantiæ permutatio, secundum qualitatem existens. Natura igitur assumpto deuoratoq; alimento, à cæteris quidem motionibus cessare debet, ut soli uacet coctioni: sed si aliquando imbecillior reddita fuerit, aliquo externo indiget auxilio: quo etiam modo, & in ea quæ in uenis elaboratur coctione, eo opus erit. Cum uerò in 47. textu Hippocrates posuisset laborantē febre graui & implacida sub initio morbi ac materiæ cruditate, coctionem docens illius, inquit: Iacere autem in conclauī obscuro debent, & lecto ualde molli, diuq; habitum eum sustinere, nec iactare sese, id enim eos multum iuuat. Hypochondriū autem lini semine illines, ex aqua & oleo decocto, ac tepido, cauens ne refrigeretur. Ergo gloria dignus est Villanouanus huius tam pulchri præcepti inuentor: cuiq; enim sua laus reddenda est, etiam ignoto & uiuenti, qualem ego opto esse: nam hominem non noui. Subiiciendæ autem sunt & rationes illius: sed prius, tanquā in clara iam re, referam quæ ex his deducuntur

tur duo præcepta nobilissima. Primum concoctio morbi iis eisdemmet fit auxiliis, quibus cibi coctio adiuuatur: quiete, molli strato, iunctione, leni pedum frictione, somno, obscuro loco, balneo, cibis calidis boniq; succi, uinoq; cum citra quatuor exceptiones exhiberi potest, licebit & singulari loco cerata apponere. Secundum autem est, quod ex hoc manifestum fit, cur adeo uictus tenuis febribus conferat, nempe materia concoquitur à membris necessario deficiente alimento ut nutriatur, quamobrem & breuissimus morbus euadit, & iudicium tutissimum. Quocirca ratio prima confurgit, Galenus enim 1. A phor. 22. & 4. etiam A phorism. 22. uult tria à natura fieri: primò coctionem, secundo segregationem, tertio expulsiōem. Quorsum igitur segregatio impuri, si quod concoquitur totum in pus euaderet? Manifestum est igitur, operationem esse unam naturalis caloris, qua utile assumit in nutrimentum: inutile autem, cum in illud naturaliter agat, atque ideo etiam necessario, sibi quantum potest assimilans ad expulsiōem præparet: iam separatum, & ob qualitatem caloris alieni membris inimicum. Inde secunda ratio exoritur, nam 1. Prognosticorum ult. & 5. A phor. 39. & 3. de Naturalibus facultatibus, & 4. de Vsu partium, & 6. de Placitis Hippoc. & Platonis, membra sibi non aliis concoquunt non habentes ipsa prouidentiam, & si forsan architectus illorum habuerit ut in mamillis: igitur conantur etiam sibi assimilare quod concoquunt: & ideo necessario actio illa suppurationis est propter nutritionem, quamuis resistente alieno calore, magna pars ueram coctionem subterfugiat, & suppuretur. Alia ratio sumitur ex 5. de Simplicib. medic. cap. 8. tum etiam ex 14. de Arte curat. cap. 13. in horum altero præcipit, ut quod alienum est, omnino tollatur ex toto: quod autem inutile habet utili coniunctum, similibus foueatur: dicitq; si possemus phlegmoni manum perpetuò supertensam continere, breui ad suppurationem uenturum: quod fit, ut intelligamus, naturam utile quidem in omnibus semper ad se transferre: ibiq; agit de carniū contusione, expressioneq; indicans scilicet, partem succi in alimentum transire, partem ex toto corrumpi. Sed & si quis 12. Artis curat. mentem Galeni inspiciat, dum febris ab humoribus crudis tractat curationem, in cap. 3. facile intelliget, dum trium dierum inedia præcipit, eius humoris partem in alimentum corpori concoqui, partem autem in suppurationem ut expellatur.

Vltimum fundamentum huius opinionis sumitur ex similitudine auxiliorum, utriq; enim coctionis generi eadem præsidia ut in 4. de Tueda sanitate, cum de cura crudi humoris agit. Quin etiam 7. de Simplic. medic. cap. de croco, uim habere dicit concoctricem, quod calore sit temperato, modiceq; astringens, hoc coctioni cibi confert. Addit autem, quod

K emp

emplasticam habet naturam, hoc ad concoctionis partem suppuratoriam magis pertinet. Est enim uirtus emplastica 5. Artis cur. cap. 3. cum medicamentum crassitie partium cutis poros claudere potest.

Est autem aduertendum, ut colligitur in libro de Constitut. artis med. & in de Sanguinis missione, & 2. Facultatum naturalium, non tantum humorum, sed ciborum uitiata coctionem morbos facere. Fit autem coctio, ex 6. de Dogmate Platonis, & 2. Aphor. 7. ex solidorum uirtute, nutrimentum sibi adnitente assimilare. Per hæc ad argumenta: ad Philosophi autoritatem, quamuis accipiat Coctionem sub alio significato, nihilominus nihil plus uult, quam quod antequam humor syncerus euadat, natura operetur in eum per se: per accidens autem in partem quæ coctioni ueræ rebellis est: nam ferme, quamuis non semper, materia praua boni aliquid habet admixtum. Et hæc est causa, quod in tertianis & quartanis in initio accessionis apparent spontanæ expurgationes: quia humor ille iam est separatus. Dico, igitur, quod calor agit in humorem corruptum, sed non per se: uerum ut agat in utilem. Quod uero Philosophus accipiat alio modo Coctionis nomen, patet: quia distinxit eam in tria 6. Maturationem, Assationem, & Elixationem, quare longe generalius capit quam Galenus. Si quis autem roget, sub quo genere contineatur hæc coctio? Respondet Philosophus ibi in sectione 19. commentatoris, quod sub maturatione, Villanouanus tamē paululum à nostra responsione, ac opinione declinat.

Ad argumenta nostra, ad primum respondeo, quod in principaliter intentis uarietas obiectorum facit uarietatem uirtutum & actionum, ut de cibo & excremento. Sed quia, ut dixi, natura hic non agit, nisi ut operetur inutile, non fuit necessaria alia uirtus. Ad secundum dico, quod Galenus respondet 1. Prognosticorum ult. quod hoc accidit, quia uirtus concoctrix est in membris seminalibus, quæ sunt alba: & dat exemplum de femine, quod & ipsum album est. Sed exemplum primò est dubium, ut uidebitur suo loco: quia semen candidum fit ab alba carne testium. Secundò, quia membra seminalia plerunque sunt frigida, ut os, cartilago, membranæ, nerui, & nervosa: & non uidetur quomodo melius & ualidius concoquant carne ipsa, quæ est calida. Sed admittatur. Quomodo igitur iecur non dealbatur, si nutritur ex alimento albo? Forssitan dicere oportebit quod duo calores contrarii uincente naturali, efficiunt colorem album: sicut calor cum humido facit omnes plantas in foliis uirides, iuxta Philosophi sententiam, in libro de Coloribus. Et hoc est uerisimilius: quia quando ulcus in carne sanatur post sanicem albam, uidemus uincente calore naturali, humorem rubescere: igitur causa candoris est potius calor non naturalis. Et cum conatus fueris hic tueri Galenum, uidebis innumeras
diffic

difficultates: nisi illius uerba sic interpretēris, quòd membrorum seminalium uis etiam iuuat ad candorem: nam præter reliqua, illud est manifestissimum, quòd sanguis etiam extra effusus, putrescensq; dealbatur: quare illa erit causa coadiuuans non principalis.

C O N T R A D I C T I O X I I I.

Concoctio omnis an condenset.

QUæ uerò concoquuntur, ut crassiora & calidiora euadant, necesse est. Nam ei quod concoquitur ampliorem molem calor tribuit, & crassius illud, aridiusq; reddit, 4. Meteororum 18. Hic Philosophus reddit in his uerbis rationem dicti: nam calor resoluit subtiliores & humidiores partes, igitur exiccat & condensat. Additur & peculiaris ratio à Conciliatore, differentia 50. dum hanc tractaret quæstionem: quæ nõ tenet de omni coctione, sed solum de ea, quæ ordinatur ad nutritionem: nam omne quod mouetur, est partim in termino à quo, & partim in termino ad quem, 5. Physicorum 65. in textu. At nutritio & coctio sunt quidam motus, 5. Physicorum 7. Relinquitur igitur, cum hæc mutatio fiat ex humore in membrum, & membrum sit crassioris substantiæ quàm humor, ut humor ille perpetuò condensetur, accedens ad naturam membri. Alia ratio eius, quòd ordinata in finem aliquem naturam recipiunt eius in quod ordinantur, 2. Physi. 23. sed coctio ordinatur in restaurationem solidorum, & possent reduci ad unum fundamentum. addo ego utile pro medicis, quauis singulare: nisi ita esset, homines ex quacūq; febre in hecticam incidere. quia si attenuaretur humor in coctione, nõ est causa cur in febribus putridis, ros ille non supercalefiat, & omnis humor ad nutritionem paratus: & sic ut illico contabescat patiens. Galenus quoq; 4. Regim. acut. 4. exponens ea uerba, LIQUIDAE DEIECTIONES, inquit, Coctio omnis cogit & condensat. & 4. de Locis cap. 8. post principium, In pulmonis affectibus initio tenuia, ubi coctum fuerit crassa expuuntur. Idem in 5. cap. 7. pag. penult. capituli: Nam omni parte inflammata cui crassum tegmen non incumbit, in primis quidem sanies tenuis defluit, quæ concocta deinde inflammatione crassior, & puri similior redditur. Neq; uerò aliud magis in libello de totius morbi temporibus edocet, quàm hoc, in febribus, ulceribus, tumoribusq; , quam quòd ab initio tenuia apparent succedente tempore dum concoquuntur crassiora euadunt. Ad oppositum est autoritas Galeni 5. de Simplicib. medic. cap. 12. Nitrum, & aphronitrum, & abrotanum, ac talia, uirtutem habent extenuandi crassos ac lentos humores, præparandiq; ad expulsionem. Et in de Attenuante uictu, cap. 12. de odoratis, calidis, crassis, dulcibusq; uinis sermonem habens, inquit: Non enim incidenda tantum sunt, aut calefacienda, quæ spuito sunt expurgan-

da, sed moderatè etiam humectanda, ne siccata ac lenta reddita sputa, tussis excitent, exitusq; uiolentia, uas aliquod in rùptionis discrimen adducatur. Quamobrem quæ uina sunt crassa & dulcia, propterea quòd humorem habent crassum. & ob id ipsum perdurantem, in thoracis pulmonumq; affectibus, si cum tenuantibus medicamentis adhibeantur, multum adferent commodi. Aëtius quoque lib. 5. cap. 29. ordinem hunc urinarum ostendit: In subtilibus primo nebula suprema, pòst in medio, pòst hypostasis apparet. At ubi morbus ex crassis humoribus processerit, initio in urina apparet sedimen, ex quo multi coctionem, quæ nondum peracta est, peractam esse putant: pòst encephema: ultimò nebula suprema. Hic igitur duo coctionis ordines fiunt manifesti, quorum primus fit per condensationem, secundus autem procedit attenuando. Arabes etiam omnes coctionem attenuantem admittunt, de condensante uerò sunt discordes, ut prima quarti trac. 2. cap. 7. iuxta medium. Sed & rationes multæ istud suadent. Prima est, & à Conciliatore adducitur, excrementa naturam ostendunt eorum, à quibus deciduntur. 2. Artis medicæ 74. At superfluum tertiæ concoctionis est sudor, uel halitus, ac uapor: secundæ autem urina: primæ feces: igitur concoctio non solum noxii, sed & iuuatiui attenuando procedit. Ad hoc dat duas responsiones: prima solum habet uerba: sed secunda innititur huic, quòd ubi fit secretio, illa fit ad opposita, à subtilibus crassa, à crassis subtilia refecantur: nam aliter talia relinqui non possent. Responsio hæc non uidetur satisfacere: debet enim halitus ille habere aliquid proportionale cum nutrimento ultimo: igitur impossibile est ut sit adeo crassum ut primum quod concoquitur. Item 2. Aphor. 9. Crassa debent attenuari & incidi: quare concoctio sic procedet. Forsan dices, quòd hæc est præparatio, ut inquit Villanouanus: contrà si coctio condensat & hæc est necessaria, quia crudi humores, & præparatio attenuat, igitur humor idem simul attenuatur & condensatur. Per idem oppugnatur expositio quam dat literæ Aëtii, quòd intelligat de coctione cum præparatione coniuncta, nam non obscurum est quòd sic idem humor, & ab eodem agente naturali calore, & eodem modo, condensabitur & attenuabitur. Item in generatione spirituum fit coctio, & attenuatio, aliter non essent subtilissima nostri corporis pars. Adduco etiam rationes eius in oppositum: nam coctio quæ fit in uentriculo est similis elixationi: in elixatione quod coquitur subtilius euadit: indicium est leuitas, & quòd facilius superatur à calore naturali, & quòd mollius est. Calor etiam quamuis resoluat humidum, tamen rarefacit quod densum est: unde uidemus, quòd æs diutius coctum euadit porosum & leue: unde etiam primo de Medicamentis secundum genera, cap. 5. iuxta principium. spuma argenti, crassitiem amisit ex ignis uirib

uiribus. Ad quid etiam damnauit Hippocrates & Galenus 2. Prognosticorum 46. crassa sputa & humores, si crassities est ipsa concoctio: Galenus etiam in de Constat. artis medic. cap. 19. curatio quidem omnis per contraria, crassa attenuando, tenuia incrassando, utraq; communiter concoquendo. Cum etiam bubula caro concoquitur ipsa attenuatur necessario, cum sit crassior humana carne, & condensatur, & sic simul duo contraria efficiuntur ab eodem calore in idem subiectum. Sequitur etiam secundum ipsum, cum extenuatio sit opus expultricis, ut concoctrix ab extenuationis munere liberaretur, quod ante concoctionem crassi cibi necessario expultrix operabitur, quod nunquam Galenus dixit, oporteret etiam ut humor non pręparatus ante pręparationem expelleretur: sed quia hoc incidit in opinionem de uirtute discretiua, quoquomodo ab Auerroë posita relinquatur. Oua etiam apala (3. de Alimentis cap. 22.) celerrime nutriuntur, uel igitur quod concoquitur ad crassissimam substantiam oportet reduci, & sic tenuissima, ut uinum, & oua, tardè concoquentur, contra Gal. 3. de Temperamētis, cap. 2. in initio: uel ad mediocrem consistentiam, & sic quęcunq; erunt crassiora, ea consistentia, attenuatione indigebunt. Item in attenuatione, uel sit comminutio partium, & sic non differt ab incisione, nec est uera attenuatio substantię, nec sunt duo, sed unum, Attenuare, & Diuidere: nam auri limatura aurum est. Vel est uera attenuatio substantię: igitur cum reducetur ad mediū, erit humor uel cibus concoctus. Ad quid enim uerè attenuare ut iterū incrassescat? Mirum autem esset, quod Galenus hoc alicubi non dixisset.

Pro hac contradictione sciendum est, quod concoctio omnis condensat iuxta Galenum, & iuxta etiam Aristotelem. Verum scire oportet, duo esse quę circa materiam transmutandam considerantur, Pręparationem, de qua loquitur 2. Aphor. 9. & 1. Aphor. 24. & quod sint distincta patet, quia sperat Galenus in secundo loco adducto prima uel secunda die pręparare corpus. Concoctio autem fit à natura, ut declarauimus, & iuxta ordinem indicatoriorum dierum, ut 1. de Crisi, per longum processum docetur. In pręparatione autem continentur, (ut à Galeno in dictis Aphorismis, & alibi) condensatio eorum quę sparsa sunt, diuisio tenacium, attenuatio crassorum, contemperantia immodicę qualitatis, obstructionum apertio, leuitas alui. Auer. 7. Collect. cap. 9. quasi hanc rationem intellexit: dixit enim: Duplex est pręparatio, una ab arte, & procedit attenuando: alia à natura, & hæc reducit humores ad substantiā mediocrem. Et quantum alia addat, nunc illa prætermittenda sunt: nam Arabes ignorauerunt quid esset concoctio, & confuderunt concoctionem cum pręparatione: inde orti innumeri errores, in quibus omnes caligarunt, (præter Villanouanum) tam antiqui, quàm recentiores, ut ex illorum scriptis pa-

ter, Et hoc est, quia etiam ipse Galenus, ubi rem non ex composito, sed obiter tractat, aliquando hæc confundit nomina. Nos tamen ubiq; hic & in his quæ edemus, proprietatem nominum ipforum seruabimur, seruauimusq;. Cum igitur Concoctionem dico, intelligo caloris naturalis opus in materiam duplex: aut qua nutriri potest ut nutriatur, & assimiletur, & fit condensando: aut in materiam ex qua nutriri non potest; & hoc est diuersum pro diuersitate illius, & non intentum à natura: nam merito talis humoris natura solum expulsionem intendit & tentat. Cum autem dico Præparationem, intelligo quæ dicta sunt.

Propter tamen argumentum unum, quod tactum est, quod natura simul attenuaret & condensaret, dicitur, quod de mente Galeni humores crassi prius attenuantur, deinde cōcoquantur. Galenus etenim 4. de Tuenda sanitate, cap. 8. cum docuisset, crudis humoribus dominantibus, præfidiis primo uti dissecantibus, oximelite inquam: post attenuantibus, mulso diaspolitico, & eo quod ex tribus constat piperibus: tandem iuxta finem inquit: Quod si crudos iam succos attenuatos speras, uinum dabis quod & substantia tenue sit, & colore fuluū, aut album. Hoc enim ad succi bonitatem & concoctionem facit: illud urinam mouet. In fine etiam cap. 9. inquit: Si enim in primis uenis crudi succi copia est, dissecandus nobis est, ac concoquendus est. Vbi tres scopos Galenus docet animaduertere sibi inuicem succedentes: Attenuationem cum dissectione, Concoctionem, & Diffusionem, de qua mox loquitur. In 12. etiam Artis cur. cap. 3. cum ægrum ex crudis laborantem humoribus iuxta finem cap. per septem dies attenuante nictu tenuisset, in 4. cap. de concoctione agit per uini exhibitionem, tum de digestionem: neq; enim uinum solius syncopis causa commemorat. Sed & horum ratione, ut in fine capitis, animaduertere licet. Sed si quis obiciat, igitur superfluit dissectio. Animaduertendum est, attenuationem illam in crasis fieri humoribus, dissoluto eo quod erat per frigus congelatum. Est igitur Attenuatio illa colliquatio quædam, non uera tenuitas: nam si concoctio condensat, humores omnes crudi substantia sunt tenuiores quàm par sit, sensu uerò crassiores: cum à calore non sint colliquati. Ex his ad Galeni auctoritates non obscurum est quid dicendum sit, præparationem enim docet. Aëtius præsupponit medicum decipi: nam illa non est uera hypostasis, sed crudus humor: de quo 7. Aphor. 31. ubi agit de sedimine farinæ simili. Differt autem ab hypostasi in tribus: Primò, quia urinam tingit albedine sua: Secundò, quod est solutum, & imum petit, non pineæ figuram aut coni seruans: Tertiò, quia multum est, & copiosius hypostasi, 1. de Crisi 12. iuxta medium. Ad argumentum Conciliatoris: natura separat inutile ab utili: nec ualet, Quod concoquitur crassius fit, igitur concoctum crassius est, eo quod concoquebatur; miscentur enim duæ

duæ operationes: altera qua segregatur inutile, quod aliquando crassius est, aliquando tenuius, & coctio ipsa: concoctum igitur semper est crassius eo quod concoquitur, non eo quod dissolutum est: nam non est crassior sanguis hominis bubula carne. Quæ igitur refecantur excrementa à tenuioribus partibus tenuiora euadunt: nam sanguis tenuior est cibo, non tamen humidum membri sanguini, quia licet per coctionem crassescant, attamen per separationem crassioris excrementi attenuantur. Contrà, quia si urina est tenuior sanguine, igitur humidum quod gignitur erit crassius sanguine? Respondeo, quòd hoc uerum est: nam si quod refecatur tenuius, quod concoquitur duplici ratione crassius euadit: & ratione excrementi, & ratione coctionis. si autem excrementum crassius est, tunc tenuius potest fieri quod concoquitur, cum per concoctionem solam crassescat, per separationem autem attenuetur. Sed quomodo posito humido membri ut est crassiore quàm sanguis excrementum, tamen est tenuius urina cum utrinq; excrementum sit eodem modo se habens ad id, cuius est excrementum, scilicet tenuius parte à qua fecernitur? Respondeo, quòd halitus & sudor non sunt excrementa tertie coctionis: sed ex Galeno in libro de Vsu respirationis, hæc per arterias, maximè halitus, expelluntur & à corde. Excrementa autem tertie coctionis sunt pili & res quæ hæret cuti quasi terra, & sudor uiscidus, quæ omnia sunt crassiora quàm urina. Ad id de spiritu, fit ex aëre & spuma sanguinis, & sic fit per condensatio- nem etiam. Sed de hoc alias. Cætera nota sunt per se, præter id quod de ouo adducitur. Respondeo igitur ad hoc argumentum nostrum, quòd crassities nutrientis nō est certa. ideo dicebat Galenus, quòd uinum nutrit spiritus: & sic oua sanguinem subtilem quia unumquodq; nutriens conden- satur proportionē suæ substantiæ & non ad certam metam: aliter ar- gumentum concluderēt. Et si dicas, igitur membra non nutriuntur: dico, quòd ex crassiore parte & parū. Vel dic, quòd oua & uinum ex parte per- mutationis longiore indigent tempore, puta quàm caro auicularum & panis, tamen quia carent excrementis, non indigent separatione, ideoq; longe celerius nutriunt: attamē quia paucam habent substantiā crassam membra solida tabescunt, ideoq; uitam breuem copiose sumpta reddunt.

C O N T R A D I C T I O X I I I I .

Syrupi an concoquant, & an sincerus humor concoqui possit.

AN syrapi conueniant dubitatum est in morbis: hoc autem potissi- mum propter frigidos, nam calidi proculdubio concoctionem iu- uant: de frigidis autem est autoritas omnium primo Arabum, Auicennæ, Rasis, Auenzoar, Auerrois, Haliabbatis, Serapionis. Alexander etiam lib. 1. cap. 16. inquit: Ad humorem biliosum subigendum & concoquen- dum,

dum, conueniunt aëopa lauacra, & cibi humectantes, & unctiones. Sumpta hæc omnia ex 2. de Medic. secundum locos, cap. 11. Verum hic iacet difficultas, An humores alii à sanguine & pituita coctionem recipiant: nam si recipiunt, commode syrupi exhibentur: si non, non eius causa: nam ad refrigerandum membra poterunt exhiberi. Galenus igitur in de Constitutione artis medicæ, cap. 16. atram bilem ægrè concoqui affirmat, igitur hic humor coctionem recipit. Libro etiam cui titulus est, Quos & quando purgare oporteat, iuxta medium, In tenacibus humoribus, quales sunt pituita, & atra bilis, concoctionem expectabis. & Aëtius eadem uerba refert libro 3. cap. 23. Galenus etiam declarat lib. de Atra bile, & in de Vsu partium, atram bilem, & bilem membra nutrire: igitur & cōcoqui poterunt. Sic dantur etiam genera diuersa bilis flauæ, rubræ, uicidissatq; ita diuersam suscipit pro coctione naturam: quamuis inepta nutritioni. Sequeretur etiam, quod urinæ in processu coctionem non reciperent: cuius oppositum habetur in primo de Crisi. Sequeretur etiam, quod illico febricitantes expurgare conueniret. nunc loquor de laborantibus biliosa febre, quod est contra Hippocratē, 1. Aphor. 22. & Galenum in libro, Quos & quando purgare oporteat, post medium. Patet sequela: nam ad quid expectanda coctio quæ fieri nequit? Si dicas, posse præparariam docui, eam præparationem longe celerius perfici, quàm ut expectetur morbi status. Si dicas, aliquid esse permixtum, quod possit concoqui: igitur urinæ uel sunt crudæ ratione admixti, & sic non ratione morbi, sed rei non pertinentis ad morbum: si ratione peccantis bilis, igitur illa est cruda, demum concoquitur. Sequeretur igitur, quod habentes aliquem humorem crudum in corpore, haberent crudas urinas, ut in febrium initio: quod contradicit sensui 2. etiam Regim. acut. 44. ubi Hippocrates biliosa cruda appellat, Galen. in Commento hæc habet: Nempe biliosa cruda ita appellauit, quoniam & excrementorum coctionem uocat, quanquam mutata nutrire non possunt, ut bilis utraque, & qui Græce *ἰχθυὸς* dicuntur. Verum tamen quoniā & talia euincit natura. Cocta uocare consuevit Hippocrates huiusmodi excrementa, quæ à natura euiecta sunt, Cruda uerò, quæ euiecta non sunt: ob id & pus in phlegmone quod concoquitur fieri ait, quanquam pars nulla ex pure accipiat alimoniam, ueluti facit ex crudis dictis humoribus, ac pituita: quæ reliquum coctionis ac perfectionis assecuta, corpus ualent enutrire. sic igitur bilioforum humorum concoctio est, ut sanguinis in phlegmone in pus migrantis: intelligentibus quidem nobis, nomen coctionis in suo uniuersaliore significato. est autem hoc, cum natura ualidior causis, eas permutauerit robore suo. Quæ igitur in corpore anima carente putrescunt, nihil ad permutationem conferente calore innato, à concoctionis ratione degenerant. Hoc sanè serosæ urin

urinarum materiæ contingit: atq; ob id crudas urinas concoqui dicimus, quanquam corpus ex urinis coctis ali non possit. Generali etiam hoc concoctionis significato utimur, cum catarrhum, coryzam uel ex oculis fluentes humores crudos coctos uel esse dicimus. Ad hunc modum bilem crudam *ἡ κίτρινη*, id est uel incoctam, aut coctam esse pronuntiamus. Cruda quidem flaua admodum est, & acris, & male olens: cocta autem pallidior, minimeq; male olens. hæc Galenus: ubi humoris etiam præter naturam coctionem, sed alterius generis admittit. Ad hæc sic Galenum interpretatur Villanouanus, ut coctam bilem intelligat, cum à natura euicta nec euagari, nec in deterius uerti finitur, sic ut illius prauitati resistens membrum lædere non sinat: adducitque Galenum 1. de Crifi 5. ante medium, dicentem: Sputa subflaua, subruffaque, cruda, sed non mala: rotunda, uiridia, uel nigra mala: quæ uerò flaua permixta, facileq; expuuntur concocta. Itaque quod sic crudum est, uel ad deterius uergere potest, nec tunc concoqui dicitur: uel in suo statu retineri, & sic Concoctum uocatur. Sed nec illi auctoritati, nec huic satisficit: nanque in prima auctoritate crudam bilem flauam, coctam uocat pallidam, ut sic necessariò permutetur. Prima male olet, secunda minime. Sed hoc clarius in secunda auctoritate: nam statuens ab initio subflauum sputum, duas in eo facit permutationes, alteram ad malum, & est ut flauum purum, uel uiride euadat: alteram ad salutem, & est ut flauum permixtum: igitur percoctionem subflauus color, in flauum permutatur. Vtrinq; igitur agit calor naturalis permutando colorem & substantiam, sed aliter aliterq;. Non abs re fuerit declarasse, quid intersit inter *ὑμόνη*, & *ἀνέκνη*, seu crudum & incoctum: nam utriusque Aristoteles meminit, tum Hippoc. 22. Aphor. primæ particulæ, tum Galenus in præcedenti scripta auctoritate. Crudum igitur ad primam refertur coctionem, quæ in uentriculo celebratur. Incoctum autem quod quoquomodo male coctum est, aut deprauatum, ut in de Symptom. differentiis: & 3. de Symptom. causis: & 8. Methodi: & Aëtius lib. 9. cap. 24. Sed de crudo agit maxime per totum quartum librum de Tuenda sanitate. & est eius species uitreus uocatus humor à Praxagora 2. de Differentiis febrium cap. 6.

Sed in oppositam partem facere uidentur uerba Gal. 4. de Tuenda sanitate, cap. 4. ibi: Quod igitur omnino alienum est expellere, tentandum, quia nulla ratione fieri potest, ut naturæ gratiam recipiat. Et rursus cap. 7. cum dixit: Quoniam ergo duo prima sunt, crudorum seu etiam semicoctorum qui ante sanguinis perfectionem fuerunt, percoctio, & acrium ac mordacium, qui sanguine sunt posteriores, eductio: non igitur ulla concoctio uel uera uel ficta in his est expectanda. Adducitur & sententia ex 2. Regim. acut. 30. sed ea parum facit, cum de uera coctione lo-

L quatur

quatur. Quòd si dicas & bilem, & atram bilem nutrire: Fateor, inquam: sed Gall. lib. de Atra. bile, cap. 7. huius reddidit differentiam: nam excrementitia haud nutrit, quæ uerò adhuc sanguini permixta est, nutrit. Hic igitur Galeno de excrementitia est sermo. Eodem modo autoritas in de Constitutione artis med. cap. 19. nos non offendit: cum acidam in nutrimentum adhuc redigi posse affirmet: nam subiungit: Dulcis uerò etiam facilius concoquitur. Quod uero etiam Philosophum pro se adducat ex 4. Meteororum, non uideo: nam in 3. cap. de uera maturatione & coctione loquitur: in secundo autem de secundo coctionis genere, quo fatetur etiam humorem in lippitudinibus concoqui: quare uel aduersatur Villanouano, uel nihilo pro eo habet. Adducitur & autoritas ex 2. de Differentiis feb. cap. 6. iam alias inducta, ubi Galenus docet uitiosissimo humori, nullam etiam ualidis mediocriter uiribus, utilem permutationem accedere, sed ex uno in alterum prauitatis genus transire, atque corrumpere. Sic & ex 9. Artis curatiuæ cap. 5. post medium: & in 11. libro cap. 9. Quod utile est, aut semiputre, concoquit natura, ac trahit: quod uerò inutile, prorsus expellit. Addit etiam rationes, ne quicquam desit, Villanouanus: Prima, quòd ex secundo super primum Epidem. 44. cum in morbis uelut alimentis modò plurima pars transeat ad nutritionem, modò pauca igitur, ubi nulla prorsus, oportebit naturam id expellere, nihil morantem: nam cessat finis causa in prorsus inuiti, qui est nutritio, igitur & actio. In scyrrho quoque & puro erisipelate, Galenus non applicat concoquentia 14. Artis cur. 13. sed iubet excindi ea & amoliri, igitur & in sincero humore. Accedit, quòd concoquens sui causa non solum concoquit, sed etiam familiaritatem habere debet cum eo quod cōcoquitur, 4. de Tuenda sanita. cap. 4. talis uerò humor non habet cum membro familiaritatem. Rursus ex ordine, declaratum est enim 4. Aphor. 22. & etiam 1. Aphor. 22. quòd prius humor concoquitur, deinde separatur: sed syncerus iam est separatus, igitur concoqui non debet. Concoctio etiam ex habitis incrassat, igitur ad expulsionem humorem reddit ineptiorem. In arcuato etiam morbo qui etiam à pituita fieri potest 6. de Simp. medi. cap. de attriplice, non debemus concoquere quando à bile, sed tantum extenuare, incidere, postmodum purgare: Aëtius libro 19. cap. 18. & 1. de Humana natura 29. & 5. de Locis affectis cap. 2. iuxta extremum finem. cum etiam multos hoc modo curatos iacet in aſcite etiam ac tympanite non quærimus coctionem, quia nihil ibi utile: igitur nec in sincero inuiti alio humore. Ex hoc infertur oppositum primi quæſiti: nam syrupi cum dentur concoquendi talem humorem gratia, impediunt naturam, & morantur, nec proderunt concoquere non potentes.

Pro solutione animaduertenda est distinctio data à Galeno de duplici coctione

coctione, 2. Regim. acutorum 44. & si quis dicat, Hoc iam contradicit determinatis in præcedenti contradictione: Respondeo, Non: quia natura primam tantum intendit: prima impedita, fit secunda non intenta a natura. Sicut natura intendit tantum asinum in generatione muli, loquendo de natura quæ est in semine asini, & tamen generat mulum ex materie resistentia. Secunda est distinctio habita 2. de Differentiis februm, cap. 6. coctio habet diuersum successum uel ob uirium imbecillitatem, uel ob humoris præuitatem. Tertia, aliud est opus naturæ, aliud est opus medici. Quarta, alia est ratio putrescentis humoris, alia naturalis. His intellectis syncerus humor nunquam debet concoqui, nisi fuerit putrescens, uel ex pituitæ genere. Patet ex autoritatibus adductis: & etiam ratione illa quod iam separatus ideoque excrementitius, & ideo propter hoc, & quia loquitur de opere medici 4. de Tuenda sanitate, in duobus locis, medicus non debet moliri coctionem, sed expellere: quod si remoretur, fit perpetuo deterior: nam calor agit necessario, quia est agens naturale: & non concoquendo, igitur adurendo. Et hæc est causa quod Princeps administrabat syrupum cum fumo terræ etiam in febre de pituita in fine: quia calor adurit semper: est enim agens non ab electione. in 2. autem Regim. acut. præsupponit alterum duorum, uel quod materia cruda sit, & tamen mala, uel quod non sit excrementitia: in primo genere est cum praua pituita bili admiscetur: ideo etiam subflaua sputa apparent in morbis pectoris, & tunc cruda sunt, ut 1. de Crisi 5. Concocta autem non bili, sed illi iuncta pituita, euadunt flaua, in hac etiam actione bilis etiam patitur, & ideo si diutius tardetur uiridis fit, aut nigra: & propter hoc facilitatem sputi commendat Hippocrates ne moretur. Eadem ratio, quæcumque iam cocta moram trahunt, agunt hominem in perniciem: seu in febribus, seu in phlegmonibus. Porro non adeo uitiosus humor euincitur, ut si bilis nondum fuerit excrementitia, nititur enim natura concoquere, nam nutrire apta est, ut diximus. Vbi igitur syncera bilis sit, inedia enecat: quoniam aduritur magis, & uirtus debilior redditur, & circumiacens humor absimitur. Medici autem nostri temporis gratuito nos oderunt: cum plerique hæc ignorantes, fortuito ægris manus admoueant: omnes autem grauiter laborantes in eorum manibus interire necesse est: quoniam non possunt perfectam hanc rationem assequi, quæ omnino eos latuit: uix etiam me scribente intelligent, sanant autem solum leues morbos: sed & in his quàm plurimum uitæ adimunt: senescunt enim præpropere nimium, & breuem uitam nanciscuntur, qui hac prætermissa ratione uel non intellecta, curantur. Si enim humor iam sit syncerus, nec nutriantur, celeriter moriuntur in grauib. morbis, ut etiam eadem die in leuib. autem humidum naturale membrorum absimitur. At si nondum syncero nutriantur, mor-

bus profertur in immensum: atque sic ex grauibz omnino moriuntur, ex leuibz contabescunt membris solidis: uerum quanto difficilius est postmodum opere ipso hæc agnoscere. Sed syruporum utilitas multiplex quidem est: calidi enim concoquere etiam præter cætera possunt: at frigidis ac calidis, commune est primo præparare materiam aperiendo incidendo corrigendoq; malas tum humorum tum membrorum temperaturas. prohibent etiam ne bilis illa praua aut deterior euadat, aut depascatur quæ integra sunt. In multis igitur commoda est illorum exhibitio, etiam si non concoquere queant. Villanouanus autem hoc secundum genus coctionis nimis audacter sustulit: nam syncerus solū, ac immodicè siccus, hic est excrementitius, concoqui nullo modo potest. Medici autem nō est, ut cum febris non adest, quærat concoctionem etiam in non extremē- titio, sed solam præparationem: quia perfecte illum agnoscere non potest: estq; maius longe periculum in mora, quàm in inuitili euacuatione: quod iam declarabo, illud solum admonens, in febribz prius, concoctionem morbi & urinarum semper esse expectandam, antequam euacuemus, tum etiam præparationem materiæ. Causa uerò cur urina sit cruda in initio morborum triplex est: naturæ perturbatio ut cibus non intendat: humor in uenis crudus existens, prohibens transitum bilis ad urinam: tum mala qualitas ex humore uenis ipsis impressa, 1. de Crisi, cap. 7. & 12. post initia. Cōcoctam uerò qualis esse debeat urinam declarauit Hippoc. 2. Prognosticorum 26. cum dixit: Urina optima est, si candidum sedimentum fuerit, leueq; & æquale per omne tempus, dum morbus iudicetur. Subiūxit Galenus in commento, ut sit colore crocea, mediaq; inter tenuem & corpulentam qualis est iumentorum, adducta autoritas in lib. Quos & quando, de præparatione materiæ non de coctione intelligenda est.

CONTRADICTION XV.

Materia turgens an mobilis: & an tota, & ex initio expurganda.

Multa sanè tum hîc tum in sequēti Contradictione nec non in præcedentibus dicenda à me fuissent: sed cum pleniorē tractatum cui titulus est, de Purgationibus, conscripserim, nec soleam quicquam ex instituto meo repetere, ob id lectorem ut diligentem habeat de singulis tractationem, ad illum remitto: neque enim eorum quæ ad hoc spectant, hîc tanquam fundamētis per epilogum absque demonstratione recitatis, quicquam prætermisimus. Igitur de turgente materia cum iam dixisset in 1. Aphor. 22. quod turgentes humores qui mouentur & titillant, oportet purgare, ne ægrum molestant: & quia transfluunt: sunt enim purgationi apti, 4. etiam Aphor. 10. dixerat ab initio purgandum esse prius quàm febris accendatur, uel robur uirium exoluatur, aut humores in
aliquod

aliquod membrum principale decumbant. Hæ rationes uidentur generales esse & ratione materiæ, cum semper sit periculum ne in membrum aliquod nobile influant:& ni tota eradicetur materia, idem manet periculum. Per hoc etiam quod dixit, medicari in ualde acutis: significauit, in turgente materia haud esse mittendum sanguinem, sed semper purgandum: quod & innuit 2. Aphor. 29. nam materia quieta existēte, iubet sanguinem mitti: turgente, purgari. Idem etiam in libro, Quos & quando purgare oporteat, iuxta finem: Humores qui sunt in motu uehementi permutanturq; de loco ad locum, educere expedit, dum sunt in fluxu positi. in 1. etiā de Crisi 9. reddit rationē, cur expediat tunc expurgare, dicens Motum humorū, uim medicamenti iuuare. Idem dicit 8. de Medicamentis secundum locos, cap. 3. in hiera Thermissonis. Sed tamen in 24. primæ particulæ A phor. quinq; numerat exceptiones, quibus non licet purgare ab initio, etiam turgente materia: & sunt ciborum crassorum ingluuiēs, crudi humores in corpore, obstructio magna quæ ex tensione habetur hypochondriorum, uehemens illorum etiam caliditas, & phlegmon. Quod etiam nō tota debeat eradicari patet Aphor. 29. particulæ 2. Aphor. Cum enim dixisset, quod ab initio, si materia quieta est, sanguis auferatur: si autem turget, expurgetur, inquit, ut postmodum melius ualeat residuum materiæ natura concoquere: igitur non totam uult ab initio expurgatam esse. Princeps etiam ait, quod melius est infra subsistere, quàm exquisitis finē euacuare, 4. primi cap. 3. iuxta finē. Sed & in lib. cui titulus est, Quos & quando purgare oporteat, in acceptionibus per uomitum purgare docet: manifestum uerò est, non totam debere expurgari materiam: turget tamē. Quamobrem primò scire oportet, quænam sit turgēs materia: nam ex dictis tres conditiones continere uidetur: prima, ut sit in toto corpore uel in membro principali 4. Aphor. 10. Secunda, ut moueatur de membro ad membrum: neq; enim sufficit quod moueatur, & quod titillationem faciat, ac molestiam, 1. Aphor. 22. Tertia, ut nondum membrum aliquod occupauerit, nec firmam aliquam habeat inclinationem, 8. de Medicam. secundum locos, cap. 3. Princeps 4. primi cap. 3. & prima quarti, de cura februm in generali, addebat, quod ultra has tres conditiones, etiam multa esset. Dignoscitur autem turgens materia tribus modis: primò, cum fecerit initium phlegmonis, 4. Regim. acut. 76. Secundò, cum ad intestina repit purgationem faciens, 4. Regim. acutorum 64. Tertiò, si titillationem in diuersis locis faciat, ut dictum est 1. Aphor. 22. in omnibus his purgare expedit. Sed non uidetur dictum 4. Regim. acut. 76. concordare cum dicto 8. de Medic. secundum locos, cap. 3. cum iam uelit materiam, quæ incipit decumbere in membrum, esse turgentem. Respondeo ad id, & illud 2. Regim. acut. 11. cum purgat inchoante laterali morbo, non eam quæ iam

incipit locum obsidere, turgentem esse: sed solum reliquam, quæ adhuc in motu est. Sed cadit difficultas, quia 4. Aphor. 1. uidetur ultra mobilitatem, superabundantiam requirere, ad hoc ut turgentes humores dici mereantur. Respondeo, quod *πλεονάζοντες* & superabundantes omnes potest significare, & multitudine abundantes. Mihi uidetur, quod in primo significato melius intelligatur.

Quod igitur per turgentem materiam neq; Hippocrates, nec Galenus, nec Aëtius, nec Auicēna aut alius classicus uir ferre, excepto Rase, multam intellexerit, satis manifestum arbitror esse. Sunt tamen qui uelint legere Principis uerba disiunctim, turgens materia est, quæ uel est multa, uel mobilis. Sed hoc abest à literæ sensu, & à mente: à sensu quidem, quia coniunctione copulantur in utraq; litera: à mente, quia uoluit Galeno esse conformis: quod etiam in singularium morborum curatione obseruat.

Causæ uerò, cur materiæ turgentes debeant purgari, duæ recitantur à Galeno: Finis, ac Forma. Ex fine, ne decumbant in membro principali, & phlegmonem excitent, & ægrum occidant eo modo. Ex forma, quoniam motu suo adiuuant attractionē medicamenti, & ideo cum facilitate euacuantur. Quinq; illæ conditiones, quæ prohibent euacuari materiam turgentem, impediunt ratione huius secundæ conditionis, & non primæ. Et sic patet solutio primæ contradictionis.

Materia uerò quæ facit fluxum uentris non est turgens: patet, quia non habet tertiam conditionem: procedit enim ad membrum destinatum, imò ad concauitatem solum. Si uerò faciat solum rugitum in intestinis, tunc est turgens.

Materia quæ facit accessiones in tertiana & quartana interpolatis, non est turgens, quia non est in membro principali, nec in toto, & clarius, quia destinatur ad certum locū, qui est concauitas membri, & non membrum. Et si dicas, Ipsa tamen debet expurgari: dico, quod non. Sed bene debemus iuuare naturam illud facientem iuxta textum Hippocratis, 1. Aphor. 21. & ideo recte inquit Auenzoar 3. Theisir, tract. 2. cap. 2. in finē, quod uomitus talis est naturæ permittendus, uel leuiter adiuuandus per accidens: & si aliter feceris dicit, ut multi faciunt, dando decoctum raphani, & talia, pro maiori parte nocebis. Et hoc in crisi, quanto minus est in accessione faciendum? Possumus bene adiuuare naturam iuxta præceptum Galeni, dictum in libro, Quos & quando, dando aquam calidam puram, uel cum ordeo.

Materia uerò lateralis morbi dum fit est turgens pro parte, quæ nondum fluxit: & pro parte, quæ iam fluxit, turgens non est, quia certum iam possidet locum.

Materia uerò morbi attoniti hic non ingreditur: quia ratio turgentis & non turgentis consideratur à Galeno in febribus tantum, non in aliis morbis sine febre existentibus. Et ideo cum in aliis liceat purgare non turgente materia, turgente ferme cogimur. Sed de hoc nihil constituo, cum sit proluxa disputatio à nobis tractata in libro de Purgationibus. Causæ purgandi consequentes, nec principales in turgente materia duæ aliæ sunt à principalibus, à Galeno narratæ ibidè: nam toties repetere tedium parit. Prima est, molestia quam facit, unde inquietudo, & uigiliæ, & sæua alia symptomata. Secunda est, quoniam postmodum morbo magno existente non licet euacuare, uel phlegmone iam facto, uel solutis uiribus ægrotantis, uel incendio febris superaucto. Hæc indicant quòd ab initio sit educenda. Sed non sanguinis missione: nunquam enim eius meminit Galenus in turgente materia: & Hippocrates dixit, Medicari, non Euacuare. Ratio uerò huius clara est, quia turgens materia non obedit sanguinis missioni, imò est separata à sanguine, aliter non adeo uiolenter moueretur: & si moueretur, illico phlegmonem excitaret. Inuenitur tamen materia turgens sanguini iuncta.

Materia uerò pestilentialis febris, an sit turgens, nunc uidendum: nam & pestilentia datur sine febre 3. par. super 3. epidem. Com. 58. & in textu 61. inquit enim Galenus: Inuadentis etiam sine febre pestis. uerum de hoc in secundo libro agemus. Cum uerò dixisset in textu 47. Erant etiam aliæ febres, de quibus iam acturus sum: subiicit in 51. textu, & tribus sequentibus, hæc uerba: Carbunculi æstate multi & alia quæ putredo uocantur. Papulæ quoq; magnæ, & aliis serpentina ulcera. Quæ etiam ad uentrem attinebant multa multis incommoda attulerunt. primum tenesmi cum dolore. Hæc quis non uidet signa omnia comprehendere furentis materiæ? cumq; dixisset Hippoc. 57. textu, Purgationes multos offenderunt: respondit Galenus, quoniam illas proculdubio ut turgenti materiæ conuenire uidebat, nam nihil contulisse ita affectis remedia, & si ille non dixisset palam est: Si quidem cum multi morerentur, nullius erant usus omnibus illis auxilia. Causa uerò huius erat, quia aliqua ex his quinq; conditionibus prohibebat maximè quod dicebat Princeps prima quarti tract. 4. cap. 2. enarrans signa pestilentialis febris: Et tenditur quod est sub hypochondriis. Sed & esse quasdam febres pestilentes in quibus materia non turget, per hæc uerba in eodem libro Epidemiorum, quorum initium est à textu 35. declaratur. Febrium ardentium, quæ uigebant, hæc erat natura: initio sopore erant oppressi, inhorrescebant, fastidiosi: febris non acuta, nec magnopere sitibundi erant, nec delirantes: nares autem pauca stillabant, & accessiones diebus paribus aduentabant: obliuioq; sub eis, & langor, & uocis defectus: extremi pedes & manus his frigidiores erant, & multo magis
circa

circa accessiones: quibus calor pendetentim nec probè redibat, redibantq;
 ad mentem ac loquebantur: detinebatur uerò perpetuo sopore, non som-
 no, aut uigiis laboriosis: alius his plerisq; turbata, atq; his excrementa
 cruda, multa, & tenuia: urinæ multæ, tenues, nec decretorii quicquam, uel
 boni: nec uerò decretorii quicquam erat deprehendere: non sanguinis pro-
 fluium, non abscessus. moriebantur autem incerto ordine, plerunq; ta-
 men circa iudicia: quidam tardius, qui largius sudassent: in his nullum
 turgentis materiæ signum, nisi alius turbata: sed cum demitteret, non iam
 turgentis materiæ signum erat, sed naturæ conantis frustra se exonerare.
 Eadem est Principis sententia cum in prima 4. cap. 2. nullius signi turgen-
 tis materiæ meminerit in pestilenti febre. deinde in 3. quarti tract. 1. cap. 1.
 & 17. meminerit Altoin, tanquam phlegmonis in glandosis carnibus per-
 niciosi, consequentis febres pestilenciales. Et eadem ratione collocauit ua-
 riolas & morbillos in tract. 4. primæ Fen, non solum quod essent conta-
 giosæ, sed etiam quia ex turgente materia fierent. Nam ut ad totum fe-
 brium genus habita comparatione pauca turgent, ut inquit Hippocrates:
 sic ad pestilentium solum maxima pars turget: quia in reliquis speciebus
 febrium rarissima turgens materia contingit. Eadem fermè est sententia
 Galeni 5. Artis curatiuæ, cap. 12. ubi grauis pestilentia bis meminit: at cla-
 rissimè paucis uerbis hæc ambo genera cōplexus est, cum dixit in primo
 cap. libri de Cibis boni & mali succi. At quibus ex his quæ antè diximus
 phlegmonibus atq; ulceribus in cute nihil accidit, omnes aliquo ex extis
 euidenti phlegmone correpto, uel uehemēti ac praua febre interiire. Itaq;
 quæcūq; phlegmones ab initio excitant febres, ac uagantur, & interimunt,
 pestilentes sunt à turgente materia. Quæ uerò non excitant ab initio,
 neq; intus nec foris phlegmonem, occidunt tamē & uagantur, pestilentes
 sunt: sed non à turgente materia. Diximus autem, hæc duo inesse pestife-
 ræ febri, ut uagetur, & occidat, ex primo Epid. 1. & 1. Regim. acut. Com.
 9. Singulares enim morbi & si occidant *σπράγδες*, si uagentur Epidemii
 dicuntur ex his solum pestilentes qui occidunt, quod & aliàs diximus. At
 contagiosos esse fermè ignorauerunt antiqui. neq; enim Hippocrates &
 Galenus eos curassent accedētes ad illos: nec etiam Auicenna huius con-
 tagionis meminit, neq; in 1. cap. primæ 4. in tract. 4. ubi agit de causis: nec
 in 5. ubi loquitur de cura & præseruatione. Sed neq; Celsus lib. 3. cap. 7.
 huius custodiæ meminit. Rebantur inquam antiqui, ex aeris, uel aquæ
 solum corruptione aduenire quo in errore etiam nunc Turcæ sunt, atq;
 Afri. cum tamen manifesto experimento nunc constet omnibus Italis, cu-
 stodiam à congressu laborantium eo morbo, esse tutissimum auxilium:
 uixq; unum uel duos, qui sibi ab his præcaueant, uel etiam in sæuissimis
 pestilentiis contingat mori. Igitur reclamant etiam nunc isti Galenistæ,
 qui

qui se putant Galenicos ac optimos medicos, quod sciant dicere, Galenus, me addidisse febri pestilenti differentiam quandā, quod cōtagiosa sit: cū ille adeo solers in nullius momenti rebus, adeoq; nugax, hoc tanti ponderis non animaduertit: qua ignorantia etiā peremit optimū Cæsare Antoninū, nam ille peste obiit, de Philosopho loquor. Nec maior in suiipius custodia prudentia, nam & ipse non præcauens correptus est peste, ex qua ad extremū usq; uitæ periculum laborauit: libro de libris propriis, cap. 3. Sic poterat egregius iste noster Galenus seruare imperatorē, de se suo testimonio benemerentem, magnamq; Romani populi partē, deniq; etiam seipsum à periculo uindicare. Certū enim est, ambitiosos istos uiros, dum inani gloriæ & cōtentionibus student, talia admittere, quibus humanum genus etiam suæ fidei cōmissum perdant. Permite illos de minimis nugari, ut uideantur ualde sapiētes, maxima uerò quæq; præterire, nihilque recti sapere. Nam si hæc atq; alia plura, quæ nostris sunt sparsa libris, intoleraunda, principes medicorū perpetrarunt, quid existimas lector, quisquis es, has nostri tēporis personatas umbras efficere? Non ne ille strenuē egit, ac admodū diligenter? qui 16. Aētii libros ad tetrabiblus redegit? ò solertiam admirabilem quod inscriptionem *παραβιβλος* non prætermisit. deinde de cādore animi disputat, laboresq; Montani subripit. Dii boni adeo homines nostri æui odistis perniciose, ut etiā illustres animas, ac eruditorum uirorum mentes, huc cæcitatibus agatis, ut ob ambitionem uel auaritiā sui oblitri, maximas prætereant, nugisq; ut eruditi uideantur indulgeāt: artem tractantes, in qua salus hominum, ac etiam regnorum, constituta est. Nanq; ut uno exemplo utar, Bertholdus Estēsis lapide iectus, mortuus est inscitia medici, post aliquot dies, cū Venetorum exercitus dux esset. huius morte amissa Peloponnesus, nō expugnata Corinthus, Pannonia à Turcis capta: tunc Turcarum Princeps Germaniæ summis imminet uiribus. Ergo nostri inclyti uiri nugis sic incumbunt, Galenūq; tanquam Deum adorant: cū rebus ipsis, ipsi rationi studere deberent. Ego Hippocrati, Aristoteli, Galeno, Auicennæq; nihil tribuō, nisi quia illos rationibus ualidis inniti uideo. Aristoteles quidem fermē semper, etiam si obiter rem tractet: Hippocrates etiam sensus testimonium certissimum attulit. Galenus cū ex composito rem aggreditur, uir est accerrimi ingenii, atq; firmissimi iudicii: cū obiter, nemo periculosior. & qui se Galenicos profitentur, etiam sicarios fateantur necesse est: nanq; uix adeo quisquā erit oculatus, ut nisi præscriptam habeat à Galenō forte fortuna totius negotii ex sentētia seriem: in illius incidens obiter placita, quæ tum plerūq; benē ac etiam optimē dicta sint, sed Delio quopiam natatore indigeant, ut non quenque sibi obuiam curando perimat. Neq; ob quempiam magis, quàm ob Galenum, hi nostri libri necessarij sunt: quamuis & in his

M per

perlegendis opus sit non dormitante animo: nam quod ad Auicennam attinet, ut minus diligens, sic omnia ex sententia, nihil obiter tractauit: uerum cum Galeni falsa haberet scripta, & uera etiam suspecta, anxie & ambigüe omnia docuit, ut nihilo plus cum legeris scias, quam antequam legere coeperis. Ingenio autem proprio fidere non est ausus, nam & id feliciter successisset & fecisset, quia dissectionis, & pulsuum rationes non habebantur. Scripta uero Hippocratis maiore etiam quam Galeni ambiguitate laborabant. Si hæc non obfuisent, certum erat Principi totam ex seipso tractationem medicinæ tradere. Sed modò à Galeno dissidere timens, modò à ueritate ac ratione, nec huic nec illi satisfecit. Diximus uero Orbasium, Aëtium, & Paulum solos esse recitatores, Philosophiæ omnino principiis carentes. Verum dices forsân Galenum primo de Februum differentiis cap. 4. ostendisse se pestilentem morbum quod contagiosus esset, cognoscere. Sed qualem contagiosum existimauit ut scabiem, lepram, opthalmiam? qui morbi non solo congressu, non uestis contactu, non fellæ contagio adhærent. At pestis hæret undique, solo afflatu etiam super tabulam homines enecat. Hocine sic est agnouisse pestem? Sed de hoc satis: scripsimus enim alibi copiose de peste. Febris tamen ipsa pestilens, non secus ac aliæ, curantur rectè ac perfectè ab initio: cuius rei per decennium totum integrum Mediolani exemplum dedimus: cum nemo ex his, aut alijs, febre tanquam principaliore morbo laborantibus perierit, adeò exacta ad libellam horum, & quæ illic scripta sunt, omnium obseruatione: quod & alias scripsisse nos meminimus, ut hortaremur eos, qui non omnino sunt perditio animo, ut tandem se homines esse agnoscerent, exemploq; nostro ducerentur: quod uel ex publica, quæ solet mortuis omnibus à medicis fide exhiberi, satis adhuc quisq; perspicere potest. Sed iam ad rem ipsam redeamus, docentes prius, duas esse apud Galenum præparationes: alteram ægri, qua omnes indigent, humores: alteram humoris, qua solum crassi. Cum materia turgens euacuari debet, tota euacuanda est quæ turget: maiusq; est periculum si infra subsistas, quam si ulterius progrediaris: nam si euacuari debet, licet nec adest impedimentum. Vbi uero impedimentum non est, si quid reliqueris, in eodem phlegmonis periculo uersaris, & corpus iam totum frustra agitaſti. nec periculum uirtutis est uel febris causa, cum ab initio ferme omnia integra sint. Galeni dictum 2. Aphor. 29. ad sanguinis missionem solum, materiamque non turgentem manifestè referri debet. Auicennæ uero sententia est de his, quibus iam concocta materia morbus processit: & ob id inualida iam animalis uirtus. Sed tamen neque in hoc, ut in præcedente diximus Contradiotione, uera est illa sententia: imo in paulò uberiore purgatione nullum uitæ periculum, cum materia concocta

ita fuerit : in leui maximum . quamuis non euident sed serò exitus appareat. Docuimus enim, quòd materia concocta quanto diutius manserit in corpore, eo magis deterior efficitur, uicinamq; corrumpit.

C O N T R A D I C T I O X V I .

An in morbis à principio medicari conueniat.

Concocta medicari, atque mouere non cruda, neque in principiis, modò non turgeant, plurima uerò non turgent. 1. Aphor. 22. & in libro de Humoribus. Sed in oppositum est primò Rasis 16. Con. cap. 2. fol. 339. adducitque quatuor rationes: Prima est, Galenus timet expurgationem in febribus (nam, ut diximus in 14. Contradietione, in aliis debemus illico purgare) propter caliditatem medicamenti: sed datur medicamentum frigidum, ut mirabolani: & etiam medicina calida refrigerat educta materia calida. Secundā: Nunquam licebit purgare: non in principio, ex hoc Aphor. non in augmento nec statu, ex 29. Particulæ 2. non in declinatione, ex 20. primæ particulæ. Tertia: Licet sanguinẽ mittere, igitur & purgare. Respondet pro Galeno, quòd sanguis est concoctus semper. Contrā igitur & bilis, ac atra bilis, quæ in illo sunt. Respondet pro Galeno quòd flaua nimis calida, atra nimis est frigida. contrā igitur in fine morbi æqualibus humoribus conueniet uenæ sectio. Quarta: Vbi rationes pugnant, standum est experimento: sed non facta purgatione ab initio in icteritia stante multa crassa materia. nam de hac est sermo, plerumq; succedit hydrops, facta autem nec febris nec urinæ fiunt deteriores: igitur æger purgandus est. Subiūgit denique sic superfluous uidebitur medicus ut ex secunda ratione patet. O' uiuam rationem, & uirum moribus huius temporis dignum! occidemus homines nostræ etiam fidei commissos, & scientes, ut aliquid facere uideamur. De subtilibus etiam habuimus auctoritatem 4. de Tuenda sanitate cap. 4. & Aëtius lib. 3. cap. 23. Est etiam auctoritas Galeni 1. ad Glauconem 9. est etiam purgatio bilis per inferna utilis: loquitur de cura tertianæ. nec potest dici quòd loquatur de materia concocta: nam subiungit: Et si tibi coctionis monstrantur signa. Hippocrates etiam 4. Regim. acut. 29. dabat libras usque ad sexdecim lactis afinini cocti ut uentrem liberaliter soluat. & 2. eiusdem 11. elleborum in ambobus per morborum initia. prima quoque 3. trac. 1. cap. 29. ubi timemus ebullitionem ex humoribus, si expectemus concoctionem, ut à calore fusa & aucta faciat dolorem, tunc ab euacuatione incipiemus, & reliquum concoquemus. in 4. etiam de Tuenda sanitate, cap. 5. iuxta finem, & 7. iuxta initium, Vbi sanguinem mittere non licet, purgatione largiore illius loco utendum. Quòd perperam quidam existimarunt

M 2 etiam

etiam dictum 8. Methodi. 4. & 11. eiusdem cap. 10. sed ibi ubiq; uenæ sectionem intelligit. In uulneribus etiam, & cacochimia, & alopecia, & capitis doloribus ut in 1. de Medic. secundum locos, cap. 2. & in 2. lib. etiā licet purgare absq; cōcoctione. Auicenna etiā purgabat, prima quarti trac. 4. cap. 4. per initia febris pestilēntialis dicēs: Et cura eius est exiccatio: & hæc fit cum phlebotomia et pharmacia. Nec potest dici, quòd materia turgeat, hoc enim est declaratum in præcedēte cōtradictione. Est etiā difficultas, quia nisi purgemus ab initio, nihil purgādū relinquetur: nam omne quod superest ab accessionibus diffatur in illis, 2. de Differentiis febr. cap. 5. in princ. tamen in cap. 16. sed nō in omnibus febrium generibus hoc accidit: nam ut ibi dicebatur: crassa & lenta materia non tota discutitur, sed quod superest in crisi expellitur. Circa quod sciendū est, quòd cū putrescit humor tria facit naturā: circūiacentes & incipientes, in mēbrorū traducit nutritionem: putrescentes autem subtiliores in halitus digerit, ut sic non sint impedimento: in eo uerò quod & putrescit, & crassum est, operatur formam puri similem inducendo, ne possit à calore externo ex toto corrumpi. In calida igitur materia interpolatarum febrium, uel etiam sicca, ut in quartana, quāuis non relinquatur puri quicquā simile, relinquitur tamen aliquid cineri simile, quod per crism sponte, uel de fide natura per medicamentū expellitur. Natura etiā soluit morbum non existēte hypostasi in urina, 1. de Crisi 12. post medium: mouet etiā materiā in initio morbi, ut 1. Aphor. 2. salubri fine, & ut experimur quotidie in uentris fluxibus. Primo etiam de Crisi 8. crism solum in initio morbi semper malam esse ait, igitur in augmento etiā salubriter potest natura decernere: ergo non decernente medicus purgabit. Hæc ratio est pro medicis nostrorum temporum, nec ulla alia. Sunt etiā tres Principis autoritates aliæ: Prima erat, prima 4. cap. de cura febris ex pituita, ubi inquit: Ego non diligo expectationem concoctionis, sed oportet ut primo euacuetur aliquid, deinde expectetur. Vnde patet, quòd ille qui addidit, NISI, ut legatur: Et ego nō diligo, nisi expectationem concoctionis: non satisfecit posterioribus uerbis, nec sententiæ Principis. Ex quo elicitur etiam ratio nostra in pituita, iuuat febrem accendere iuxta illud 4. Aphor. 57. Qui à conuulsione aut distentione neruorum tenentur, febre superueniente liberātur, & 6. Aphorism. 51. cessat igitur ratio Galeni quòd medicamentum excalefaciat. Secunda autoritas habetur 4. primi cap. 3. iuxta medium, cū dixit: Et similiter cū non fuerimus securi, quòd uirtus usque ad horam concoctionis perduret, euacuabimus eam: postquam nobis cauerimus, ut subtilis incrassetur, & crassa subtilietur. Nec ualet quòd dicas, antea illum dixisse, In subtili, nisi sit mobilis, expectandam esse coctionem: & quæ in uno est membro prorsus non mouendam. Nam manifestè illud dicit, ubi spes

spes est uirtutem suffecturam usque ad statum morbi: hoc uerò ubi timemus: uult tamen in omni casu præparationem præcedere. Tertia autoritas est 1. 4. tract. 2. cap. 36. de cura tertianæ nothæ. Et de solutiuis in principiis eius quæ sunt propinquiora æqualitati, est aqua Galeniabin decocti, & syrupus acetosus. Et fortassis ponemus in ea casiam fistulam: & ualidius hoc est, ut ponas in ea uirtutem turpethi. Auerroës quoque & ipse adducit (7. Collectaneorum cap. 9. ubi hanc mouet dubitationem) duas rationes in materia subtili: Prima est illa, Facilius euacuatur, quàm si incrassetur. Et reprobatur ex experimento: & est autoritas Galeni in de Purgantium medic. facultate, post medium, ibi: Quæcunq; igitur nigram bilem purgant, liquidiora prius ac tenuiora ex illa trahunt: inde crassiora: igitur subtiles humores non debent concoqui. Item in illis febribus materia multa est iuxta os uentriculi, quæ nimium offendit, igitur (dicit) sanguis mittendus: multo magis medicamento subducenda erit. De crassa nos olim multa adnotauimus in margine dum XXI. ageremus annum, sed non potuimus totum emendare: ideo sic iacet impressus, cum imperfectis nostris castigationibus: etiam suppresso (ut alias diximus) nostro nomine. Est igitur ratio, materia pituitosa paulatim potest concoqui & tutius, & ut concocta est expurgari debet. Et dat exemplum de onere, quod melius fertur in pluribus uicibus per partes diuisum, quàm totum in una: additq; quod dictum Gal. de expectatione, intelligitur in securis morbis. & quòd cum Galenus 1. ad Glauconem 11. paulatim concoquat, & expurget materiam in quartana: quanto magis in febre ex pituita, quæ minime uacat periculo etiam magno, id erit faciendum. Sed Auicenna prima quarti tract. 2. cap. 7. contra rationem primam Auerrois inuehitur, cum dixit: Humoris autem cholerici digestio est, ut conuersus à subtilitate fiat spissus: & aqua quidem frigida facit illud. Et pro hoc adducit tres rationes: Prima est: Concoctio fit per substantiæ ad mediocrem consistentiam deductionem, sed bilis ipsa iusto tenuior est, igitur incrassari debet. Assumpta propositio habetur primo de simpli. medic. cap. 24. Quod plane tenue est, id medicamenti facultatem effugit, ac etiam in parte ipsa figitur. & 4. de Locis cap. 9. Bifariam cōtingit quòd aliquis multum tussiendo pauca expuat: aliis ob crassum & lentum, aliis ob tenuem humorem. siquidem tenuis, cum subleuatus est à spiritu, diuisus refluit. Idem habetur 2. de Crisi 10. & 3. de Ratione uictus, in principio. & 1. Epidem. par. prima Commen. 25. Altera ratio est dicta de urina, quæ initio caret sedimento in tenui materia, inde acquirit illud, igitur concoquitur. Tertia: Si materia subtilis cocta esset, natura in principio posset crism recte perficere. tandem præcinit præana dicens (quamuis & ad Rasim uerba hæc torque-

ri possint, qui cum Auerroë in hoc consentit) Forſitan quòd uir iſte non uidit hoc ab antiquis, ideo ſufficiet illi quòd bene opinetur de Hippocrate & Galeno. Manardus quoq; rationes ſuas addit, quę ſunt quatuor: Prima: Si athletę boni habitus homines purgãdi ſunt, 1. A phor. 3. multo magis ægrotantes ob multitudinem. Confirmatur ratio, quia ſuperueniens athletę febris non debet auferre intentionem curatiuam. adducit etiam, ſe: x l. v l. i. annis ſic agendo felicem habuiſſe in medendo ſucceſſum. Secunda: Eadem in turgente quę ſunt pericula, in multa inueniuntur: ſed in turgente debemus, igitur debemus etiam in multa purgare. Confirmatur, quia facilius eſt reprimere turgentem quàm multam: item quia ſicut turgens occurrit medicamento, ſic multa ubiq; occurrit. Tertia: Quia Galenus 7. Artis cura, cap. 11. educit bilem in uentriculo exiſtente cum pira abſq; cõcoctione, igitur pari ratione & in aliis. Quarta: Quòd in 5. eiſdem cap. 12. docet expurgandam materiam in peſtilenti febre, quę tamen non turget: idem ut diximus 1. de Differentiis feb. cap. 4. Humida corpora exiccentur, plena euacuentur. Sed in 5. Artis cura. hoc non habetur expreſſe. Propter hoc aliqui dixerunt, multam materiam eſſe turgentem, ob multitudinem. Alii, ſubtilem omnem & calidam, quia moueri facile poteſt, ideo mobilem dici poſſe. Alii, quòd prohibet eradicantem purgationem. Accedit quarta, Auicennę & Auerrois expoſitio: quòd loquitur in his qui concoctionis tempus expectare poſſunt.

Contra primam interpretationem Gal. 12. Artis curat. cap. 3. & prima quarti in cap. de cura ſyncopalis humorosę non purgant, cùm tamen ſit periculum maximum etiam de ſuffocatione ob multitudinem: igitur multo minus in aliis. Contra ſecundam, ſequitur quòd in omni caſu debemus purgare: nam intelligendo materiam turgentem omnem quę moueri apta eſt, omnis materia erit turgens. Galenus etiam 1. de Criſi 9. exponens hunc locum inquit: Verbum fuerent de animalibus dici conſueuit proprię, quę ad coitum rapiuntur: tranſſatum autem eſt ad eas, quę properant, & celeriter mouentur ægri tudines, & præcipuę cum laborantis ſenſus ab inordinata humorum & ſpirituum agitatione irritatur: nam in his quiſpiam cum ratione tantum medicamento utetur: cum adiuuantem ſponte habeat ſuperabundantem humorem motum, ad faciliter attrahendum. Contra tertiam (quę fuit Gentilis & Iacobi, qui traxerunt uolentes medicos in errorem noſtri temporis) eſt litera Gal. in Commento 23. primę par. A phor. cum dixit: Hucusq; locutus eſt de qualitate, nunc uult loqui de quantitate, igitur ſic interpretando locutus eſſet de quantitate: quia docuiſſet non eſſe eradicatiuę (ut dici ſolet) euacuandum. Item in 2. A phor. 29. docet non turgente materia miſſionem ſanguinis,

nis, ut fortior euadat natura, non autem purgationem, nisi turgeat: igitur prohibet in non turgente minuentem purgationem. Auicenna quoque, ut dixi, non facit in febribus hoc, ut dicam etiam in quibus maxime conueniret, ut in hemitriteo: nam de latica soluemus inferius dubitationem. Item sequeretur, quod oportet concocta materia totam simul euacuare: hoc autem est falsum in apostematibus 6. Aphor. 27. & in quartana, ut dixi. Sequeretur etiam, quod præceptum esset absurdum: nam cruda materia educi tota non posset, quin prius homo ad syncopim perueniret. hoc autem iam docuerat in 3. Aphor. eiusdem particulæ. Item 4. Regim. acut. 38. dicit rationem purgandi sumendam esse ex Aphorismis. Sed hæc ratio sic sumpta est imperfecta, quia non docet quomodo minuendo debeamus euacuare. cumque eundem Aphorismum in tractatu, Quos & quando, recitet, illius præcepta sequens, patebit eum tractatum esse incompletum, cum de eradicatione, non minuite purgatione solum loquatur. Contra quartam expositionem: Materia si sit superior ad uirtutem computata malitia & multitudine ab initio, igitur & multo magis facta euacuatione, quia plus deperditur de uirtute & maius fit augmentum in febre & obstructionibus, quam euacuetur de materia: aliter natura recte operaretur expurgando materiam ab initio: quod tamen est falsum, ut dictum est 1. de Crisi 8. dicit enim: Deberet esse bonum, saltem ratione causæ, si non ratione signi: sed non est, neque etiam ratione causæ. & idem 4. Aphor. 22. Præterea regula illa esset nulla, quia eius opposita seruaret morituros, & in uicturis maius asferret iuuamentum, igitur regula Hippocratis falsa. Esset etiam facile sic interpretari omnes auctoritates, cum Galenus & Hippocrates totiens repetentes Aphorismum hunc, nunquam huius meminerint exceptionis. Eodem modo peccant dicentes, quod hoc est dictum solum ratione materiæ crudæ & coctæ, non autem uenenosæ, aut multæ, uel præfocantis. Sed hoc est falsum, cum excipiat materiam turgentem.

Ideo scire primo expedit: quod in materia expurganda tria considerantur, Qualitas, & hanc docuit in 2. Aphor. primæ par. Tempus, & hoc docuit in 22. eiusdem: & Quantitas, & hanc in 23.

Sciendum etiam est, quod ex materia crudaeducta sequuntur quinque incommoda: Primum est, Lucta & labor uirtutis, inde sæua symptomata, deliquia animi, nausea, uertigo, tormina, 2. Aphor. 9. Secundum est, Colliquatio membrorum, 4. Regim. acutorum 22. Tertium est, quod materia è loco mota, non amplius concoquetur. Quartum, quod accident obstructiones. Quintum, quod accendetur febris. Hæc patent ex locis adductis tum maxime ex 24. primæ part. Aphorismorum hæc tamen par-

tim

tim ad crudæ, partim ad non præparatæ materiæ educationem consequuntur.

Est uerò sciendum etiam quid intersit inter coctionem & digestionem: uel *συνόζωσις καὶ ἀνάλωσις*. Est igitur Concoctio, conuersio in substantiam, nutrire, uel expelli commodè aptam, cum à putredine uindicatur. Digestio autem euacuatio, quæ per poros fit corporis: ut 5. de Simpli. medi. cap. 9. post principium, ibi: Cum autem quicquàm coquere consilium est. & 12. Artis cur. cap. 2. At qui Arabum libros uerterunt, & Conciliator ac Trusianus, Gentilis, Iacobi ambo, & cæteri huius classis, per digestionem coctionem, & præparationem intelligunt.

Nec nos latere decet, quòd Princeps per minutionem materiæ, quandoq; intelligit lenientia, & lubricantiam: nam prima 4. tract. 2. cap. 7. cum dixit parum ante medium: Tunc oportet post illud, ut occuperis in digestionem, & euacuationem, quæ non est secundum semitam minorationis, & alleuiationis: & iam diximus eam: & iam dixerat sectionem uenæ, & uomitoria, & lenificationem solum, igitur per minutionem factam medicamento, intelligit eam quæ fit cum leniente, quod & confirmatur à Gal. 11. Artis curat. 9. in principio. Putredo minuenda est cum his, quæ aluum deiciunt, & urinam mouent: Qualia autem sint, declarat cum mulsâ & apomellinam 3. Regim. acutorum 12. dixerat Hippocrates, quòd mulsâ multa biliosa deiecit. Quare hoc firmum sit licere purgare lenientibus ex Hippocrate & Galeno, in morborum initiis, & quòd lenientia etiam putridos trahunt humores. Sed de his Aphorismus non intelligitur. Quod uerò elleborum suadeat 2. Regim. A cut. 11. tanquàm coctionem haud impediens, Galenus in plurimis refugit: quanquàm materiam fluentem adhuc, turgentem dicere possimus. Sed hoc tamen in comparatione ad peplium tantum dixit Hippocrates. Inconuenientia tamen quæ Galenus in fine Commentii refert, ad errorem operationis, non ad operationem ipsam referri debent. Et nisi Auicennæ sententiam ad hunc traxerimus sensum, manifestum est illum cum cæteris Arabibus in hoc consensisse: quòd multa existente, materia sit minuenda: cum timor affuerit, ne non possit ad status tempus æger peruenire. Inquit enim illico post iam adducta uerba: Et non euacues materiam in calido, nec frigido, nisi propter necessitatem. Manifestum est, non de turgente illum loqui, cum postmodum declaret. Item, quia frigida turgens esse non potest. Causa erroris Arabum fuit ratio soluta iam à nobis. Et quanquàm sic senserit in de pestilentiali febre nobiscum non dissentit: nam non ratione materiæ peccantis, sed præseruandi purgat: nec enim nos alterius rei causâ prohibemus medicamentum, sed cum naturam peccantem uelis expurgare. Vt igitur breui

breuibus rem absoluam: Febre non assistente coctio non est necessaria, sed sola præparatio: & ideo etiam in interpolatis, quia dies uacuus est à febre, licet materiam subtilem educere, ut in tertiana: si tamèn non educas, melius erit. In materia crassa coctio est expectanda. Lenitiuo educere licet: imò illud est fluxum corpus reddens: hoc educere potest materiam etiam morbi, sed in uia existentem. Ideo nullum est ex commemoratis periculum, naturæ enim est opus. In pestilentia, & uulneribus, ac contusionibus, indigemus exiccantibus purgatoriis: ut catapotiis ex aloë, croco, & myrrha, cum aceto exhibitis: ratione materiæ peccantis nequaquam. Illud etiã interest inter medici, & naturæ opus, quod illa multa agit utiliter, quæ medicus nescire cogitur: ut si in fine augmenti materiam expellat, cum medicus statum debeat expectare: nam natura scit se separasse, medicus hoc tunc scire non potest.

Auer. 7. Collectaneorum cap. 9. addit unum detrimentum crudam materiam expurgantium, quod bonam materiam malæ permiscet. Celsus lib. 3. cap. 4. censet ut mollientibus uti possit per initia febris: purgantibus nequaquam, nisi rarè admodum, turgentem materiam insinuans. Stante igitur cruditate uomitus est ciendus, si sit in uentriculo: uel clystere educi debet, si in intestinis. Eduit autem etiam ex mesenterio & hepatis cauo 12. Methodi, & 2. de Compositione medic. secundum locos: in reliquis quiescendum, si alius lenis sponte sit.

Sed cum materia in non febricitante facta præparatione, nunquam indigeat coctione, in febricitate nisi turgat, semper indigeat & præparatione simul & coctione: causa huius differentię declaranda est. Igitur ubi nõ est febris, nec putredo, ibi non est calor præter naturam: nam 4. Meteororum, passiuæ qualitates semper ab actiuis gubernantur. Si igitur à frigore, fit congelatio: si à calore, uel natiuo, & sic animata nutriuntur, inanimata conseruantur: uel externo, & sic putrescunt: uel ab utroq; simul natiuo & externo gubernentur humidum & siccum, & fit suppuratio. In omni igitur uiuente cum sit putredo, semper succedit suppuratio: sed si calor naturalis fortissimus sit, suppuratio euadit perfectissima, & putredo ac calor præternaturalis ex toto finitur. ideo ibi non est foetor nec color, nec substantia mala, nec dolor, sed pruritus quidam solum. Si uerò calor natiuus debilis fuerit eo putredo magis uincit & suppuratio minus, quo magis innatus calor debilis extiterit. Semper attamen, etiam in moriente, agit calor naturalis actionem suam, quæ est suppuratio: sed tantam, quanta est eius magnitudo. unde ubi dolor maximus, odor teterrimus, color uiridis uel niger, substantia inæqualis, & subtilis, ac fluxa, ibi minimum est de operatione caloris naturalis, nec præternaturalis in eo saniei genere finitur, sed manet adhuc. Et idem est iudicium de materia febris, quod

N est

est de materia puris ad unguem : nam & ibi duo calores , & reliqua ut prius. Sed in exteriori phlegmone non eadem ratio quæ in interno , aut febre : nam phlegmon exterius si incidatur ante finitionem caloris præternaturalis, id est ante perfectam suppurationem , aëre ingrediente , non potest amplius finiri coctio à naturali calore : igitur calor præternaturalis manebit : igitur necessario conuertetur in sinum, seu fistulam ; quia sanies illa nunquam finiri potest. Alia autem detrimenta , quæ sequuntur ad talem sectionem ut uehementia doloris , & fluxus materiæ , in sectione immaturi phlegmonis, licet sint magna , eueniunt tamen per accidens , & non per se , nec semper. In febre igitur si materia nondum cocta sit, adhuc manet calor putridus , & ideo natura non dominatur illi materiæ , quia calor putridus & ipse dominatur : nec est finitus , quare educeres omnino nihil de materia peccante : nam calor putridus tuetur à natura rerum uniuersali. medicamentum igitur loco eius trahet bonos humores, & uexabit naturam. Et hæc est ratio dicti Hippocratis superius adducti 4. Regim. acutorum 22. In duobus tamen casibus educit : primò , ubi materia turget, & hoc quia calor præternaturalis iam diligit ipse motum ; & ideo manifestum est quòd oportet solui educere materiam quæ acta est in motu, non quæ potest moueri, aut quæ iam refedit. Oportet etiam medicamentum esse ualidissimum , quia totum periculum est, ne non trahat, uel non totam. Et si dicas, quòd 2. Regim. acut. 11. in fine commenti, Galenus refugit nimis ualidum : Dico, quòd iure ibi , quia relinquitur phlegmon iam factum, post euacuationem : quòd coctione indiget , & multa uirtute etiam ad expurgandum : & ideo talis expurgatio est ualde periculosa, ex utroque latere , seu nimis ualida sit, seu debilis . & Galenus ob id iure merito quasi dissuadet eam. Secundus casus est , ubi materia sit in intestinis, trahitur enim per consequentiam secum, & aliorum humorum, qui sunt in dominio caloris naturalis. & ideo melius operatur lenitium in hoc casu, quàm purgans medicamentum : quia illa materia non descendit , quia obediat medicamento , sed quia ruit , ratione grauitatis fecum, & bonorum humorum. Et ideo per ualidissimum medicamentum possibile est ut cum maxima quantitate optimorum succorum exigua portio etiam putrescentis materiæ descendat. Et quòd hoc sit uerum , patet : si enim in phlegmone non suppurato materia mala non obedit gladio, & manibus ; cum inciditur : quanto minus materia mala, possessa à calore externo in febribus , obediat medicamento ? Ex hoc patet igitur uera ratio , & quasi necessaria curationis fistularum , qua omnes sinus curari poterunt , per tres intentiones , ut nullus sit insanabilis. Patet etiam quòd febre non existente omnis humor medicamento obedit , facta præparatione : quia est in potestate solius caloris innati.

His

His uisis, declarabo primò quædam ad hoc pertinentia, postmodum soluam argumenta contra Hippocratis sententiam adducta. Est igitur primò sciendum, quòd pituita à crudo humore differt: quia humor crudus est crassior, & minus lentus, frigidus, humidus: at fluxilis pituita, ut 4. & 6. de Tuenda sanitate, & 1. de Alimentis, & libro de Plenitudine, & 10. de Medicamen. secundum locos, colligitur. Si igitur uenter contineat humores crudos, aut bilem, aut putrescentem humorē, uomitus pro-ritandus, 4. de Tuenda sanitate, & 2. de Medic. secundū locos, in De cura doloris capitis ex ebrietate, A pollinarii autoritate. & Aëtius lib. 4. cap. 51. & Paulus lib. 1. cap. 32. non enim tutum est concoctionem expectare: nam uel corrumpentur magis, ac superingestos cibos uitiant, uel etiam si ex uoto succedat res, concocti nimium uenas replebunt. Dolores etiam capi-tis poterunt excitare, libro de Remediis paratu facilibus. Eadem ratio in nidorosa uel acida eructatione, ut 8. Artis curatiuæ, si tamen uitium na-turale non sit. Porro in his omnibus ut uomitus communis est, sic prouo-candi ratio, omnino singulis diuersa est. Cum medicamento uerò ne ten-taueris: & similiter si humores sint ultra hepar crudi, quamuis febris non adfit, medicamento non sunt educendi. obstruent enim ut 4. de Tuenda sanitate.

De turgentibus humoribus considerandum est: non enim semper eua-cuationi parcendum, cum crudi humores affuerint. nam uix in principio febrium deesse possunt crudi humores. Educendus igitur est turgens hu-mor, præparatis humoribus crudis prius, si in uia affuerint 1. Aphor. 24. si tamen uel ingens periculum uexet, uel in uis ipsis crudus humor non af-fuerit, quod ex uictu præcedente, tum hypochondriorum habitu licet coniectari, eadem die purgandus: ut 4. Aphor. 10. Maius enim est in mora, quàm in frustratione periculum.

Ad argumenta Auicennæ, cum nos tueamur opinione eius (siquidem quod subtilem materiam cum putrescit, non debemus, quia nō possumus, euacuare ante coctionem: in non putrescente autem sufficit sola præpara-tio, ut in aqua asclitis & erysipelate) respondere non debemus nisi ad ter-tiam autoritatem, in qua illud est diligenter animaduertendum, quòd cum in continuis concoctio semper expectanda sit febribus: in febre ca-rentibus morbis nulla sit concoctio expectanda, utpote quæ prorsus nul-la sit, intermittentes medium locum possident: quod in diebus quibus æger non laborat febre eoq; magis si longa sit intermissio materias non febri proprias purgamus. Admonemus itaq; errorem eius esse grauem, quòd existimet frigidam aquam, non concocta materia, ut concoquat ex-hibendā esse. hoc enim falsum est, ut 1. de Regim. uictus acutorum iuxta

finem.& à Paulo libro 2.cap.29.

Causa uerò cur natura in initiis accessionum humores tenues prius pellat,3. Prorrhiticorum 58.cùm non dominetur materiæ putridæ:Respon-
deo,quòd motus ille fit per uillos, & hoc modo materia mala obedit per
accidens si non sit lenta, ut etiam in lenitiuo dixi. Ex hoc non sequi-
tur, quòd idem possit fieri medicamento, cùm attractio eius sit à pro-
prietate.


Ad argumenta Rasis patuit uera causa, cur non purgandum, & præ-
cipua, quia non possumus:& sic patet ad primum. Ad secundum: Licet
ubi febris non est, ubi turgēt materia, ubi iam concocta est, si natura non
plene totam eduxerit.2. Aphor. 12. Ad tertium, Agit prauum se Galeni
custodem, quandoquidem liceat ab initio dicere, quòd sanguinis missio
partem materiæ peccantis educere potest: quia sectio uenæ euacuat non
à proprietate, sed grauitatis ratione. Ad quartum: Ipse cum Manardo nil
aliud faciunt, quàm quòd multos se occidisse homines fatentur: non ani-
maduertentes, se deceptos ex successu eorum qui febre non laborabant.
Exemplum eius de icteritia non est ad propositum, cùm ibi non adsit fe-
bris:ideo purgandum, cum nulla possit coctio succedere alia:ideo præter-
missa purgatione ab initio par est hydropem aduenire.


Ad rationem nostram, si modo febris etiam proficit, solis calefacienti-
bus erit excitanda: non tanto incommodo quale per medicamentum ac-
cerfitur procuranda: etsi Aphorismi etiam illi non de medici operatio-
ne loquantur, sed naturæ: quare nec in pituitosa febre purgatio con-
uenit.


Auerrois disputatio, & Auicennæ, an paulatim concoquendum, &
paulatim euacuandum, in libro de Purgationibus, longam quia seriem
expostulabat, tractata est.

Ad rationes Manardi, ac alias, plenè satisfactum est: præterquàm ad se-
cundam, ad quam dicimus, athletam illum aliquando debere purgari
etiam febrientem: non ut educatur materia febris, quæ educi non potest:
sed ut educatur materia non uitiosa, sola peccans multitudine.

Ex hoc tandem manifestum est, minuentem purgationem, in nullo
casu, & nunquàm competere. Nam ab initio non turgente materia nulla
competit: in fine eradicatiua. turgente uerò in fine nulla eius merito, post-
quam in principio eradicatiua opus fuit. Et hoc in febribus.







H548
C266C
1-SIZE
V.1

